

梁·

唐 姚思廉 撰

華 書

中

局

卷 第 一

一七至卷四〇(傳) 册

梁書卷十七

列傳第十一

王珍國 馬仙琕 張齊

郡太守。 財, 賊,境內肅清。 珍國者少矣。」復出爲安成內史。入爲越騎校尉,冠軍長史、鍾離太守。 眞可謂良二千石也。」還爲大司馬中兵參軍。 以拯窮乏。 王珍國字德重,沛國相人也。 珍國起家冠軍行參軍,累遷虎賁中郎將、南譙太守,治有能名。 還爲游擊將軍,以父憂去職 齊高帝手敕云:「卿愛人治國,甚副吾意也。」永明初,遷桂陽內史, 罷任還都,路經江州,刺史柳世隆臨渚餞別,見珍國還裝輕素,乃歎曰:「此 父廣之,齊世良將,官至散騎常侍、車騎將軍。 武帝雅相知賞,每歎曰:「晚代將家子弟,有 時郡境苦饑,乃發米散 仍遷巴東、建平二 討捕

如

盜

建武末, 列 傅 魏軍 + 圍司州, 王 珍 國 明帝使徐州刺史裴叔業攻拔渦陽, 以爲聲援,起珍國爲輔國將

如

故。

元 軍 ·, 率 兵助焉 會稽 太守 魏 王敬 將楊大眼大衆奄至,叔業懼 則 反 珍國 又率衆距之。 , 敬則 棄軍 平, 走, 遷 珍 寧朔 國 率其衆殿,故不 將 軍、 青冀 州 至 刺 大 史, 敗。 將 永 軍 泰

侍宴. 侍 將 引 先 師 中 所 書 稷 發 軍 敗 如 舍 故 ,侍 於 復 力, 力 義 帝 加 賜 人 衞 師 入城。 給 問 中、衞 金帛 尉府 裴 起,東昏召珍國以衆還京師,入頓建康城。 事 日 長 中 穆等奉東昏首 ,勒兵入自雲龍門, 尉張稷都督衆軍 珍 遷 卿明 仍密 國 左 這都暴 鏡 叉 衛將軍 尙 固 存 譲 奉明 歸高 , 敕答 加散騎常侍。 ٠, 鏡獻 珍 卽 祖 何在。」珍 日 國 東昏 一一一昔田 誠 潛 以 於高 結 功 於 稷 國 授 内 天監初: 祖 子 腹 答 .殿 右 泰 , 心 衞 斬 日 高 固 張齊 之,與 將 祖 辭 , 丁黄 封躡陽 軍 義 斷 絹 要稷, 師 金謹 金以 穀。 稷 辭 至,使珍國 會 不 縣侯,邑千戶。 在 報之。 卿體 尚 稷 拜 臣 書 許 ٠, 肘, 叉授 [僕射 之。 國 時 情深 出 不 城 王亮等 屯 徐 敢 中 朱雀 , 良 州 失墜 咸 除都官尚 月 刺 在 思 於 史, 丙 門,爲王 可 從義 西鍾 寅 復 嘉 固 且 [七留 爲 書 下 _ 後 莫 茂 珍國 右 一,常 敢 京 使 衞 因

梁秦二 少 不 五. 苦 州諸軍事、征虜將軍、 年 其 魏 多 ட் 任 城王 高 祖 元 壯 澄 其言 寇 鍾 離 南秦梁二州刺 乃 7, (1) 假 節 高 與 祖 衆 遭 史。 珍 軍 國 口 會梁州長史夏侯道遷以州降魏,珍國 討 因 焉 問 討 魏 賊 軍 方 退 略。 7 班 珍國 師 對曰:「臣 出 爲 使 持 常 節 患魏 步道 都 衆

丹陽 林, 寡克 至前 前。 出 射 魏 都督 便復 鉤 仙 仙 興,將 衆 將 徵還爲員外散騎常侍、太子右 義 馬 斬 小 琕 仙 魏 琕 師 軍 爲 將 湘 袪 猶 少 起 碑字靈馥,扶風郿人也。 十四年,卒。 州諸軍 襲之, ·, 昔 用 持 人甚憚之。 隨 以 出 兵於 四 果敢 人 爲 齊 高 方 安陸 弗 龍 不果, 祖 事、信武 多響 江 忌 聞,遭父憂, 驤 笑 西 將 王 復以 而 韶贈車騎將軍,給鼓吹一 應, 遂留 卿 軍 蕭 美之。 日 路軍 、南 緬 勿以 功遷 高 鈔 鎭 汝陰譙 運 祖 一戮使 一、湘州 、毀瘠 焉 緬 寧朔 俄而 漕 使 卒 仙 父伯鸞, 衛率, 斷 以無功, 過 刺史。 將 仙碑母卒,高祖知其貧,賻給 建 ___ 事 琕 運 禮, 康 郡 明 故 軍 太守。 茍 帝 加 城 人 負 豫 宋 後軍。 陷 姚 自 視 累表 土 州 冠 永元 嫌 仲 事 成 部,賻錢十萬,布百匹。 仙 軍 刺 絕 會壽 賓 四 清解, 墳 碑號 史。 司 也 中 年,徵還爲護軍 頃之, 說 手植 之,仙 陽 0 蕭 哭 新陷 高祖 仙 經宿 遙光、崔慧景 復爲 松柘。 琕 碑於軍 佛許。 謝 乃 魏將王肅侵 左衞 曰 甚 解 起家郢州 斬 ·將軍,遷通直散騎 將軍 厚。 小 改封宜 兵 仲賓 歸 亂 人 諡曰威。子僧度嗣 如 罪。 仙 邊,仙 以 九年, 累 主簿 陽縣侯, 琕 失 徇。 有戰 主 號 高 一、遷武 泣 大, 祖 出 義 功, 勞之日 謂弟仲 後 師 爲使持 戶邑如 常侍、 騎常 主 至新 以 餇 勳 ō

列

傳

第

+

馬

仙

琕

二七九

艾 (日:「: 蒙 大 造之恩 未 獲 上報 **今復荷殊澤,當** 與爾 以 心力自効耳

言功。 縣伯,邑四百 論 授輔 監 人 問 國 四 將 其 年 戶,仍遷都督司州諸軍事、司州 故,仙 ·, 王 軍 、、宋安安蠻二郡太守,遷南義陽太守。 師 北 碑曰:「丈夫爲 討,仙 琕 每戰,勇冠三軍,當其 時 所 知,當進不 刺史,輔國 求名, 衝 1將軍 累破 者,莫不 退不 如故。 山蠻, 逃罪, 摧 破。 郡 俄進號 境清 乃平 與諸 貞威 生願 將 論 浴將軍 以功封 也。 議 何 口 功可 未

王 超 關 遭 以 等亦 轉 副 懸 將 號 瓠 魏 相 來降。 豫 雲塵,復爲 齊苟兒以兵二千助守懸瓠 次退散,魏軍逐進據三關。 月,英破懸瓠,執齊苟兒,遂進攻馬廣,又破廣,生擒之,送雒陽。 州人白阜生殺其刺史琅邪王 高 祖使仙琕赴之, 司 馬,加振遠將軍。 又遣直閤將軍武會超、馬廣率衆爲援。 魏中山王元英率衆十萬攻懸瓠,仙碑遣廣、會超等守三 仙 司 **埤坐徵還**, 馬慶會、三自號平北 爲雲騎將軍。 將軍,推鄉人胡遜爲刺史,〔三〕 出爲仁威司馬, 仙 仙琕不能救。 碑進頓楚王城, 府主 豫章

督 馬 衆 豫北 十餘 械 十 萬 豫霍三州諸軍事、信武將軍 年, 赴焉。 胊 可 勝 Щ 民殺 數。 仙 琕 振 現邪太守劉 與戰,累破之,昶 旅 還 京 師,遷· 断,回 、豫州刺史,領南汝陰太守。 太子 遁走。 以城 左 衞 降魏, 仙 率,進爵爲侯,增邑六百戶。 **:** : 與縱兵乘之,魏衆兔者十一二,收其 韶假仙 **埤節,討之。** 魏徐州 十一年,遷持節、 刺 史盧昶 、 兵糧· 以

雅 在 州 愛仗之。 邊 郡 境 , 初 能 仙 常單身潛 與 琕 士 在 幼 卒 州 名仙 同 四年,卒。 入敵 . 勞逸。 婢, 庭, 及長,以「婢」名不 身衣 伺 贈左衞將軍。 知壁壘村落險 不 過布 帛, 所居 典 諡 要 日剛 處 功 無性 所 以「玉」代「女」,因成「碑」云。 |幕衾| 子巖夫嗣。 故戰多克捷,士卒亦甘心爲之用,高 屏, 行 則 飮 食 與厮養最 自 下 者 爲 同 將 及 旭 居 其

南 甚 歷 兗州 相 生 知 張 重 ,又擢爲府中兵參軍,始委以軍旅。 齊字子響,至 歷生酗 一,以爲 酒, 心腹,雖家居細事,皆以任焉。 遇下嚴酷, 馮翊 郡 不甚禮之。 世居横 歷生罷 或 齊盡心事稷,無所辭憚。 云 官 横桑 歸,吳郡 人也。 張 稷 少 有 爲 利用府司 膽氣。 隨稷歸京師。 初事 馬,齊復從 荆府 司 之,稷 馬 垣

造 於 王 齊手 內殿,齊手刃焉。 珍 齊 永元中,義 國 一,陰 亦 知書,目不 與定計。 師起,東昏徵稷歸,都督宮城諸軍事,居尚書省。 明年, 計定, 識字,而 夜引珍國就稷造膝,齊自執燭 高祖 在 郡有清政,吏事 受禪,封齊安昌縣侯,邑五 , 甚脩。 以成謀。 一百戶, 義兵至,外圍漸急,齊日 仍爲寧朔將軍、 明 旦, 與稷、珍國 歴陽太 卽 東

監二年, 還爲 が 虎 賁 中郎將。 未拜, 遷天門太守, 寧朔將軍如故。 四年, 魏將王 足寇

列

巴、蜀 二成,軍還 高祖 益州。 以 齊 爲輔國將軍救蜀。 其年,遷武旅 派將軍 、巴西太守,尋加征遠將軍。 未至,足退走,齊進戍南安。 七年秋,使齊置大劍 十年,郡人姚景和聚合蠻

蜒,抄斷江路,攻破金井。齊討景和於平昌,破之。

米二十萬斛。 初 ,南鄭沒於魏,乃於益州 又立臺傳,興冶鑄,以應贍南梁。 西置 南梁州。 州鎭 草創,皆仰益州取足。 齊上夷獠義租,得

於葭 五年, 走。 引還,於是葭萌復沒於魏 壽太守,以城歸款。 萌 十四年,遷信武將軍、巴西梓潼二郡太守。 魏 層 一年,進假節、督益州外水諸軍。 東 十餘 益 州 城 刺 魏將丘突、 史元法僧遣子景隆 益州刺史鄱陽王遣齊帥衆三萬,督南梁州長史席宗範諸軍迎令宗。 王穆等皆降。 來拒 十二年, 齊師, 而魏 是歲,葭萌人任令宗因衆之患魏 南安太守皇甫諶 更增傅豎眼兵,復來拒戰,齊兵少不 魏將傅豎眼寇南安,齊率衆距之,豎眼 及宗範逆擊之,大破魏 也, 殺 利, 魏 軍 退

齊緣 是以 頓 含城 路聚糧食,種蔬菜,行者皆取給焉。 威 齊 名 在 壘,皆委曲 益 行 部累年,討擊蠻獠,身無寧歲。 於庸、蜀。 得 其 巴西 便,調 郡 給衣糧 居盆 州之半, 資用, 其能濟辦,多此類也。 其居軍 叉當 人 人 無 東 所 中,能身親勞辱,與士卒同其 道 衝 困 乏。 要,刺史經過,軍府遠涉,多所窮匱 旣 爲 物情 所附 蠻獠 、勤苦。 亦 不 敢 自畫 犯,

賻錢十萬,布百匹。 征西鄱陽王司馬、新興永寧二郡太守。 十七年,遷持節、都督南梁州諸軍 諡曰此。 事、智武將軍、南梁州刺史。 未發而卒,時年六十七。 追贈散騎常侍、右衞將軍。 普通四年,遷信武將軍

雖李牧無以加矣。 罪,或斬關獻捷;其能後服,馬仙碑而已。仁義何常,蹈之則爲君子,信哉!及其臨邊撫衆, 陳吏部尚書姚察曰:王珍國、申胄、徐元瑜、李居士,齊末咸爲列將,擁强兵, 張齊之政績,亦有異焉。 冑、元瑜、居士入梁事迹鮮,故不爲之傳。 或面縛請

校勘記

C一) 五年魏任城王元澄寇鍾離 州 魏」,通鑑 刺史任城王澄遣將入寇,三年二月,任城王澄攻鍾離。 繫之於天監四年,是在天監五年以前。 「五年」南史作「天監二年」。按: 則此「五年」當是「二年」之誤。 叉下文 通鑑梁武帝天監二年三月, 「梁州長史夏侯道遷以州降 魏揚

魏豫州人白阜生殺其刺史琅邪王司馬慶曾 生」、「司馬悅」、通鑑皆從魏書。 「白阜生」、「司馬慶曾」, 魏書宣武帝紀作

列傳第十一 校勘記

- 推鄉人胡遜爲刺史「遜」各本作「遊」,據本書武帝紀改。
- 朐山民殺琅邪太守劉晣 「晣」各本譌「昕」,據南史及魏書盧昶傳改。
- [五] 張齊字子響 「響」南史作「嚮」。

梁書卷十八

列傳第十二

張惠紹 馮道根 康絢

將軍 戰,斬首數十級,賊乃散走。 主如故。 戰,惠紹擊破,斬難當,盡獲其軍器。 高祖使惠紹與軍主朱思遠遊遏江中,斷郢、魯二城糧運。 初,母喪歸葬於鄉里。 、前軍,直閣、左細仗主。 張惠紹字德繼,義陽人也。 時東昏餘黨數百人,竊入南北掖門,燒神虎門,害衞尉張弘策。 聞義師起,馳歸高祖,板爲中兵參軍,加寧朔將軍、軍主。 以功增邑二百戶,遷太子右衞率 高祖踐阼,封石陽縣侯,邑五百戶。 少有武幹。 義師次新林、朱雀,惠紹累有戰功。 齊明帝時爲直閣,後出補竟陵橫桑戍主。 郢城水軍主沈難當帥輕舸數十挑 遷驍騎將軍,直閣、細仗 建康城平,遷輔 惠紹馳率所領赴 師次漢口 國

天監 列 四年, 傳 第 + 大舉北伐,惠紹與冠軍長史胡辛生、寧朔將軍張豹子攻宿預, 張 惠 紹 執城主馬成

督司州 龍,送于京師。 附,惠紹 騎將軍。 陽,惠紹 是夜奔還淮陰, 諸軍事、信威將軍、司州刺史、領安陸太守。 撫納有功,進號智武將軍,益封二百戶。 與馮道根、裴邃等攻斷魏連橋,短兵接戰,魏軍大潰。 尋出 爲持節、都督北兗州諸軍事、冠軍將軍、北兗州刺史。 使部將藍懷恭於水南立城爲掎角。 魏復得宿預。 六年,魏軍攻鍾離, 入爲衞尉卿,遷左衞將軍。 韶左衞將軍曹景宗督衆軍爲援,進據邵 俄而魏援大至,敗陷懷恭,惠紹不能守, 在州和理, 吏民親愛之。 以功增邑三百戶,還爲左驍 魏宿預、淮陽二城內 出爲持節、都

喪,惻 詔 日忠。」子澄 日 張惠紹 徴還 愴于懷。 為 左衞將軍, 嗣 志略開 宜追寵 濟, 命, 加通直散騎常侍,甲仗百人,直衞殿內。 幹用貞果。 以彰 動烈。 誠懃義始, 可贈護軍將軍,給鼓吹一部,布百匹,蠟二百斤。 績聞累任。 爱居禁旅,盡心朝夕。 十八年, 卒, 時年六十三。 奄至殞 諡

胡紹世、魚弘並當時之驍將。[l] 澄 初為 直 閤 將軍,丁父憂,起爲晉熙太守,隨豫州刺史裴邃北伐,累有戰功,與湛僧智、 歷官衞尉卿、太子左衞率。 卒官,諡 日愍。

馮道根字巨基,廣平酇人也。 少失父, 家貧,傭賃以養母。 行得甘肥,不敢先食,必遽

還 主,自道斑攻蠻錫城,反爲蠻所困,道根救之。 以 (進母。 年十三,以孝聞於鄉里。 郡召爲主簿,辭不就。 匹馬轉戰,殺傷甚多,道斑以免,由 年十六,鄉人蔡道斑爲湖陽戍 是知名。

之,衆賴以全。 不聽,道根循以私屬從軍。 尾俱急。 口 , (言道 齊 建武 根 不 ·如悉棄船艦於酇城,方道步進,建營相次,鼓行而前。 末,魏主托跋宏寇沒南陽等五郡,明帝遣太尉陳顯達率衆復 與鄉里人士以牛酒候軍,因說顯達曰:「治水迅急,難進易退。 尋爲約口戍副 及顯達敗,軍人夜走,多不知山路,道根每及險要,輒停馬指示 如是,則立破之矣。」顯達 魏若守隘, 爭之。師入汮 則首

軍,高 根 驍 高 豊 非 騎 隨王茂 祖 孝乎? 將 使道根副之,皆隸於王茂。 永元 祖令道根并領其衆。 軍 討 中,以母喪還家。聞高祖起義師,乃謂所親曰:「金革奪禮,古人不避,揚名後世, 平 之。 時不可失,吾其行矣。」 封增城 縣男,邑二百戶。 大軍次新林,隨王茂於朱雀航 茂伐沔,攻郢城,克加湖,道根常爲前鋒陷陳。 率鄉人子弟勝兵者,悉歸高祖。 領文德帥,遷游擊將軍。 大戰,斬獲尤多。高祖卽位,以爲 是歲,江州刺 時有蔡道福爲將從軍, 史陳伯之反,道 會道福卒於

至者、 天監 衆頗笑之。 二年,爲寧朔將軍、南梁太守,領阜陵城戍。 道根 曰:「怯防勇戰,此之謂也。」脩城未畢,會魏將党法宗、傅竪眼率衆二 初到阜陵,脩城隍,遠斥候,有如敵將

列

萬, 連 城 出 奄至 相 與 魏 城 軍戰,敗之。 魏將 道 高 根 祖珍以三千騎 塹壘未固, 魏 人見意閑,且 城 軍 中衆少, 其間 戰 道根 叉不 皆失色。 利,因 !率百騎橫擊破之,獲其鼓角軍儀。 . 退走。 道根命廣開門、緩服登城, 是時 魏 分兵於大 小峴、東桑等, 選精銳 於是糧 運

旣

絕

誻

軍

· 乃 退。

遷道

根

輔

國將軍

權 績。 叡 直 武 州 馬 閣。 將 中 救 刺 步 地, 之, 軍 史、 司 益 豫 十五 宣 馬 封 州 道 領 計 三百 刺 惠 右 馬 根 汝 年 史章叡 陰 足 司 游 率 戶 以 馬 擊 爲 衆三千爲叡 太 賦 將 右 守。 進 新 圍 衞 軍 爵 功,回 合肥, 興 至 將 武 爲伯 永 爲 軍 寧 旅 城 政清簡 前 克之, 將軍 、 隍立 還 驅 郡 遷 太 歷陽 三騎 道 境內 辨 至 守。 徐 根 太守。 將 及 州,建計據邵 與諸軍同進,所在有功。 十四四 安定。 軍 淮 水 年,徵 領直 八年, 長, 十 一 閤 道 爲 年,徵 陽 將 遷 根 員 洲 軍 乘 貞 外散 戦艦 一毅將 改封 爲 築壘掘 **以騎常**: 太子 軍、 攻 豫 六年,魏攻鍾離,高 寧縣 右 斷 塹,以逼 侍、 假 衞 魏 節 右 率。 連 戶邑如 游 督 橋數百 魏 擊將 十三 豫 城。 州 前 軍 年, 諸 丈, 道 軍 領 出 累遷 魏 祖 根 爲 復 軍 能

信

豫

中

敗

走

將 言 何 功 事。」高祖嘗指道根示尙書令沈約曰:「此人口不論勳。」約曰:「此陛下之大樹將軍也。」 道 諸 根 將 性 讙 謹 譁 厚, 爭 競 木 訥 道 少言 根 默 然 爲將 而 已。 能 檢 其 御部 部 曲 曲, 或 所過 怨 非 之, 村陌,將 道 根 喻 士 不 日 敢 明主 虜掠。 自 鑒 毎 功 所 Ź 征 多 伐, 少,吾 終不

入室 處 州 則 郡 蕭 和理 然 如素士之貧賤者。 一清靜,爲部下所懷。 當時服其淸退,高祖亦雅重之。 在朝廷,雖貴顯而性儉約,所居宅不營牆屋,無器服 微時不學,旣貴,粗讀書,自 侍衞,

謂 少文,常慕 周勃之器重。

平 復 於 憶 武 臣 有 德殿,召 十六年,復假 恨 ____ 無可 州 工 死 視 之 地。」 道根,使圖 節、都督豫州諸軍事、信武將軍、豫州刺史。 豫部重得道根,人皆喜悦。 其形像。 道根 踧踖謝 曰:「臣所可報國家,惟餘一死;但天下太 高祖每稱曰:「馮道根所在,能使朝廷不 將行,高祖引朝臣宴別道 根

朱异 侍 匹。 普通 不 臣 寡 で領 能 人之臣 亦 諡 過 元 居 左 有 也 年 州 日 勞 軍 一,是社 威 吉凶同日,今行乎。」异 IE 少 王室 將 奄致 。 子 時, 月,卒,時年五十八。 軍 馬道根 一稷之臣 , 臨 之 禮 遇疾, 懷 殞 喪, 嗣 奉 也, 惻愴于懷 自表乞還朝,徵為散騎常侍、左軍將軍。 也。」高 上能忠, 聞 其 祖 死, 對 是日 即幸 有功不伐,撫 曰:「昔柳莊 可贈信威將軍 請往 輿駕春祠二廟,旣 其宅,哭之甚慟。 _ __ 不 釋祭服 寢疾,衞獻公當 人留 ·、左衞將軍 愛,守 而 往 詔 出宮,有司 邊難 日 ·,給鼓吹一部。 遂 祭,請於尸曰:『 以襚之。 豫 犯,祭遵、馮異、郭伋 旣至疾甚,中使累加存問。 寧縣 以聞。 開 道根 或 高 伯 賻錢十萬,布百 雖未 祖問 有臣 新 爲 除散騎常 中書舍人 柳莊,非 、李牧, 社 稷

之

置 堅太子詹事,生穆,穆爲姚萇河南尹。 |華山郡藍田縣,寄居于襄陽,以穆爲秦、梁二州刺史,未拜,卒。 詔 於河西,因留爲點首,其後即以康爲姓。 康 絢字長明,華山藍田人也。 其先出自康居。 宋永初中,穆舉鄉族三千餘家,入襄陽之峴南 晉時隴右亂,康氏遷于藍田。 初,漢置都護,盡臣 絢世 父元隆, 父元撫, 西域,康居亦遣侍子 **絢曾祖因** 爲符 宋爲 並

明 年,除奉朝請。文帝在東宮,以舊恩引爲直後,以母憂去職。 絢 推誠撫循,荒餘悅服。 少俶儻有志氣,齊文帝爲雍州刺史,所辟皆取名家,絢特以才力召爲西曹書佐。 遷前軍將軍,復爲華山太守。 服闋,除振威將軍、華山 永 為流

人所推,相繼爲華山太守。

赴之,魏軍退。 湖 郞 安縣男,任己邑三百戶。 南 軍鋒甚盛,絢隨王茂力攻屠之。自是常領遊兵,有急應赴,斬獲居多。天監元年,封南 永元 康王中兵參軍,加輔國將軍。 元年,義兵起,絢舉郡以應高祖,身率敢勇三千人,私馬二百五十匹以從。 七年,司州三關爲魏所逼,詔假絢節、武旅將軍,率衆赴援。 除輔國將軍、竟陵太守。魏圍梁州,刺史王珍國使請救,絢以郡兵 義師方圍張沖於郢城,曠日持久,東昏將吳子陽壁于加 九年,遷假節、 除西中

茅 分 督 北 軍 伯 兗 據 討 州緣淮諸 嶮 平之。 魏 軍 至, 軍事、 徵 驃騎 不得越朐 振遠將 臨 JII 王司 城。 軍、 馬, 北 明 兗 年, 加 州刺史。 左 青州 驍騎將軍,尋轉朱衣直閣。 刺 史張 及胸山亡徒以城降魏,絢馳遣 稷爲 土人徐道角 所殺,日 十三年,遷太子右 絢 司馬霍奉 叉 遣 司 伯 衞 馬

率 ,甲 絈 仗百人,與領軍蕭景直 身長八尺,容貌 絕倫 一雖居 殿 內 顯官,猶 習武 藝。 高 祖 幸德陽殿 、戲馬, 敕 絢馬射, 撫弦

貫

的 日 圖 見 親

岸 書 細 沉 蛟 節 內 格 于 が能 都都 沙土 一、潼沱 以 必 觀者悅之。 築 盡, 僕射袁昂 堰 時 督淮 乘 魏降 土 漂 所。 爲激 負 風 輕, 擔者 雨決壞 合脊 上 人王 猶 諸 溝 不 、侍中 不 於 併 其日,上使 肩 軍 · 堅實, 足 能 崖岸,其 中 事 E 灌 合,乃伐 陳 並 皆 謝舉假節慰勞之, 流 鉅 計, 穿。 其功不 護堰作,役 野 + 性 澤 畫 求 樹 应 夏 一惡鐵,一 高高 工 堰 年, 爲 可 日 圖 淮 就。 疾 井 祖 絢 堰 水 幹,塡 人 因 疫, 以爲 形 將 以 是引 及戦 高 ′, 遣 死 并加蠲 合, 灌 祖 者相 以 然, 壽 東 士,有 弗 中 淮 巨石 陽。 西二冶鐵 使 使 納,發徐、揚 枕, 水 復。 持 水工陳承伯、材官將 漂 衆 足引北 蠅 加 以 疾, 二十萬。 是冬又寒甚,淮、泗盡 問 蟲 土 器, 畫 其 絢 輒 方童謠 夜 上。 人,率二十戶 復 大 聲 決 於 則釜 緣 卿 相 潰, 鍾 日 合。 准 識 離 鬻 衆 此 百 南 軍 荆 患之。 高 里 小 取五 起 祖 Щ 不 祖 內, 則 浮 阳重 爲 凍, 愍役 鋘 1 Щ 岡 視 其 或謂 E 鋤 以築之。 士卒死者十七 格 陵 地 北 人 木石 形 淹 數 江 抵 浮 巉石 淮 千 加 咸 Щ ·萬斤, 此 無巨 假 爲 遣 多 謂 ·;依 有 尙 絢 F 淮

列

戰 軍來 其子悅: 水之所及,夾淮方數百里地。 注,則游波寬緩,堰得不壞。」絢然之,開湫東注。 **閤曹世宗、徐元** 視 五. 八,高 居 丈,高二十丈,深十九丈五尺。 夾之以堤,并樹杞柳,軍人安堵,列居其上。 |魏人信之,果鑿山深五 戰,公 人墳墓, 祖 挑 復遣賜 戰,斬魏咸陽王府司 絢與徐州刺史劉 了然皆在其下。 和相次距守。 以衣袴。 十一月,魏遣將楊大眼揚聲決堰, 丈, 思祖等距之。高祖又遣 十五年四月,堰乃成。 魏壽陽城戍稍徙頓於八公山,此南居 馬徐方興, 或 開湫北注, 人謂絢曰:「四瀆, 魏軍 水日夜分流, 小却。 又縱反間於魏曰:「梁 天所以節宣其氣,不可久塞。 右衞將軍昌義之、太僕卿魚弘文、「云」 其長九里,下闊 十二月, 湫猶不減。 絢命諸軍撤營露次以待之。 魏遣其尚 人散 其月, 一百四十丈,上廣四十 人所懼開 就 書僕射 岡 魏軍 壟。 其水清潔, 李曇定督 竟潰 湫 若鑿湫 ,不畏野 而歸 俯 直 東 衆 遣

徴絢。 甚 絢還後,豹子不脩堰,至其秋八月,淮水暴長,堰悉壞決,奔流于海,祖暅坐下獄。 慚 初,堰 俄 尋以絢爲持節、都督司州諸軍事、信武將軍、司州 而 1起於徐州界,刺史張豹子宣言於境,謂己必尸其事。 敕豹子受絢節度,每事輒先諮焉,由是遂譖絢與魏交通,高祖雖不 刺史,領安陸太守,增封二百戶 旣而 絢 以他官來 納,猶 監作,豹子 | 絢在州三 以事畢

十八年,徵爲員外散騎常侍,領長水校尉,與護軍韋叡、太子右衞率周捨直殿省。 普通

年,大脩城隍,號爲嚴政。[10]

元年,除衞尉卿,未拜,卒,時年五十七。 輿駕卽日臨哭。 贈右衞將軍,給鼓吹一部。 賻錢

十萬,布百匹。諡曰壯。

胸寬和少喜懼,在朝廷,見人如不能言,號爲長厚。 在省,每寒月見省官繼樓,輒遺以

襦衣,其好施如此。子悅嗣。

諸 封二百戶。 天監元年,封永豐縣侯,邑五百戶。 次新林、隨王茂於新亭、幷朱雀航力戰、斬獲尤多。 板爲輔國將軍、軍主,除建安王中兵參軍。 補防閣,出爲馮翊戍主。 軍 事 昌義之,歷陽烏江人也。 、輔國將軍、北徐州刺史,鎭鍾離。 及虎代還,義之留事高 少有武幹。 除驍騎將軍。 魏寇州境,義之擊破之。 時竟陵芋口有邸閣,高祖遣驅,每戰必捷。 齊代隨曹虎征伐,累有戰功。 祖。 出爲盱眙太守。 建康城平,以爲直閤將軍、馬右夾轂主。 時天下方亂,高祖亦厚遇之。 三年,進號冠軍將軍,增 二年,遷假節、督北徐州 虎爲雍州,以義之 義師起,

城戍,克之。 四年,大舉北伐,揚州刺史臨川王督衆軍軍洛口,義之以州兵受節度,爲前軍,攻魏梁 五年,高祖以征役久,有詔班師,衆軍各退散,魏中山王元英乘勢追躡,攻沒馬

與城平 處,輒馳往救之,每彎弓所向,莫不應弦而倒。 之,所值城土輒頹落。曰回義之乃以泥補缺,衝車雖入而不能壞。 魏軍乃以車載 橋,跨淮通道。 道 明 、 平東將軍楊大眼等衆數十萬, 來寇鍾離。 英 與大眼躬自督戰,晝夜苦攻,分番相代,墜而復升,莫有退者。 土填塹,使其衆負土隨之,嚴騎自後蹙焉,人有未及回者,因以土迮之,俄而 英據東岸,大眼據西岸,以攻城。 鍾離. 日戰數十合,前後殺傷者萬計,魏軍死者 時城中衆纔三千人,義之督帥,隨方抗禦。 城北阻淮水, 義之善射,其被攻危急之 魏 人於邵 又設飛樓及衝 陽洲西岸作 撞

事、征遠將軍、湘州刺史。 脫 左 五 一驍騎 州諸 百戶,遷持節、督青冀二州諸軍事 身奔走。 六年四月,高祖遣曹景宗、韋叡帥衆二十萬救焉,旣至,與魏戰,大破之,英、大眼等各 將軍 軍 事 下,輔國: ٠, 義之因率輕兵追至洛口而還,斬首俘生,不可勝計。 直閣 將軍、南兗州刺史。 如故。 遷太子右衞率,領越騎 九年,以本號還朝,俄爲司空臨川王司馬,將軍如故。十年,遷右 、征虜將軍、靑冀二州刺史。 坐禁物出藩,爲有司所奏免。 校尉,假節。 八年,出爲持節、督湘州諸 以功進號軍師將軍,增封 未拜,改督南克克徐青冀 其年,補朱衣直閣,

衛將軍。十三年,徙爲左衞將軍。

破魏 時魏兵盛,神念攻峽石浮橋不能克,故援兵不得時進,遂陷峽石。 聲欲決堰,詔假義之節,帥太僕卿魚弘文、直閣將軍曹世宗、徐元和等救絢,軍未至,絢等已 以其 軍。 是冬,高祖遣太子右衛率康絢督衆軍作荆山堰。 魏又遣大將李平攻峽石, 圍直閣將軍趙祖悅,義之又率朱衣直閣王神念等救之。 明年,魏遣將李曇定大衆逼荆山 義之班師,為有司所奏,

高

祖

功臣,不問也。

隱,誠著運始,効彰邊服。 州緣准諸軍事 將軍,并鼓吹一 四年十月,卒。 民安之。 十五年, 子寶業嗣,官至直閣將軍、譙州刺史。 俄給鼓吹一部,改封營道縣侯,邑戶如先。 復以爲使持節、都督湘州諸軍事、信威將軍、湘州刺史。 、平北將軍、北徐州刺史。 部。 高祖深痛惜之, 韶曰:「護軍將軍、營道縣開國侯昌義之, 幹略沉濟, 志懷寬 給東園秘器,朝服一具。 方申爪牙,寄以禁旅,奄至殞喪,惻愴于懷。 義之性寬厚,爲將能撫御,得 賻錢二萬,布二百匹,蠟二百斤。諡曰夙。 普通三年,徵爲護軍將軍,鼓吹如故。 人死力,及居藩 其年, 改授都督北徐 可贈散騎常侍、車騎 匠子,吏

門,而惠紹以力戰顯,合肥、邵陽之逼,而道根、義之功多,浮山之役起,而康絢典其事 厥勞,寵進宜矣。 陳吏部尚書姚察曰: 先是鎭星守天江而堰興,及退舍而堰決,非徒人事,有天道矣。 張惠紹、馮道根、康絢、昌義之, 初起從上, 其功則輕。 及羣盜焚 , . . 互有

校勘記

- 與湛僧智胡紹世魚弘並當時之驍將 「胡紹世」,夏侯亶傅作「明紹世」。「魚弘」各本作「魚弘
- 按: 夏侯亶傳南史張紹惠傳及册府元龜三五二並作「魚弘」。 「文」字衍,今據删。下同。
- 鄉人蔡道斑爲湖陽 成主 「斑」南史及册府元龜八四七作「班」。
- 師入汮口 「袀口」各本皆作「汋均口」。 王鳴盛十七史商權云:「汋當作汮。均字乃後人旁注,
- 迅急」,「汋均口戍副」,皆當作「汋水迅急」,「泃口戍副」,今並改正。 而 傳寫者誤入正文。」按:王說是。
- 229 **U** 計馬足以賦功 「馬」,各本脫。 據南史及册府元龜三五二補
- 五. 於 領汝陰太守 合肥。 馮道根傳領汝陰太守,亦當爲南汝陰,史缺南字耳。」 「汝陰」當作「南汝陰」。錢大昕廿二史考異:「是時豫州治合肥,南汝陰郡亦僑置
- C水ン封南安縣男「南安」南史及册府元龜七六五作「南陽」。

記

見殺,非十年也。此於九年下接之,明年則似十年矣,非也。」

ファン

[八] 十二月魏遣其尚書僕射李曇定督衆軍來戰 通鑑天監十五年:「康絢已擊魏兵,却之。」

「按魏帝紀,此年正月乃遣李平節度諸軍,絢傳誤也。 曇定卽平字也。」

八 九 凵 太僕卿魚弘文 「魚弘文」亦疑爲「魚弘」之譌。 然魚弘傳不載其爲太僕卿。

[10] 號爲嚴政 「政」兩史作「整」。

(二) 乃遣土匠脩營鍾離城 「土匠」疑「工匠」之譌。

所值城土輒頹落 「土」各本作「上」。 按下文有「義之乃以泥補缺」,則「上」字顯係「土」字之

譌,今改正。

梁書卷十九

列傳第十三

宗夬 劉坦 樂藹

宗夬字明敭,南陽涅陽人也,世居江陵。 祖炳、[1] 炔時徵太子庶子不就, 有高名。 父

繁,西中郎諮議參軍。

學士於西邸,並見圖畫,决亦預焉。 决少勤學,有局幹。 弱冠,舉郢州秀才,歷臨川王常侍、驃騎行參軍。 永明中,與魏和親,敕决與尚書殿中郎任昉同接魏使, 齊司徒竟陵王集

皆時選也。

書都官郎。 文惠太子薨,王爲皇太孫,夬仍管書記。及太孫卽位,多失德,夬頗自疏,得爲秣陵令,遷尙 武帝嫡孫南郡王居西州,以夬管書記,夬旣以筆札被知,亦以貞正見許,故任焉。 隆昌末,少帝見誅,寵舊多罹其禍,惟夬及傅昭以淸正免。 俄而

列傅

第十

=

宗夬

軍 所推 經 別 五 .長 路,並 | 兵尙書,參掌大選。 駕 史。 信,故領軍將軍蕭 明 義 帝 護送軍資,高祖甚禮之。 師 天監元年,遷征虜長史、東海太守,將軍 卽 起, 位 以夬 遷西中郎諮議參軍,別駕 爲郢州治中,有名稱職,以 穎胄深相委仗,每事諮焉。 三年,卒,時年四十九。 中興初,遷御史中丞,三 如故。 父老去官還鄉里。 子曜卿嗣。 時西土位望,惟夬與同郡 如故。 二年, 徵爲太子右衞率。 高祖 師發雍州,穎胄遣夬出 以父憂去職。 南康王爲荆州刺史,引 樂藹 起為 冠 自楊口 、劉坦爲州 厄軍將軍 是冬,遷 面 一、衞 人

|夬從弟岳,有名行,州里稱之,出於|夬右。 仕歷尚書庫部郎, 野州治中, 北中郎錄事參

元 初 ,為南郡 劉 坦字德度, 王 國常侍,尋補 南陽安衆人也、四晉鎮東將軍喬之七世孫。 孱 陵令,遷南中郎錄 事參 軍 一所居 以幹 坦少為從兄虬 濟 稱。 所 知 齊 建

軍 崩 楊 公 武 南 則 士,則 康 爲湘 王 爲 百 荆 州 姓畏侵漁 刺 州刺史, 史,帥 師赴 **;若遣文人,則威略不振。** 坦為 夏口 西中 一,西朝 鄓 中兵參軍 議 行州 了,領 事 者, 長流 必欲鎮靜一州城, 坦 謂 義師 衆 日: 起, 湘 遷 境人情,易擾 諮 軍民足食, 議 參 軍。 則無踰老 難 時 輔 或 若 將

舊恩,道迎者甚衆。 先零之役,竊以自許。」遂從之。 下車簡選堪事吏,分詣十郡,悉發人丁,運租米三十餘萬斛,致之義師, 乃除輔國長史、長沙太守,行湘州事。 坦嘗在湘州

時東昏 遣安成太守劉希祖破西臺所選太守范僧簡於平都,希祖移檄湘部,於是始興內 資糧用给。

衆愧且 不閉 要結 逃走,坦悉聚船焚之,遣將尹法略 主,師于建寧。 未起,而 曇弄、鄧道介報復私讎,因合黨亦同焉。 史王僧粲應之。〔三〕 ,以疑之。 士庶數百人,皆連名定計,刻 服, 收兵已報具得其文書本末,玄紹 州部遂安。 玄紹 自是湘部諸郡、悉皆蜂起;惟臨湘、湘陰、瀏陽、羅四 邵陵 未及發,明旦詣坦問其故。 法略 人逐其內史褚府,永陽 與 、僧粲相持累月,建康城 日反州城。 距 僧粲, 即首伏, 僧粲自號平西將軍、湘州刺 相持未 坦聞 人周暉起兵攻始安郡,並 坦 於坐斬 決。 其謀, 偽爲不 平,公則 前湘州鎮軍 與語,密遣親兵收 之。 還州,羣賊始散。 焚其文書, 知, 縣猶 鍾 因理 史,以永陽 玄紹潛謀應 全。 應僧粲。 其餘 訟 其家 至夜, 州 書 黨悉無所問 人咸 人周 玄紹 僧粲 桂陽 而 城 舒 欲 在坐 門遂 爲謀 汎舟 人 邵

史,行之卒,時年六十二。 天監 初 論 功封 荔浦 子泉嗣。 縣子,邑三百戶。 遷平西司馬、新興太守。 天監三年,遷西中郎長

器物 ,試諸甥姪。 樂藹字蔚遠,南陽淯陽人,晉尙書令廣之六世孫,世居江陵。 其舅雍州刺史宗愍,嘗陳

言所記。譾略讀具舉,慤益善之。

讀書。 記室。 易,藹隨問立對,若按圖牒,嶷益重焉。 州刺史,以藹爲驃騎行參軍、領州主簿,參知州事。 以父憂去職,吏民詣州請之,葬訖起焉。 朱建平王景素爲荆州刺史,辟爲主簿。 疑還都, 以藹爲太尉刑獄參軍, 州人嫉之,或譖藹廨門如市 時齊豫章王嶷爲武陵太守,雅善臈爲政,及嶷爲荆 典書記, 景素爲南徐州,復爲征北刑獄參軍,遷龍陽相。 遷枝江令。 疑嘗問藹 還爲 風土舊俗,城隍基時, 大司馬中兵參軍, ,嶷遣覘之,方見藹閉 Щ 轉署 jij 險 閣

引見藹,問 脩廨署數百區,頃之咸畢,而役不及民。 參軍、步兵校尉,求助戍西歸。 永明八年,荆州刺史巴東王子響稱兵反,旣敗,焚燒府舍,官曹文書,一時蕩盡。 九年,豫章王嶷薨,藹解官赴喪,率荆、湘二州故吏、行 以西事,藹 上對詳敏,帝悅焉。 荆部以爲自晉王忱移鎭以來府舍,(公) 用為 荊州治中,敕付以脩復府州事。 建碑墓所。 累遷車騎平西錄事 未之有 高 還 州, 武帝 也。 繕

臺建,遷鎭 南 康 王爲 軍 司馬、中書侍郎、尚書 西中郎,以藹爲諮議參軍。 左 丞。 義 時營造器甲,舟 師 起,蕭穎 艦 軍 糧 , 及朝 延儀 憲,悉資藹焉 以經略。

尋遷 給 事黃門侍郎,左丞如故。 和帝 東下 ,道兼衞 尉卿。

將葬, 船 庫 若 得 有 天 而 車 監 灰 車 輻 初 非 府 ; 一遷驍騎將軍、領少 吏罪 忽於 如 中 丞 也 庫 健步 失油 旣 而 避道 絡, 檢之,果有積 欲推 者, /府卿 主者。 至是果遷焉。 ())俄遷 灰,時稱 御 藹 日二 :史中丞,領本州大中正。 昔晉 其博 藹 性 物 武 公强 庫 弘 下, 居 恕 火,張華 焉 憲臺 以爲 甚 稱 初, 藹發江陵, 無故於 積 職。 油 時長 萬 石 必 沙 宣 武王

瑜 討 賊,而 罷 二年, 歸 道 實 謀 遇 出 襲藹。 始 爲 興 持節 人士反,逐內史崔睦舒,因掠元瑜 **萬覺之,誅** 督廣交越三州 元瑜 諸軍、冠 尋進)號征 軍將 虜將軍,卒官 軍 財 一、平越 產 中郎 元瑜 走 將 歸 、廣州刺 廣州 史。 借兵 前 (於藹 刺史徐元 託欲

藹 姊 適 徴 士同 郡 劉 虬 一亦明 識 有 :禮訓。 藹 爲 州 ()迎姊居官舍,參分祿秩,西 + 稱 之。

子

法才

字元備

幼

與弟法藏俱

有

美名。江辺少

/遊京

師,造

沈約、

",約見

而

稱

之。

齊和

帝

,

郎,復掌通 留 相 任京 國 召爲府參軍, 邑,遷金部郞 事 丁,遷尙 書右丞。 鎭軍 ,父憂去官。 蕭 穎冑辟主 晉安王爲荆州,重除別駕從事史。 服闋,除 簿。 中書 梁臺 建,除. 通 事 舍人,出為 起部 郎。 本州 天監 復徴為 別駕。 二年,萬出鎭 尚書右丞, 出爲招遠 爲 通 嶺 直 表, 散 法 騎侍

列

物表。 斯,可 騎將軍、少府卿。 將軍、建康令。 以爲百城表矣。」卽日遷太舟卿。曰曰尋除南康內史,恥以讓俸受名,辭不拜。 皇太子以法才舊臣,累有優令,召使東下,未及發而卒,時年六十三。 不受俸秩,比去任,將至百金,縣曹啓輸臺庫。高祖嘉其清節,曰:「居職若 出爲信武長史、江夏太守。 因被代,表便道還鄉。 至家,割宅爲寺,棲心 俄轉雲

宜乎! 之鎭 也。 陳東部尚書姚察曰:蕭潁胄起大州之衆以會義,當其時,人心未之能悟。 經營締構, 蓋有力焉。 方面之功, 坦爲多矣;當官任事 腐則兼之。 此三人者,楚 咸登寵秩,

校勘記

祖 炳 「炳」字, 各本作「景」, 姚思廉避唐諱所改。 宗炳,字少文,見宋書隱逸傳。 南史避唐諱,

稱少文而不名。今改回。

中興初 師次楊口,和帝遣御史中丞宗夬銜命勞軍,見本書庾域傳及通鑑。 遷御史中丞 中 興」各本作「天興」。 按: 齊無天興 年號。 今據改 齊和帝中興元年三月,蕭衍

- ニ 子曜卿嗣 上文不言宗夬封爵,此言「嗣」,如「嗣」字不是衍文,即上有脫文。
- 四 **い** 州刺史喬七世孫。」南齊書州郡志,南陽郡領縣七,有涅陽,無安衆。 南陽安衆人也 按 晉書劉喬傳:「喬,南陽人。」南齊書、南史劉虬傳並云:「南陽涅陽人,晉豫 此南陽安衆當就其漢世郡
- 五 時東昏遺安成太守劉希祖破西臺所選太守范僧簡於平都至於是始興內史王僧粲應之 太守」,通鑑 和帝中興元年紀作「安成內史」。「始興內史」,南齊書蕭穎胄傳作「湘東內史」。 「安成

望

一而言。

- 前湘州鎭軍 稱,此必梁書之誤。」 鍾玄紹潛謀應僧粲 通鑑和帝中興元年紀同。 胡注:「按當時州府官屬無鎭軍之
- 〔4〕遷西中郎長史 「長史」二字,各本皆脱,據南史補。
- 荆部以爲自晉王忱移鎭以來府舍 率荆湘 二州故吏 「二州」各本作「二牧」,據南史改。 「忱」各本作「悅」。按:晉荆州刺史有王忱,無王悅,今改正。
- 〔10〕幼與弟法藏俱有美名 「法」字各本脫,據南史補。
- 卽 少 日遷太 府 卿十一班, 舟卿 太舟卿九班,以班多者爲貴。 「太舟卿」各本作「太府卿」,據南史改。 下文「俄轉少府卿」, 按: 梁天監七年官制,太府卿十三班, 明應由太舟卿轉, 不應由太

府

卿降。

梁書卷二十

列傳第十四

劉季連 陳伯之

季 劉 連有 季連字惠續,彭城人也。 名譽,早歷淸官。 齊高帝受禪,悉誅宋室近屬,將及季連等, 父思考,以宋高祖族弟顯於宋世,位至金紫光祿 太宰褚淵素善之, 大夫。

固請乃免。

欣之鎭江陵 廣陵 長史、南郡太守。 王會爲 太守,並行府州 建元中,季連爲尚書左丞。 遙欣 也,意寄甚隆,而遙欣 諮 議參軍,美容貌,頗 時明帝諸子幼弱,內親則仗遙欣兄弟,外親 事。 入爲給事黃門侍郎, 永明初,出爲江夏內史,累遷平南長沙內史,日日冠軍長史、 才辯,遙欣遇之甚厚。 至州, 多招 賓客,厚自 轉太子中庶子。 1封殖, 會多所傲忽,於公座 則倚后弟劉暄、內弟 明帝甚惡之。 建武 中, 叉出 季連 爲平 與遙欣競侮季 族 江 西蕭遙 甥 祏 琅 欣 邪 遙

列

僔

第

十

四

劉季

連

連 人 猶 四 季連爐之,乃密表 以 義 以爲 故,善待季連。 輔國將軍、益州刺史,令據遙欣 明帝, 季連下車,存問故老, 稱遙欣 有異迹, 明帝納焉,乃以遙欣 上流。 撫納 新舊,見父時故吏,皆對之流涕。 季連 父, 宋世 爲 雍州 爲益州,貪鄙無政 刺 史。 明帝 心德季 績 辟遂 州

治市 令李膺 守。 寧 火 月 備 聚 自 如 人 雍 無 人襲愜 小緩,更思 十月 險, 矜。 道 所 東昏 連 發 奉伯 嬰 得 晞 買 城 人 即位 本以 爲 率 参軍 大 晉原 與 1 府 羣 自 因 後計。」奉伯不納,悉衆入山,大敗而出,遂奔還州。 敗 五千 戰 主簿。 守, 賊 ,

永元元年,

徵季連爲右衞將軍,

道斷不 獨 文吏知名,性忌而 崔 而 人樂寶 不 萬餘 進 還,死 茂 季連遣中兵參軍 利 人, 巴西之東鄉 祖 愜,龔穎之孫,累世有學行,故引焉 逼 聲以 率衆 還州, 郡縣 稱、 者十七八。 巴西,去 《二千計· 李難 講武,遂遣中兵參軍宋買率之以襲中水。 討 郡 當 褊 餘 多叛 李奉伯 殺其 數 狹,至是遂嚴愎酷狠,土人始懷 之,齎三日 明 賊。 里, 年 亂矣。 太守,寶稱自號 李膺 正 道 率衆 月,新 晞 止之日: 糧 稱 是月,新城 五. 鎭 千 城 値 西 救 人帛養 歲 將軍 之。 至。 卒 大寒,羣賊 南 惰 人趙續伯殺 秦州刺史,難當 奉伯 逐遂寧太守熊希 季連聞東昏失德,京師多故,稍 號 將 驕, 建 至, 義。 六月,江陽人程延期反,殺 怨望。 乘 相 與郡 勝 聚,伐 五 巴西 履 穰 城 兵 人李 險, 其年九月,季連 令,三 太守 益 破 樹 淵 非 州 寒路, 擒 託豫 魯休 良策 刺 道 逐始平 晞 月 知之,設 軍 也。 烈 斬 巴 + 與 人 西 水 因 不 涪

進討 出 太 廣 、守何法藏。 漢 之,遣長 、乘佛 史趙越常前驅。 輿,以五 魯休烈懼 綵裹青石, 誑 不自保,奔投巴東相蕭慧訓。 兵敗,季連復遣李奉伯 百姓云:「天 與我玉印,當 由涪路討之。 十月, 王蜀 巴西 人趙續伯又反,有衆 愚人 奉伯 別軍自潺亭 從之者 甚 梁、 與大軍

初 叉 7, 拜郢 代季連入爲御 時 會稽 州別 人石文安字守休,「三 駕,從高 史中丞,與季連 祖 平京邑。 相善。 隱居鄉里,專行禮讓,代季連爲尚書左丞,出爲江夏 子仲淵字欽回, 聞 義 師 起, 率鄉 人 以應高 祖 內史,

會於城,進攻其栅,大破之。

益州 校,緣 略 士,見 季 飭 典籤朱道 說 還 連 季連 裝。 明 器 路 亂 禍 年春 奉 及 物 離已久,公私府庫必 琛者,嘗爲季連府都錄,無賴 高 求 黨 輒 迎 祖 一,遣左右陳建孫送季連弟通直郎子淵及季連二子使蜀 爲 不然 與,競言之於 奪之,有 以西臺將 巴西 ,萬里資糧 那,留 不獲者, 鄧元 季 三子爲質,季連許之。 多秏 起爲 連 未 語 日一 季連 易 益 失,劉益 可 州 會當屬 亦 得。」元起 刺 小 以 人,有罪,季連 史。 州臨 爲然,又惡 元起, 人 歸空竭,豈辨 許之。 何 頃之,季連遂召佐史,矯稱齊宣德皇后令, `須苦惜。」於是軍府大懼, 南郡 昔之不 欲 道琛旣至,言語不恭,又歷 人。 殺之,逃叛 復 禮元起 季 能遠遣 連 爲 也 以発。 喻旨慰勞。 南 候遞。), 益 憤 郡 之時, 至是說 謂 懣。 道琛 元 季連 素 司 造 請先使檢 起 薄 元 馬朱士 府 至 起 受命 元 必 州 起。

巴西以待之,季連誅士略三子。 聚兵復反,收朱道琛殺之。 書報朱士略,兼召李膺。膺、士略並不受使。 使歸,元起收兵於

枕。 愜送焉。 宣韶降季連,季連肉袒請罪。一定起遷季連於城外,俄而造焉,待之以禮。季連謝曰:「早知 謀以城降,不果,季連誅之。獨中喪亂已二年矣,城中食盡,升米三千,亦無所糴,餓死者相 如此,豈有前日之事。」元起誅李奉伯幷諸渠帥,送季連還京師。季連將發,人莫之視,惟龔 乃敗退還成都。季連驅略居人,閉城固守。 其無親黨者,又殺而食之。季連食粥累月,飢窘無計。二年正月,高祖遣主書趙景悅 天監元年六月,元起至巴西,季連遣其將李奉伯等拒戰。 。元起稍進圍之。是冬,季連城局參軍江希之等 兵交,互有得失,久之,奉伯

初,元起在道,懼事不集,無以爲賞,士之至者,皆許以辟命,於是受別駕、治中檄者,將

正月,因出建陽門,爲蜀人藺道恭所殺。季連在蜀,殺道恭父,道恭出亡,至是而報復焉。 謂曰:「卿欲慕劉備而曾不及公孫述,豈無臥龍之臣乎。」季連復稽顙謝。赦爲庶人。四年 季連旣至,詣闕謝,高祖引見之。季連自康掖門入,數步一稽顙,以至高祖前。 高祖笑

列傳第十四 陳伯之

主將 輒 年長,在鍾離數爲劫盜,嘗授面覘人船,船人斫之,獲其左耳。 偸 一川之。嘗爲田主所見,呵之云:「楚子莫動」伯之謂田主曰:「君稻幸多,一擔何苦。」 執之,伯之因杖刀而進,將刺之,曰:「楚子定何如」」田主皆反走,伯之徐擔 陳伯之,濟陰睢陵人也。 幼有膂力。年十三四,好著獺皮冠 後隨鄉人車騎將軍王廣之, 一帶 刺 刀, 候 伺 稻 鄰里 而 歸。 稻 田 及

廣之愛其勇,每夜臥下榻,征伐嘗自隨。

因 城 齊安陸王子敬爲南兗州,頗持兵自衞。 開,獨入 , 斬子敬。 又頻有戰功,以勳累遷爲冠軍將軍、驃騎司馬,封魚復縣伯,邑五 明帝遣廣之討子敬,廣之至歐陽,遣伯之先驅,

百戶

之。 進西 命,猶 義 聞 城 衆軍 明 義 中甚 懷 門 郢 師 兩端,偽云「大軍未須便下」。高祖謂諸將曰:「伯之此答,其心未定,及其猶豫,宜逼 逐次 城平,高祖 起,東昏假伯之節、督前驅諸軍事、豫州刺史,將軍如故。 建 康 尋陽,伯之退保南湖,然後 城 未平,每降人出,伯之輒喚與耳語。 得伯之幢主蘇隆之,使說伯之,卽以爲安東將軍、江州刺史。 州降、欲遣 刺客中卿,宜以爲慮。」伯之未之信。 婦別。 進號鎭南將軍,與衆俱下。 高祖 恐其復懷 尋轉江州, 據尋陽以拒 會東昏將鄭伯倫降,高 一翻覆, 伯之頓籬門,尋 密語伯之曰: 伯之雖受

降,復 軍 祖 ,封豐城縣公,邑二千戶,遣還之鎭。 使過伯之, 欲 遣刺客殺卿。 謂日 ::「城中甚忿卿,欲遣信誘卿以封賞。 宜深爲備。」伯之懼, 自是無異志矣。 須卿復降,當生割卿 力戰有功。 城平, 手脚; 進號 卿若不 征 南將

伯 之不 識書,及還江州, 得文牒辭訟,惟作大諾而已。 有事,典籤傳口語,與奪決於

主者

伯 者 喪 私 而 州 之鄉 亂 語 輕 一行 用 薄 未 所 伯之與豫章人鄧繕、永興人戴永忠並有舊,繕經藏伯之息英免禍,伯之尤德之。 i 繕 爲 人朱 事 互 知 可 能 知。 日 別駕, 若 龍 自致,惟網獨 無成,入魏, 建武 符 陳伯之擁 永忠 爲 長流 以後,草澤底下,悉化成貴人,吾何罪而 記室參軍。 參軍,並 强兵在 不達。 何遽減 江州,非代 作 高祖 乘伯之愚闇,恣行 河南褚緭,京師之薄行者 河 南郡。」於是遂投伯之書佐 即位,網頻造尚書范雲, 來臣,有自疑意;且熒惑守南 姦險,刑 齊末爲 政 見棄。 涌 雲不 王 塞 一思穆 好網, ,悉共專之。 今天下 揚州 斗,詎 事 西曹,遇 堅距之。 之,大 草創,饑饉不 非 見 爲 亂居 我 親 網 狎。 Щ 閭 盆 及在 已, 及

江 以爲治中。」繕於是日夜說伯之云:「臺家府庫空竭,復無器仗,三倉無米,東境饑流,此萬代 州 別 伯 乏子 駕 鄧 虎牙 繕 ,伯之並不 時爲直 ·受命。 閣 將 軍 一高祖 答高 祖 手疏龍符 日:一 龍符驍 罪,親付 勇健 虎牙, 見,鄧 譜事 虎牙 有 封示 績 効, 伯之; 臺 所遣 高 祖 別 又遣代 駕,請

列傳第十四 陳伯之

皆 龍符 家 萬,已次六合,見使以江州見力運糧速下。 李景受 走 惡 說伯之曰:「今舉大事,宜引衆望。 使反。」高 合率 詐爲 休 便 逃 時 爲 也, 廬 息。 「可召爲長史,以代元沖。」伯之從之,仍以網爲尋陽太守,加討逆將軍,永忠輔義將軍, 蕭 數 龍 豫 Ш 機不可失。」網、永忠等每贊成之。 百 符 州 寶夤書,以示僚佐。 元沖因其解弛,從北門入,徑至廳事前。 祖敕部內一郡處繕,伯之於是集府州佐史謂曰:「奉齊建安王敎,率江 節度,隣爲徐州,景爲郢州。 刺史,率五百人守大雷。 人,使怕之典籤呂孝通、戴元則爲內應。 伯之每旦常作伎,日晡輒臥,左右仗身 於廳事前 程元沖不與人同心,臨川內史王觀,僧虔之孫,人身不 大雷戍主沈慧休,鎭南參軍李延伯。 爲壇,殺牲以盟,伯之先飲,長史已下次第歃血。 豫章太守鄭伯倫起郡兵距守。 伯之謂繕:「今段啓卿,若復不得,便與卿共下 我荷明帝厚恩,誓死以報,今便纂嚴備辦。」使 伯之聞叫聲,自率出盪,元沖力不 程元沖旣失職,於 又遺鄉人孫隣、 . 北 義

見殺。 應空手 遣 初 受困 信 元 高 還 祖 沖 都 遣 起兵,要尋陽張孝季,孝季從之。 報 王 今先 茂討 虎牙兄弟,虎牙等走盱眙,盱眙人徐安、莊興紹、張顯 平 伯之。 豫章,開 伯之聞茂來,謂網等曰:「王觀 通南路,多發丁力,益運資糧,然後席卷北 旣敗,伯之追孝季不得,得其母郎氏,蠟灌 既不就 命,鄭伯 明邀擊之,不能禁,反 向,以撲飢疲之衆, 倫 又不肯 從,便 殺

|之爲使持節、散騎常侍、都督淮南諸軍事、平南將軍、光祿大夫、曲江縣侯。 王茂前 不憂不濟也。」乃留鄉人唐蓋人守城,遂相率趣豫章。 軍旣至,伯之表裏受敵,乃敗走,間道亡命出江北,與子虎牙及褚緭俱入魏。 太守鄭伯倫堅守,伯之攻之不能下。 魏以伯

天監 四年,韶太尉、臨川王宏率衆軍北討,宏命記室丘遲私與伯之書曰:

翔。 刃 赤心於天下,安反側於萬物,將軍之所知,非假僕一二談也。 故,直以不能內審諸己,外受流言,沉迷猖蹙,以至於此。 於 旦爲奔亡之虜,聞鳴鏑而股戰,對穹廬以屈膝,又何劣耶。尋君 愛子,漢主不以爲疑,魏君待之若舊。 昔因機變化,遭逢明主,立功立事,開國承家,朱輪華轂,擁旄萬里,何其壯 陳將軍足下無恙,幸甚。 將軍勇冠三軍,才爲世出。 況將軍 無昔人之罪,而勳重於當 棄鵝雀之小志,慕鴻鵠以高 聖朝赦罪論功,棄瑕 朱鮪涉血於 去就之際,非有他 友于,張繡傳 世 錄用,收 也 ·! 如

序。 靦顏借命 柏 翦,親 懷黃 夫 《迷塗知反,往哲是與,不遠而復,先典攸高。 佩紫,贊帷幄之謀;乘軺建節,奉疆埸之任。 「戚安居;高臺未傾,愛妾尚在。 驅馳異域,寧不哀哉 悠悠 爾 心 主上屈法申恩,吞舟是漏。 亦 並 一刑馬作誓,傳之子孫。 何可 述。 今功臣名將,雁 將軍獨 將軍松 行 有

失以慕容超之强,身送東市,姚泓之盛,面縛西都。 故知霜露所均,不育異類;姬

漢 舊邦,無取雜種。 北虜僭盜中原,多歷年所,惡積 方當緊頸蠻邸, 懸首藁街。 《禍盈, 理至燋爛。 而將軍魚游於沸鼎之中, 況偽孽昏狡,自

巢於飛幕之上,不亦惑乎!

登陴,豈不愴恨。 暮春三月,江南草長,雜花生樹,羣鸎亂飛。 所以廉公之思趙將,吳子之泣西河,人之情也。 見故國之旗鼓, 感平生於疇日,撫弦 將軍獨無情哉 想

伯之乃於壽陽擁衆八千歸。 虎牙爲魏人所殺。

早勵良圖,自求多福

戶。 未之任,復以爲通直散騎常侍、驍騎將軍,又爲太中大夫。久之,卒於家。 伯之旣至,以爲使持節 、都督西豫州諸軍事、平北將軍、西豫州刺史, 永新 縣侯, 其子猶有 邑千

在魏者。

是,不知非昔非。」魏人怒,出爲始严太守。 褚網. 在魏,魏人欲擢用之。 魏元會,網戲爲詩曰:「帽上著籠冠,袴上著朱衣,不知是今 日日行獵,墮馬死。

史臣曰:劉季連之文吏小節,而不能以自保全,習亂然也。 列 傅 第 + 四 陳 伯 之 校 勘 記 陳伯之小人而乘君子之器,

校勘記

〇一」累遷平南長沙內史 張森楷校勘記:「『平南』下疑脫『長史』二字。平南乃將軍號,非郡,不當

有內史。」

新城人趙續伯殺五城令

按下文「巴西人趙續伯又反」, 前後互異。 又南史及太平御覽八二

皆謂趙續伯是巴西人。

時會稽人石文安字守休 「字」字各本股,據册府元龜八八二補。

梁書卷二十

列傳第十五

王瞻 王志 王峻 暕 子訓 孫锡 僉

張充 柳惲 蔡撙 江蒨

僧達聞而異之,謂瞻父曰:「吾宗不衰,寄之此子。」年十二,居父憂, 膽年數歲,嘗從師受業,時有伎經其門,同學皆出觀, 王瞻字思範,琅邪臨沂人,宋太保弘從孫也。 祖柳、光祿大夫、東亭侯。 瞻獨不 視,習誦 如初。 以孝聞。 父猷,廷尉卿 從父尚書僕射 服闋, 襲封

瞻幼時輕薄,好逸遊,爲閭里所患。 及長,頗折節有士操,涉獵書記,於棊射尤善。

東亭侯。

子中舍人。 起家著作佐郎,累遷太子舍人、太尉主簿、太子冼馬。 又爲 齊南海王友, 尋轉司徒竟陵王從事中郎, 頃之,出爲鄱陽內史,秩滿,授太 王甚相 賓 禮。 南海王爲護軍將

列

傅

第十

五

王瞻

軍討賊黨,瞻言於朝曰:「愚人易動,不足窮法。」明帝許之,所全活者萬數。 潔己爲政,妻子不免飢寒。 軍,瞻爲長史。 又出補徐州別駕從事史, 遷驃騎將軍王晏長史。 時大司馬王敬則舉兵作亂 ,路經晉陵,郡民多附敬則, 晏誅,出爲晉陵太守。 徴拜給事黃門 軍敗 臺 瞻

侍郎,撫軍建安王長史,御史中丞。

軍,未拜,卒,時年四十九。 廢 海領。 吏 部尚 高祖 高祖 書。 霸府開,以瞻爲大司馬相國諮議參軍,領錄事。 瞻性率亮,居選部,所舉多行其意。 每稱瞻有三術,射、棊、酒也。 諡康侯。 子長玄,著作佐郎,早卒。 尋加左軍將軍,以疾不拜,仍爲侍中,領驍騎將 頗嗜酒,每飲或竟日 梁臺建,爲侍中, ,而精神益 遷左民尙 朗 贍, 書, 不 俄

王志字次道,琅邪臨沂人。 祖曇首,宋左光祿大夫、豫寧文侯,父僧虔,齊司空、 簡穆

公並有重名。

駙馬 淵謂僧虔曰:「朝廷之恩,本爲殊特,所可光榮,在屈賢子。」累遷鎭北竟陵王功曹史、安陸南 都尉、 志年九歲,居所生母憂,哀容毀瘠,爲中 秘書郎。 累遷太尉行參軍,太子舍人,武陵王文學。 表所 異。 弱冠,選尚宋孝武女安固公主,[1]拜 褚淵爲司 徒,引志爲主簿。

將軍 憂。」明旦,果自詣獄,辭以婦孕,吏民益歎服之。 轉吏部 |志到官,父老乃相謂曰:「王府君有德政,吾曹鄕里乃有此爭。」 倪、慶因相攜請 郡二王友。入爲中書侍郎。尋除宣城內史,清謹有恩惠。 人,冬至日悉遣還家,過節皆返,惟一人失期, 地遂爲 閑田。 尚書,在選以和理稱。 徵拜黃門侍郎,尋遷吏部侍郎。 崔慧景平,以例加右軍將軍,封臨汝侯,固讓不受,改領右衞 出爲寧朔將軍 獄司以爲言。 視事三年,齊永明二年,入爲侍中, 郡民張倪、吳慶爭田,經年不決。 、東陽太守。 志曰:「此自太守事, 郡獄有重 罪, 三 所訟 主者勿 囚 未拜, 十餘

軍、驃騎大將軍長史。 樹葉挼服之,偽悶,不署名。 義 師至,城內害東昏,百僚署名送其首。 梁臺建,遷散騎常侍、中書令。 高祖覽牋無志署,心嘉之,弗以讓也。 志聞而歎曰:「冠雖弊,可加足乎?」因 霸府開,以志爲右軍將 取庭中

之。」因多謝病,簡通賓客。遷前將軍、太常卿。六年,出爲雲麾將軍、安西始興王長史、南 令,及居京尹,便懷止足。常謂諸子姪曰:「謝莊在宋孝武世,位止中書令,吾自視豈可以過 粥 有寡婦無子,姑亡,舉债以斂葬,旣葬而無以還之,志愍其義,以俸錢償焉。 ;於郡門,以賦百姓,民稱之不容口。 天監元年,以本官領前軍將軍。 。三年,爲散騎常侍、中書令,領游擊將軍。 其年,遷冠軍將軍、丹陽尹。 。爲政淸靜,去煩苛。 時年饑,每旦爲 志爲 中書 京師

列

郡 太守。 明年,遷軍師將軍、平西鄱陽郡王長史、江夏太守,並加秩中二千石。 九年,

散騎常侍、金紫光祿大夫。十二年,卒,時年五十四。

志善草隸,當時以爲楷法。 齊游擊將軍徐希秀亦號能書,常謂志爲「書聖」。

賜 罪咎劾人。 而 之,追諡曰安。有五子,緝、休、諲、操、素,並知名。 稱其善。 志家世居建康禁中里馬蕃巷,〔〕父僧虔以來,門風多寬恕,志尤惇厚。所歷職,不以 兄弟子姪皆篤實謙和,時人號馬蕃諸王爲長者。 門下客嘗盜脫志車聽賣之,志知而不問,待之如初。 普通四年,志改葬, 賓客游其門者, 專覆其過 高祖厚賻

王峻字茂遠,琅邪臨沂人。曾祖敬弘,有重名於宋世,位至左光祿大夫、開府儀同三

司。 祖瓚之,金紫 光祿 大夫。 父秀之,吳興太守。

除 邵 太子 陵 王文學, 峻 洗馬,建安王友。 少美風 太傅主簿。 姿,善舉止。 出 府主 爲寧遠將軍、桂陽內史。 起家著作佐郎,不拜,累遷中軍廬陵王法曹行參軍,太子舍人, 齊竟陵王子良甚相賞 遇。 會義師起,上流諸郡多相驚擾,峻閉門 遷司徒主簿,以父憂去 職。 服 関

靜

坐,

郡帖然,百姓賴之。

遠將軍、平西長史、南郡太守。 稱 職 ,轉征虜安成 視事三年,徵拜侍中,遷度支尙書。 天監初,還除中書侍郎。 王長史,又爲太子中庶子、游擊將軍。 高祖甚悅其風采,與陳郡謝覽同見賞擢。 尋爲智武將軍、鎭西長史、蜀郡太守。 又以本官兼起部尚書,監起太極殿。 出爲宣城太守,爲政 還爲 俄遷吏部,當官不 左民尚書,領步 清 事畢,出爲 和, 吏民安 征

兵校尉。

遷吏部尙書,處選甚得名譽。

營務。 郡,平心不畏强禦,亦由處世之情旣薄故 王曰:「此自上意,僕極 子踪,玩。[四] 琮爲 峻 久之,以疾表解職,**遷金紫光祿大夫,**未拜。 性詳雅,無趨競心。 「不願如此。」峻曰:「臣太祖是謝仁祖外孫,亦不藉殿下姻媾爲門戶。」 國子生,尙始興王 嘗與謝覽約,官至侍中,不復謀進仕。 也。 女繁昌縣主,不慧,爲學生所嗤,遂離婚。 峻爲侍中以後,雖不 普通二年,卒,時年五十六,諡 退身, 覽自吏部尚書出爲吳興 亦淡然自守, 惠子 峻謝 無

暕 字思晦,琅邪臨沂人。 父儉,齊太尉、南昌文憲公。

望,復在此矣。」弱冠,選尙淮南長公主,拜駙馬都尉,除員外散騎侍郎,不拜,改授晉安王文

陳

年數

歲,

而

風神

警拔,有成

人之度。

時文憲作宰,賓客

盈

門,見陳相

謂

日:「公才公

園, 學,遷 達,領袖後進。 絕 聲倦響,九工是詢;寢議 庭;猶懼隱鱗卜祝,藏器屠保,物色關下,委裘河上。非取製於一狐,諒求味於兼采。 璉之茂器。」除驃騎從事中郎。 七葉重光,海內冠冕,神淸氣茂,允迪中和。 台階虛位; 庠序公朝, 萬夫傾首。 勢門上品, 猶當格以淸談; 英俊下僚, 不可限以位貌。 廬陵王友、秘書丞。 垂拱永逸,方之疏壤, 居無塵雜,家有賜書,辭賦淸新,屬言玄遠;室邇人曠,物疏道 廟堂,借聽輿阜。臣位任隆重,義兼邦家,實欲使名實不違,徼幸路 明帝詔求異士,始安王遙光表薦陳及東海王僧孺曰:「臣聞求賢 取類導川。伏惟陛下道 豈徒 首命可想,李公不亡而已哉! 乃東序之祕寶,瑚 叔寶理遣之談,彥輔名教之樂,故以暉映先]隱旒纊,信充符璽,白駒空谷,振鷺在 竊見祕書丞琅邪王陳,年二十 養素丘 而五

晉陵 射 世 四 爲 ",以母 年冬,暴疾卒,時年四十七。 貴 侍 顯,與物 中。 高 祖 憂去官。[三] 起爲雲麾將軍、吳郡 霸 出 爲 府開,引爲戶曹屬,遷司徒左長史。 徵 多 爲 寧朔將軍、中軍長史。 隔,不能留 吏部尚書,俄領國子祭酒。 宁 寒素, 韶贈侍中、中書令、中軍將軍,給東園秘器,朝服一具,衣一 衆頗謂 又爲侍中,領射 太守。 爲 陳名公子,少致美稱,及居 刻薄。 還爲 天監元年,除太子中庶子,領驍騎將軍,入 侍中、尚書左 聲校尉,遷五 遷尙 書右僕射,尋 一僕射 兵尙書,加給 領 選曹,職 加 侍 國子祭酒。 中。 事 事 復遷左 中。 脩 理 普通 出 二; 然 僕

襲,錢十萬,布百匹。 諡曰靖。 有四子,訓、承、釋、語,並通顯。

策高第,除秘書郎,遷太子舍人、秘書丞。轉宣城王文學、友、太子中庶子,掌管記。 **六**,召見文德殿,應對爽徹。 中,旣拜入見,高祖從容問何敬容曰:「褚彥回年幾爲宰相。」」敬容對曰:「少過三十。」上曰: 「今之王訓,無謝彦回。」 訓字懷範,幼聰警有識量,徵士何胤見而奇之。年十三,陳亡憂毀,家人莫之識。十 上目送久之,顧謂朱异曰:「可謂相門有相矣。」補國子生,射 。俄遷侍

訓美容儀,善進止,文章之美,爲後進領袖。 贈本官。諡溫子。 在春宮特被恩禮。 以疾終於位,時年二十

王泰字仲通, 志長兄慈之子也。 慈, 齊時歷侍中、吳郡, 知名在志右。

作郎,不拜,改除秘書郎,遷前將軍法曹行參軍、司徒東閤祭酒、車騎主簿。 對曰:「不取,自當得賜。」由是中表異之。旣長,通和溫雅,人不見其喜慍之色。 泰幼敏悟,年數歲時,祖母集諸孫姪,散棗栗於牀上,羣兒皆競之,泰獨不取。 起家爲著 問其故,

列傳第十五 王泰

國事。 中。 徒左長史。 騎常侍、左驍騎將軍。 接 能 從事史,居職有能名。 書,圖書散 並掌吏部如故,俄卽眞。 稱職。 ·人士,士多懷泰,每願其居選官。 頃之,爲吏部尚書,衣冠屬望,未及選舉,仍疾,改除散 尋爲太子庶子、領步兵校尉,復爲侍中。 高 祖 王遷職,復爲北中郎長史、行豫章王府、州、國事,太守如故。入爲都官尚書。 霸府 |泰爲之不通關求,吏先至者卽補,不爲貴賤請囑易意,天下稱平。 累遷爲廷尉,司 亂殆盡。 出爲明威將軍、新安太守,在郡和理得民心。 建, 以泰爲驃騎功曹史。 泰爲丞,表校定繕寫,高祖從之。 未拜,卒,時年四十五。諡夷子。 復徵中書侍郎,敕掌吏部郎事。 自過江,吏部郎不復典大選,令史以下,小人求競者輻湊,前後少 天監元年, 遷秘書丞。 仍遷仁威長史、南蘭陵太守,行南康王府、州、 頃之,遷中書侍郎。 累遷給事黃門侍郎,員外散騎常侍, 徵爲寧遠將軍,安右長史,俄遷侍 齊永元末,後宮火,延燒祕 出為南徐州別駕 泰能

初康無子,養兄子祁,晚有子廓。

份十四而孤,解褐車騎主簿。 王份字季文,琅邪 人也。 祖僧朗,宋開府儀同三司、元公。「弘父粹,黄門侍郎。 出爲寧遠將軍、始安內史。 袁粲之誅,親故無敢視者,份

獨 往致慟,由 是顯名。 遷太子中舍人,太尉屬。 出爲晉安內史。 累遷中書侍郎,轉大司

引 柏 魏 ,寧遠懚有臣。」帝亦以此亮焉。 人來侵疆場, 份兄與於雍州被誅,與子肅奔于魏,份自拘 世祖嘗因 侍坐, 從容謂份曰:「比有北信不 尋除寧朔將軍、零陵內史。 請罪,齊世 祖知其誠款,喻而遣之。 · ^] |份斂容對日:「肅旣近忘 徵爲黃門侍郎,以父終於此 屬 肅 墳 屢

職

,固辭不拜,遷秘書監。

紫 侍東宮,除金紫光祿大夫。復爲智武將軍、南康王長史,秩中二千石。 寧朔將軍、北中郎豫章王長史、蘭陵太守,行南徐府州事。 無 、光祿、南徐州大中正,給親信二十人。 。]份對曰:「陛下應萬物爲有,體至理爲無。」高祖 天監初,除散騎常侍、領步兵校尉、 遷尙 兼起部尚書。 書左僕射,尋加侍 稱善。 高祖嘗於宴席問羣臣曰:「朕爲有爲 出爲宣城太守,轉吳郡太守,遷 遷太常卿、太子右率、散騎常侍, 中。 復入爲散騎常侍、金

十萬,布四百 中 ·、 特 時 進、左光祿,復以本官監丹陽尹。 脩建二郊,份以本官領大匠卿,遷散騎常侍、右光祿大夫, 匹,蠟四百斤,給東園 [秘器,朝服一具,衣一襲。 普通五 |年三月,卒,時年七十九。 諡 胡子。 加親信爲四十人。遷侍 詔贈本官,賻錢四

尙 義 長子琳 興公主 ,字孝璋, 舉南徐州秀才, ,拜駙馬 都 尉。 累遷中書侍郎,衞軍謝朏長史,員外散騎常侍。 釋褐 征虜建安王 一法曹, 司 徒東 閣 祭酒,南平王 出 爲 明威將軍、 文學。

東陽太守,徵司徒左長史。

飾居宇。 永安侯,除晉安王友,稱疾不行,敕許受詔停都。 |緒齊名,俱爲太子舍人。 丁父憂,居喪盡禮。 服闋,除太子洗馬。 時昭明尚劲,未與臣僚相 歲,猶隨公主入宮,高祖嘉其聰敏,常爲朝士說之。 高祖敕:「太子洗馬王錫、秘書郎張纘,親表英華,朝中髦俊,可以師友事之。」以戚屬封 錫字公嘏,琳之第二子也。幼而警悟,與兄弟受業,至應休散,常獨留不起。 雖童稚之中, 一無所好。十二,爲國子生。十四,舉淸茂,除秘書郎,與范陽張伯 、王冠日,以府僚攝事。 精力不倦,致損右目。公主每節其業,爲 年七八

以嘲謔,緣、纘隨方酬對,無所稽疑,未嘗訪彼一事,善明甚相歎挹。佗日謂异曰:「一日見 云何可見。」异具啓,敕即使於南苑設宴,錫與張纘朱异四人而已。善明造席,遍論經史,兼 司。二國通和,所敦親好,若以才辯相尙,則不容見使。」善明乃曰:「王錫、張纘,北間所聞, 負其才氣,酒酣謂异曰:「南國辯學如中書者幾人?」异對曰:「异所以得接賓宴者,乃分職是 賢,實副所期,不有君子,安能爲國!」 普通初,魏始連和,使劉善明來聘,敕使中書舍人朱异接之,預讌者皆歸化北人。善明

轉中書郞,遷給事黃門侍郞、尙書吏部郞中,時年二十四。謂親友曰:「吾以外戚,謬被

時 便謝遣胥徒,拒絕賓客,掩扉覃思,室宇蕭然。 知,多叨人爵,本非其志;兼比羸病,庶務難擁,安能捨其所好而徇所不能。」乃稱疾不拜。 中大通六年正月,卒,時年三十六。贈侍中,

東園秘器,朝服一具,衣一襲。諡貞子。

子泛、湜。

服 蜀 遷 史,屬循爐作亂,「亞復轉愈爲安成內史,以鎭撫之。 美,頒示 記。 通 太 郡 理。策高第,除長兼秘書郎中,「ギ」歷尚書殿中郎,太子中舍人,與吳郡陸襄對掌東宮管 一具,衣一襲。 太守。 子中庶 出爲建安太守。 **愈字公會,錫第五弟也。八歲丁父憂,哀毀過禮。** 州郡。 僉憚 子,掌東宮管記。 除武威將軍、四始興 岨嶮,固以疾辭,因以黜免。 承聖三年,世祖追詔曰:「賢而不伐曰恭,諡恭子。」 山會方善、謝稀聚徒依險,屢爲民患,愈潛設方略,率衆平之, 太清二年十二月,卒,時年四 、內史,丁所生母憂,固辭不拜。 **外之,除戎昭將軍、尚書左丞,復補黃門侍郎,** 還除黃門侍郎,尋爲安西武陵王長史、 服闋,召補國子生,祭酒袁昂稱爲 干五。 贈侍中, 又除寧遠將軍、南康內 給東園秘器,朝 有詔 聚

張充 字延符,吳郡人。 父緒,齊特進、金紫光祿大夫,有名前代。 **充少時,不持操行,好**

逸游。 拜於水次。 而敬易之。」緒曰:「過而 |緒嘗請假還吳,始入西郭,值||充出獵,左手臂鷹,右手牽狗,遇緒船至, 緒曰·「一身兩役,無乃勞乎?」充跪對曰·「充聞三十而立,今二十九矣, 能改,顏氏子有焉。」及明年,便脩身改節。 學不盈載,多所該覽, 便放紲脫韝, 請至來

尤明老、易、能清言、與從叔稷俱有令譽。

不護細行,故儉言之。充聞而慍,因與儉書曰: 東 取 士比無所執,緒諸子又多薄行,臣謂此宜詳擇。」帝遂止。 決焉。 起家撫軍行參軍,遷太子舍人、尚書殿中郎、武陵王友。 武帝嘗欲以充父緒爲尚書僕射,訪於儉,儉對曰:「張緒少有淸望,誠美選也,然 先是充兄弟皆輕俠,充少時又 時尚書令王儉當朝用事,武帝

端,紛綸百年,昇降之途不一。[10]故以圓行方止,器之異也,金剛水柔,性之別也。善 攝。 擯 崖;確乎之情,峯橫海岸。 之貴。日己充生平少偶,不以利欲干懷,三十六年,差得以棲貧自澹。介然之志,峭聳霜 御性者,不違金水之質,善爲器者,不易方圓之用。所以北海掛簪帶之高,河南降璽書 **;跡江臯,陽狂隴畔者,實由氣岸疏凝,情塗狷隔。獨師懷抱,不見許於俗人;孤秀神** ·

元幸以魚釣之閑,鎌採之暇,時復以卷軸自娛,逍遙前史。 從橫萬古,動默之路多 吳國男子張充致書於琅邪王君侯侍者:頃日路長,愁霖韜晦,涼暑未平,想無虧 影纓天閣,旣謝廊廟之華,綴組雲臺,終慚衣冠之秀。所以

鳥,畢影松阿。半頃之田,足以輸稅,五畝之宅,樹以桑麻。 崖,每邅回於在世。 故君山直上,蹙壓於當年,叔陽夐舉,樾轉乎千載。 嘯歌於川澤之間,諷味於 充所以長羣魚

澠池之上,泛濫於漁父之遊,偃息於卜居之下。 如此而已,充何謝焉。

إال 煙霞,高臥風月。 陰,相繚於澗曲。 毎至 若夫驚巖罩日,壯海逢天,竦石崩尋,分危落仞。 |西風,何嘗不眷?聊因疾隙,略舉諸襟;持此片言,輕枉高聽。 元卿於是乎不歸,伯休亦以茲長往。 悠悠琴酒,岫遠誰來,灼灼文談,空罷方寸。不覺鬱然千里,路阻江 桂蘭綺靡,叢雜於山幽,松柏森 若廼飛竿釣渚,濯足滄洲, 獨浪

仲子之節。 爲 山 而 長懷 被 其潤。 丈 霸 人歲路未强,學優而仕,道佐蒼生,功橫海望。入朝則協長倩之誠,出議則抗 山之氓,佇衣車而 奇禽異羽,或巖際而逢迎;弱霧輕煙,乍林端而菴藹。東都不足奇,南山豈 可謂盛德維時,孤松獨 聳歎。 秀者也。 得無惜乎。若鴻裝撰御,鶴駕軒空,則岸不辭枯, 素履未詳,斯旅 尚眇。茂陵之彦,望冠蓋

鄕 說 下之言, 蓬轉於 充昆 西之百姓,岱表之一民。 謬延 屠博之間,其歡甚矣。 於造次。 然舉世皆謂充爲狂,充亦何能與諸君道之哉? 丈人早遇承 蠶而衣,耕且食,不能事王侯,覓知己,造時人,騁遊 華, 中逢 一崇禮。 肆 上之眷, 望溢 是以披聞見, 於早辰;

列

掃心胸,述平生,論語默,所以通夢交魂,推衿送抱者,其惟丈人而已。

關山敻阻,書罷莫因,儻遇樵者,妄塵執事。

<u>檢言之武帝,免充官,廢處久之。後爲司徒諮議參軍,與琅邪王思遠、同郡陸慧曉等,</u> 並爲

司徒竟陵王賓客。入爲中書侍郎,尋轉給事黃門侍郎

明帝作相,以充爲鎭軍長史。 出爲義興太守,爲政淸靜,民更便之。 尋以母憂去職,服

関,除太子中庶子,遷侍中。

義師近次,東昏召百官入宮省,朝士慮禍,或往來酣宴, 充獨居侍中省, 不出閤。 城內

旣害東昏,百官集西鍾下,召充不至。

軍將軍、司徒左長史。 自陳,徵爲散騎常侍,金紫光祿大夫,未及還朝,十三年,卒于吳,時年六十六。 酒如故。入爲尙書僕射,頃之,除雲麾將軍、吳郡太守。下車卹貧老,故舊莫不欣悅。 說,皇太子以下皆至。 雲騎將軍。 高祖霸府開,以充爲大司馬諮議參軍,遷梁王國郎中令、祠部尚書、領屯騎校尉,轉冠 尋除晉陵太守, 秩中二千石。 時王侯多在學、執經以拜、充朝服而立,不敢當也。 天監初,除太常卿。 徵拜散騎常侍、國子祭酒。 **尋遷吏部尙書,居選稱爲平允。** 充長於 轉左衞將軍,祭 俄爲散騎常侍、 、義理,登堂講 韶贈侍中、 以疾

護軍將軍。

諡穆子。

子最嗣。

柳 惲 字文暢,河東解人也。 少有志行,好學,善尺牘。 與陳郡謝滿鄰居,滿深所友愛。

教,百 惲 追 蹤 彈 聞 爲 古烈。」累遷太子洗馬,父憂去官。 而 初,宋世 姓稱焉。 雅 引之,以爲法曹行參軍,雅被賞狎。 弄。 有嵇元榮、羊蓋,並善彈琴,云傳戴安道之法,惲幼從之學,特窮其妙。 子良曰:「卿巧越嵇心,妙臻洋體,良質美手,信在今辰。 還除驃騎從事中郎。 服闋,試守鄱陽相,聽吏屬得盡三年喪禮,署之文 王嘗置酒後園,有晉相謝安鳴琴在側,以授惲 豈止當世稱奇,足可 齊竟陵

侍 牋 陵 中 一,使 陳便宜 高 惲西 祖 與 ,請城平之日,先收圖籍,及**遵**漢祖寬大愛民之義,高祖從之。 至京邑,惲候謁 上迎和帝,仍除給事黃門侍郎,領步 僕射沈約等共定新 石頭,以爲 律。 冠軍將軍、征東府司馬。 兵校尉,遷相 國右司 時東昏未平,士猶苦戰,惲上 馬。 天監元 會肅] 穎 年,除長兼 **青薨于江**

琅邪 云 王元 一太液滄波起, 惲 立 長 行 貞素,以貴公子早有令名,少工篇什。 見而嗟賞, 長楊高樹秋。 因書齋壁。 翠華承漢遠, 至 是預 (曲宴) 雕輦逐風遊。」 必被詔賦詩。 始爲詩曰:「亭皋木葉下,隴首秋雲飛。」 嘗奉 深爲高 和 祖所美。 高 祖 登景陽樓中篇 當時咸共

列

傳

第

+

五

柳惲

稱傳。

州刺史。 軍 自陳解任,父老千餘人拜表陳請,事未施行。 騎常侍,遷左民尙書。 徵爲祕書監,領左軍將軍。 八年,除持節、都督廣交桂越四州諸軍事、仁武將軍、平越中 復爲吳興太守六年,爲政淸靜,民吏懷之。 天監十六年,卒,時年五十三。 二年,出爲吳興太守。 六年。 贈侍中、中護 於郡威疾, 郞 徵為散 將、廣

惲旣善琴,嘗以今聲轉棄古法,乃著淸調論,具有條流。

惟善政,政在養民。」衆咸異之。 少子偃,字彦游。 年十二引見。 韶尚長城公主,拜駙馬都尉, 部問讀何書,對日尚書。 都亭侯,太子舍人,洗馬,廬 叉曰:「有何美句?」對曰:「德

陵、鄱陽內史。大寶元年,卒。

蔡撙字景節,濟陽考城人。父興宗,宋左光祿大夫、開府儀同三司,有重名前

王儉高選府僚,以撙爲主簿。 撙 少方雅退默,與兄寅俱知名。 累遷建安王文學,司徒主簿、左西屬。 選補國子生, 舉高第, 爲司徒法曹行參軍。 明帝爲鎭軍將軍,引 齊左衞將

軍

爲從事中郞,遷中書侍郞,中軍長史,給事黃門侍郞。 因居墓 所。 除太子中庶子,太尉長史,並不就。 梁臺建,爲侍中,遷臨海太守, 丁母憂,廬于墓側。 齊末多難、服闋, 坐公事左遷

太子中庶子。

復爲侍中,吳興太守。

夫、宣惠將軍。 故。 常侍、國子祭酒。 黨悉平。 **擲堅守不動,募勇敢固郡。** 寇吳興,所過皆殘破,衆有二萬,奄襲郡城。東道不習兵革,吏民恇擾奔散, 普通二年,出爲宣毅將軍、吳郡太守。 天監九年,宣城郡吏吳承伯挾祇道聚衆攻宣城。四殺太守朱僧勇,因轉屠旁縣, 加信武將軍。 諡 康子。 遷吏部尚書,居選,弘簡有名稱。 徵度支尚書,遷中書令。 承伯盡銳攻撙,撙命衆出拒,戰於門,應手摧破,臨陣斬承伯,餘 四年,卒,時年五十七。 復爲信武將軍、晉陵太守。 又爲侍中,領祕書監,轉中書令,侍中如 追贈侍中、金紫光祿大 還除通直散 並請 **撙避之。** 踰山

騎

子彥熙,歷官中書郎,宣城內史。

江蒨字彦標,濟陽考城人。 曾祖湛,宋左光禄、儀同三司、父學,齊太常卿:並有重名於

前世。

史,轉尙書吏部郎,右將軍。 在寬惠,吏民便之。 遷太子中庶子,中正如故。轉中權始興王長史。 後軍臨川王外兵參軍。累遷臨川王友,中書侍郎,太子家令,黃門侍郎,領南兗州大中正。 江州,遺寧朔將軍劉諓之爲郡,庸帥吏民據郡拒之。及建康城平,庸坐禁錮,俄被原,起爲 太子洗馬,累遷司徒左西屬,自己太子中舍人,秘書丞。 東閤祭酒、廬陵王主簿。 **構幼聰警,讀書過目便能諷誦。** 韶徵爲寧朔將軍、南康王長史,行府、州、國事。 頃之,遷太尉臨川王長 居父憂以孝聞、廬於墓側、明帝敕遣齋仗二十人防墓所。 選爲國子生,通尚書,舉高第。 出爲伏波將軍、晉安內史。在政淸約,務 出爲建安內史,視事朞月,義師下次 起家秘書郎,累遷司 服闋,除 徒

侍並侍帷幄,分門下二局入集書,其官品視侍中,而非華胄所悅,故鮑斥處爲之。 構尋遷司 杖曹中幹免官,泰以疾假出宅,自己乃遷散騎常侍,皆勉意也。初,天監六年,詔以侍中、常 忤。除散騎常侍,不拜。是時勉又爲子求庸弟臣及王泰女,二人並拒之。 葺爲吏部郎,坐 之屈。勉因庸門客翟景爲第七兒蘇求庸女婚,庸不答,景再言之,乃杖景四十,由此與勉有 左長史。 庸方雅有風格。僕射徐勉以權重自遇,在位者並宿士敬之,惟庸及王規與抗禮,不爲

初,王泰出閣,高祖謂勉云:「江蒨資歷,應居選部。」勉對曰:「蒨有眼患,又不悉人物。」

徒

高祖 乃止。 遷光祿大夫。 大通元年,卒,時年五十三。 詔贈本官。 諡 肅子。

· 情好學,尤悉朝儀故事,撰江左遺典三十卷,未就,卒。 文集十五卷。

子杯,經在孝行傳。

仲。 稱,蒸擲以方雅著,江蒨以風格顯,俱爲梁室名士焉。 是貴、子有才行,可得而稱。 其後蟬冕交映,台袞相襲,勒名帝籍,慶流子孫, 史臣曰:王氏自姬姓已降,及乎秦漢,繼有英哲。 張充少不持操,晚乃折節 斯爲盛族矣。 泊東晉王茂<u>弘經</u>綸江左,時 在於典選, 實號廉平。 王瞻等承藉茲基, 柳惲以多藝 人方之管 國

校勘記

- 選尙宋孝武女安固公主 「安固」南史作「固安」。
- 倪慶 南史 因 作「倪慶因相攜請罪」,是,今據補 相攜請罪 「慶」百衲本、南監本、汲古閣本、 金陵局本俱脫。 「因」北監本、 殿本並脱。
- = 志家 列 傳 世 第 居 建康 禁中里馬蕃巷 「蕃」南史及册府元龜七九三作「糞」。

十

五

校

勘 記

- 「四」子琮玩 南史無「玩」字。疑「玩」字是衍文。
- Ħ. 僕射,且下文又謂「還爲侍中、尚書左僕射」,明「右」是「左」之譌。 復遷左僕射以母憂去官 「左僕射」各本作「右僕射」。 按:上文已遷尚書右僕射,不應復遷右 本書武帝紀普通 元年亦作

「尙書左僕射王暕以母憂去職」。今據改。

- ハベン 祖僧朗宋開府儀同三司元公 「僧朗」各本譌「續明」或「續朗」。
- フキン 除長兼秘書郎中 「長」下各本皆有「史」字。 張森楷梁書校勘記 據南史王彧傳改。 「長史當有府, 不應徒稱,此
- 除武威將軍 「武威」原作「威武」。 按隋書百官志敍梁官制,有武威將軍,無威武將軍,「威武」

二字必是誤倒,今乙正。

史字疑誤衍文。」今删。

- た **リ** 屬循 作亂,疑。」 壚作亂 百衲本、 南監本作「循壚」,其餘各本作「盧循」。 曾鞏於卷末附校語云: 「屬循壚
- 昇降之途不一 「途」各本作「徒」,據南史及册府元龜九○五改。
- (11) 河南降璽書之貴 「璽書」各本作「璽言」、今改正。
- 天監 元年除長兼 侍中 「長」下各本皆有「史」字,據南史删。
- 贈侍中中護軍 「中護軍」下各本有「將軍」二字。 按中護軍不稱將軍,護軍將軍不稱中。 }南

記

- [18] 天監九年宣城郡吏吳承伯挾祆道聚衆攻宣城 「九年」各本作「元年」。 按本書武帝紀繁吳承
- 伯殺朱僧勇事在天監九年,南史、通鑑並同。今據改。
- 二吾 累遷司徒左西屬 「西」各本譌「南」。按司徒官有左西屬,無左南屬。今改正。
- 「宅」各本譌「守」,據南史及册府元龜三三八改正。

列傳第十六

太祖五王

太妃生臨川靖惠王宏,四南平元襄王偉。 簡王融。 太祖十男。 張皇后生長沙宣武王懿、永陽昭王敷、高祖、衡陽宣王暢。 吳太妃生安成康王秀, 始興忠武王憺。 李太妃生桂陽 郡 費太妃 王。 陳

生鄱陽忠烈王恢。

援,未至,魏軍 廬陵王法 臨 川靖惠王宏字宣達,太祖第六子也。 曹行參軍,遷太子舍人。 退。 六 遷驃騎晉安王主簿,尋爲北中郎桂陽王功曹史。 時長沙王懿鎭梁州,爲魏所圍,明年,給宏精兵千人赴 長八尺,美鬚眉,容止可觀。 衡陽王暢, 齊永明十年,爲 有美名,爲

列

傳

第

+

太 齟 五 王

及 禍 安王蕭 ,謂南平王偉曰:「六弟明於事理,必先還臺。」及信至,果如高祖 遙光所禮。 及遙光作亂,逼暢入東府,暢懼禍,先赴臺。「三高祖在雍州,常懼諸弟 策。

後將軍 事 。[2] 天監元年,封臨川 高祖 、揚州刺史,又給鼓吹一部。 三年,加侍中,進號 義 師下,宏至新林奉迎,拜輔國將軍。 郡王,邑二千戶。 尋爲使持節 建康平, 中軍將 、散騎常侍、 遷西中郎將、中護軍,領石頭戍軍 軍 都督 揚南徐州諸 [軍事、

弟,所領皆器械精新,軍容甚盛,北人以爲百數十年所未之有。 督、刺史、將軍 節、都督揚徐二州 中如故。 年,遷司徒,領太子太傅。 斬 魏將鼂清。 四 年,高 其年冬,以公事 祖韶北伐,以宏爲都督南北克北徐青冀豫司霍 並 會征役久, 如故。 諸軍事、揚州刺史、侍中、將軍如故。 左遷驃騎大將軍,至開府同三司之儀,侍中 有詔班師。 八年夏,爲使持節、都督揚南徐二州諸軍事、司空、 六年夏,遷驃騎將軍、開府儀同 十二年,遷司空,使持節、侍中、都 八州北討諸軍事。 軍次洛口,宏前軍 如 三司,侍中如 故。 揚州 未拜,遷使持 宏以帝之介 刺 ·剋梁城, 故。 史, 其

難潛伏,與太妃異處,每遣使參問起居。 對使涕泣。 五. 年 春,所生母 及太妃薨,水漿不入口者五日,高祖 陳太妃寢疾,宏與母弟南平王偉侍疾,並衣不解帶,每二宮參問, 或謂宏曰:「逃難須密,不宜往來。」宏銜淚答曰: 每臨幸慰勉之。 宏少而孝謹,齊之末年,避

可無我,此事不容暫廢。」尋起爲中書監,驃騎大將軍、使持節、都督如故,固辭弗許。

宏性寛 鉞,王 台階 本官 不 弘 五 元 十四。 永 通。 年 哀 領起部尚書,事竟罷。 ,遷使持節、都督揚南徐州諸軍事、太尉、揚州刺 十七年夏,以公事左遷侍中、中軍 論道 如 和 爱初弱齡,行彰素履;逮于 痛 故。 篤 自 抽 登朝 厚,在 疾 切, 並 至于薨,輿駕七出臨視。 物物 給羽 震慟于厥 州二十餘年,未嘗 無異議。 葆鼓 吹一 七年三月,以疾累表自陳,詔許解揚州,餘如故。 ì **股友于之至,家** 部, 宜增 應務,嘉猷 增 以 班 峻禮秩, 吏事按 將軍、行司 劍爲六十人。 及葬、詔曰:「侍中、太尉 載緝。 國兼情,方弘燮贊,儀刑列辟。 式昭懋典。 那縣,時稱 徒。 自皇業啓基 給溫 史,侍中如故。 其年冬,遷侍中、中書監、司 其 可贈侍中、大將軍、 明 長 秘器, 斂以袞服。 者 ,地惟介弟 臨川王宏, 二年,改創南 个人司 器字沖貴,雅 天不 匹 揚州 諡 月,薨,時年 **整遺,奄焉** 神 日 、北郊,以 徒。 牧、假 一句,歷 靖惠 普 黄 位 量 通

侯,正德 讓 天監 正 義 十 宏 车, 有 爲 西豐侯,正 七子 嗣 卒, , 高 ,正仁,正義,正德,正 諡 祖 日哀世子。 嘉 則樂山 而 許之, 一侯,正立羅平侯,正表封山侯,正信武化侯。 改封 無子 一,高祖 正立 則,正立,正表,正信。 爲 詔以 建安侯, 羅平 侯正立為 邑千戶。 世 世子,由宏意 卒, 子正仁,爲吳興太守,有治能。 子賁嗣。云 正德別有傳 也。 IE 宏薨,正立 義先封 平 表 樂

陳亦無子,有母德,視二子如親生焉。 也,由是親友 九歲,並以孝聞,居喪,累日不進漿飲,太祖親取粥授之。 安成康王秀字彥達,太祖第七子也。年十二,所生母吳太妃亡,秀母弟始興王憺時年 及家 人咸敬焉。 齊世,弱冠爲著作佐郎,累遷後軍法曹行參軍,太子舍人。 秀既長,美風儀,性方靜,雖左右近侍,非正衣冠不見 哀其早孤,命側室陳氏并母二子。

避。 又慮廢立,並間懿,懿亦危之,自是諸王侯咸爲之備。 東昏日夕逸遊,出入無度,衆頗勸懿因其出,閉門舉兵廢之,懿不聽。 永元 方其逃也,皆不出京師,而罕有發覺,惟桂 中, 長沙宣武王懿入平崔慧景,爲尚書令,居端右,弟衡陽王暢爲衞尉,掌管籥。 陽王融及禍 及難作,臨川王宏以下諸弟姪各得奔 帝左右旣惡懿勳高,

寶嵩 史, 冠軍 亂,累被兵革,民戶流散,秀招懷 一年,以本號徵領石頭戍事,「も」加散騎常侍。 長史、南東海太守、鎭京口。 爲冠 高 國 祖 口將軍 軍 義 將軍、南徐州刺史,鎮京口,長史范岫行府州事,遣使降,且請兵於高祖,以秀爲 師至新林,秀與諸王侯並自拔赴軍,高祖以秀爲輔國將軍。 ·如故。 天監元年,進號征虜將軍,封安成郡王,邑二千戶。 撫納,惠愛大行。 建康平, 仍爲使持節、 三年,進號右將軍。 仍值 年饑, 都督南徐兗二州諸軍 以私財贍百 五年,加領軍、中書令, 是時東昏弟晉熙王 姓,所濟活甚多。 京口自崔 事、南徐 慧景作 州 刺

給鼓吹一部。

之歌 隱逸 足, 遂破。 東 寧南 水 日 舫 玉。 郭 潦 辟 或 麻 ,空谷著來思之詠, 爲 北 秀 爲 、葭牆艾席,樂在 下 梁 及 曰 可加引 患,可利之乎 年 四 並 敎 南 曹。 至州 一吾豈愛財 , 出 一脫落 北 曰:「夫鶉 為使持節、都督江州諸 秦州 辟,幷遺 ,聞前刺史取 時盛夏水汎長,津梁斷 風 塵,高 九州諸 其 而 火之禽,不 喩意。 給船 不愛 中。 蹈 弘 其 軍 風 徴 昔伯武 而 闡道 事、平西將軍 事。 士。」乃教 旣 士 已。」七年, 同 匿影於丹山; 陶潛曾孫爲 一,靡不 兩韓之孝友純深,庾、郭之形骸 .魏侯致禮之請,庶無辟彊 貞堅,就仕 軍事、平南 絕,外司 **分所由**, 由茲。 州 遭慈母陳太妃憂,詔起視事 里司。 以牢者給 請依 州 昭華之寶,乍耀采於藍田 河内了 處士 E 將 軍、 刺史。 舊僦度,收其價直。 河東 秀歎 史雲孤 江州 [5] 其年,遷號安西將軍。 一多 佐, 日 韓懷明、南平韓望、南 刺 三緘 劭, 下者載齋 史。 陶潛之德,豈可不及後世 屈志 之数 (枯槁 將發,主者求堅船以 陳留。 ٥ ်ဝ ,或橡飯菁羹,惟日 秀教 物。 尋遷都督荆湘雍 是以 旣 岦 曰:「刺史不德, 郡 而 日場苗,實 江漢 遭 庾承先 立學校,招 風 有濯 <u></u>。 卽 爲 齌 催 纓 不 河 齋 益 舫

咸 巴陵 宜 是歲 待 馬 臺 魏 營蠻 報 懸 爲緣江 秀 瓠 日:「彼 城 民反,殺豫州 寇害,後軍 待 我 而 爲援, 司馬高江產以郢州軍伐之,不剋, 刺 史 司 援之宜 馬悅, 速, 引 司 待敕 州刺 雖 史馬 舊, 仙碑,仙碑籤 非 應 急 江產死之,蠻遂盛。 也 卽 荆 遺 州 求 兵赴之。 應 先

列

傅

第

+

六

太

젪

五.

王

百餘人,百姓甚悅。

也。」於是務存約己,省去遊費,百姓安堵,境內晏然。先是夏口常爲兵衝,露骸積骨於黃鶴 田魯生,弟魯賢、超秀,據蒙籠來降,高祖以魯生爲北司州刺史,魯賢北豫州刺史,超秀定州 樓下,秀祭而埋之。一夜,夢數百人拜謝而去。每冬月,常作襦袴以賜凍者。 役,其弊如此。 侍、都督郢司霍三州諸軍事、安西將軍、郢州刺史。 刺史,爲北境捍蔽。而魯生、超秀互相讒毀,有去就心,秀撫喻懷納,各得其用,當時賴之。 十六年,遷使持節、都督雍梁南北秦四州郢州之竟陵司州之隨郡諸軍事、鎭北將軍、寧 十一年,徵爲侍中、中衞將軍,領宗正卿、石頭戍事。十三年,復出爲使持節、散騎常 秀至鎮,務安之。主者或求召吏。秀曰:「不識救弊之術;此州凋殘,不可擾 郢州當塗爲劇地,百姓貧,至以婦人供 高祖聞之,甚 時司州 叛蠻

蠻校尉、雍州刺史,便道之鎭。十七年春,行至竟陵之石梵,薨,時年四十四。

痛悼焉。遣皇子南康王績緣道迎候。

帽,哀哭以迎送之。雍州蠻迎秀,聞薨,祭哭而去。喪至京師,高祖使使册贈侍中、司空, 初,秀之西也,郢州民相送出境,聞其疾,百姓商賈咸爲請命。旣薨,四州民裂裳爲白初,秀之西也,郢州民相送出境,聞其疾,百姓商賈咸爲請命。旣薨,四州民裂裳爲白

諡曰康。

門者,東海王僧孺、吳郡陸倕、彭城劉孝綽、河東裴子野,各製其文,古未之有也。世子機嗣 於世。 之,亦弗辭多也。 於始興王儋尤篤。 不飯,亦不之誚也。 治 !其罪。 秀有 秀於高祖布衣昆弟,及爲君臣,小心畏敬,過於疏賤者,高祖益以此賢之。 容觀,每朝,百僚屬目。 秀曰:「吾豈以鳥傷人。」在京師,旦臨公事,厨人進食,誤而覆之,去而 昆弟之睦,時議歸之。故吏夏侯亶等表立墓碑,詔許焉。 梁興,儋久爲荆州刺史,自天監初,常以所得俸中分與秀,[む]秀稱心受 精意術學,搜集經記,招學士平原劉孝標,使撰類苑,書未及畢,而已行 性仁恕,喜慍不形於色。 左右嘗以石擲殺所養鵠,齋帥請 當世高才遊王 登車,竟朝 少偏孤,

言,世 治績,頻被案劾。 姿容,善吐納。家旣多書,博學强記;然而好弄,尙力,遠士子,近小人。爲州專意聚斂,無 遷持節、督湘衡桂三州諸軍事、寧遠將軍、湘州刺史。大通二年,薨于州,時年三十。 通 元年,襲封安成郡王,其年爲太子洗馬,遷中書侍郎。二年,遷明威將軍、丹陽尹。三年, 機字智通,天監二年,除安成國世子。 祖集而序之。 及將葬,有司請證,高祖詔曰:「王好內怠政,可諡曰煬。」所著詩賦數千 子操嗣 六年,爲寧遠將軍、會稽太守。 還爲給事中。 機美

列

傅

第十六

太祖五王

昭將 封。 盡銳攻之,推隨方抗拒,頻擊挫之。至夕,東北樓主許鬱華啓關 軍 歷寧遠將軍、淮南太守。 南 、吳郡 浦 侯推 太守。 ", 字 智進,機次弟也。 所臨必赤地大旱,吳人號「旱母」焉。 遷 輕車 少清敏,好屬文,深爲太宗所賞。 將軍、晉陵太守,給事中, 侯景之亂, 延賊,城遂陷,推握節死之。 太子洗馬, 守 普通 東府城, 秘書丞。 六年,以王子例 賊設樓車, 出爲 戎

沔,高 軍, 命, 事 舉兵將襲雍州 府遷 南 祖 平元襄王偉字文達, 義 欣 驃 師 然 騎, 謂佐 發後,州內 轉外兵。 ¢ 偉 與 始 東曰:「吾無憂矣。」義師起, 儲備及 高 興王憺遣兵於始平郡待師仁等,要擊大破之,州境 祖為 太祖第八子 人皆虛竭。 雍州, 慮天下將亂, 也。 魏 幼淸警好學。 興 南康王承 太守裴師仁、齊興太守顏僧都 求迎偉及始 制, 齊世,起家晉安鎭北 板為冠 興王憺 軍將軍 來 士,留行 语 襄陽 以 並據 法 俄 雍 郡 曹 州 聞 不 行 州 已入 府

蹟等皆降。 州 西 朝 屯軍 兇 高 懼 祖 上 旣剋郢、魯,下尋陽,圍建業,而巴東 明, 和帝韶以偉爲使持節、都督雍梁南北秦四州郢州之竟陵司州之隨郡諸軍事、寧 尙 書僕射 連破 荆 夏侯 州 詳議 鎭 軍 徴 蕭穎胄遣將劉孝慶等距之,反爲璝所敗,穎胄憂憤暴疾卒, 兵雍州, **偉乃割州府將吏,配始興王** 太守蕭 慧訓子璜及巴西太守魯休烈起兵逼荆 憺 往赴之。 憺 旣 至,

寧二 鑾 校尉、雍州 州 餘 如 故。 刺史,將軍如故。 封建安郡王,食邑二千戶,給鼓吹一 尋加侍中,進號鎭北將軍。 部。 天監元 四年,徙都督南徐 年,加散騎常侍,進督開 州諸 軍 事、南

以疾 其年 疾表 遷使持 徐州 年疾浸劇,不復 四十萬,廚供月二十萬,并二衞兩營雜役二百人,倍先,置防閤白直 以 本 ·, 出 號 解州。 不 刺 拜。 加開 節 史,使持節、常侍、將軍 爲 改侍 使持節、散騎常侍、都督 都督揚南徐二州諸 十三年,改爲左光祿 府儀同三司。 出藩,故俸秩 中、中撫軍 下, 知司 其年,復 加 一如故。 軍 焉 大夫。 徒 事、右軍將軍 以疾陳解。 江州 事。 五年,至都,改爲 諸 加 九年,遷護軍 親信四十人,歲給米萬斛,布絹五千匹,藥直二百 軍 事 一、揚州 、鎭南將軍、 十二年,徵爲 刺 、石頭戍軍事,侍中、將軍、 史。 撫軍 未拜, 將軍、丹陽 江州 撫軍將軍、三三儀同、常侍 刺 進號 左右職局一百人。偉末 史,鼓吹如故。 尹,常侍 中 權將 如 鼓 故。 七 十 吹 年,以 六年, 如故, 如 年, 故。

水漿不入口 五. 年,所生 [累日 高 母母 祖 陳太妃寢疾,偉及臨川王宏侍疾,並衣不解帶。 毎 臨幸譬抑之。 偉雖奉詔,而毁瘠 殆不勝 喪。 及太妃薨,毁頓過禮,

四年,遷中書令、大司 三司 十七年,高祖 普通 四年,增邑一 以建安土瘠,改封南平郡王, 馬。 千戶。 五年,薨,時年五十八。詔斂以袞冕,給東園祕器。 五年,進號鎭衞大 邑戶 將軍。 如故。 中大通 遷侍中、 元年,以本官領太子 左光祿 大 夫、 又詔曰:「旌 開 府 太傅。 儀 司

德紀 弘茲 識 弘簡 袞 功,前王令典;慎終追遠,列代通規。 職。 爰在弱齡,清風載穆,翼佐草昧,勳高熞、沔, **奄焉薨逝,朕用震慟于厥心。宜隆寵命,式昭茂典。** 故侍中、中書令、大司馬南平王偉, 契闊艱難, 可贈侍中、太宰,王 劬勞任寄。 器宇宏曠, 及贊務論 一如故。

給羽葆鼓吹一部,並班

劍四十人。

諡

日元襄。」

與

倕並 貧無 信佛 齊世 而 賓客遊其中,命從事 偉 常遣腹 ,青溪宮改爲芳林苑,天監初,賜偉爲第,偉又加穿築,增植嘉樹珍果, 名精解,而 理,尤精玄學,著二旨義,別爲新通。 使至,給其喪事,得周濟焉。 以殯斂,友人江革往哭之,其妻兒對革號訴。 偉 少好學,篤誠通恕, 心左右,歷訪閭里人士,其有 不能屈 中郎蕭子範爲之記。 趨賢重 每祁寒積雪,則遣人載樵米,隨乏絕者卽賦 士,常如不及。由是四方遊士,當世知名者, 貧困吉凶不舉者,即遣贈卹 又製性情、幾神等論,其義,僧寵及周捨、殷鈞、陸 梁世藩邸之盛, |革日:「建安王當知,必爲營理。」 言未訖 無以過焉。 之。 而性多恩惠, 太原王曼頴卒,家 窮極 、給之。 雕麗, 莫不 晚年崇 尤愍窮 畢至。 毎

偉四子:恪、恭、虔、祗。 世子恪嗣。

恭字敬範。 天監八年,封衡山縣侯,以元襄功,加邑至千戶。 初,樂山侯正則有罪,勑

讓諸王,獨謂元襄曰:「汝兒非直無過,並有義方。」

徵 爲 秘 恭 書丞, 起家 給事中,遷太子洗馬。 遷中書 郎,監丹陽尹,行徐南徐州事,轉衡州刺史,母憂去職。 出爲督齊安等十一郡事、寧遠將軍、西陽武昌二郡太守。 尋起爲雲麾將

軍、湘州刺史。

被賞 勞神苦思,竟不成名,豈 謂 終辰,座客滿筵,言談不倦。 惟積,長 **惏**,邊蠻 |魏寇,詔||恭赴援,仍除持節 人日 恭善解 狎, :「下官歷觀世人,多有不好歡樂,乃仰眠床上,看屋梁而著書,千秋萬歲,誰傳此者。 以 不 至 交短短 知 **是手** 吏事,所在見稱,而性尚華侈,廣營第宅,重齋步櫚,模寫宮殿。 敬讓,懷抱不 静 令曰:「彼 以制躁。 如 士流骯髒, <u>;</u> 、仁威將軍、寧蠻校尉、 臨淸風,對朗 '阜白,法律無所 早蒙愛念,敢布腹心。」恭至州,治果有聲績,百姓陳奏,乞於城 時世祖居藩,頗事聲譽,勤心著述,卮酒未嘗妄進。 有關 月,登山泛水,肆意酣歌也。」尋以雍州蠻文道拘引 輔 餘 用 施。 風 雍州刺史,便道之鎭。 黔首扞格,但 願充實 (邊戍,無數遷徙,諜 知重劍 輕死。 太宗 少與恭遊,特 候惟遠,箱 降胡惟尚 賓友,酣讌 恭每從容 貪 庾

陵王所啓,由是発官削爵,數年竟不敍用。 先高 加 以雍爲邊鎮,運數州 之粟,以實儲 侯景亂,卒于城中, 倉,恭後多取官米, 贍給私宅, 時年五 十二。 爲荆 詔特復 州 刺史廬 本封。

南

立

|碑頌德,詔許焉。

世祖追贈侍中、左衞將軍。諡曰僖。

子舍人、東宮領直。 史,散書滿席,手自讎校。 世子靜,字安仁,有美名,號爲宗室後進。 遷丹陽尹丞,給事黃門侍郎,深爲太宗所愛賞。 何敬容欲以女妻之,靜忌其太盛,距而不納, 有文才,而篤志好學,旣內足於財, 太清三年,卒,贈侍中。 時論服焉。 多聚經 歷官太

曹行 弟有 遺。 逃 在 京 參 可委以腹心者,宣武言恢焉。 鄱陽忠烈王恢字弘達,太祖第九子也。 旣長,美風 軍 師 明帝 表,涉獵史籍。 卽 位,東宮建,爲 齊隆昌中,明帝作相 太子舍人,累遷北中郎外兵參軍,前軍主 明帝以恢爲寧遠將軍,甲仗百 幼聰頴,年七歲,能通孝經、論語義,發擿無所 ,內外多虞,明帝就 人衞東府, 長沙宣武王懿求 海。 且引為驃騎 宣武之難, 法

還爲 |郢同二州諸軍事、後將軍、郢州刺史、持節如故。 二千戶。 冠軍 高 祖 二年。 將 義 軍 兵至,恢於新林奉迎,以爲輔國將軍。 · 、右 出 爲 衞 使持 將軍。 節 、都督南徐州諸軍事 天監元年,爲侍中、前將 、征虜將軍 義兵初,郢城內疾疫死者甚多,不及藏殯, 時三吳多亂,高祖命出頓 軍 、領石頭 南徐州 成軍 事 刺 史。 封 破崗。 鄱 四年,改授都督 陽 郡王,食邑 建康平,

及恢 下車,遽命埋掩。 又遣四使巡行州部,境內大治。七年,進號雲麾將軍,進督 霍州

使持節 軍 匹,以付所訂之家,資其騎乘,有用則以次發之,百姓賴焉。 中 載 儀 領 便道 年,復進 三年,遷散 一、開府 · 司 緝。 同 軍 將軍。 三司 之鎭。 徒, 都 日 方入正 號 儀 、荆州 É :「故使持節、散騎常侍、都督荆湘 騎 督 同三司、荆州刺史。 平 十八年,出爲使持節、散騎常侍、都督荆湘雍梁益寧南北秦八州諸軍事、征 成都去新城五 加 常侍、都督益寧南北秦沙七州諸軍事、三三 荆湘雍益寧南北梁南北秦九州諸軍事 ·西將軍。Clill十年,徵爲侍中、護軍將軍、石頭戍軍 故。 論 刺史鄱 道,弘 并給 陽王恢,風 變台階,奄焉 班 劍二 百里,陸路往来,悉訂私馬,百姓患焉,累政不 普通 一十人。 度 薨逝, 朕用 開 五 年,進號驃騎大將軍。 諡 朗 ,器情凝質。 日 忠烈 雍梁益寧南北秦 傷 。」遣中書舍 慟于厥 、平西將軍、荆州刺史,給鼓吹一部。 爱在 鎭西將軍、益州刺史,使持節如故, ì 弱歲,美譽克宣,洎于從 十七年,徵爲侍中、安前將軍 人 八州諸 宜 七年九月, 劉 ·事,領宗正 隆 顯 寵 護 軍 命,以申 ·事、驃騎 喪 能改。 事 薨于州, 卿。十一 朝 大 典。 恢乃市馬千 將軍、開 時年五 年,出爲 政,嘉猷 可贈侍 西將 府 十

眼術 恢請 遑 恢 有 便 孝 之。 廢 性 寢 旣至 食。 初 鎭蜀,所 俄 空 而 中 都信 生 忽見聖僧,及慧龍 費 至,太 太 妃 猶停 妃已瘳。 都,後於 下鍼,豁然開朗,咸謂 後又目有疾,久廢 都下 不豫,恢 未之知,一 視視 精誠 瞻,有北渡道 所致 夜 忽夢還侍疾,旣 人慧龍得治

第十六 太祖五王

列

傳

民,自有其職。 恢性 **,趙王好吏,二者孰愈。〕衆未有對者。** 通恕,輕財好施, 中山聽樂,可得任性,彭祖代吏,近於侵官。今之王侯,不守藩國,當佐天子 凡歷四州,所得 ·俸祿隨而散之。 顧謂 長 史蕭琛 曰:「漢時王侯,藩屛而已, 在荆州,常從容問賓僚曰:「中山 視 事 親

臨民、清白其優乎!」坐賓咸服。 世子範嗣

祖嘉其勞苦。 範字世儀,溫和有器識。 出爲益州刺史,開通劍道,剋復華陽,增邑一千戶,加鼓吹。 起家太子洗馬、秘書郎,歷黃門郎,遷衞尉卿。 毎夜自巡警, 徵爲領軍將

循將 持節 關,請兵于魏,遣二子爲質。魏人據合肥,竟不出師助範,範進退無計,乃泝流西上,軍于擬 事,進伐穰城。 史,鎭合肥。 子嗣 士,盡獲歡心。太淸元年,大舉北伐,以範爲使持節、征北大將軍、總督漢北征討諸 、都督雍梁東益南北秦五州諸軍事、鎮北將軍、雍州刺史。範作牧莅民,甚得時譽, **|**範雖無學術,而以籌略自命,愛奇翫古,招集文才,率意題章,亦時有奇致。 與裴之高等入援,遷開府儀同三司,進號征北將軍。京城不守,範乃棄合肥,出 時景已蓄姦謀,不臣將露,範屢啓言之,朱异每抑而不奏。 專遷安北將軍、南豫州刺史。 侯景敗於渦陽, 退保壽陽, 乃改範爲合州刺 及景圍京邑,範遣 復出爲使 東 軍

晉州, 陽,遺信告尋陽王。 商旅不通,信使距絕,範數萬之衆,皆無復食,人多餓死。 造子嗣 爲刺史。 尋陽要還九江,欲共治兵西上,範得書大喜,乃引軍至湓城,以晉熙爲 江州郡縣,輒更改易,尋陽政令所行,惟存一郡,時論以此 範恚,發背薨,時年五十二。 少之。

之秋也。」遂中流矢,卒於陣。 出壘距之。 ,皆得其死力。 世 子嗣,字長胤。 時賊勢方盛,成勸且止。 範之薨也,嗣猶據晉熙,城中食盡, 容貌豐偉,腰帶十圍。性驍果有膽略,倜儻不護細行, 嗣按劍叱之曰:「今之戰,何有退乎? 士乏絕,景遣任約來攻,嗣躬擐甲胄, 此蕭嗣效命死節 而能傾身養

議 弱 多軍 冠 爲 始 丁、遷相 西 興忠武王憺字僧達,太祖第十一子也。 中 郞 戜 法 從 曹行參軍 事 中郎, 一,遷外 與南平王偉留守。 兵參軍。 義 師 起,南康 數歲,所生母吳太妃卒,憺哀感傍人。 派王承制. ,以憺爲冠軍 |將軍 · 西 中郎諮 齊世,

偉遺憺赴之。 荆 州 和 屯 帝立,以 軍 上 明 |憺 憺 鎭 以 爲 書 軍 給 喻 將 事黃門侍 遺等, 旬 軍 蕭 額冑暴疾卒, 郎。 日皆請降。 時巴東 西 是冬,高祖平建業。 太守蕭慧訓子蹟等及巴西太守魯休烈 朝甚 惺 尚書僕射 夏侯 明年 詳 春,和帝將發江陵,詔 議 徴 兵 (雍州 南南 舉 兵 平王 逼

列

傳

第

以憺爲使持節、都督荆湘益寧南北秦六州諸軍事、平西將軍、荆州刺史,未拜。 任,思欲開導物情。 厲精爲治,廣闢屯田,減省力役,存問兵死之家,供其窮困,民甚安之。 憺自以少年始居重 用,於我何傷?吾開懷矣,爾其無吝。」於是小人知恩,而君子盡意。 加安西將軍、江門都督、刺史如故。 教,決於俄頃。曹無留事,下無滯獄,民益悅焉。三年,詔加鼓吹一 乃謂佐吏曰:「政之不臧,士君子所宜共惜。言可用,用之可 封始興郡王,食邑二千戶。[三時軍旅之後,公私空乏,憺 部。 民辭訟者,皆立前待符 天監元年, 也; 如不

憺 **邴州在南岸,數百家見水長驚走,登屋緣樹,憺募人救之,一口賞一萬,估客數十人應募救** ,州民乃以免。又分遣行諸郡,遭水死者給棺槥,失田者與糧種。是歲,嘉禾生於州界, 避焉。憺曰:「王尊尙欲身塞河堤,我獨何心以免。」乃刑白馬祭江神。俄而水退堤 立。 歸美,憺謙讓不受。 六年,州大水,江溢堤壞,憺親率府將吏,冒雨賦丈尺築治之。 雨甚水壯,衆皆恐,或請

徵 勞謙,降意接士,常與賓客連榻而坐,時論稱之。 八年,爲 以 七 本號還朝。 年,慈母 平北將軍、護軍將軍、領石頭戍事。 陳太妃薨,水漿不入口六日,居喪過禮,高祖優詔勉之,使攝州任。是冬,詔 民為之歌曰:「始興王,民之爹徒可反。赴人急,如水火。何時復來哺乳我。」 尋遷中軍將軍、中書令,CIKJ俄領衞尉卿。 是秋,出爲使持節、散騎常侍、都督南北克 憺性

足焉。 極。 事 命之元勳,利民之厚德,契闊二紀,始終不渝,是用方軌往賢,稽擇故訓,鴻名美義,允臻其 雍州, 薨於道。 年,遷都督荆湘雍寧南梁南北秦七州諸軍事、鎭右將軍、荆州刺史。 巴南,西圍南安,南安太守垣季珪堅壁固守,憺遺軍救之,魏人退走,所收器械甚衆。 徐青冀五州諸軍事、鎮北將軍、南兗州刺史。 「咨故侍中、司徒、驃騎將軍始興王:夫忠爲令德,武謂止戈,于以用之,載在前志。 月,薨,時年四十五。 、鎭西將軍、益州刺史。 今遣兼大鴻臚程爽、謚曰忠武。 天下稱其悌。 [慘聞喪] 自投于地,席稾哭泣,不飲不食者數日,傾財產賻送,部伍小大皆取 十八年,徵爲侍中、中撫將軍、開府儀同三司、領軍將軍。 追贈侍中、司徒、驃騎將軍。 開立 一學校, 魂而有靈,歆茲顯號。 勸課就業, 九年春,遷都督益寧南梁南北秦沙六州諸軍 遣子**映**親受經焉,由是多向 給班劍三十人,羽葆鼓吹一 嗚呼哀哉」 同母兄安成王秀將之 方者。 普通三年十 部。 時魏襲 王有佐 册曰: 四

憺未薨前,夢改封中山王,策授如他日,意頗惡之,數旬而卒。 世子|亮嗣。

盤 石凝脂, 樹斯梁、楚。 史臣曰:自昔王者創業,廣植親親,割裂州國,封建子弟。是以大旂少帛,崇於魯、衞, 高祖遠遵前軌,藩屏懿親。至於安成、南平、鄱陽、始興,俱以名跡

列傳第十

六

太

齟

五王

梁

著,蓋亦漢之間、怦矣。

校勘記

- 懿及融齊永元中爲東昏所害 「永元」各本譌「永明」,據南史梁長沙宣武王懿傳改。
- 臨川靖惠王宏 「靖」各本作「靜」。王鳴盛十七史商権六三:「靜惠,文中作靖惠,標題傳寫誤。

張敦 <u>、頤六朝事蹟卷下墳陵、碑刻二門,皆作靖惠,是。」按八瓊室金石補正卷十一著錄</u> 「梁故假

黄鉞侍中大將軍揚州牧臨川靖惠王之神道」,亦作「靖惠」,今並下文「靜惠」,皆改「靖惠」。

- 暢懼 者。 渦先 詳玩文誼,暢當作宏。」 赴臺 張森楷梁書校勘記:「暢行第四,宏行第六。 帝謂六弟明於事理,又若是謂宏
- **24** 遷西中 官,當是西中郎將之譌,今改正 郎將中護軍領石頭戍軍事 「西中郎將」各本作「西平郎將」,宋、齊、隋志,無西平郎將
- Ħ 天監十一 其年冬以公事左遷驃騎大將軍 年冬十一月。 南史:「十一年正月爲太尉,其年冬,以公事左遷驃騎大將軍。」則「其年」 「其年冬」,承上「八年夏」而言。 然據本書武帝紀,蕭宏左遷在
- 子賁嗣 「賁」,各本皆譌作「貴」,據南史及册府元龜二八四、二九四改。

當作「十一年」。

- \Box セレ 以本 號徵 領石頭戍事 「事」各本作「軍」,據册府元龜二八〇改
- **尋遷都督荆湘** 事 北」二字,九州只得八州。按鄱陽王恢傳,天監十一 、平西將軍、荆州 雍 益寧南北梁南北秦州九 刺 史。 督區、軍號及所刺之州 州諸軍 事 年,门 革 全 同。 西將軍荆 都督荆湘雅益 是此「秦州」明 州 刺 史 寧南 爲「南 秦州」 北梁南 北 上各本皆脫 秦州」,今據補 北 秦 九州 諸 南 軍
- へ た **い** 常以所得俸中 分與秀 「常」各本譌「帝」,據南史及册府元龜二七四 改
- 留行 雍州 州府 事 州 府事」各本譌「開府事」,據南史及册府元龜二八〇改。
- 徴爲 撫軍 將軍 「撫軍」各本譌「中撫」。 據本書武帝紀改。
- 八年復進號平西將軍 按本書武帝紀,蕭恢進號平西將軍在天監七年八月。
- 都督益寧南北秦沙七州諸 興忠武王儋傳謂儋於天監九年,都督益寧南梁南北秦沙六州諸軍事, 軍事 按此只有五州,疑脱南北梁 三州。 南梁, 其中 天監 有南梁。 中分 益 叉 州置,始 上文十
- 一年都督荆湘雍益寧南北梁南北秦九州諸軍事,亦有南北梁。
- 天監 元年加安西將軍 按本書武帝紀,蕭儋進號安西將軍在天監六年閏十月。
- 二吾 食邑二千戶 「二」各本作「三」。 據册府元龜二六四及徐勉梁故侍中司徒驃騎將軍始興忠武

列傳第十六 校勘記

尋遷中軍將軍中書令

三五七

「中軍」,南史及徐勉梁故侍中司徒驃騎將軍始興忠武王碑作「中衞」。

梁書卷二十三

列傳第十七

長沙嗣王業 永陽嗣王伯游 衡陽嗣王元簡

桂陽嗣王象

尉、梁南秦二州刺史,自加冠軍將軍。是歲,魏人入漢中,遂圍南鄭。 王行參軍,襲爵臨湘縣侯。遷太子舍人、洗馬、建安王友。出爲晉陵太守,曾未朞月, 率、尚書吏部郎、衞尉 懼,邊境逐寧。 多,乃解圍遁去。 和, 長沙嗣王業字靜曠,「己高祖長兄懿之子也。懿字元達,少有令譽。 稱爲善政。 進號征虜將軍,增封三百戶,遷督益寧二州軍事、益州刺史。入爲太子右衞 懿又遣氐帥楊元秀攻魏歷城、臯蘭、 駱谷、 坑池等六成, [三] 剋之,魏 入爲中書侍郎。 卿。 永元二年,裴叔業據豫州反,授持節、征虜將軍、督豫州諸軍事、 永明季,授持節、都督梁南北秦沙四州諸軍事、西戎校 懿隨機拒擊,傷殺甚 解褐齊安南邵陵 訟 人震

列

傳第十

七

長沙嗣

王業

追贈侍中、中書監、司徒。宣德太后臨朝,改贈太傅。天監元年,追崇丞相,封長 珍等所憚,乃說東昏曰:「懿將行隆昌故事,陛下命在晷刻。」東昏信之,將 時東昏肆虐,茹法珍、王咺之等執政,宿臣舊將,並見誅夷,懿旣立元勳,獨居朝右,深爲法 尚書右僕射,未拜,仍遷尚書令、都督征討水陸諸軍事 慧景遣其子覺來拒,懿奔擊大破之,覺單騎走。 豫 知之,密具舟江渚,勸令西奔。懿曰:「古皆有死,豈有叛走尚書令耶。」遂遇禍。 邑,奉江 目 1宣武。 州刺史, . 夏 王 給九旒、鸞輅、輼輬車,黃屋左纛,前後部羽葆鼓吹,挽歌二部,虎賁班劍百人,葬 領 寶玄圍臺城,齊室 歷陽 南譙二郡太守、討叔業, 大亂,詔徵懿。 叔業懼,降于魏。 乘勝 懿時方食, 而 ,持節、 進, 投箸 慧景衆潰, 將軍 旣而 而 ·如故, 起, 平西將軍崔慧景入寇京 率銳卒三千人援城 追斬之。四授侍 加酷害,而懿 增邑二千五百戶。 沙 中興元 郡王 所親

禮 **竞徐青冀五州諸軍事、仁威將軍、南兗州刺史。 八年,徵爲護軍。** 侍、太子右 二年,襲封 高 祖 一依晉安平王故事。 既至,乃赴于軍,以爲寧朔將軍。 幼 而 長 衞率,遷左 明敏、識度過人。仕齊爲著作郎、太子舍人。宣武之難,與二弟藻、象俱逃匿。 沙王,徵爲冠軍將軍,量置佐史,遷秘書監。 | 驍騎將軍,尋爲中護軍,領石頭戍軍事。 中興二年,除輔國將軍、南琅邪淸河二郡太守。 四年,改授侍中。 七年,出爲使持節、都督南克 九年,除中書令,改授安 六年,轉散騎常 天監

後 護軍,領南 將 軍、鎮琅邪彭城二郡、領南琅邪太守。 琅邪 彭城,鎮于琅邪。至沒徵中書令,出爲輕車將軍 十年,徵爲安右將軍、散騎常侍。 大湘州 刺 十四年,復爲

侍、護軍將 業性敦篤, 軍。(云) 所在留惠。 四年,改爲侍中、金紫光祿大夫。 深信因果, 篤誠 佛法, 高祖 七年,薨,時年四十八。諡曰沅。 每嘉歎之。 普通三年,徵爲散騎常 有文

集行於世

子孝嚴嗣

{烏 子愼嗣 華光殿、景陽山等頌, 孝 嚴字 希莊 ,聰慧有文才。 其文甚美, 射策甲科,除秘書郎、太子舍人。從幸華林園,於座獻相風 高祖深賞異之。 普通元年,薨,[刊]時年二十三。 諡

擊之。 信威將軍。 舉楯禦箭,叉命除之,由是人心大安。 年,封西昌縣侯,食邑五百戶。 天下草創,邊徼未安,州民焦僧 藻字靖藝, [5] 或陳不可,藻大怒,斬于階側。 九年、徵爲太子中庶子。 元王弟也。 護聚衆數萬,據鄭、繁作亂。[云] 藻年未弱冠,集僚佐議,欲 出爲持節、都督益寧二州諸軍事、 少立名行,志操清潔。 十年,爲左驍騎將軍、領南琅邪太守。 賊乃夜遁,藻 乃乘平肩輿, 命騎追之,斬首數千級, 巡行 齊永元初, 賊 壘。 賊弓亂射,矢下 冠軍 釋褐著作佐郎。 ·將軍 入爲侍中。 遂平之。 益 州 如 刺 酮 史。 天監 從 進 自 者 時 元

列

宗正卿。 洲 數鎭 司 祿大夫,置佐史,加侍中。 始降,乃以藻爲使持節、北討都督、征北 六年,爲軍師將軍,與西豐侯正德北伐渦陽,輒班師,爲有司所奏,発官削爵士。 左 子詹事,出爲丹陽尹。 、、中書令,侍中如故 將軍、尚書左僕射, 刺史。十二年,徵爲使持節、都督南兗兗徐靑冀五州諸軍事 7,民 更稱之。 | 八年,復封爵,尋除左衞將軍,領步兵校尉。 年, 出爲 推善下人,常如弗及。 使持節、都督雍梁秦三州竟陵隨二郡諸軍事、仁威將 加侍中,藻固辭不就,詔不許。大同五年,遷中衞將軍、開府儀同三 高祖每歎曰:「子弟並如迦葉,吾復何憂。」 中大通元年,遷護軍將軍, 大將軍,鎮于渦陽。 徵爲太子詹事。 中權如故。 大通元年, 。二年,爲中權將軍、[10] 普通 で、兗州 三年,遷領 三年, 遷侍中、中護 迦葉,藻小名也。 刺史,軍 爲中軍將軍 軍 軍 將 號 、寧蠻校 軍,加 軍。 如 七年,起爲 故。 時渦 金紫光 入爲安 大三三大 |尉、|雍 侍中。 頻莅 陽

散 閑 寂 祖 常侍、大將軍。 毎以 ,賓客罕通,太宗尤敬愛之。 |藻性恬靜,獨處一室,牀有膝痕,宗室衣冠,莫不楷則。 常以爵祿太過,每思 此稱之。 出爲使持節、督南徐州刺史。侯景亂,藻遣長子彧率兵入援,及城開,加 景遣其儀同蕭邕代之,據京口,藻因感氣疾,不自療。或勸奔江北,藻 自遭家禍,恒布衣蒲席,不食鮮禽,非在公庭,不聽音樂, 屏退,門庭

曰:「吾國之台鉉,位任特隆,旣不能誅翦逆賊,正當同死朝廷,安能投身異類,欲保餘生。」

因不食累日。太清三年,薨,時年六十七。

即位,追贈侍中、司空,封永陽郡王,諡曰昭。 之,以爲前後之政莫之及也。 進號寧朔將軍,徵爲廬陵王諮議參軍。 子舍人,洗馬,遷丹陽尹丞。 永陽嗣王伯游字士仁,高祖次兄敷之子。 入爲太子中舍人,除建威將軍、隨郡內史。 敷字仲達,解褐齊後軍征虜行參軍,江川轉太 建武四年,薨。 招懷遠近,黎庶安 高

東奧區,宜須撫莅,可督會稽東陽新安永嘉 襲封永陽 伯游美風神,善言玄理。 郡王。 五年,薨,時年二十三。 天監元年四月,韶曰:「兄子伯游,雖年識未弘, 諡曰恭。 臨海五郡諸軍事、輔國將軍、會稽太守。」二年, 意尙粗可。浙

年,追贈侍中、驃騎 **衡陽嗣王元簡字熙遠,高祖第四弟暢之子。** 大將軍、開府儀同三司。封衡陽郡 暢仕齊至太常,封江陵縣侯,卒。 諡 日宣。

列 傅 第 + 七 永 陽 嗣 Ŧ 伯 游 衡 陽 嗣 王 元 簡

諸 廣交越三州諸 軍事、信武將軍、郢州 元簡 三年 軍事 襲封,除 了、平越 中書郎,遷會稽太守。 刺史。 中郎將、 十八年正月,卒於州。 廣州 刺 史。 十三年,入爲給事黃門侍郎,出爲持節、都督 還爲太子中庶子 諡 日孝。 ,,遷使持節 子俊嗣。 、都督郢司 霍 三州

武之難,融遇害。 桂陽郡 桂 玉。 陽嗣王象字世翼,長沙宣武王第九子也。 諡曰簡。 高祖平京邑,贈給事黃門侍郎。 無子,乃詔象爲嗣,襲封爵 初, 天監元年,加散騎常侍、撫軍大將軍,封 叔父融仕齊至太子洗馬。 永元 力,宣

州刺史。 薨,去職。 領 改授持節、督江州諸軍事、信武將軍、江州刺史。 行石頭戍軍事,轉給事黃門侍郎、兼領軍,又以本官兼宗正卿。 爲持節、督司霍郢三州諸軍事、征遠將軍、郢州刺史。 步兵校尉。 象容止閑雅,善於交遊,事所生母以孝聞。 湘州舊多虎暴,及家在任,爲之靜息,故老咸稱德政所感。除中書侍郎,俄以本官 服闋,復授明威將軍、丹陽尹。像生長深宮,始親庶政,舉無失德,朝廷稱之。 大同二年,薨,諡曰敦。 子慥嗣。 起家寧遠將軍、丹陽尹。 以疾免。 尋遷湘衡二州諸軍事、輕車將軍、湘 尋除太常卿,加侍中,遷秘書監、 尋遷侍中、太子詹事,未拜, 到官未幾,簡王妃 出

史臣曰:長沙諸嗣王,並承襲土字,光有藩服。 桂陽王像以孝聞、在於牧湘、猛虎息暴,

蓋德惠所致也。 昔之善政,何以加焉。

校勘記

「」長沙嗣王業字靜曠 蕭業本名淵業,姚思廉避唐諱省去「淵」字;而於武帝紀則改「淵」爲「深」,

作「深業」。

梁南秦二州刺史 「南秦」各本譌「南梁」, 據南史改。 按上督區是「梁南北秦沙」, 則下不得更

爲「南梁」刺史。

改。

懿又遣氐帥楊元秀攻魏歷城臯蘭駱谷坑池等六戍

「駱谷」各本譌「駱火」,據南齊書魏虜傳

「坑池」、魏廣傳作「仇池」。

7 追斬之 「斬」各本譌「奔」,據南史及册府元龜二九〇改。

Œ. 鎭于 琅邪 「于」各本譌「牙」,據册府元龜二八〇改。

ベン 列 普通 傅 三年 第 + 徵爲散騎常侍護軍將軍 七 桂 陽 嗣 王 象 校 勘 本書武帝紀,蕭淵業爲護軍將軍在普通元年。 記

プセン 普通元年薨 蕭淵業死於普通七年,孝嚴嗣爵,則孝嚴不得死於普通元年。「普」字或爲「大」

字之譌,或爲「中大」二字之譌。

「【<】 藻字靖藝 藻本名淵藻、姚思廉避唐諱、省去「淵」字。

へたし 據郫繁作亂 「繁」百衲本、殿本等作「樊」。今據南史及册府元龜四一九改。

二年爲中權將軍 本書武帝紀,蕭淵藻爲中權將軍在中大通元年三月。是年十月方改元,在

十月前仍得稱大通三年,此「二年」當作「三年」。

三年爲中軍將軍 各本作「中將軍」、脫一「軍」字、據南史補。

解褐齊後軍征虜行參軍 「後」字下,原衍「將」字。按:徐勉故侍中司空永陽昭王墓誌銘作「解

褐齊後軍長沙王行參軍」,無「將」字,今據删。

梁書卷二十四

列傳第十八

蕭景弟昌昂昱

器,爲司徒建安王中兵參軍,一府稱爲長者,琅邪王僧虔尤善之,每事多與議決。 軍將軍、東陽太守。 之卒。高祖卽位,追封東昌縣侯,邑一千戶。子譽嗣。崇之以幹能顯,爲政尙嚴厲,官至冠 尉,卒官。天監初,追諡文宣侯。尚之子靈鈞,仕齊廣德令。高祖義師至,行會稽郡事,頃 歷宋太尉江夏王參軍,終于治書侍御史,齊末,追贈散騎常侍、左光祿大夫。 長子尚之,字茂先,次太祖文皇帝,次崇之。初,左光祿居於鄕里,專行禮讓,爲衆所推,仕 景八歲隨父在郡,居喪以毁聞。旣長好學,才辯能斷。齊建武中,除晉安王國左常侍, 蕭景字子昭,[1] 高祖從父弟也。 永明中,錢唐唐萬之反,別衆破東陽,崇之遇害。天監初,追諡忠簡侯。 父崇之字茂敬, 即左光祿大夫道賜之子。 尚之敦厚有德 道賜三子 遷步兵校

列

傳第

諸軍事 有疑滯· 景居州,清恪有威裁,明解吏職,文案無壅,下不敢欺,吏人畏敬如神。 將軍、監南兗州。 壁,景示 亦逃難。 遷 爲饘粥於路以賦之,死者給棺具,人甚賴焉。 還爲 こう 以威信, 驃騎行參軍。 高 冠軍將軍、南兗州刺 祖 義 師至,以景爲寧朔將 渠帥相率面 高祖 踐阼,封吳平縣侯,食邑一千戶,仍爲使持節、 永元二年,以長沙宣武王懿勳,除步兵校尉。 縛請罪, 史。 詔景母毛氏為國 軍、行南兗州軍 旬日境內皆平。 事。[三] 太夫人,禮 中興二年,遷督南兗州諸軍事 時天下未定,江北傖楚各據塢 如王國太妃,假金章紫綬。 都督南北克青冀四 是冬,宣武 會年荒,計 王遇害,景 口 **賑**卹, 、輔 州 或

蠻累爲邊患,可因此除之。景曰:「窮來歸我, 誅之不祥。 尋出為 局官僚,舊多驕侈,景在職峻切,官曹肅然。 子右衞率,遷輔 八年三月,魏荆州刺史元志率衆七萬寇潺溝,驅迫羣蠻,羣蠻悉渡漢水來降。 天監 使持節、督雍梁南北秦郢州之竟陵司州之隨郡諸軍事、信武將軍、寧蠻校尉、雍州 四年,王師北伐,景帥衆出淮陽,進屠宿預。 國將軍、衞尉卿。 七年,遷左驍騎將軍,兼領軍將軍。 制局監皆近倖,頗不堪 丁母憂,詔起攝職。 且魏人來侵,每爲矛盾,若悉誅 命,以是不得久留中。 領軍管天下兵要,監 五年,班 師 議者 、除太 以 刺

蠻, 孟 惠 則 儁 魏 擊 軍無礙,非長策也。」乃開樊城受降。 志 於 潺 溝 大破之,生擒志長史杜景。 因命司馬朱思遠、寧蠻長史曹義宗、中兵參軍 斬首 萬 餘 級,流屍蓋漢水,景遣中兵參軍崔

繢 率 軍 士 收 而 極焉

郡 軍 年 事 縣 皆 景 , 徵爲領軍 改 初 十二年,復 節 到 州 自 勵 ,省除參迎 將 軍 爲 州 使持 ,直殿省, 內清 節、督南北克北徐青冀 羽儀器服,不得煩擾吏人。 肅, 縁 漢 知十州損 水陸千餘 益 事,月 里,抄 加 五. 盜 祿 州 諸 修營城壘,申警邊備,理辭訟,勸農桑。 絕 五. 萬。 迹。 軍 事 十 一 、信威將軍 年,徵 ·、南兗州刺 右衞將軍、領 史。回 石頭 戍

隆 尤 爄 並 日 置 汝 稱 軍 佐 手 揚 景 明 國 ', 何 斷, 史, 州 爲 大 人雅 應 敢 事 侍 符 須 中 ', 皆 留之」其 敎 緝 有 如 嚴 理 與 風 故, 整。 一,宜得 議 力 決。 長 卽宅爲府。」 爲 有田 其 於辭 人 十五 所 人。 舍老 令。 畏 年, 敬 侍 姥 景越 如 中 其在 加 嘗 侍 此 訴 領軍 親 中。 朝 得 居 廷, 符, 將軍 揚 十七年, 州 爲 還 吳平侯景才 衆 至 辭 所 一縣,縣 讓 太 瞻 甚 尉、 仰。 懇 吏未. 惻, 任 揚 於高 卽 州 此 至于 . 發 舉 刺 祖屬雖為 (),姥語 丁, 可 史臨 沸泣 以安 川王 , 日 高 從弟, (右將) 宏 祖 蕭 不許。 坐 監州 軍 而 法 監 発。 禮 揚州 寄甚 在州

火

詔

安西將軍 十八年 ٠, 累表 郢州 陳解, 刺 史。 高 將發, 加 未 之 高祖幸建興苑餞別,爲之流涕。 許 明 年,出 爲 使持節 散騎常 侍、 旣 還宮, 都 督 郢 詔給 司 霍 鼓 三州 吹吹 諸軍 部

列

傳

第

+

在 略。 州 普通 復有能名。 匹 年, 卒于州,時年四十七。 齊安、竟陵郡接魏界, 多盜賊,景移書告示,魏卽焚塢戍保境,至不復使 韶贈侍中、中撫軍、開府儀同三司。 諡 日忠。 子勱

嗣

豫章 卿。 湘 郎 將 州 廣州 內史。 之始安諸軍事、信武將軍、衡州 其年,出爲安右長史。 昌 字子建,景第二弟也。 五. 刺史。 年,加寧朔將軍。 七年,進號 累遷太子中庶子、通直散騎常侍,又兼宗 征 齊豫章末,[t] 爲晉安王左常侍。 遠將軍。 六年,遷持節、督廣交越桂四 刺史,坐觅。 九年,分湘州置 十三年,起爲散騎 |衡州,以昌爲 州諸軍事 天監初,除中書侍郎, 侍 īΕ 持節 郎,尋 卿 輔 、督廣州 或 以本官兼宗 將 軍 平 之 綏 越 出爲 中 建

刑戮 縦酒 虚悸。 昌爲 頗 無期度。 人亦明悟,然性好酒,酒後多過。 在石頭東齋,引刀自刺,左右救之,不殊。 醉時所殺,醒或求焉,亦無悔 在州郡 也。 ,每醉輒逕出 屬 十七年,卒,時年三十九。子怕言 爲 有 司 所劾,入留京師,忽忽不樂,遂 入 人家,或獨詣草野。 其 於

景 再爲南党,德惠在人,及昂來代,時人方之馮氏。 昂 字 子明, 景第三弟也。 天監初, 累遷司 徒右長史,出爲輕車 徴爲 (琅邪、彭城二郡太守, 軍號如先。 將 軍、監南兗州。 初,兄

軍。 軍、太子中庶子,出爲吳興太守。 復以輕車將軍出爲廣州刺史。 中大通元年,爲領軍將軍。 普通二年,為散騎常侍、信威將軍。 二年,封湘陰縣侯,邑一千戶。 大通二年, 徵為仁威 將軍、衞尉 出爲江州刺史。 卿, 四年,轉散騎侍郎、中領 尋為: 侍中, 大同元年, 兼領 軍將

卒,時年五十三。諡曰"恭。

誠哉 功名 鄎。 實銜淚憤懣。潛伏東境,備履艱危,首尾三年,亟移數處,雖復飢寒切身,亦不以凍餒爲苦。 試,屢成干請。 每涉驚疑,惶怖失魄,旣乖致命之節,空有項領之憂,希望開泰,冀蒙共樂;豈期二十餘年, 而 雨祁寒,小人猶怨,榮枯寵辱,誰能忘懷!臣藉以往因,得預枝戚之重,緣報旣雜,時逢坎燷 不許。遷給事黃門侍郞。 可鄙 無紀,畢此 每求自試,高祖以爲淮南、永嘉、襄陽郡,並不就。 昱字子眞,景第四弟也。 昔在齊季,義師之始,臣乃幼弱,粗有識慮,東西阻絕,歸赴無由,雖未能負戈擐甲, ;自譽自伐,實在可羞。 然量己揆分,自知者審,陳力就列,寧敢空言,是以常願一 ,身骸,方塡溝壑,丹誠素願,溘至長罷,俯自哀憐,能不傷歎! 夫自媒自衒, 夫 上 應玄象,實不易叨;錦不輕裁,誠難其製。 上表曰:「夏初陳啓,未垂採照,追懷慚懼,實戰胸 天監初,除秘書郎,累遷太子舍人,洗馬,中書舍人, 志願邊州,高祖以其輕脫無威望,抑 過去業鄣,所以致乖算測。 ij 臣聞 中書侍 暑

列傳

第十

八

蕭景

章、興二人,並有名宗室,就欲習吏事,不過章爲平陰令,興爲緱氏宰,政事有能,方遷郡守, 處成長,於何取立,豈得任情反道,背天違地。 正是朝序物議,次第若斯,於其一 显諸兄遞居連率,相繼推轂,未嘗缺歲。 願;復問晉安、臨川,隨意所擇,亦復不行。 爲招遠將軍、鎭北長史、襄陽太守,又以邊外致辭,改除招遠將軍、永嘉太守,復 非直政績見稱,即是光武猶子。 韶答曰:「昱表如 聖 屛退私門。 伏願天照,特垂允許。 此。 古者用人,必前明試,皆須績用旣立,乃可自退之高。 普漢光武兄子 昱之才地,豈得比類焉!往歲處以淮南郡,旣不 門,差自無愧。 臣雖叨樂兩宮,報效無地,方違省闥,伏深戀悚。」高祖 其同產兄景,今正居藩鎭。 解巾臨郡,事不爲薄, 孰謂朝廷無有 無論今日不得如此; 憲章,特是未欲致之于理。 數有致辭, 朕豈厚於景而薄於昱, 昱兄弟昔在 意欲何在。且 云 ·肯行;續用 布衣,以 內 地 手

還,且令受菩薩 俄而暴疾卒,百姓行坐號哭,市里為之諠沸,設祭奠於郡庭者四百餘人。田舍有女人夏氏, 軍、晉陵太守。 五年,坐於宅內鑄錢,爲有司所奏,下廷尉,得觅死,徙臨海郡。 下車勵名迹,除煩苛,明法憲,嚴於姦吏,優養百姓, 戒。 昱旣至,恂恂盡禮,改意蹈道,持戒又精潔,高祖甚嘉之,以爲招遠將 旬日之間,郡中大化。 行至上虞,有敕追

表解

職。

可聽如啓。」坐発官。

因此杜門絕朝覲,國家慶弔不復通

年百餘歲,扶曾孫出郡,悲泣不自勝。 其惠化所感如此。 百姓相率爲立廟建碑,以紀其德。

又詣京師求贈諡。詔贈湘州刺史。諡曰|恭。

史臣曰:高祖光有天下,慶命傍流,枝戚屬嬈,咸被任遇。 蕭景之才辯識斷,益政佐時,

校勘記

蓋梁宗室令望者矣。

蕭景字子昭 蕭景本名昺, 姚思廉避唐諱,改「昺」爲「景」。 弘明集有衛尉卿蕭昺答釋法雲

難范縝神滅論。

行南兗 州 軍 事 文館詞林四 五七梁孝元帝郢州都督蕭子昭碑銘作 「行南兗州 事 Ŀ, 無「軍」字。

都督南北兗青冀四州諸軍

事

各本皆作

「都督北兗徐青冀四州諸

軍

事」。

文館詞林四

五.

七梁

孝元 帝 郢州都督蕭子昭碑銘作「督南北兗、靑、冀四州諸軍事」。 按:下云爲南兗州刺史,則 其所

督諸州必首爲南兗州。今據碑文補一「南」字,删一「徐」字。

29 信威將 軍 南兗州 刺史 「信威」梁孝元帝郢州都督蕭子昭碑銘作「信武

Ŧ. 魏卽 焚塢戍保境 「焚」各本作「禁」,據南史及册府元龜六九五改。

列傳第十八 校勘記

[代] 子勱嗣

「勱」各本作「勵」,據陳書江總傳改。

齊豫章末 齊有豫章王蕭嶷,無「豫章」年號,「豫章」二字當有誤,或是衍文。

梁書卷二十五

列傳第十九

周捨 徐勉

時。 捨幼聰頴,順異之,臨卒謂曰:「汝不患不富貴,但當持之以道德。」 旣長,博學多通,尤 周捨字昇逸,汝南安城人,晉左光祿大夫顗之八世孫也。 **父**顋,齊中書侍郎, 有名於

精義理,善誦書,背文諷說,音韻清辯。

講,捨造坐,累折包,辭理遒逸,由是名爲口辯。 起家齊太學博士、遷後軍行參軍。 建武中,魏人吳包南歸,有儒學,尚書僕射江而 王亮爲丹陽尹,聞而悅之,辟爲主簿,政事 招包

多委焉。遷太常丞。

列

傳第十九

周拾

之於高祖,召拜尚書祠部郎。 梁臺建,爲奉常丞。 高祖卽位,博求異能之士,吏部尚書范雲與顋素善,重捨才器,言 時天下草創,禮儀損益,多自捨出。 尋爲後軍記室參軍、秣陵

令。 夜侍 將 故 言漏 厦華堂 軍 人莫有至者,捨獨敦恩舊,及卒,身營殯葬,時人稱之。 ·,雖居職屢徙,而常留省內,罕得休下, 泄機事,衆尤歎服之。 .上,預 一、閨閣 (機密,二十餘年 重邃,捨居之則塵埃滿積。 未嘗離 性儉素,衣服器用,居處牀席,如布衣之貧者。 左右。 以获爲鄣, 壞亦不營。 捨素辯給,與人汎論談謔,終 國史詔誥,儀體法律,軍旅謀謨,皆兼掌之。 遷尙書吏部郎,太子右衞率,右衞 爲右衞, 日不 母憂 每入官府,雖 絕口,而竟無一 去 職,起爲 廣 明 日

頃之,加散騎常侍、本州大中正,遷太子詹 事

服闋、除侍中、領步兵校尉、未拜、仍遷員外散騎常侍、太子左衞率。

威將軍

、右驍騎將軍。

左右。 味,身靡兼衣。終亡之日,內無妻妾,外無田宅,兩兒單貧,有過古烈。 護軍將軍簡子捨,義該玄儒,博窮文史,奉親能孝,事君盡忠, 勞機要,多歷歲年,才用未窮,彌可嗟慟。 爲有司所奏,捨坐免。 部、給東園秘器、朝服一具、衣一襲、喪事隨由資給。 普通 詔曰:「太子詹事、豫州大中正捨,奄至殞喪,惻愴于懷。 五年,南津獲武陵太守白渦書,日一許遺捨面錢百萬, 遷右驍騎將軍,知太子詹事。 宜隆追遠,以旌善人。 以其年卒,時年五十六。 諡曰簡子。」明年,又詔曰:「故侍中、 歷掌機密,清貞自居。 津司 其學思堅明, 可贈 以聞。 侍 中、護軍 往者,南司白渦之 雖書自外入,猶 志行開 上臨哭,哀慟 將 軍,鼓吹 食不重 敏, 劬

劾, 恐外議謂朕有私,致此黜免,追愧若人一介之善。 外可量加褒異,以旌善人。」二子: 弘

義,弘信。

徐勉字脩仁,東海郯人也。 祖長宗,宋高祖霸府行參軍。父融,南昌相。

好 勉幼孤貧,早勵淸節。 起家國子生。 太尉文憲公王儉時爲祭酒,每稱 年六歲,時屬霖雨,家 人祈霽,率爾爲文,見稱耆宿。 勉有宰輔之量。 射策舉高第,補 及長,篤志 西

裾。」俄而元長及禍,時人莫不服其機鑒。

邪王元長才名甚盛,嘗欲與勉相識,每託

人召之。

勉謂人曰:「王郎名高望促,

難可

輕樂衣

王國侍郎。

尋遷太學博士,鎭軍參軍,尚書殿

中郎,以公事

趸。

又除中兵郎、領軍長史。

琅

管書記。 初與長沙宣武王遊,高祖深器賞之。 高祖踐阼,拜中書侍郎,遷建威將軍、後軍諮議參軍、本邑中正、尚書左丞。 及義兵至京邑,勉於新林謁見,高祖甚加恩禮,使 自掌

樞憲,多所糾舉,時論以爲稱職。

勉參掌軍書,劬勞夙夜,動經數旬,乃一還宅。 天監二年,除給事黃門侍郎、尚書吏部郎, 参掌 每還,羣犬驚吠。 大選。 遷侍中。 時王 勉歎曰:「吾憂國忘 師北伐, 候驛塡

列傳第十九 徐勉

選官,彝倫有序,旣閑尺牘,兼善辭令,雖文案塡積,坐客充滿, 家,乃至於此。 綜百氏,皆爲避諱。 若吾亡後,亦是傳中一事。」六年,除給事中、五兵尚書,遷吏部尚書。 常與門人夜集,客有虞屬求詹事五官,勉正色答云:「今夕止可談風月, 應對如流, 手不停筆。 叉該 勉居

不宜及公事。」故時人咸服其無私。

宮。 騎將軍,尋加散騎常侍,遷尚書右僕射,詹事如故。 賢,妙盡時譽,勉陳讓數四。又與沈約書,求換侍講,詔不許,然後就焉。 尚書令沈約備二傅,勉與國子祭酒張充爲執經,王瑩、張稷、柳憕、王陳爲侍講。 昭明太子尚幼,敕知宮事。 除散騎常侍,領游擊將軍,未拜,改領太子右衞率。 太子禮之甚重,每事詢謀。 又改授侍中,頻表解宮職,優詔不許。 遷左衞將軍,領太子中庶子,侍東 嘗於殿內講孝經,臨川靖惠王、 轉太子詹事,領雲 時選極親

悉關 豪家,乃或半晷,衣衾棺椁,以速爲榮,親戚徒隸,各念休反。 告斂之晨,申其望生之冀。請自今士庶,宜悉依古,三日大斂。 者,以俟其生也,三日而不生,亦不生矣。』自頃以來,不遵斯制。送終之禮,殯以朞日,潤屋 鼠之顧步,愧燕雀之徊翔。 他手,愛憎深淺,事實難原,如覘視或爽,存沒違濫,使萬有其一,怨酷已多,豈若緩其 時人間喪事,多不遵禮,朝終夕殯,相尙以速。 傷情滅理,莫此爲大。且人子承衾之時,志懣心絕,喪事所資, 勉上疏曰:「禮記問喪云:『三日而後斂 故屬纊纔畢,灰釘已具,忘狐 如有不奉,加以糾繩。」詔可

嘗漏洩。 重位,盡心奉上。 尋授宣惠將軍,置佐史,侍中、僕射如故。 每有表奏,輒焚藁草。 知無不爲。 爰自小選,迄于此職,常參掌衡石,甚得士心。禁省中事,未 博通經史,多識前載。 又除尚書僕射、中衞將軍。 朝儀國典,婚冠吉凶,勉皆預圖議。 勉以舊恩,越升

普通六年,上修五禮表日

章尤備,因殷革夏,損益可知。 則致亂於師律,冠婚不以禮,則男女失其時。 則不齊不莊,喪紀不以禮,則背死忘生者衆,賓客不以禮,則朝覲失其儀,軍旅不以禮, 有五,即宗伯所掌典禮:吉爲上,凶次之,賓次之,軍次之,嘉爲下也。 禮所以安上治民,弘風訓俗,經國家,利後嗣者也。唐虞三代,咸必由之。 臣聞「立天之道,日陰與陽;立人之道,日仁與義」。故稱「導之以德,齊之以禮」。夫 雖復經禮三百,曲禮三千,經文三百,威儀三千,其大歸 爲國修身,於斯攸急。 故祠祭不以禮, 在乎有周,憲

粉綸,遞有興毀,或以武功銳志,或好黃老之言,禮義之式,於焉中止。及東京曹襃,南 暴秦滅學,掃地無餘。 章缺矣。 洎 周室大壞,王道旣衰,官守斯文,日失其序,禮樂征伐,出自諸侯,小雅盡廢,舊 是以韓宣適魯,知周公之德,叔侯在晉,辨郊勞之儀。 漢氏鬱興,日不暇給,猶命叔孫於外野,方知帝王之爲貴。 戰國從橫, 政敎愈泯; 末葉

三七九

列

晉初,爰定新禮,荀顗制之於前,擊虞删之於末。 宮制述, 句旣淪, 集其散略,百有餘篇,雖寫以尺簡,而終闕平奏。 俎豆斯輟。 方領矩步之容, 事滅於旌鼓; 蘭臺石室之文, 用盡於帷蓋。 旣而中原喪亂,罕有所遺,江左草創, 其後兵革相尋,異端互起,章 至乎

因循而已。

釐革之風,是則未暇。

雍,人從五典,秩宗之敎,勃焉以興。 碩學,闡曲臺之儀。溫上淹中之儒,連蹤繼軌,負笈懷鈆之彦,匪旦伊夕。諒以化穆三 之費、「三固亦日書左史、副在司存、今可得而略也。是以命彼羣才、搜甘泉之法、延茲 **德形容備矣,天下能事畢矣。明明穆穆,無德而稱焉。** 業定。光啓二學,皇枝等於貴遊,闢茲五館,草萊升以好爵。 伏惟陛下睿明啓運,先天改物,撥亂惟武,經世以文。〔三〕作樂在乎功成,制禮弘於 至若玄符靈貺之祥,浮溟棧山 爱自受命, 迄于告成, 盛

建武 於此遇禍,又多零落。當時鳩斂所餘,權付尚書左丞蔡仲熊、驍騎將軍何佟之,共掌其 猶未克就。 及文憲薨殂,遺文散逸,後又以事付國子祭酒何胤,經涉九載,猶復未畢。 議置新舊學士十人,止修五禮,諮禀衞將軍丹陽尹王儉,學士亦分住郡中,製作歷年, 四年,胤還東山,齊明帝敕委尚書令徐孝嗣。舊事本末,隨在南第。永元中,孝嗣 伏尋所定五禮,起齊永明三年,四太子步兵校尉伏曼容表求制一代禮樂,于時參

條牒 常 鎭 年, 金 区 軍 禮 事 依 沈 以 定,以爲 議 人 卿 禮 約 聲, 北 陸 前 歷 删 中 佟之啓審省置之宜,敕使外詳。 連掌 漢 啓 復 張 諮 一選,欲且省禮局,併還尚書儀曹。 等參議, 年不就,有名無實。 時修禮局住在國子學中門外,東昏之代,頻有軍火,其所散失,又踰太半。 義 石渠 聞 豫 充 復 議 永准。 貫 騎兵參軍 參 参軍 軍 及 以 幽 决 知 禮,右軍參軍 臣三人同 禮 、後漢白虎,隨源以聞,請旨斷決。 微, 之 請五 儀 伏暅代之。 制旨。 但頃之修撰,以情取人,不以學進,其掌知者,以貴總一,不 若有 深 理 嚴植 |禮各置舊學士一人,人各自舉學士二人,相助抄撰。 廣、記 入神契, 疑義 參厥務。 疑 之掌凶禮, 此旣經國所先,外可議其人,人定,便卽撰次。」於是尚書僕射 事 載殘缺,宜須博 司馬褧掌嘉禮,至尚書左丞何佟之總參其事。 後 ,所掌學士 旣 前儒所不釋,後學所未聞。 又以暅代嚴植之掌凶 多,歲 臣 叉奉別 中軍田曹行參軍兼太常丞賀瑒掌賓禮,征 時尚書參詳,以天地初革,庶務權輿,宜俟隆平,徐 時 當 又積,制旨 職先 詔旨云:「禮壞樂缺,故國異家殊,實宜以時修 敕,總知 論 一、共盡 立. 議 乃以舊學士右軍 其事。 裁 其致, 禮。 通諮 斷,其數 五. 晒尋遷官, 更使鎭軍 凡諸奏決,皆載篇首, 末 禮 又使中書侍 不 舊 少 學士 記 ′,莫不 將軍 室 以 及參知,各言同 參 五經博士繆昭 丹陽 網羅 郎周 軍明 其 佟之亡後,以 捨 、中有疑者, 以稽古,所 經 尹 虜 山賓掌吉 語,玉 沈約、太 、庾於陵 具列聖 天監 記室參 . 異 掌 元 振

列

旨,爲不刊之則。 洪規盛範,冠絕百王; 茂實英聲, 方垂千載。 寧孝宣之能擬,豈孝章

五年二月始獲洗畢。 千一百七十六卷,八千一十九條。又列副祕閣及五經典書各一通,繕寫校定,以普通 七日上尚書,合四十有七秩,五百一十四卷,五千六百九十三條:大凡一百二十秩,一 日 書,合十有二秩,一百一十六卷,日五百三十六條,寶禮儀注以天監六年五月二十日 日上尚書,合十有八秩,一百八十九卷,二百四十條,吉禮儀注以天監十一年十一月十 上尚書,合十有七秩,一百三十三卷,五百四十五條,軍禮儀注以天監九年十月二十九 上尚書,合二十有六秩,二百二十四卷,一千五條,以禮儀注以天監十一年十一月十 五禮之職,事有繁簡,及其列畢,不得同時。 嘉禮儀注以天監六年五月七日上尚

任,淹留歷稔,允當斯責,兼勒成之初,未遑表上,寔由才輕務廣,思力不周,永言慚惕, 武二王,所以綱紀周室,君臨天下,公旦脩之,以致太平龍鳳之瑞。 隨 日。孔子曰:「其有繼周,雖百世可知。」[+] 豈所謂齊功比美者歟! 臣以庸識, 謬司其 [事附益。質文相變,故其數兼倍,猶如八卦之爻,因而重之,錯綜成六十四也。 昔文 竊以撰正履禮,歷代罕就,皇明在運,厥功克成。周代三千,舉其盈數,今之八千, 自斯厥後, 甫備茲

乎洋 無忘 逝 一,臣 溢,信 寤寐。 雖 幸存,耄已將及,慮皇世大典,遂闕騰奏,不任下情,輒具載撰修始末,并職掌 可以懸諸日月,頒之天下者矣。 自今春輿駕將親六師,搜尋軍禮,閱其條章,靡不該備。,所謂郁郁文哉,煥 愚心喜抃,彌思陳述,兼前後聯官,一時皆

人、所

成

卷秩、條目之數,謹拜表以聞。

章孔 者 詔 差還省。 乃令停下省,三 其 曰:「經禮大備, 按 備, 辺 功成業定,於是乎在。 遵行,勿有失墜。」尋加中書令,給親信二十人。 一日一朝,有事遣主書論決。 政典載弘, 今詔有司,案以行事也。」又詔曰:「勉表 可以光被八表, 脚疾轉劇,久闕朝覲,固陳求解,詔乃賚假,須疾 施諸百代,俾萬世之下,知斯文在斯。 勉以疾自陳,求解內任,詔不許, 如此。 因革允釐,憲

勉 乃答曰 勉 雖 一一人 居顯位,不營產業,家無蓄積,俸祿分贍親族之窮乏者。門人故舊或從容致言。 遺 子 孫 以 財,我遺之以清白。 子孫才也、則自致輜軿、如其不才、終爲他有。」

嘗爲書誡其子崧曰:

慶,故臻此 逢,遂至今日,尊官厚祿,可謂備之。 吾家 世清 耳。 廉, 古人所謂「以清白遺子孫,不亦厚乎。」又云:「遺子黃金滿籯, 故常居貧素,至於產業之事,所未嘗言,非直 毎念 叨竊若斯, 岩 由 才 致, 仰藉先代 不經營而 風範 不如 薄躬遭 及 以 福

列

亦令貨殖聚斂。 以來,將三十載,門人故舊,亟薦便宜,或使創闢田園,或勸興立邸店,又欲舳艫運致, 經 |。」詳求此言,信非徒語。 若此衆事,皆距而不納。 吾雖不敏,實有本志,庶得遵奉斯義,不 非謂拔葵去織,且欲省息紛 敢墜失。 紅 所以顯貴

房宇。 至耳。 蓮。 屬。 不可 郊 價 娛休沐, 甲第,連 方 止 一,吾清明門宅,無相容處。 ·際閑曠,終可爲宅,儻獲懸車致事,實欲歌哭於斯。 幅,意亦謂 所 華 得,何 中 雖 中年聊於東田間營小園者,非在播藝,以要利入,正欲穿池種樹,少寄情賞。 塗而 樓 云 近營東邊兒孫二宅,乃藉一住南還之資,其中所須,猶爲不少,旣牽挽不至,又 憶謝靈運山家詩云:「中為天地物,今成鄙夫有。」吾此園有之二十載矣,今為天 闥 用 人外,城 迥 以至 託 ·洞房,宛其死矣,定是誰室。但不能不爲培塿之山,聚石移果,雜以花卉,以)榭,頗 一輟,郊間之園,遂不 此逆旅舍耳,何事須華?常恨時人謂是我宅。古往今來,豪富繼踵,高門 性靈。隨便架立,不在廣大,惟功德處,小以爲好。所以內中逼促,無復 此? 闕 有 由吾經始歷年,粗已成立,桃李茂密,桐竹成陰,塍陌交通,渠畎相 [密邇,韋生欲之,亦雅 臨眺之美;孤峯叢薄,不無糾紛之興。 所以爾者,亦復有以,前割西邊施宣武寺,既失西廂,不復 ·辨保,貨與韋黯,乃獲百金,成就兩宅,已消其半。尋園 有 「情趣。 追述此事,非有客心,蓋是筆 慧日、十住等,既應營婚,又須住 瀆中並饒茲 游,湖 裏殊富芰 勢所 叉以

髴。 汝 且 地 有所收穫, |釋氏之敎,以財物謂之外命,儒典亦稱「何以聚人曰財」。況汝曹常情,安得忘此。 所買姑孰 物,物之與我,相校幾何哉!此吾所餘,今以分汝,營小田舍,親累旣多,理亦須此。 孔 子曰 汝 : 「居家理治,可移於官。」 旣已營之,宜使成立。, 進退兩亡, 更貽 田 可自分贍內外大小,宜令得所,非吾所知,又復應沾之諸女耳。 地,甚爲层鹵,彌復 何安。 所以 如此,非物競故 也。 雖事 異寢丘,聊可髣 「恥笑。 汝旣居 聞

長,故有此

及。

別。 殫,牽課 家已來 暫樂,庶居常以 徒棄日 文案間隙,負杖 後其身而 庾盈 自茲以後,吾不復言及田事,汝亦勿復 凡爲人長,殊復不易,當使中外諧緝,人無問言,先物後己,然後可貴。 ,不事資產,旣立墅舍,以乖 ,乃是棄身,
「<> 奉 箱,爾之幸遇。 身先。」若能 公,略不克舉,其中餘暇,裁可自休。 待終,不宜復勞家間 、躡屬,逍遙陋館,臨 身名美惡,豈不大哉 爾者,更招巨利。 如斯之事,並無俟令吾知也。 池 舊業,陳其始末,無愧懷抱。 細務。 觀魚,披林 汝當自 ! 與吾言之。 汝交關旣定,此書又行,凡 可不愼歟? 勗 聽鳥,濁酒一杯,彈琴一曲,求數 或復冬日之陽,夏日之陰, 假使堯水湯旱,吾豈 記云:「夫孝者,善繼人之志,善 今之所敕,略言此意,正 兼吾年時朽暮,心力稍 所資須,付給 以棄 知 良辰美景, 日也。 老生云: 如 何,若 刻之 謂 爲 非 如

列傳

述人之事。」今且望汝全吾此志,則無所恨矣。

勉第二子悱卒,痛悼甚至,不欲久廢王務,乃爲答客喻。 其辭曰:

宫並降中使,以相慰勗,親遊賓客,畢來弔問,輒慟哭失聲,悲不自已,所謂父子天性, 普通五年春二月丁丑,余第二息晉安內史悱喪之問至焉,舉家傷悼,心情若隕。二

不知涕之所從來也。

益,同之兒女,傷神損識,或虧生務。門下竊議,咸爲君侯不取也。」 右、憂深責重,休戚是均,宜其遺情下流,止哀加飯,上存奉國,俯示隆家。 豈可縱此無 爾忘懷。 春榮秋落,氣象之定期。 人居其間,譬諸逆旅,生寄死歸,著於通論,是以深識之士,悠 於是門人慮其肆情所鍾,容致委頓,乃斂衽而進曰:「僕聞古往今來,理運之常數; 東門歸無之旨,見稱往哲,西河喪明之過,取誚友朋。足下受遇於朝,任居端

然得失之際,不見喜慍之容。 悌之至,自幼而 息 ,析彼歧路,楊子所以留連。 事有可深,聖賢靡抑。 今吾所悲,亦以悱始踰立歲,孝 余雪泣而答曰:「彭殤之達義,延吳之雅言,亦常聞之矣;顧所以未能弭意者,請陳 夫植 .樹階庭,欽柯葉之茂,爲山累仞,惜覆簣之功。 故秀而不實,尼父爲之歎 長,文章之美,得之天然,好學不倦,居無塵雜,多所著述,盈帙滿笥,淡 及翰飛東朝,參伍盛列,其所遊往,皆一時才俊,賦詩頌

閩 旬 歸 以 詠,終日忘疲。 區 骨之期,雖復無情之倫,庸詎不痛於昔!夷甫孩抱中物,尚盡慟以待賓,安仁未及七 報恩明主,克保元吉。 猶 一,政存淸靜,冀其旋反,少慰衰暮,言念今日,眇然長往。 慇懃於詞賦。況夫名立宦成,日治半途而廢者,亦焉可已已哉。 每從容謂吾以遭逢時來,位隆任要,當應推賢下士,先物後身,然後 **俾余一紀之中,忝竊若是,幸無大過者,緊此子之助焉。** 加以闔棺千里之外,未知 求其此懷,可謂 自 出 可

殯, 乃 虧,頻 贈錢二十 增 親 信 苗 中 詔 啓停出,詔許之, 大通 實之義。 四十人。 贈 ·萬,布 特 三年,又以疾自陳,移授特進、右光祿 進、右光祿 百匹。 諸賢既貽格言,喻以大理,卽日輟哀,命駕脩 兩宮參問,冠蓋結轍;服膳醫藥, 皇太子亦舉哀 遂停輿駕。 大夫、開府儀同三司,餘並 大同 、朝堂。 元年,卒,時年七十。 諡 日簡 大夫、侍中、中衞將軍,置佐史, 一如故。 皆資天府。 肅 公。 給東園秘器,朝服一具,衣一襲。 職事焉。」 高祖 有敕每欲臨幸, 聞 而 流涕, 勉 刨 以拜伏有 日車駕臨 餘如故。

百卷 年,故佐史尚書左丞 歸,撰會林五 汽包左丞 勉 善 屬 文, 一十卷。 彈 勤著述,雖當機務,下筆不休。 事 五卷; 劉覽等詣闕陳勉行狀,請刊石紀德,卽降詔許立碑於墓云。 凡所 著前 在選曹, 後二 撰選品五卷,齊時,撰 集四十 ·五卷, 嘗 叉為 以起 婦人集 居注 太廟祝文二卷,以 煩雜,乃加删 十卷,二二 皆行 撰為流別起居注六 孔 於世。 釋 二教 、殊途 大同三 同

舍 人,猶管書記。 出入宫坊者歷稔,以足疾出爲湘東王友,遷晉安內史。 起家著作佐郎,轉太子舍人,掌書記之任。 累遷洗馬、中

光日月,故能明經術以綰青紫,出閭閻 王,提衡端軌,物無異議,爲梁宗臣,盛矣。 陳吏部尚書姚察曰: 徐勉少而厲志忘食,發憤脩身,愼言行,擇交遊;加運屬興王,依 而取 卿相。 及居重任,竭誠事主,動師古始,依則先

校勘記

普通五 年南津獲武陵太守白渦書 南史周捨傳作「普通五年, 南津校尉郭祖深獲始興相白渦

書」。本書武帝紀及南史郭祖深傳皆云南津校尉置於普通七年, 且卽以郭祖深任校尉, 則普通

五年當作普通七年。 白渦是武陵太守或始興相,則無以決。

經世以文 「世」各本作「時」,南史作「俗」,皆以避唐諱改,今改回。

トドリ 浮溟棧山之費 「棧」,各本譌『機」,據册府元龜五六三改。 按: 顏延年三月三日曲水詩序有

「棧山航海」語,與此同義。

兵校尉伏曼容表定禮樂」。

五 右軍參軍司馬褧掌嘉禮 「褧」各本譌「裴」,據南史改。

ハベン 一百一十六卷 「百」字上「一」字,各本脫,據南史及册府元龜五六三補。

フキコ 雖百世可知 「世」各本作「代」。此語本論語,姚思廉避唐諱改,今改回。

非徒棄日乃是棄身「非徒」二字各本皆脫,據藝文類聚二三補。

八九山 況夫名立宦成 「宦」各本譌「官」,今改正。

 C_{0} 乃加删撰爲流別起居注六百卷 「流」字各本脫去,據南史補。

流別,即分類。

又爲婦人集十卷 南史作「又爲人章表集十卷」。

列

傳 第 +

梁書卷二十六

列傳第二十

范岫 傅昭 弟映 蕭 琛 陸杲

范岫字懋賓,濟陽考城人也。

高祖宣,晉徵士。

父羲,宋兗州別駕。

西將軍,引爲主簿。 岫 早孤,事母以孝聞,與吳興沈約俱爲蔡興宗所禮。 累遷臨海、長城二縣令,驃騎參軍,尚書删定郎,護軍司馬,齊司徒竟陵 泰始中,起家奉朝請。 興宗爲安

王子良記室參軍。

約,而名行爲時輩所與,博涉多通,尤悉魏晉以來吉凶故事。約常稱曰:「范公好事該博,胡 廣無以加。」南鄉范雲謂人曰:「諸君進止威儀,當問范長頭。」以岫多識前代舊事也。 累遷太子家令。 文惠太子之在東宮,沈約之徒以文才見引,岫亦預焉。 岫文雖不逮

遷國 列 子 傳 博 第 = 士。 十 永明 范 中,魏使至,有詔妙選朝士有詞辯者,接使於界首,以岫兼濮陰長史 岫 三九一

迎焉。 職,遷右軍諮議 還遷尙書左丞,母憂去官,尋起攝職。出爲寧朔將軍、南蠻長史、南義陽太守,未赴 參軍, 郡如故。 除撫軍司馬。 出爲建威將軍、安成內史。入爲給事黃門侍

郎,遷御 史中丞、領前軍將軍、南北兗二州大中正。永元末, 出為輔國將軍、冠軍晉安王長

史,行南徐 州 事。 義師平京邑,承制徵爲尚書吏部郎,參大選。 梁臺建,爲度支尚書。 天監

侍、右衞將軍,中正 五年,遷散騎常侍、光祿大夫,侍皇太子,給扶。 六年,領太子左衞率。 一如故。 其年表致事,詔不許。八年,出爲晉陵太守,秩中二千石。 七年,徙通直散騎常 九年,

入爲祠部尚書,領右驍騎將軍,其年遷金紫光祿大夫,加親信二十人。十三年,卒官,時年

七十五。賻錢五萬,布百匹。

雙,猶以爲費。所著文集、禮論、雜儀、字訓行於世。二子懷,偉。 以 廉潔著稱。 岫身長七尺八寸,恭敬嚴恪,進止以禮。 爲長城令時,有梓材巾箱至數十年,經貴遂不改易。 自親喪之後,蔬食布衣以終身。 在晉陵,惟作牙管筆一 每所居官,恒

世。 淡事宋竟陵王劉誕,誕反,淡坐誅。 昭六歲而孤,哀毁如成人者,宗黨咸異之。十一,隨 **傅昭,字茂遠,北地靈州人,晉司隸校尉咸七世孫也。** 祖和之,父談,善三禮,知名宋

戶,輒 或有 外祖 爲所禮 「此兒 英妙 稱昭 於朱雀航賣曆日。 神 擅 歎 一,辟爲 (日:「經: 情不 山東,才子傾洛陽。 於廷尉 郡 凡,必成 其戶 主簿 虞 愿) 寂若 ,使諸子從昭受學。 《佳器。」司 ,愿乃遣車迎昭。 爲雍州刺史袁顗客,顗嘗來昭所,昭讀書自若,神色不改。 無 人,披其帷,其 清塵誰 徒建安王休仁聞 能 嗣 時愿宗 ,及爾遘遺芳。」太原王延秀薦昭於丹陽 會明帝崩,緊造哀策文,乃引昭定其所制。 人斯 人通之在坐, 在,豈非名賢。」尋爲總明學士、奉朝請。 而悅之, 因欲致 並當 昭,昭以宋氏多故,遂不 世名流, 通之贈 尹 袁粲,深 顗 昭 毎經 詩 歎 齊 昭

牀,明帝聞之,賜漆合燭盤等, 記室參軍,長水校尉,自立太子家令,驃騎晉安王諮議參軍。 求 權寵,惟昭及南陽宗夬,保身守正, 先是御 時居此 史中丞劉 職者,皆勢傾天下,昭獨 休薦昭於武 敕曰:「卿有古人之風,故賜 帝 無所參入, 永明初, 廉靜,無所 以昭 竟不罹 于 豫。 爲 南 器服 其 郡王 禍。 卿古人之物。」累遷車 尋除尚書左丞、本州 一侍讀。 率 明帝 陋,身安粗 王嗣 踐 阼 . , 引 帝位,故時臣 糲。 |昭 常插 爲 大 騎 中 中 燭 書 蹜 於板 隸 海 通 事 爭

永

明

中

,累遷員

八外郎

、司徒竟

陵王子良

|参軍、尚書儀

曹

郎

頃之,公 六年,徙爲左民尚書,未拜,出爲建威將軍、平南安成王長史、尋陽太守。七年,入爲振遠 高祖 棄御史中丞,黃門、著作、中正 素悉昭能,建康 城平,引爲 並 驃騎錄事 一如故。 一參軍。 天監三年,兼五兵尚書,參選 梁臺建,遷給事黃門侍郎, 事, 四 ら年, 領著作郎, 卽 眞

列

傅

第

尙書。

將軍、中權長史。八年,遷通直散騎常侍,領步兵校尉,復領本州大中正。十年,復爲左民

致。 暴雨,倏忽便至,數間屋俱倒,卽夢者所見軍馬踐蹈之所也。 夜夢見兵馬鎧甲甚盛,又聞有人云「當避善人」,軍衆相與騰虛而逝。夢者驚起。俄 郡溪無魚,或有暑月薦昭魚者,昭旣不納,又不欲拒,遂餧于門側 十一年,出爲信武將軍、安成內史。安成自宋已來兵亂,郡舍號凶。 自後郡舍遂安,咸以昭正直所 及昭爲郡,郡內人 而疾 風

夫,領本州大中正,尋領秘書監。 乃敎勿封。縣令常餉栗,置絹于薄下,昭笑而還之。一普通二年,入爲通直散騎常侍、光祿大 十二年,入爲祕書監,領後軍將軍。 郡有蜜巖,前後太守皆自封固,專收其利。 五年,遷散騎常侍、金紫光祿大夫,中正 十四年,遷太常卿。 昭以周文之囿,與百姓共之,大可喻小, 十七年,出爲智武將軍、臨海 一如故。

以爲不逮。 則不可,取而埋之。」其居身行己,不負闇室,類皆如此。 而 日端居,以書記爲樂,雖老不衰。 論之,無所遺失。 昭所莅官,常以清靜爲政,不尙嚴肅。 大通二年九月、卒、時年七十五。詔賻錢三萬、布五十匹、卽日舉哀、諡曰貞子。 性尤篤愼。 子婦嘗得家餉牛肉以進,昭召其子曰:「食之則犯法,告之 博極古今,尤善人物,魏晉以來,官宦簿伐,姻通內外,舉 居朝廷,無所請謁,不畜私門生,不交私利。 京師後進,宗其學,重其道,人人自

斑白,時人美而服焉。及昭卒,映喪之如父,年踰七十,哀戚過禮,服制雖除,每言輒 餞之,賓主俱歡,日昏不反,映以四年高,不可連夜極樂,乃自往迎候,同乘 映字徽遠,昭弟也。 三歲而孤。 兄弟友睦,脩身厲行,非禮不行。 始昭之守臨海,陸倕 而歸,兄弟並已 感慟。

映以昭未解褐,固辭,須昭仕乃官。 時為府丞,文敎多令具草。 映泛涉記傳,有文才,而不以篇什自命。 褚彦回聞而悅之,乃屈與子實等遊處。 少時與劉繪、蕭琛相友善,繪之爲南康相,映 年未弱冠, 彦回欲令仕,

悉歸于兄。 百姓思治,天人之意可知,旣明且哲,忠孝之途無爽。願明府更當雅慮,無祇悔也。」尋以公 親賢誅戮,君子道消,外難屢作,曾無悛改。今開、雍協舉,乘據上流,背昏向明,勢無不濟。 身以明節,司徒當寄託之重,理無苟全,所以不顧夷險,以殉名義。今嗣主昏虐,狎近羣小, 世忠貞,固守誠節,乃訪於一時三「卿謂時事云何。」一映答曰:「元嘉之末,開闢未有,故太尉殺 永元元年,參鎭軍江夏王軍事,出爲武康令。及高祖師次建康,吳興太守袁昂自謂門 天監初、除征虜鄱陽王參軍,建安王中權錄事參軍 復爲臨川王錄事參軍,南臺治書,安成王錄事,太子翊軍校尉,累遷中散大夫、 ,領軍長史,烏程令。 所受俸祿,

光祿卿,太中大夫。 大同五年,卒,年八十三。子弘。

蕭琛字彦瑜,蘭陵人。 祖僧珍、宋廷尉卿。 父惠訓,太中大夫。 琛年數歲,從伯惠開撫

其背曰:「必興吾宗。**」**

丹陽尹,辟爲主簿,舉爲南徐州秀才,累遷司徒記室。 才氣,欲候儉。 踩少而朗悟,有縱橫才辯。 時儉宴于樂遊苑,琛乃著虎皮靴,策桃枝杖,直造儉坐,儉與語,大悅。 起家齊太學博士。時王儉當朝,深年少,未爲儉所識,負其 |儉為

『雨我公田,遂及我私』。」座者皆服,道固乃受踩酒。 南徐州事。 讌之,琛於御筵舉酒勸道固,道固不受,曰:「公庭無私禮,不容受勸。」、琛徐答曰:「詩所謂 永明九年,魏始通好,琛再銜命至桑乾,還爲通直散騎侍郎。 還兼少府卿、尚書左丞。 遷司徒右長史。 時魏遣李道固來使,齊帝 出爲晉熙王長史、行

之。 年,遷庶子, 三 出爲宣城太守。 高祖定京邑,引爲驃騎諮議,領錄事,遷給事黃門侍郎。|梁臺建,爲御史中丞。 東昏初嗣立,時議以無廟見之典,琛議據周頌烈文、閔予皆爲卽位朝廟之典, 徵爲衞尉卿,俄遷員外散騎常侍。 三年,除太子中庶子、散 於是從 天監元

騎常侍。九年,出爲寧遠將軍、平西長史、江夏太守

固 眞本。」琛固求得之,其書多有異今者,而紙墨亦古,文字多如龍舉之例,非隸非篆, 僧曰:「三輔舊老相傳,以爲班 琛甚

及是行也,以書饟鄱陽王範,範乃獻于東宮。

甚有靈驗,遂於郡廳事安施牀幕爲神座,公私請禱,前後二千石皆於廳拜祠,而避居他室 踩至,徙神還廟,處之不疑。又禁殺牛解祀,以脯代肉。 毅將軍、太尉長史。 |踩尋遷安西長史、南郡太守,母憂去官,又丁父艱。 起爲信武將軍、護軍 出爲信威將軍、東陽太守、遷吳興太守。 郡有 項羽廟,土民名爲憤王, 長史,俄爲貞

南徐州大中正,太子右衞率。徙度支尚書,左驍騎將軍,領軍將軍,轉秘書監、後軍將軍,遷 踩頻莅大郡,不治產業,有闕則取,不以爲嫌。普通元年,徵爲宗正卿,遷左民尙書,領

夙忝 同閈,雖迷興運,猶荷洪慈」。上答曰:「雖云早契闊,乃自非同志;勿談興運初,且道狂 高 祖在西邸,早與琛狎,每朝讌,接以舊恩,呼爲宗老。 踩亦奉陳昔恩,以「早簉中陽,

踩常言:「少壯三好,音律、書、酒。年長以來,二事都廢,惟書籍不衰。」而踩性通脫,常

奴異。」

自解竈,事畢餕餘,必陶然致醉。

軍,給東園秘器,朝服一具,衣一襲,賻錢二十萬,布百匹。 太守,秩中二千石,以疾自解,改授侍中、特進、金紫光祿大夫。卒,年五十二。遺令諸子, 與妻同墳異藏,祭以蔬菜,葬日止車十乘,事存率素。 乘輿臨哭甚哀。 大通二年,爲金紫光祿大夫,加特進,給親信三十人。中大通元年,爲雲麾將軍、晉陵 謚 日 平 子。 韶贈本官,加雲麾將

陸杲字明霞,吳郡吳人。 祖徽,宋輔國將軍、益州刺史。 父叡,揚州治中。

郎並 遷黃門侍郎,右軍安成王長史。 西曹掾。 宜 與甥。」起家齊中軍法曹行參軍,太子舍人,衞軍王儉主簿。 都 王 到 果少好學,工書畫,舅張融有高名,果風韻舉動,頗類於融,時稱之曰:「無對日下,惟舅 功曹史,驃騎晉安王諮議參軍,司徒從事中郎。 上省交禮,而具至晚,不及時刻,坐発官。人之,以爲司徒竟陵王外兵參軍 天監元年,除撫軍長史,母憂去職。 五年,遷御史中丞。 服闋,拜建威將軍、中軍臨川王諮議參軍,尋 梁臺建,以爲驃騎記室參軍 遷尙書殿中曹郎,拜日,八座 一,遷征 ,遷相國 虜 丞

中書舍人黃睦之以

肩 是臣通親,小事彈臣不貸。」高祖曰:「杲職司其事,卿何得爲嫌」」杲在臺,號稱不畏强 不識其人。」時陸之在御側,上指示果曰:「此人是也。」果謂陸之曰:「君小人,何敢以罪人屬 南司。」睦之失色。領軍將軍張稷,是杲從舅,杲嘗以公事彈稷,稷因侍宴訴高祖曰:「陸杲 事託杲,杲不答。高祖聞之,以問杲,杲答曰「有之」。高祖曰:「卿識睦之不。〕杲答曰:「臣

將軍、臨川內史。五年,入爲金紫光祿大夫,又領揚州大中正。中大通元年,加特進,中正 如故。 正如故。 所 稱。 六年,遷秘書監,頃之爲太子中庶子、光祿卿。 八年,出爲義興太守,在郡寬惠,爲民下 還爲司空臨川王長史、領揚州大中正。十四年,遷通直散騎侍郎,俄遷散騎常侍,中 四年,卒,時年七十四。諡曰質子。 十五年,遷司徒左長史。十六年,入爲左民尚書,遷太常卿。 普通二年,出爲仁威

杲素信佛法,持戒甚精,著沙門傳三十卷。

弟煦、學涉有思理。天監初、歷中書侍郎、尚書左丞、太子家令、卒。 撰晉書未就。 叉

著陸史十五卷,陸氏驪泉志一卷,並行於世。

子罩,少篤學,有文才,仕至太子中庶子、光祿卿。

婞直,無所忌憚,旣而執法憲臺,糾繩不避權幸,可謂允茲正色。 詩云:「彼己之子,邦之司 學著名。踩朗悟辯捷,加諳究朝典,高祖在田,與踩遊舊,及踐天曆,任遇甚隆,美矣。杲性 史臣曰:范岫、傅昭,並篤行淸愼,善始令終,斯石建、石慶之徒矣。 蕭琛、陸杲俱以才

校勘記

直。」杲其有焉。

累遷車騎臨海王記室參軍長水校尉 「長水」各本作「長史」。 按: 歷代無「長史校尉」之官。梁

有屯騎、步騎、越騎、長水、射聲五營校尉。「長史」當爲「長水」之譌,今改正。

つ こ し 天監元年遷庶子 按:梁東宮職僚有太子中庶子,太子庶子。 此「庶子」上當脫「太子中」 三字

或「太子」二字。

梁書卷二十七

列傳第二十

陸倕 到治 明山賓 殷 鈞 陸襄

陸倕字佐公,吳郡吳人也。 晉太尉玩六世孫。 祖子眞,宋東陽太守。〔〕父慧曉,齊太

常卿。

英俊,倕亦預焉。 岱常謂諸子曰:「此兒汝家之陽元也。」年十七, [三] 舉本州秀才。 遍,必誦於口。 倕少勤學, 嘗借人漢書,失五行志四卷,乃暗寫還之,略無遺脫。 善屬文。於宅內起兩間茅屋,杜絕往來,晝夜讀書,如此者數載。 辟議曹從事參軍、廬陵王法曹行參軍。 天監初,為右軍安成王外兵參軍, 刺史竟陵王子良開西邸延 幼爲外祖張岱所異, 所讀

轉主簿。

倕與樂安任昉 友善,爲感知已賦以贈昉, 昉因此名以報之曰:「信偉人之世篤, 本侯服

意 訪 核 不 飢虛表於徐步,逃責顯於疾行。 年之陸子,定一遇於班荆。 旣 於陸鄉 類闇求,千里懸得。 峙於東岳,比凝厲於秋霜。 息,望鳳 山陽之居,沒非要離之側。 九師 朴。 蘊 非餌,絲竹豈娛。 深,又理勝而 藉 於淮曲。 其 冠衆善而 條 有 緬 而 餘,又淡然而無味。 風 曾翔。 流與道素, 辭縟。 術兼 **貽操,綜羣言而名學。** 彼白玉之雖潔, 我未捨駕,子已回輿。 言象可廢,蹄筌自默。 · 咨余生之荏苒,迫歲暮而傷情。測徂陰於堂下,聽鳴鍾於洛城。 口傳之書,藝廣鏗鏘之樂。 襲袞衣 不一飯以妄過,每三錢以投渭。 余獲田蘇之價,爾得海上之名。信落魄而無產,終長對於短生。 似膠投漆中,離婁豈能識。」其爲士友所重如此 子比我於叔則, 得意同乎卷懷,違方似乎仗氣。 與繡裳。 此幽蘭之信芳。 折高、戴於后臺,異鄒、顏乎董幄。 還伊人而世載,「言 中飯相顧,悵然動色。 居非連棟、行則同車。 又方余於耀卿。 時坐睡 思在 而梁懸,裁枝梧而 物而 匪蒙袂之敢嗟,豈溝壑之能衣。 並三駿而 取譬,非 心照情交,流言靡惑。 邦壤旣殊,離會莫測。 冬日不足,夏日靡餘。 類平叔 龍光。 斗斛之能 而靡雕,似子雲之 錐握。 採三詩於河間, 過龍津而 旣文過而 。唯忘 萬

製石闕銘,辭義典雅,足爲佳作。 文甚美。 遷 驃騎臨川王東曹掾。 遷太子中舍人,管東宮書記。 是時禮樂制度,多所創革,高祖雅愛倕才,乃敕撰新漏刻銘 昔虞丘辨物,邯鄲獻賦,賞以金帛,前史美談。 又詔爲石闕銘記,奏之。敕曰:「太子中舍人陸倕所 可賜絹三

卒,年五十七。 中,揚州 事史,以疾陳解,遷鴻臚卿,入爲吏部郎,參選事 府州事 十匹。」遷太子庶子、國子博士,母憂去 大中正。 以公事免,左遷中書侍郎,司徒司馬, 文集二十卷,行於世 復除國子博士, 中庶子、中正並如故。 職。 服闋, 太子中庶子,廷尉卿。 爲中書侍郎,給事黃門侍郎,揚州別駕從 出爲雲麾晉安王長史、尋陽 守太常卿,中正如故。 又為中庶子,加給事 太守、行江 普通七年, 州

第四子續,早慧,十歲通經,爲童子奉車郎,卒。

到給字茂泓,彭城武原人也。 宋驃騎將軍彦之曾孫。 祖仲度,驃騎江夏王從事中郎。

父坦,齊中書郎。

歲。 職,朓欲薦之,洽覩世方亂,深相拒絕。除晉安王國左常侍,不就, 見洽深相賞好,日引與談論。 逐申拜親 樂安任昉有知人之鑒, **洽年十八,爲南徐州迎西曹行事。** 之禮 與洽兄沼、漑並善。 每謂治曰:「君非直名人,乃亦兼資文武。」」朓後爲吏部,治去 洽少知名, 清警有才學士行。 見之歎曰:「此子日下無 **逐築室巖阿,** 謝朓文章盛於一時, 幽居者積

列傳第二十一 到洽

御 日 何 如流、 華光殿,詔洽及沆、蕭琛、任昉侍讌,賦二十韻詩,以洽辭爲工,賜絹二十匹。 監初,沼、溉俱蒙擢用,治尤見知賞,從弟沆亦相與齊名。 、溉。」遲對曰:「正淸過於沆,文章不減漑;加以淸言,殆將難及。」卽召爲太子舍人。 高祖問待詔丘遲曰:「到洽 高祖謂昉

省,亦 卒於郡,時年五十一。贈侍中。 年 侍,復領博士,母憂去職。五年,復爲太子中庶子,領步兵校尉,未拜,仍遷給事黃門侍郎, 子。 得入尙書下舍,洽兄漑爲左民尙書, 領 在 仍置學 居 遷御 : 尙書左丞,準繩不避貴戚,尙書省賄賂莫敢通。 郡 此 普通元年,以本官領博士。頃之,入爲尚書吏部郎,請託一無所行。 稱職。 職,時人榮之。七年,遷太子中舍人,與庶子陸倕對掌東宮管記。 二年,遷司徒主簿,直待詔省,敕使抄甲部書。 五年,遷尙書殿中郎。 洽兄弟羣從,遞 以其 士二人,洽復充其選。 史中丞,彈糾無所顧望,號爲勁直,當時肅淸。 兄弟素篤,不能相別 十四年,入爲太子家令,遷給事黃門侍郎,兼國子博士。十六年,遷太子中庶 九年,遷國子博士,奉敕撰太學碑。十二年,出爲臨川內史, 也。 諡曰理子。 七年,出爲貞威將軍、雲麾長史、尋陽太守。 給引服親不應有 昭明太子與晉安王綱令曰:「明北克、到長史遂 時變輿欲親戎,軍國容禮,多自恰出。六 礙,刺省詳 以公事左降,猶居職。 決。 左丞蕭 俄爲侍讀,侍讀省 俄遷員外散騎常 子雲議許入漑 舊制,中丞 大通元年, 示

如 當傷懷 潔,文該四始,學遍九流,高情勝氣,貞然直上。 天下之寶,理當惻愴。 祇悔,實二三子之力也。 乂,東序之祕寶。 相 係凋落,傷怛悲惋,不能已已。 ,儻值夫子, 也。 比 人物零落,特可傷惋,屬有今信,乃復及之。」 必升孔堂。 此之嗟惜,更復何 近張新 談對如昨, 到子 安又致故,其人文筆弘雅,亦足嗟惜,隨弟府朝,東西日久,尤 去歲陸太常殂殁,今茲二賢長謝。 風 論。 神開爽,文義可觀,當官莅事, 音言在耳,零落相仍,皆成異物,每一念至,何時 但遊處周旋,並淹歲序,造膝忠規,豈 明公儒學稽古,淳厚篤誠,立身行道,始終 介然無私。 陸生資忠履貞,冰清玉 可勝說,幸免 皆海內之俊 可言。

哈文集行於世。子伯淮、仲舉。

軍記 兄仲璋嬰痼 頃之去 室參軍 Щ 明 賓 山賓字孝若,平原 七 , 歲 疾,家道屢空,山賓乃行 義師至, 掌治吉 (能言名理,四十三博通 禮。 高祖 鬲 時初置五經博士,山賓首膺其選。 引 人也。 爲 相府 父僧紹,隱居不仕,宋末國子博士徵,不就。 于 田 曹參 禄。 經 傳,居喪 軍。 齊始安王 梁臺 盡禮。 建, 蕭遙光 服闋, 爲尚書駕部 引為 遷北中郎諮議參軍,侍皇太子 州辟從 撫軍行 郎, 事史。 參軍,後為 遷治書 起家 侍御 奉朝詩。 廣 史,右 陽 令,

列

讀。 丞。 督緣淮諸 士,又以山賓居之,俄以本官兼國子祭酒。 累遷 以公事左遷黃門侍郎、司農卿。 中書侍郎,國子博士,太子率更令,中庶子,博士如故。 軍 事、征遠將軍、北兗州刺史。 四年, 普通二年,徵爲太子右衞 遷散騎常侍,領靑冀二州大中正。 率,加給事中,遷御史中 天監十五年,出爲持節、 東宮新置

詩曰:「平仲古稱奇,夷吾昔檀美。 闕 康桑方有係,原生今易擬。必來三逕人,將招五經士。」 曰:「明祭酒雖出撫大藩,擁旄推轂,珥金拖紫,而恒事屢空。 有司追責, 初,山賓在州,所部平陸縣不稔,啓出倉米以贍人,後刺史檢州曹,失簿書,以 籍其宅入官, 山賓默不自理,更市地造宅。 令則挺伊賢, 東秦固多士。 聞構字未成,今送薄助。」並貽 昭明太子聞築室不 築室非道傍,置宅歸仁里。 就, 山賓為耗 有令

差已久,恐後脫發,無容不相語。」買主遽追取錢。處士阮孝緒聞之, 歎曰:「此言足使還淳 反朴,激薄停澆矣。」 山賓性篤實,家中嘗乏用,三貨所乘牛。 既售受錢,乃謂買主曰:「此牛經患漏 蹄,治

李,時年八十五。詔贈侍中、信威將軍。諡曰 並使舍人王顒監護喪事。 五年,又爲國子博士,常侍、中正如故。 又與前司徒左長史殷芸令曰:「北兗信至,明常侍遂至殞逝,聞之 質子。 其年以本官假節,權攝北兗州事。 昭明太子爲舉哀,賻錢十萬,布 大通元年, 百匹,

諂,造膝忠規,非顯外迹,得之胸懷者,蓋亦積矣。 恒。 此賢儒術該通,志用稽古,溫厚淳和,倫雅弘篤。 攝官連率,行當言歸,不謂長往,眇成疇 授經以來,迄今二紀。 若其上交不

月。 追憶談緒 ,皆爲悲端,往矣如何 1.! 昔經聯事,理當酸愴也。

禮儀注二百二十四卷,禮儀二十卷,孝經 Щ .賓累居學官,甚有訓導之益,然性頗疏通,接於諸生,多所狎比,人皆愛之。 喪禮服義十五卷。 所著:

子震,字興道,亦傳父業。 歷官太學博士,太子舍人,尚書祠部郎,餘姚令。

奥誅, 楷法 事 中 南南 鄎。 殷鈞 叡 鄉范雲、「松」樂安任昉並稱賞之。 並見害。 叡 字季和,陳郡長平人也。 妻王 奥女。 鈞時年九歲,以孝聞。 **奥爲雍州刺史、鎭北** 晉太常融八世孫。父叡,有才辯,知名齊世,歷官司徒從 及長,恬靜簡交遊,好學有思 高祖 將軍,乃言於朝,以叡爲鎭北 與叡少舊故,以女妻鈞,即永興公主也。 理。 長史、河南太守 善隷書,爲當 時

家令,掌東宮書記。 四 部 書,更爲 天監初 ,拜駙馬 目 錄。 `都尉,起家秘書郎,太子舍人,司徒主簿,秘書丞。 頃之,遷給事黃門侍郎,中庶子,尚書吏部郎,司 又受詔料檢西省法書古迹,別爲 品 目。 遷驃騎從 徒左長史,侍中。 事 鈞 中郎, 在職、啓校定祕閣 中書郎、太子

列

置 學 士,復 以釣 爲之。 公事免。 復爲中庶子,領國子博士、左驍騎將軍,博士如故。 出爲 明

威將軍、臨川內史。

消責。 補續, 境無復瘧疾。 常侍如故。 侍,領步兵校尉,侍東宮。 制。 令,並繆道臻宣旨,伏讀感咽,肝心塗地。 俯存禮制,饘粥果蔬,少加 所進殆無一溢,甚以酸耿。 戾所鍾,復加橫疾。 薑桂之滋,實聞前典,不避粱肉,復忝今慈,臣亦何人,降此憂愍。 鈞 如脫申延,實由亭造。」服闋,遷五 體 劫帥稽顙乞改過,鈞便命遣之,後遂爲善人。 羸 中大通四年,卒,時年四十九。 多疾,閉閣 母憂去職,居喪過禮,昭明太子憂之,手書誡喻曰:「知 頃者綿微,守盡晷漏,目亂玄黃,心迷哀樂,惟救危苦,未能以遠理自 臥治,而百姓化其德,劫盜皆奔出境。 尋改領中庶子。 勉强。 迥然一身, [刊]宗奠是寄, 毁而滅性, 聖教所不 憂懷旣深,指故有及,並令繆道臻口具。」鈞答曰:「奉賜 小人無情,動不及禮,但稟生尫劣,假推年歲,罪 一兵尙書,猶以頓瘵經時,不堪拜受,乃更授散騎常 諡曰貞子。 昭明太子薨,官屬罷,又領右游擊,除國子祭酒, 郡舊多 山瘧, 嘗禽劫帥,不加考掠, 更暑 **比諸德**, 謹當循復聖言,思自 心動, 哀頓爲過, 自鈞 宜微自遣割, 在任 但和言 叉

死,不獲,遂以身蔽刃,刑者俱害之。 亂,或勸閑去之。 陸襄字師卿,吳郡吳人也。 閑曰:「吾爲人吏, 父閑,齊始安王遙光揚州治中,[5]永元末,遙光據東府作 何所逃死。」臺軍攻陷城,閑見執,將刑,第二子降求代 襄痛父兄之酷,喪過于禮,服釋後猶若居憂。

家令、知金華宮 職。 昭明太子敬耆老,襄母年將八十,與蕭琛、傅昭、陸杲每月常遣存問,加賜珍羞衣服。 大通三年,昭明太子薨,官屬罷,妃蔡氏別居金華宮,以襄爲中散大夫、領步兵校尉、金華宮 劑,始欲酬直,無何失之,時以襄孝感所致也。 嘗卒患心痛,醫方須三升粟漿,是時冬月,日又逼暮,求索無所,忽有老人詣門貨漿,量如方 王 中舍人,並掌管記。 法 曹,外兵,輕車廬陵王記室參軍。昭明太子聞襄業行,啓高祖引與遊處,除太子洗馬,遷 襄年已五十,毀頓過禮,太子憂之, 天監三年,都官尚書范岫表薦襄,起家擢拜著作佐郎,除永寧令。 出爲揚州治中,襄父終此官,固辭職,高祖不許,聽與府司馬換廨居之。 日遣使誡喩。 累遷國子博士,太子家令,復掌管記,母憂去 服闋,除太子中庶子,復掌管記。 秩滿,累遷司 空臨 中 母 JII

又於地中得石璽,竊怪之。踩先與妻別室,望琛所處,常有異氣,益以爲神。 其門徒,殺廣晉令王筠,號上願元年,署置官屬,其黨轉相誑惑,有衆萬餘人。 七年,出爲鄱陽 內史。「立先是,郡民鮮于琛服食脩道法,嘗入山採藥,拾得五色幡眊, 大同元年,遂 將出攻郡,

列傳

等四百二十人詣闕拜表,陳裏德化,求於郡立碑,降勑許之。又表乞留裏,裏固求還,徵爲 還,因相親厚。 民又歌曰:「陸居政,無怨家,鬭旣罷,讎共車。」在政六年,郡中大治,民李睍 守宰、案治黨與、因求賄貨、皆不得其實、或有善人盡室離禍、惟裏郡部枉直無濫。 襄先已帥民吏脩城隍,爲備禦,及賊至,連戰破之,生獲琛,餘衆逃散。 吏部郎,遷秘書監,領揚州大中正。太淸元年,遷度支尚書,中正如故。 內室,不加責誚,但和言解喻之,二人感恩,深自咎悔,乃爲設酒食,令其盡歡,酒罷,同載而 曰:「鮮于平後善惡分,民無枉死,賴有陸君。」又有澎率二家,先因忿爭,遂相誣告,襄引入 時隣郡豫章、安成等 民作歌

吳郡。 于墓下,一夜憂憤卒,時年七十。 衆 于,推襄行 担子仙。 一年,侯景舉兵圍宮城,以襄直侍中省。 三年三月,城陷, 襄逃還吳。 賊尋寇東境,沒 景將宋子仙進攻錢塘,會海鹽人陸黯舉義,有衆數千人,夜出襲郡,殺偽太守蘇單 郡事。時淮南太守文成侯蕭寧逃賊入吳,襄遣迎寧爲盟主,遣黯及兄子映公帥 子仙聞兵起,乃退還,與醫等戰於松江,黯敗走,吳下軍聞之,亦各奔散。 襄匿

、雲麾將軍。 襄弱冠遭家禍,終身蔬食布衣,不聽音樂,口不言殺害五十許年。 以建義功,追封餘干縣侯,邑五百戶。 侯景平,世祖追贈侍

陳 吏部尚書姚察曰:陸倕博涉文理,到洽匪躬貞勁,明山賓儒雅篤實, 殷鈞靜素恬和,

陸襄淳深孝性,雖任遇有異,皆列於名臣矣。

校勘記

- [一] 祖子眞宋東陽太守 「東陽」南史作「海陵」。
- [1] 年十七 「年」字各本脫去,據册府元龜七二七補。
- 八川〕還伊人而世載 「還」藝文類聚三一作「逮」。
- 山賓七歲能言名理 「名」北監本、汲古閣本、 殿本、金陵局本及南史俱作「玄」。 今從百衲本及

册府元龜七七四。

- [] 家中嘗乏用 [用] 南史作[困],疑作[困]是。
- 南鄉范雲 「鄉」各本譌「郡」,今據南史及册府元龜八六一改。按:本書范雲傳作「南鄉舞陰人」。
- [1] 迥然一身 「迥」各本譌「迴」,據册府元龜七五三改。
- 父閑齊始安王遙光揚州治中 「揚州治中」,齊書孝義陸絳傳及南史陸閑傳作「揚州別駕」。
- 七 年 出 爲鄱陽 內 史 中大通只六年,其明年正月改大同,不得有七年。 「七」字譌,當作「六」。

梁書卷二十八

列傳第二十二

裴邃 兄子之高 之平 之横 夏侯亶弟夔 魚弘附 章放

裴邃字淵明,河東聞喜人,魏襄州刺史綽之後也。日祖壽孫,寓居壽陽,爲宋武帝前軍

長史。 父仲穆,驍騎將軍。

遙昌爲立碑,使邃爲文,甚見稱賞。 逐十歲能屬文,善左氏春秋。 舉秀才,對策高第,奉朝請。 齊建武初, 刺史蕭遙昌引爲府主簿。 壽陽有八公山廟

值刺史裴叔業以壽陽降魏,豫州豪族皆被驅掠,邃遂隨衆北徙,魏主宣武帝雅重之,以爲司 東昏踐作,始安王蕭遙光爲撫軍將軍、揚州刺史,引邃爲參軍。 後遙光敗, 邃還壽陽,

後軍諮議參軍。 徒屬,中書郎,魏郡太守。 邃求邊境自効, 魏遣王肅鎭壽陽,邃固求隨肅,密圖南歸。 以爲輔國將軍、 廬江太守。 時魏將呂頗率衆五萬奄來攻 天監初,自拔還朝,除

列 傳 第二 + = 裴 邃

四

郡、邃率麾下拒破之,加右軍將軍。

康。 長史、廣陵太守。 甚雨,淮水暴溢,邃乘艦徑造橋側,魏衆驚潰,邃乘勝追擊,大破之。進克羊石城,斬城主元 又破霍丘城,斬城主甯永仁。 五年,征邵陽洲,魏人爲長橋斷淮以濟。 平小峴, 攻合肥。 邃築壘逼橋,

每戰輒克,於是密作沒突艦。 以功封夷陵縣子,邑三百戶。 遷冠軍

事中、雲騎將軍、朱衣直閤將軍,遷大匠 安。 頭。 宿預、詔邃拒焉。行次直瀆、魏衆退。遷右軍諮議參軍、豫章王雲麾府司馬、率所領助守石 臣之迹」。由是左遷爲始安太守。邃志欲立功邊陲,不願閑遠,乃致書於呂僧珍曰:「昔阮咸、 明威將軍、西戎校尉、北梁秦二州刺史。復開創屯田數千頃,倉廩盈實,省息邊運,民吏獲 顏延有『二始』之歎,[三] 吾才不逮古人,今爲三始,非其願也,將如之何!」未及至郡,會魏攻 出爲竟陵太守,開置屯田,公私便之。遷爲游擊將軍、朱衣直閤,直殿省。 乃相率餉絹千餘匹,邃從容曰:「汝等不應爾,吾又不可逆。」納其絹二匹而已。 邃與鄉人共入魏武廟,因論帝王功業。 其妻甥王篆之密啓高祖,云「裴邃多大言,有不 卿。 尋遷假節、 還爲給

討焉。邃深入魏境,從邊城道,出其不意,魏所署義州刺史封壽據檀公峴,邃擊破之,遂圍其 普通二年,義州刺史文僧明以州叛入於魏,魏軍來援。 以邃爲假節、信武將軍,督衆軍

城,壽 面 一縛請降,義州平。 除持節、督北徐州諸軍事、信武將軍、北徐州刺史,未之職,又遷

督豫州北豫霍三州諸軍事、豫州刺史、鎮合肥。

衆大敗。 郡,略地至於鄭城,汝潁之間,所在響應。魏壽陽守將長孫稚、河間 城、黎漿等城,皆拔之。 陽。 左衞將軍,給鼓吹一部,進爵爲侯,增邑七百戶。 絕拔還。 逐勒諸將爲四甄以待之,令直閤將軍李祖憐僞遁 九月壬戌,夜至壽陽,攻其郛,斬關 四 年, 斬首萬餘級。 於是邃復整兵,收集士卒。 進號宣毅將軍。 雅等奔走,閉門自固,不敢復出。 屠安成、馬頭、 是歲, 大軍將北伐,[三]以|選督征討諸軍事,率騎三千,先襲|壽 令諸將各以服色相 沙陵等戍。回 而 入,一 日戰九合,爲後軍蔡秀成失道不至,邃以援 諡 以引稚,稚等悉衆 是冬, 烈 別。 其年五月,卒於軍中。 始修芍陂。 邃自為黃袍騎,先攻狄丘 王元琛 **沁追之**, 明年, 率衆 四 五 復破 甄 萬,出城挑 追贈侍中、 競發,魏 魏新 甓 蔡

及其卒也,淮、肥間莫不流涕,以爲邃不死,洛陽不足拔也。 邃少言笑,沉深有思略,爲政寬明,能得士心。 居身方正有威重,將吏憚之,少敢犯法

流參軍,未行,仍留宿衞,補直閤將軍。丁父憂,服闋襲封,因請隨軍討壽陽,除雲麾將軍 遷散騎常侍。 子之禮,字子義,自國子生推第,至 又別攻魏廣陵城,平之,除信武將軍、西豫州刺史,加輕車將軍,除黃門侍郎, 補邵陵王國左常侍、信威行參軍。 王爲南克,除長

列

西魏。

率,兼衞尉卿,轉少府卿。 遷中軍宣城王司 活馬。 尋爲都督北徐仁睢三州諸軍事、信武將軍、北徐州刺史。 卒,諡曰此。子政,承聖中,官至給事黃門侍郎。 江陵陷,隨例入 徵太子左衞

少負意氣,常隨叔父邃征討,所在立功,甚爲邃所器重,戎政咸以委焉。 之高字如山,邃兄中散大夫髦之子也。 起家州從事、新都令、奉朝請,遷參軍。

侍。 盜賊,平之,「KI 以爲<u>譙州刺史。又還爲左軍將軍,出爲南譙太守、監北徐州,遷員外散騎常</u> 夜反,踰城而入,之高率家僮與麾下奮擊,賊乃散走。 父憂還京。 縣男,邑二百五十戶。時魏汝陰來附,敕之高應接,仍除假節、飇勇將軍、潁州刺史。 尋除雄信將軍、西豫州刺史,餘如故。 壽陽之役,邃卒于軍所,之高隷夏侯夔,平壽陽,仍除平北豫章長史、梁郡太守,封都城 起爲光遠將軍,合討陰陵

之,以爲侍中、護軍將軍。 公洲 及城陷,之高還合肥, 侯景亂,之高率衆入援,南豫州 柳仲禮至橫江,之高遣船舸二百餘艘迎致仲禮,與韋粲等俱會青塘立營,據建興苑。 與鄱陽王範西上。 到江陵,承制除特進、金紫光祿大夫。 刺史、鄱陽嗣王範命之高總督江右援軍諸軍事,頓于張 稍至新蔡,衆將一萬,未有 卒,時年七十三。 所屬, 元帝遣 蕭慧正召 贈侍中、

儀同三司,鼓吹一部。 諡曰 恭。

子畿,累官太子右衞率、雋州刺史。 西魏攻陷江陵,畿力戰死之。

農二郡太守,不行,除譙州長史、陽平太守。 之平字如原,之高第五弟。 少亦隨邃征討,以軍功封都亭侯。 拒侯景, 城陷後,遷散騎常侍、 歷武陵王常侍、扶 右衛將軍 太子 風弘

事

乃還。 陷,退還合肥,與範泝流赴湓城。 被蔬食以激厲之。 出爲貞威將軍,隷鄱陽王範討景。 墅,遂致殷積。 之横字如岳,之高第十三弟也。 太宗在東宮、聞而要之,以爲河東王常侍、直殿主帥,遷直 之横歎曰:「大丈夫富貴,必作百幅被。」遂與僮屬數百 景遣任約上逼晉熙,範令之橫下援,未及至,範薨, 景濟江,仍與範長子嗣 少好賓遊,重氣俠,不事產業。 入援。 連營度淮,據東城。 之高 閤將軍。 以其縱誕,乃爲狹 人,於芍陂大營田 侯景亂, 京都

降景。 時 之横 尋陽王 [率衆與兄之高同歸元帝,承制除散騎常侍、廷尉卿, 出爲 大心在江州,範副梅思立密要大心襲湓城,之横斬思立而 河東內史。 拒大心。 王僧 以州

列傳

杜 隨 崱 僧 拒侯景於巴陵、景退、遷持節、平北將軍、東徐州刺史、中護軍、封豫寧侯、邑三千戶。 辯 入守臺城。 追景,平郢、魯、江、晉等州,恒爲前鋒陷陣。 及陸納據湘州叛,又隸王僧辯南討焉。 仍至 於陣斬納將字賢明,遂平之。又破 |石頭,破景,景東奔,僧辯令之横 與 叉

兵 鎭 盡 北 矢窮 將 後 軍 江 陵陷, 徐州 一、遂於陣沒、時年四十一。 刺史,都督衆軍,給鼓吹一部,出守蘄城。 齊遣上黨王高渙挾貞陽侯攻東關,晉安王方智承制、行以之橫爲使持節、 贈侍中、司空公,諡曰忠壯。 之横營壘未周,而齊軍大至,公 子鳳寶嗣。

武

陵

王

於

一一。

還除吳興

太守,

乃作百幅被,以成其初志。

司 及 承 高 馬 大 統 祖 隨 夏侯亶字世龍,車騎將軍詳長子也。 , 封 起師,詳 府鎭 十郡 荆州、亶留京師 與長 爲宣城王,進位 父史蕭 穎 青協 爲 相 東昏 同 國 義 ,置僚屬, 聽政 舉,密遣信 主帥。及崔慧景作亂,直以捍禦功,除驍騎將軍。 齊初,起家奉朝請。 選百官。 下都迎亶,亶乃齎宣德皇后令,令南康王纂 建 康 城平,以 永元末,詳為 亶 爲尙 書 西中郞南康王 吏部郎,俄遷

爲

平

西始興王

長史、南郡太守,父憂解職。

居喪盡禮,廬于墓側,遺財悉推諸弟。

八年,起

侍

中

·, 奉

璽

於高

祖

天監

元年,出爲

宣城太守。

尋

入為散騎常侍,領

右

驍

騎將

軍

六年,出

像,立 衞 中 爲 有 持 率 正 威 節 惠 碑頌美焉。 遷左衞將軍 十五 、督司 爲 邊人所悅服。 年,出爲 州諸軍事、信武將軍、司 普通三年,入爲散騎常侍,領右驍騎將軍,轉太府卿, ٠, 領前 信武 。十二年,以本號還朝,除都官尙 、將軍、安西長史、江夏太守。 軍 一將軍。 俄出爲明威將軍、吳興太守。 州刺史, 領安陸太守。 十七年, 書, 遷給 服 入爲 闋, 事 在 中、右 襲封豐 那 通 直散 復 常侍如故。 有 衞 城 惠政, 騎常侍、 將 縣 軍、 吏民 領 太子右 豫 居 以公事 州 州 圖 其

守 還 進 代 **免,未幾,優詔復職。** 爲 須 兵荒,百姓 魚弘 逐,與 使 獲 堰 亶 持 成 六年,大舉北伐,先遣豫州刺史裴邃帥譙州刺史湛僧智、歷陽太守明紹世、[云] 男 破 帥 復進。 、晉熙太守張澄,並世之驍將,自南道伐壽陽 節 魏 女 湛 僧 多 將 都 口 流 智、 督 七 進攻黎漿, 貞威將軍 河 七年夏,淮堰 間 萬 散 豫 魚弘、張澄等通淸流澗 州 亶 五千人,米二十萬石。 王元琛、臨淮王元彧等相拒 緑淮 五年,遷中護軍 輕 刑 南豫 薄賦 水盛,壽陽城 霍 ,務農省役, 義定五 韋放 自北 州諸 ,將入淮、肥。 將沒,高 詔 以 道 頃之民戶充復。 軍 壽陽 一頻戰克捷。 一會焉。 事 祖 依 城,未 雲麾將 復遣北道 前 兩軍 魏軍 代置豫州,合肥鎮改為 克 旣 軍 ||夾||肥 尋有密敕,班師合肥,以休士馬 合,所向皆降下。 而邃卒。 大通二年, 軍元樹帥彭寶孫、陳慶之等稍 豫 築城, 南豫二 出亶 乃加亶使持節 進 州 號 軍後, 刺 平北 史。 南豫州 凡降城 亶 與 南譙太 僧 馳驛 以 五 亶 智

列

傳

第

+

夏

侯

亶

年,卒於州鎭。 高祖聞之,卽日素服舉哀,贈車騎將軍。 諡曰襄。 州民夏侯簡等五百人表

請爲直立碑置祠,詔許之。

曰:「卿傖人,好不辨族從。」直對曰:「臣聞服屬易疏,所以不忍言族。」時以爲能對。 · 宣侍御坐,高祖謂亶曰:「夏侯溢於卿疏近。」· 亶答曰:「是臣從弟。」高祖知溢於亶已疏,乃 **亶爲人美風儀,寬厚有器量,涉獵文史,辯給能專對。宗人夏侯溢爲衡陽內史,辭日,**

華侈。 妓衣也。 晚年頗好音樂,有妓妾十數人,並無被服姿容。每有客,常隔簾奏之,時謂簾爲夏侯 性儉率,居處服用,充足而已,不事

部曲入城,並卒圍內。

邀討義州,平之。三年,代兄亶爲吳興太守,尋遷假節、征遠將軍、西陽武昌二郡太守。 洗 長史,行府國 馬,中舍人,中書郞。 夔字季龍,直弟也。 事。 其年,出爲假節、征遠將軍,隨機北討,還除給 丁父憂,服闋,除大匠卿,知造太極殿事。普通元 起家齊南康王府行參軍。中興初,遷司徒屬。 事黃門侍郞。二年,副 天監元年,爲太子 年,爲邵陵王信威 裴

年,徵爲衞 尉,未拜,改授持節、督司 州諸軍事、信武將軍、司州刺 史,領安陸太守。

僧 是。顯伯聞之夜遁,衆軍追之,生擒二萬餘人,斬獲不可勝數。 旗鼓、衆莫敢妄動、慶和束兵以出、軍無私焉。 夔引軍屯安陽。 可御之以法。 僧智逆擊破之,變自武陽會僧智,斷魏軍 智,僧智曰:「慶和志欲降公,不願降僧智,今往必乖其意;且僧智所將爲烏 八年, 是時譙州刺史湛僧智圍 敕夔帥壯武將軍裴之禮 公持軍素嚴,必無犯令,受降納附,深得其宜。」於是變乃登城拔魏幟,建官軍 變又遣偏將屠楚城,盡俘其衆,由是義陽北道遂與魏 魏 東豫 直閣 州刺 史元 將軍 歸路 慶 任 慶 凡降男女口四萬餘人,粟六十萬斛, 和 思 和 於廣陵, 入其郛。魏將元 祖出義陽 於內築栅以自固,及變至,遂請 道,攻平靜、穆陵、 韶以僧智領東 絕。 短傾 豫州 合募人,[10]不 陰山 率 ,鎭廣陵 降。夔讓 軍 三關,克 餘 赴援, 物稱

威將軍、封保城縣侯、邑一千五百戶。中大通二年、徵爲右衞將軍,丁所生母憂去 之。遂留鎭焉。 大通二年,魏郢州刺史元願達請降,江三高祖敕郢州刺史元樹往迎 韶改魏郢州爲北司州,以夔爲刺史,兼督司州。 三年,遷使持節,進號 願達,變亦自楚城會

機 州 北 諸 討、尋授使持節、督南豫州諸軍事、南豫州刺史。 時 軍事 魏南兗州刺史劉明以譙城入附,詔遣鎭北將軍元樹帥軍應接,起變爲雲麾將軍,隨 豫 州 刺史。 豫州積歲寇戎,人頗失業,變乃帥軍人於蒼陵立堰,溉田千餘頃 六年, 轉使持節、督豫淮陳潁建霍義

列傳

第

二 十

妾曳羅穀飾金翠者亦有百數。 愛好人士,不以貴勢自高,文武賓客常滿坐,時亦以此稱之。 有聲績,遠近多附之。 有部曲萬人,馬二千匹,並服習精强,爲當時之盛。性奢豪,後房伎 並 歲收穀百餘萬石,以充儲備,兼贍貧人,境內賴之。變兄亶先經此任,至是變又居焉。兄弟 |有恩惠於鄉里,百姓歌之曰:「我之有州,頻仍夏侯,前兄後弟,布政優優。」在州七年,甚 四年,卒於州,時年五十六。有詔舉哀,賻錢二十萬,布二百匹。追贈侍中、安北將 日桓。

林館,破掠邸第及居人富室,子女財貨,盡略有之。 淵 明引爲府長史。 淵明沒魏,其妾並還京第,蹯至,破第納焉。 淵明彭城戰沒,復爲侯景長史。 景尋舉兵反,蹯前驅濟江,頓兵城西士 淵明在州有四妾,章、於、汪、阮,並有國

常語 勝 生 金翠,服玩車馬,皆窮一時之絕。 世 一, 如 人曰:「我為郡,所謂四盡:水中魚鱉盡,山中麞鹿盡,田中米穀盡,村里 魚弘,襄陽人。 輕 塵栖弱草,白駒之過隙。 身長八尺,白皙美姿容。累從征討,常為軍鋒,歷南譙、盱眙、竟陵太守。 Ý 遷爲平西湘東王司馬、新興永寧二郡太守,卒官。 生歡 樂富貴幾何時!」於是姿意酣賞,侍妾百餘人,不 民 庶盡。 丈夫

騎擊刺 高 安王 穆 督將陳度 退,放逐北至渦陽。 之曰:「今日唯有 王長 放 帥 祖復使帥軍自北道會壽春城。尋遷雲麾南康王長史、尋陽太守。 身 普通 中兵參軍 六年,大舉北伐,以放爲貞威將軍,與胡龍牙會曹仲宗進軍。七年,夏侯亶攻黎漿不克, 史、襄陽太守。 長七尺七寸,腰帶八圍,容貌甚偉。 韋 ,屢折魏軍,洵馬亦被傷不能進,放胄又三貫流矢。 奄至,放軍營未立,麾下止有二百餘人。 放字元直,車騎將軍叡之子。 、趙伯 八年,高祖遣兼領軍曹仲宗等攻渦陽, ,遷鎭右始興王諮議參軍,以父憂去職。 超等夾擊,大破之。 死耳。」乃免冑下馬,據胡牀處分。 於是士皆殊死戰,莫不一當百。 魏又遣常山王元昭、大將軍李獎、乞佛寶、費穆等衆五 轉假節、明威將軍、竟陵太守。 渦陽城主 初爲齊晉安王寧朔迎主簿,高祖臨雍州,又召爲 天監元年,爲盱眙太守,還除通直郎,尋爲輕車晉 王緯以 放從弟洵驍果有勇力,一軍所仗,放令洵單 又以放為明威將軍, 帥師會之。 在郡和理,為吏民所稱。 城降。三一放乃登 服闋,襲封永昌縣侯,出爲輕車南平 衆皆失色,請放突去。 放累爲藩佐,並著聲績。 山城,簡 萬來援,放 出 降 放厲聲 魏 四千二 大將費 魏 主簿 率所 軍 逐 叱

百人,器仗

充

牣

,又遣降人三十,分報李獎、費穆等。

魏人棄諸營壘,

時奔潰,

衆軍乘之,

督梁南秦二州諸軍事、信武將軍、梁南秦二州刺史。 斬獲略盡。 擒穆弟超, 幷王緯送於京師。 還爲太子右衞率,轉通直散騎常侍。 中大通二年,徙督北徐州諸 。出爲持節、 軍 事 北徐

州刺史,增封四百戶,持節、將軍如故。 爲「三姜」。初,放與吳郡張率皆有側室懷孕,因指爲婚姻。 放性弘厚篤實、輕財好施、於諸弟尤雍睦。 在鎭三年,卒,時年五十九。 每將遠別及行役初還,常同一室臥起,時稱 其後各產男女, 未及成長而率 諡 日宜侯。

亡,遺嗣孤弱,放常贍卹之。及爲北徐州,時有勢族請姻者,放曰:「吾不失信於故友。」乃以 息岐娶率女,又以女適率子,時稱放能篤舊。 長子解嗣,別有傳。

厚篤行,並遇 史臣曰:裴邃之詞采早著, 兼思略沉深, 夏侯亶之好學辯給, 夔之奢豪愛士, 韋放之弘 主逢時,展其才用矣。 及牧州典郡,破敵安邊,咸著功績,允文武之任,蓋梁室

校勘記

之名臣歟。

魏襄州刺史綽之後也 「襄州刺史綽」南史作「冀州刺史徽」。 按西魏以前無襄州, 裴綽亦未嘗

爲刺史,裴徽曾爲冀州刺史,見三國魏志。 疑南史作「冀州刺史徽」爲是。

- 昔阮 咸颜延有二始之歎 「咸」各本譌「彧」,據南史改。
- 是歲大軍將北伐 「是歲」承上文普通「四年」而言。 按當依本書武帝紀作普通五年, 則下文之

九月壬戌」、「明年」皆與紀合。

- 屠安成馬頭沙陵等戍 「安成」當依本書武帝紀普通五年十一月作「安城」。
- 五. 自國 子生推第 「推第」疑是「擢第」之譌。
- 合討陰陵 盗賊平之 「合」疑當依南史作「令」。
- . -L -L 智即梁敬 晉安王方智承制 帝,承聖 元年封晉安王,三年十一月, 姚思廉原文作「晉安王諱承制」、北監本、殿本補「諱」爲「綱」、誤。 江陵陷,梁羣臣迎至建康推爲太宰承制,後爲 按蕭方

梁帝。 今補 Ę

- . . 人 山 而 齊軍大至 「齊」各本譌「魏」,據南史改。
- , 元 凵 歷陽 太守 ·明紹世 「明」各本同。 本書張惠紹傳及册府元龜三五二作「胡」。
- 且僧 :智所將6 爲烏合募人 「鳥」? 字各本脫 去, 據册府元龜三五二補。 通鑑梁武帝大通 元年作

且 僧智所將應募烏合之人」。

列 大通二年 傳 第 魏 + 郢州 刺 校 史元願達請降 勘 記 各本脱「大通」二字。按:上文有「八年」, 爲普通八年,下文

梁書卷二十九

列傳第二十三

高祖三王

帝,吳淑媛生豫章王綜,董淑儀生南康簡王績,[1]丁充華生邵陵攜王綸, 葛脩容生武陵王 高祖八男:丁貴嬪生昭明太子統,太宗簡文皇帝,廬陵威王續;阮脩容生世祖孝元皇

時年七歲,主者有受貨,洗改解書,長史王僧孺弗之覺,績見而輒詰之,便卽時首服,衆咸歎 軍,領石頭戍軍事。 綜及紀別有傳。 南康簡王績字世謹,高祖第四子。 十年,遷使持節、都督南徐州諸軍事、南徐州刺史,進號仁威將軍。續

天監八年,封南康郡王, 四邑二千戶。出爲輕車將

其聰警。

列

傅 第

+ Ξ

高 袓 Ξ 王 十六年,徵爲宣毅將軍、領石頭戍軍事。十七年,出爲使持節、都督南北兗徐靑冀

尤異 部。 事 手 頭 五 詔 戍 州 一 十 諸 諡 大通 軍 勉之,使攝 事 軍 目 簡 五. 事 三年,因感病薨于任,時年二十五。贈侍中、中軍將軍、開府儀同三司, 五. 條,乞留州任,優詔許之,進號北中郎將。 南兗州 年,出爲使持節、都督江州諸軍事、江州刺史。 州任,固求解職,乃徵授安右將軍、領石頭戍軍事,尋加護軍。 刺史,在州著稱。 尋有詔徵還,民曹嘉樂等三百七十人詣闕 普通四年,徵爲侍中、雲麾將軍,領 丁董淑儀憂,居喪過禮,高 羸瘠弗堪 上 給鼓吹一 一表,稱績 視 祖

績 寡 玩好,少嗜慾,居無僕妾,躬事約儉,所有租秩,悉寄天府。 及薨後,府有南康國無

名錢數千萬。[三]

兗州 軍 一、丹陽 刺史。 年 子 會 尹 五. 理 一,置佐 一, 拜輕 嗣,字長才。 太清 史。 元年,督衆 車 將 出爲 軍 大湘州 少聰慧,好文史。 使持節、都督南 軍 北討,至彭城 刺 史,又領 石頭 北 年十一而孤,特爲高祖所愛,衣服禮秩與正 為 兗 戊戌軍事 魏 北 師 徐青冀 所 敗,退 o 遷侍 東徐 歸 中,兼 譙七州 本 鎭 領 諸 軍 軍 將 事、 軍 平北 葬 除宣 將軍 惠將 王不 大、南

援,實謀襲廣陵,會理擊破之,方得進路。 年, 侯景 圍京邑,會 理 治嚴將 入援,會北 臺城陷,侯景遣前臨江太守董紹先以高祖 徐 州 刺 史封 山 侯正表將應其兄正 德,外託 手敕召 赴

矣。」遂席卷而行,以城輸紹先。至京,景以爲侍中、司空、兼中書令。 與西鄉侯勸等潛布腹心,回要結壯士。時范陽祖皓斬紹先,據廣陵城起義,期以會理爲內 入朝,臣 子 之心,豈得違背。 ,其僚佐咸勸距之,會理曰:「諸君心事,與我不同,天子年尊,受制賊虜,今有手敕召我 皓敗,辭相連及,景矯詔免會理官,猶以白衣領尚書令。 ` 且遠處江北,功業難成,不若身赴京都,圖之肘腋。 雖在寇手,每思匡復, 吾計決

師。 事不果,與弟祁陽侯通理並遇害。 爲也。」敬禮曰「善」,因贊成之。于時百姓厭賊,咸思用命,自丹陽至于京口,靡不同之。 兵,安可以動。」會理曰:「湖熟有吾舊兵三千餘人,昨來相知,克期響集,聽吾日定,便至京 計賊守兵不過千人耳,若大兵外攻,吾等內應,直取王偉,事必有成。 是冬,景往晉熙,京師虛弱,會理復與柳敬禮謀之。敬禮曰:「舉大事必有所資,今無寸 縱景後歸,無能

通理字仲宣,位太子洗馬,封祁陽侯。

散,涕泣相送,义理問其故,或曰:「此簡王宮人,喪畢去爾。」义理便號泣,悲不自勝,諸宮人 見之,莫不傷感,爲之停者三人焉。服闋後,見高祖,又悲泣不自勝。 通理弟义理字季英,[5] 會理第六弟也。生十旬而簡王薨,至三歲而能言,見內人分 高祖爲之流涕,謂左

列傳

右曰:「此兒大必爲奇士。」大同八年,封安樂縣侯,「ti]邑五百戶。

人。」博覽多識,有文才,嘗祭孔文舉墓,幷爲立碑,製文甚美。 <u>火理性慷慨,慕立功名,每讀書見忠臣烈士,未嘗不廢卷歎曰:「一生之內,當無愧古</u>

卒先。 家國阽危, 固公主曰:〔<〕「事旣如此,豈可合家受斃。兄若至,願爲言之,善爲計自勉,勿賜以爲念也。 追會理,因爲所獲。 時年二十一。元貞始悟其前言,往收葬焉。 正,可以託孤,乃以 起兵,父理奔長蘆,收軍得千餘人。 太清中,侯景內寇,义理聚賓客數百,輕裝赴南兗州,隨兄會理入援,恒親當矢石,爲士 及城陷,又隨會理還廣陵,因入齊爲質,乞師。 雖死非恨,前途亦思立効,但未知天命何如耳。」至京師,以魏降人元貞立節忠 玉柄扇贈之。 紹先防之甚嚴,不得與兄弟相見,乃偽請先還京,得入辭母,謂其姊安 貞怪其故,不受。 其左右有應賊者,因間劫會理,其衆遂駭散,爲景所害 **乂理曰:「後當見憶,幸勿推辭。」會祖皓** 行二日,會侯景遺董紹先據廣陵,遂

軍、南彭城琅邪太守。十三年,轉會稽太守。十六年,爲都督江州諸軍事、雲麾將軍、江州 **廬陵威王續字世訢,高祖第五子。** 天監八年,封廬陵郡王,邑二千戶。 十年,拜輕車將

刺史。普通元年,徵爲宣毅將軍,領石頭戍軍事。

年, 薨於州, 司 畜 節、 雍梁秦沙 王正 安嗣。[10] 事、安南將軍 7三司。 養驍雄,金帛內盈,倉廩外實。 、都督雍 德 續 及胡貴通、趙伯超等馳射於高祖前,續冠於諸人,高祖大悅。 少英果,膂力絕 四州諸軍事、西中郎將、雍州刺史。「己七年,加宣毅將軍。 叉 梁秦沙四州諸軍事、平北將軍、寧蠻校尉、雍州刺史,給鼓吹一部。 出爲 時年四十四。 、江州刺史。 使持節、都督荆郢 人,馳射游獵, 三年,徵爲護軍將軍、領石頭戍軍事。 贈司空、散騎常侍、驃騎大將軍,鼓吹一部,諡曰威。 四年,遷安北將軍。 司雍南北秦梁巴華九州諸軍事、荆州刺 應發命中。 高祖常數曰:「此 大同元年,為使持節、都督江州諸軍 五年,爲驃騎將軍、開府儀 我之任城也。」嘗與臨賀 中大通二年,又為使持 三年,爲使持節、 史。 續多聚馬仗, 中大同二 都督

年,徵 邵陵郡 邵 爲信 王, 陵 攜 威將 邑二千戶。 王綸字 軍。 世調,高祖第六子也。 普 通 出爲 元年 寧遠將軍、琅邪 ·, 領 石頭戍軍 少聰穎,博學善屬文,尤工尺牘。 事 彭城 ,尋爲江州刺史。 二郡太守,遷輕車將軍、 五 年,以西 會稽 中郎將權攝南克 天監十三年,封 太守。

列

傳

第

+

 \equiv

髙

祖

Ξ

王

都督 竟不 聞,倫知之,令客戴子高 州、二二坐事 元年,為丹陽 郢定 山。 霍 坐発爲庶人。 司 尹。 四 州諸軍 四年,爲侍中、宣惠將 事 頃之,復封爵。 於都巷刺殺之。 、平西將軍、郢州刺史、三三遷爲安前將軍、丹陽 軍、揚州 大同元年, 智通子訴于闕下,高祖 刺史。 爲侍中、雲麾將軍。 以侵漁細民, 令圍綸第,捕 少府 七年, 尹。 丞 子高,綸匿 何智通 出 中大同元 爲 使持節、 中大通 以 事

公大春 遇,不如逕路直指鍾山,出其不意。」編從之。 回 大破之,斬首千餘級。 發,高祖誡曰:「侯景小豎,頗習行陣,未可以 出為鎭東 **拒駿,駿部亂** 太清二年,進位 ·、新淦公大成等,

「

司步騎三萬,發自京口。 篇乃畫夜兼道,遊軍入赴。
三三濟江 將軍、南徐州刺史。 綸復與東揚州刺史大連等 入援,至于驃騎洲。 ,賊因逼大軍 中衞 翌日 將軍、開府儀同三司。 ,賊又來攻, ,軍遂潰。 編 至 鍾 相持 中流 一戰卽殄, 日晚,賊稍 衆軍 風 山,衆裁千人,賊圍之,戰又敗,乃奔還京口 起,人馬溺者十一二。 侯景構逆, 奄至, 賊徒 將軍趙伯超曰:「若從黃城 當以歲月圖之。」綸 引却,南安侯駿以數十騎馳之。 加征討大都督,率衆討景。 大駭,分爲三道攻論,綸 進位司空。 逐率寧遠將 臺城陷, 次 鍾離, 大道, 奔 景已度 必 軍 禹穴 與戰, 與賊 西豐 賊 將

大寶元年,綸至郢州,刺史南平王恪讓州於綸,綸不受,乃上綸爲假黃鉞、都督中外諸軍事

綸 於是置百官,改廳事爲正陽殿。 數有災怪, 綸甚惡之。 時元帝圍河東王譽於長沙旣久,

內 外斷絕,綸聞其急,欲往救之,爲軍 糧不繼,遂止。 乃與世祖書 曰

手足肱 吾在 閉壅;弟敎亦不悛,故興師 遇 其間,委悉無因詳究。 爭,復以兵來。 同 奉神訓 亂 兵,斃於行陣,殞于吳局,方此非冤。 州 伏以先朝聖德,孝治天下,九親雍睦,四表無怨,誠爲國政,實亦家風。 支,自相 所居遙隔,雖知其狀,未喻所然。 ,宜敦旨喻,共承無改。 屠害。 蕭牆興變,體親成敵,一朝至此,能不嗚呼。 日者聞譽專情失訓,以幼陵長,湘、峽之內, 以伐。譽未識大體,意斷 且道之斯美,以和爲貴,況天時地利,不及 及屆 聞問 此藩,備加 、號怛,惟增摧憤,念以**兼悼**, 所行,雖存急難,豈知竊思。不能 視動訪, 旣有書問,雲雨傳流,噂喈 咸云譽應接多替,兵糧 遂至交鋒。 當 人和,豈可 唯余與爾 何可稱。 方等身

禮

山,復誅猶子,將非揚湯止沸,吞冰療寒。 祀, 晝謀夕計, 共思匡復。 昆季,在外三人,如不匡難,安用臣子。 正當輕重相推,小大易奪,遺無益之情,割下 方今社稷危恥,創巨痛深,人非禽蟲,在知君父。 至於其餘小忿, 唯應剖 若以譽之無道,近遠同疾,弟復効尤,攸非獨 或宜 流之悼、弘豁 一寬貸。 心嘗膽,泣血枕戈, 誠復子爈須 即日 以理 大敵猶强, , 通識勉之。 臾, 感誓蒼穹, 天讎 將奈國冤未逞。 未雪,余爾 今已喪鍾 憑 靈宗

罪。 幸寬於衆議,忍以事寧。 如使外寇未除,家禍仍構,料今訪古,未或弗亡。

測,勢必侵吞。弟若不安,家國去矣。吾非有深鑒,獨能弘理,正是採藉風謠,博參物 進魏軍,以求形援。 州至于湘、雍,莫非戰地,悉以勞師。侯景卒承虛藉釁,浮江豕突,豈不表裏成虞,首尾 寧、懷安二侯,以爲名號,當陽有事充掣,殊廢備境,第聞征伐,復致分兵,便是自於瓜 代景行師,景便不勞兵力,坐致成效,醜徒聞此,何快如之。又莊鐵小豎作亂,久挾觀 論,咸以爲疑,皆欲解體故耳。 難救?可爲寒心,其事已切。弟若苦陷洞庭,兵戈不戢,雍州疑迫,曰吾何以自安,必引 義,虧失多矣。 夫征戰之理,義在克勝,至於骨肉之戰,愈勝愈酷,捷則非功,敗則有喪,勞兵損 侯景之軍所以未窺江外者,正爲藩屏盤固,宗鎭 侯景事等內癰,西秦外同瘤腫。 直置關中,已爲咽氣,況復貪狼難 强密。 若自相魚肉,是

理 **慨,比屋罹禍,忠義奮發,無不抱甲負戈,衝冠裂眥,咸欲剚刃於侯景腹中,所須兵主唱** 朝野咸屬,一匡九合,非弟而誰。豈得自違物望,致招羣讟 耳。今人皆樂死,赴者如流。 皎然,無勞請箸;驗之以實,寧須確引。 自我國五十許年,恩格玄穹,德彌赤縣,雖有逆難,未亂邕熙。溥天率土,忠臣憤 弟英略振遠,雄伯當代,唯德唯藝,資文資武,拯溺濟難, 吾所以間關險道,出自東川,政謂上游諸藩, ! 其間患難, 具如所陳。 斯

卒食 甚。 在 湘 必 運 輸糧 穀 一民天,若遂等西河, 連 半菽 栗,猶 吾才懦兵寡,安能爲役,所寄令弟,庶得申情,朝聞夕死,萬殞何恨。 師 一儲,應贍軍旅,庶協力一舉,指日 狎至,庶以殘命,預在行間,及到九江,安北兄遂泝流更上, 阻 當紅委,若阻弟嚴 以菜色,無因 時事 [進取。 一始矣。 兵,唯事交切,至於運轉,恐無暇 侯景方延假息,復緩誅刑,倍增號憤,啓處 必希令弟豁照茲途,解汨川 寧泰。 宗廟重安,天下淸復,推弟之功,豈非幸 發遣。 之圍,存 全由餼饋懸絕,口的 卽 社 日 稷 萬 聊陳聞見,幸 之計,使其 心慊 無 地 望, 計 瀟

莫不掩泣。 將劉龍武等降僧辯,編軍潰,遂與子躓等十餘人輕舟走武昌。これ 世 祖 復書,陳河東有罪,不可解圍之狀。 於是大修器甲,將討侯景。 元帝聞其强盛,乃遣王僧辯帥舟師一萬以逼綸,綸 篇省書流涕曰:「天下之事,一至於斯」」左右聞之,

無怪

臨紙號迷,諸失次緒。

引 [14] 編之故吏,聞編敗,開城納之。 岫聞之,報于西魏,西魏遣大將軍楊忠、儀同侯幾通率衆赴焉。二年二月,忠等至于汝南,綸 魏 祖 時綸 軍共攻南陽。 迎綸,綸以龍祖荆鎭所任,懼爲所執,復歸齊昌。行至汝南,西魏所署汝南城主李素者, 長史韋質、司馬姜律先在于外、聞編敗、馳往迎之、於是復收散卒、屯于齊昌郡、將 侯景將任約聞之,使鐵騎二百襲編,編無備,又敗走定州。 綸乃修浚城池,收集士卒,將攻竟陵。 西魏安州刺史馬 定州刺史田

列

傅

第

= +

=

髙

祖三

 ${\bf \Xi}$

編,綸 之,爲立祠廟,後世祖追諡曰攜。 嬰城自守。 不爲屈,遂害之,投于江岸,經日顏色不變,鳥獸莫敢近焉。時年三十三。日乃百姓憐 會天寒大雪, 忠等攻之不能克, 死者甚衆。後李素中流矢卒, 城乃陷。 忠等執

城,堅屯太陽門,終日蒲飲,不撫軍政。 太清三年三月,堅書佐董勛華、白曇朗等以繩引賊登樓,城遂陷,回回堅遇害。 長子堅,字長白。 大同元年,以例封汝南侯,邑五百戶。亦善草隷,性頗庸短。 東士有功,未嘗申理,疫癘所加,亦不存卹,士咸憤 侯景圍

在第中習騎射,學兵法,時人皆以爲狂。左右或以進諫,確曰:「聽吾爲國家破賊,使汝知 弟確,字仲正。 少驍勇,有文才。大同二年,封爲正階侯,邑五百戶,後徙封永安。 常

之。」除秘書丞,太子中舍人。

聞之,逼確使入。確猶不肯,攜王流涕謂曰:「汝欲反邪!」時臺使周石珍在坐,確謂石珍曰: 韶乃召確爲南中郎將、廣州刺史,增封二千戶。確知此盟多貳,城必淪沒,因欲南奔,攜王 夕,馳驟往反,不以爲勞,諸將服其壯勇。及侯景乞盟,確在外,慮爲後患,啓求召確入城。 「侯景雖云欲去,而不解長圍,以意而推,其事可見。今召我入,未見其益也。」石珍曰:「敕旨 鍾山之役,確苦戰,所向披靡,羣虜憚之。 確每臨陣對敵,意氣詳贍,帶甲據鞍,自朝及

伯超 勢不 陷,確排闥入,啓高祖曰:「城已陷矣。」高祖 如此,侯豈得辭。〕確執意猶堅,攜王大怒,謂趙伯超曰:「譙州,卿爲我斬之,當賫首赴闕 - 能禁 |揮刃眄||確曰:「我識君耳,刀豈識君。]|確於是流涕而出,遂入城。 及景背盟復圍城,城 `自縋下城,僅得至此。」高祖歎曰:「自我得之,自我失之,亦復何恨。」乃使確爲 曰:「猶可一戰不?」對曰:「不可。臣向者親格戰 慰

賊 夫力致, 所害。 應弦而 確 旣 確 出見景,景愛其膂力,恒令在左右。 落。 不 ·惜死,正欲手刃之,但未得其便耳。 賊徒忿嫉,咸勸除之。 先是攜王遣 後從景行,見天上飛鳶,羣虜爭射不中,確射 卿還啓家王,願勿以爲念也 人密導確,確謂使者曰:「侯景輕佻 一。」事未遂 可可 而 爲

忠孝獨存,斯 之貴,據磐石 史臣 曰:自周 之重 可嘉矣。 績 、漢廣樹蕃屏,固本深根,高祖之封建,將遵古制也。 以 孝著 |清 以勇聞。 綸 聰警有才學, 性險躁,屢以罪黜, 南康、廬陵 及太清之亂, 並 以宗室

校勘記

- 〔一〕 董淑儀生南康簡王績 「淑」南史作「昭」。
- (ニ) 天監八年封南康郡王 武帝紀,天監七年九月,立皇子續爲南康郡王,是「八年」當作「七年」。

南史亦作「七年」。

- C II) 府有南康國無名錢數千萬 南史「府」上有「少」字。
- 與西鄉侯勸等潛布腹心 「勸」各本譌「歡」,據南史梁宗室吳平侯景傳改。
- 八五山 殿本。 與弟祁陽侯通理並遇害 按通理封祁陽侯,見南史本傳,建安侯是蕭賁封爵,詳後校勘記第七條。 百衲本、南監本、汲古閣本作「與建安侯通理並遇害」。今從北監本、
- 沒補。「乂理字季英」,百衲本、南監本、汲古閣本作「通理字季英」,後六處「乂理」亦並作「通 通理字仲宣位太子洗馬封祁陽侯通理弟乂理字季英 理。」今並據北監本、殿本及南史改正。 「乂理字季英」上十七字,各本無,據南
- フャン 與其弟祁陽侯通理……等,並害之」。是蕭通理封祁陽侯,蕭父理封安樂侯,蕭賁封建安侯,不 封安樂縣侯 死,子賁嗣侯。又本書侯景傳,南康嗣王會理欲襲侯景,「建安侯賁知其謀以告景,景遣收會理 「安樂」各本作「建安」,據南史改。按本書臨川王宏傳,子正立封建安縣侯,正立

應混淆,今據本書侯景傳及南史改正。

册府元龜二八五改正。「公主」,南史無「公」字。 謂其姊安固公主曰 「安固」南、 、北監本, 汲古閣本, 殿本, 張森楷梁書校勘記: 金陵局本譌作「固安」,今從百衲本及 「諸王女例封縣 主,不得

稱 公主,無公字是也。 此誤衍文。」

州

按:

南徐與梁秦沙

地

相去甚遠,不容合屬

一統府。

雍梁

秦沙

四

/υ ∐ 為使持節都督雍梁秦沙四州諸軍事 西中郎將雍州刺史 册府元龜二八〇作「都督 「雍」「雍州」各本並譌爲「南徐」「南徐

州 諸 軍事 」。又梁書武 帝紀:「普通三年 春正月己未, 以宣毅將軍 廬陵王續爲雍州 刺史。」是續以

刺 史都督雍 四 州,今據改。

雍州 梁秦 沙

(0)長子 安嗣 南史 作 世 子 憑、因 罪誅死,次子應嗣。

以 西 中 郞 將 權 攝 南 兗 州 南兗州 二萬史作「古 南徐 州

七年 至 平 西 將 軍 郢 州 刺 史 按 武帝紀、蕭 綸 爲 平 西 將 軍 、郢州刺史在大同 六年。

遊 軍 入 赴 遊」,南史及册府元龜 四二 二作「旋」。

新 凎 公 大 成等 「淦」各本譌「塗」,據 通鑑 改

三吾 雍 州 疑 迫 雍 州 各 本皆作 「雍川」, 今改正。 按確州是岳陽王營鎭地(見本書張纘傳),以此

稱 營

列 傅 第 <u>=</u> + 三 校 勘

記

- 全由餼饋懸絕 鐵,古文絕字,見前漢書路溫舒傳。」按張說是,今從改。· 「絕」,百衲本作「圝」,其他各本作「斷」。 張元濟梁書校勘記:「按觸疑繼之訛,
- 遂與子躓等十餘人輕舟走武昌 侯景左右,欲手刃侯景,被殺,則確未嘗有走武昌事。」 「躓」各本皆作「確」,據南史改。 張森楷南史校勘記:「蕭確在
- 西魏所署汝南城主李素者 「李素」南史、通志並作「李素孝」,無「者」字。 疑此「者」字爲「孝」

字之譌。

- 時年三十三 錢大昕廿二史考異:「按綸被害在大寶二年辛未,距天監十三年甲子始封之歲已 年,綸旣長於元帝,計其卒時,最少亦當四十四五歲也。」 三十八年矣, 史稱年三十三必誤也。 且梁武諸子, 綸次居六, 元帝次居七。元帝生於天監七
- 堅書佐董勛華白曇朗等以繩引賊登樓城遂陷 「等」各本譌「尋」,並脫「城」字,據南史及册府

元龜四三七增改。

梁書卷三十

列傳第二十四

裴子野 顧協 徐摛 鮑泉

奏有不允,子野從坐免職。 防有盛名, 為後進所慕, 遊其門者, **防必相薦達**。 之枯,有白兔馴擾其側。天監初,尚書僕射范雲嘉其行,將表奏之,會雲卒,不果。樂安任 久之,除右軍安成王參軍,俄遷兼廷尉正。時三官通署獄牒,子野嘗不在,同僚**輒署其名**, 起家齊武陵王國左常侍,右軍江夏王參軍,遭父憂去職。居喪盡禮,每之墓所,哭泣處草爲 四 [裴」也。 子野生而偏孤,爲祖母所養,年九歲,祖母亡,泣血哀慟,家人異之。少好學,善屬文。 裴子野字幾原,河東聞喜人,晉太子左率康八世孫。兄黎,弟楷、綽,並有盛名,所謂 曾祖松之,宋太中大夫。 或勸言諸有司,可得無咎。 祖駰,南中郎外兵參軍。父昭明,通直散騎常侍。 子野於昉爲從中表,獨不至,昉亦恨焉。 子野笑而答曰:「雖慚脚季之道,豈

列傳

第

十四四

裴子

野

因訟以受服。」自此免黜久之,終無恨意。

令, 章句 犯 嘗 皇家 聞 以 儒 栖 由 四 之諐 筝 臣 + 銜 史,苑囿 遲下位,身賤名微,而性不憛憛,情無汲汲,是以有識嗟推,州閭歎服。且家傳素業,世習 其行業而善焉。 在 治悉 ·,字幾原,幼稟至人之行,長厲國士之風,居喪有禮, 毀瘠幾滅, **줲憂之外,**蔬 杯 淳 斯 級 初 二年,吳平侯蕭景爲南兗州刺史,引爲冠軍錄事,府遷職解。 縣 耀 ·, 訪 忝 乞垂 子 不 多多 ,回授子 訓訓 臣 之邑 野 行 經籍,遊息文藝。 L 歷觀· 鞭罰 一赦宥 曾祖 故 土 里 盈 可傳,脫置之膠庠,以弘獎後進,庶一變之辯可尋,三豕之疑 古今人君欽 了。」有司 门民 野。 松之,宋元嘉中 ,差非虛謬,不勝慺慺微見,冒昧 一庭,官人邁乎有嬀,棫樸越於姬氏,苟片善宜 會遷國子博士,乃上表讓之曰:「伏見前冠軍府錄 有 如此,則賢否之宜,各全其所,訊之物議,誰 爭者,示之以理,百姓 以資 賢 著宋略二十卷,彌綸首尾,勒成一代,屬辭比事,有足 歷 (好善, 非 受詔續修何承 次,弗爲 未有 聖朝孜孜若是之至也。 通 。尋除 稱 天朱史, 悦,合境 陳聞。 尚書 無 未及 比 伏 訟 部 願 成而 郞 陛 錄,無論 ,仁威記室參軍。 下哀憐 時中書范縝與子野未遇, 敢緣 卒, 日 事參軍 不允。 子 厚薄, 斯義, **悾款**,鑒 野常欲繼成 河東裴子野,年 無謬矣。 臣 輕 與 介可求,不 陳愚瞽,乞 其愚實,干 觀者。 出爲諸 子 水 野雖 先業。 不 伏惟 進。 未 且 曁

及齊永明末,沈約所撰宋書旣行,

子野更删撰為宋略二十卷。

其敍事評論多善,約見而歎

|侯擊虜,八滑從之,此其後乎。」時人服其博識。 敕仍使撰方國使圖,廣述懷來之盛,自要服 故。 賓,莫知所出。 祖 至于海表,凡二十國。 曰:「吾弗逮也。」蘭陵蕭琛、北地傅昭、汝南周拾咸稱重之。至是,吏部尚書徐勉言之於高 ,以爲著作郞,掌國史及起居注 又敕掌中書詔誥。 子野曰:「漢潁陰侯斬胡白題將一人。服虔注云:『白題,胡名也。』又漢定遠 是時西北徼外有白題及滑國, 頃之,兼中書通事舍人,尋除通直正員郎,著作、舍人如 遣使由岷山道入貢。此二國歷代弗

之異,其於刊改一也。」 者,及其末皆翕然重之。 皆令草創。 書,深相賞好,顯尤推重之。時吳平侯蕭勱、范陽張纘,每討論墳籍,咸折中於子野焉。 及五鼓,敕催令開齋速上,子野徐起操筆,昧爽便就。旣奏,高祖深嘉焉。 事周捨、鴻臚卿劉之遴、中書侍郎朱异,集壽光殿以觀之,時並歎服。高祖目子野而言曰: 通七年,王師北伐,敕子野爲喻魏文,受詔立成,高祖以其事體大,召尚書僕射徐勉、太子詹 「其形雖弱,其文甚壯。」俄又敕為書喻魏相元叉,其夜受旨,子野謂可待旦方奏,未之爲也, 子野 與沛國劉顯、南陽劉之遴、陳郡殷芸、陳留阮孝緒、吳郡顧協、京兆章棱,皆博極羣 子野爲文典而速,不尙麗靡之詞,其制作多法古,與今文體異,當時或 或問其爲文速者,子野答云:「人皆成於手,我獨成於心,雖有見否 自是凡諸符檄, 有詆訶 普

列傳第二十四 裴子野

間。 默自守,未嘗有所請謁,外家及中表貧乏,所得俸悉分給之。 飯麥食蔬。 妻子恒苦飢寒,唯以教誨爲本,子姪祗畏,若奉嚴君。 俄 遷 中書侍郎,餘如故。 中大通二年,卒官,年六十二。 大通元年,轉鴻臚卿,尋領步兵校尉。 末年深信釋氏,持其教戒,終身 無宅,借官地二畝,起茅屋數 子野在禁省十餘年,靜

常侍、賻錢五萬,布五十匹,卽日舉哀。諡曰貞子。」 舍人裴子野,文史足用,廉白自居,劬勞通事,多歷年所。 儉約,務在節制。 先是子野自剋死期,不過庚戌歲。是年自省移病,謂同官劉之亨曰:「吾其逝矣。」遺命 高祖悼惜,爲之流涕。詔曰:「鴻臚卿、領步兵校尉、知著作郎、兼中書通事 **奄致喪逝,惻愴空懷。** 可贈散騎

秋,始草創,未就而卒。子謇,官至通直郎。[1] 卷,百官九品二卷,附益諡法一卷,方國使圖一卷,文集二十卷,並行於世。 子野少時,集注喪服、續裴氏家傳各二卷,抄合後漢事四十餘卷,又敕撰衆僧傳二十 又欲撰齊梁春

禄 張永嘗攜內外孫姪遊虎丘山,協年數歲,永撫之曰:「兒欲何戲。」協對曰:「兒正欲枕石 顧 協字正禮,吳郡吳人也。晉司空和七世孫。〔三協幼孤,隨母養於外氏。 外從祖宋右

漱流。」永歎息曰:「顧氏興於此子。」旣長,好學,以精力稱。 外氏諸脹多賢達有識鑒,從內

弟率 尤推 重焉。

軍參 還除 未 有此作。」遷安成王國 軍,領郡五官, 北 起 家 中 正德爲巴西、梓潼郡,協除所部安都令,至未至縣,遭母憂。 -郎行 揚州 ·參軍,復兼廷尉正。 議 曹從事史,兼太學博士。 遷輕車湘東王參軍事,兼記室。 左常侍,兼廷尉正。 。 久之, 出爲<u>廬</u>陵郡丞, 未拜, 會西豐侯 正德爲吳郡, 除中 舉秀才,尚書令沈約覽其策而歎曰:「江左以來 太尉臨川王聞其名,召掌書記,仍侍西豐侯正 普通六年,正德受詔北討,引爲府錄事 服闋,出補西陽郡丞。

官人,申其屈滯,協必苦執貞退,立志難奪,可謂東南之遺寶矣。伏惟陛下未明求衣,思賢 素,雅量邃遠,安貧守靜,奉公抗直,傍闕知己,志不自營,年方六十,室無妻子。臣欲言於 郎,兼中書通事舍人,累遷步兵校尉,守鴻臚卿,員外散騎常侍,「邑卿、舍人並如故。大同八郎,兼中書通事舍人,累遷步兵校尉,守鴻臚卿,員外散騎常侍,「邑卿、舍人並如故。大同八 孔愉表韓績之才,四庾亮薦翟湯之德,臣雖未齒二臣,協實無慚兩士。」即召拜通直散騎侍 是以芻蕘之言,擇於廊廟者也。臣府兼記室參軍吳郡顧協,行稱鄉閭,學兼文武,服膺道 如渴,爱發明詔,各舉所知。臣識非許、郭,雖無知人之鑒,若守固無言,懼貽蔽賢之咎。 昔如渴,爱發明詔,各舉所知。臣識非許、郭,雖無知人之鑒,若守固無言,懼貽蔽賢之咎。 昔 軍還,會有詔舉士,湘東王表薦協曰:「臣聞貢玉之士,歸之潤山;論珠之人,出於枯岸。

列

傳

足哀 年,卒,時年七十三。 廉潔自居,白首不衰,久在省闥,內外稱善。 便舉哀。 者。 大險旣畢,即送其喪柩還鄉,幷營冢槨,並皆資給,悉使周辦。 高祖悼惜之,手詔曰:「員外散騎常侍、鴻臚卿、兼中書通事舍人顧協, **奄然殞喪,惻怛之懷,不能已已。** 可贈散騎常侍,令 傍無 近 親 彌

諡曰

1溫子

食, 郞 不復娶。 事 者絕於饋遺。 不改於常。 恐顧 協 少清 至六十餘,此女猶未他適,協義而 郎 難 介 衣食者。」竟不敢以遺之。 有志操。 有門生始來 自丁艱憂, 初爲廷尉正, 冬服單薄, 寺卿蔡法度謂人曰:「我願解身上襦與 事協,知 遂終 身布衣蔬 其廉潔,不敢厚餉,止送錢二千,協發怒,杖二十, 及爲舍人,同官者皆潤屋,協在省十六載,器服飲 食。 迎之。 少時將娉舅息女, 晚雖判合,卒無胤嗣 未成 婚 而協母亡,免喪後 因 顧 此

徐摛字士秀,東海郯 人也。 祖憑道,宋海 陵 太守。 父超之,天監初 仕 至 員 外散騎 常侍。

協博極羣書,於文字及禽獸草木尤稱精詳。

撰異姓苑五卷,瑣語十卷,並行於世。

會晉安王綱出戍石頭,高祖謂周捨曰:「爲我求一人,文學俱長兼有行者,欲令與晉安 摛 幼 而 好 學, 及 長 遍 **覽經** 史。 屬 文好為 新 變, 不拘 舊 體。 起家 太學博 士 遷左 衞 司

帶領 |摘 普通 鎭 簡 遊處。」捨曰:「臣外弟徐摛,形質陋小,若不勝衣,而堪此選。」高祖曰:「必有仲宣之才,亦不 京 其 寧蠻府長史,參贊戎政,敎命軍書,多自摛出。 口,復隨府轉爲安北 、容貌。」以摛爲侍讀。 後王出鎭江州,仍補雲麾府記室參軍,又轉平西府中記室。 四年,王出鎭 襄陽,摛固水隨府西上,遷晉安王諮議參軍。 中錄事參軍,帶郯令,以母憂去職。王爲丹陽尹,起摛爲秣陵令。 王入爲皇太子,轉家令,兼掌管記,尋 大通初,王總戎北伐,以

滿、還爲中庶子,加戎昭將軍。 養。」高祖謂摛欲之,乃召摛曰:「新安大好山水,任昉等並經爲之,卿爲我臥治此郡。」中大 横,應答如響,高祖甚加歎異,更被親狎,寵遇日隆。領軍朱异不說,謂所親曰:「徐叟出入 明敏、辭義可觀、高祖意釋。因問五經大義、次問歷代史及百家雜說、末論釋教。擠商較縱 通三年,遂出爲新安太守。至郡,爲治淸靜,敎民禮義,勸課農桑,期月之中,風俗便改。 兩宮,漸來逼我,須早爲之所。」遂承間白高祖曰:「摛年老,又愛泉石,意在一郡,以自怡 **摛文體旣別,春坊盡學之,「宮體」之號,自斯而起。** 高祖聞之怒,召摛加讓,及見,應對

列觀,引秦秋義云「丁丑,夫人姜氏至。 戊寅,公使大夫宗婦覿用幣」。戊寅,丁丑之明日,故 是時臨城公納夫人王氏,卽太宗妃之姪女也。晉宋已來,初婚三日,婦見舅姑,衆賓皆

列

女,有異他姻,覿見之儀,謂應可略。」太宗從其議。除太子左衞 外客,姑率內賓,堂下之儀,以備盛禮。近代婦於舅姑,本有戚屬,不相瞻看。 見舅姑,兄弟姊妹皆立于堂下』。政言婦是外宗,未審嫻令,所以停坐三朝,觀其七德。 禮官據此,皆云宜依舊貫。太宗以問摛,摛曰:「儀禮云『質明贊見婦於舅姑』。雜記又云『婦 率。 夫人乃妃姪 舅延

者。 是常憚摛。 卒,年七十八。 長子陵,最知名。 **摛獨嶷然侍立不動,徐謂景曰:「侯公當以禮見,何得如此。」凶威遂折。** 太清三年,侯景攻陷臺城,時太宗居永福省,賊衆奔入,舉兵上殿,侍衞 太宗嗣位,進授左衞將軍,固辭不拜。 太宗後被幽閉,摛不獲朝謁,因感氣疾而 奔散, 侯景乃拜,由

鮑泉字潤岳,東海人也。父機,云湘東王諮議參軍。

將軍王僧辯代泉爲都督。 不能克。 三年,元帝命泉征河東王譽於湘州,泉至長沙,作連城以逼之,譽率衆攻泉,泉據栅堅守,譽 泉博涉史傳,兼有文筆。少事元帝,早見擢任。及元帝承制,累遷至信州刺史。 泉因其弊出擊之,譽大敗,盡俘其衆,遂圍其城,久未能拔。世祖乃數泉罪,遣平南 僧辯至,泉愕然,顧左右曰:「得王竟陵助我經略,賊不足平矣。」

僧辯旣入,乃背泉而坐,曰:「鮑郎有罪,令旨使我鎖卿,卿勿以故意見期。」因出令示泉,鎖 泉曰:「稽緩王師,甘罪是分,但恐後人更思鮑泉之憒憒耳。」乃爲啓謝淹遲之罪。

世 祖尋復其任,令與僧辯等率舟師東逼邵陵王於郢 州

騎襲之,方諸 其屍于黃鵠磯。 入,城乃陷。 「徐文盛大軍在東,賊何由得至。」旣而傳告者衆,始令闔門,賊縱火焚之,莫有抗者,賊騎遂 郢州平,元帝以長子方諸爲刺史,泉爲長史,行府州事。 執方諸及泉送之景所。後景攻王僧辯於巴陵,不克,敗還,乃殺泉於江夏,沉 與泉不恤軍政,唯蒲酒自樂,賊騎至,百姓奔告,方諸與泉方雙陸,不信,曰: 侯景密遣將宋子仙、任約率精

見任,皆 又夢泉著朱衣而 初, 如 泉之爲南討都督也,其友人夢泉得罪於世祖,覺而告之。 其 夢 行水上, 又告泉曰:「君勿憂、尋得免矣。」因說其夢、泉密記之,俄而復 後未旬,果見囚執。

頃

泉於儀禮尤明,撰新儀四十卷,印行於世。

陳 吏部 尙 書 姚察曰: 阮孝 緒常言,仲尼論四科,始乎德行,終乎文學。 有行 者多尙質

記

樸,有文者少蹈規矩,故衞、石靡餘論可傳,屈、賈無立德之譽。 若夫憲章游、夏, 祖述回、

騰,體兼文行,於裴幾原見之矣。

校勘記

[一] 子謇官至通直郎 「謇」南史作「騫」。

[二] 晉司空和七世孫 「七世」南史作「六世」。

. = 協除所部安都令 「安都」南史作「新安」。

昔孔偸 表韓績之才 「績」各本並譌爲「纘」,據晉書隱逸韓績傳改。

員外散騎常侍 王 ||懋竑讀書記疑八:「員外上少一轉字或遷字。 南史亦脫。」

ッち 父機 機」南史作「幾」。

Ħ.

-撰新儀四十卷 「四十卷」南史及隋書經籍志上皆作「三十卷」。

梁書卷三十

列傳第二十五

袁昂 子君正

嘔血 |彖曰:「其幼孤而能至此,故知名器自有所在。」 猶徙晉安,至元徽中聽還,時年十五。初,顗敗,傳首京師,藏於武庫,至是始還之。昂號慟 史,泰始初,舉兵奉晉安王子勛,行了事敗誅死。昂時年五歲,乳媼攜抱匿於廬山,會赦得出, ,絕而復蘇,從兄緣嘗撫視抑譬,昂更制服,廬于墓次。後與緣同見從叔司徒粲,粲謂 袁昂字千里,陳郡陽夏人。祖洵,[1]宋征虜將軍、吳郡太守。父顗,冠軍將軍、雍州刺

齊永明中,武帝謂之曰:「昂昂千里之駒,在卿有之,今改卿名爲昂,卽千里爲字。」出爲安南 尹,經於後堂獨引見昂,指北堂謂昂曰:「卿必居此。」累遷秘書丞,黃門侍郎。 昂本名千里, 齊初,起家冠軍安成王行參軍,遷征虜主簿,太子舍人,王儉鎭軍府功曹史。儉時爲京

列

傳第二十五

袁昂

鄱 王 長 史、尋陽公相 還爲太孫中庶子、衞軍武陵王長史。

典籍。 教,示 常願 之者, 與弟 在 共 今以餘喘,欲遂素志,庶寄其罔慕之痛, 至,必欲行之。 終 有,恣其 千秋 毅 彌固 昂致書以喻之曰:「竊聞 以義方,每假其談價,虛其聲譽,得及人次,實亦有由。 內憂,哀 同 孤子夙 居,毅亡,棱為 ,此恩此愛,畢壤不 之後,從服朞齊,不圖 取足,爾來三十餘年,憐愛之至,無異於己。〔三〕姊 以不天,幼傾乾廕,資敬未奉,過庭莫承, 君問 毁過禮。 禮 所 心服三年。 歸,謹 服 未 追。 除 禮 門衰 以諮 由 而 旣情若同生,而服爲諸從,言心卽事 . 恩斷,服以情申,故小 從兄彖卒。 自。 ,禍集一旦,草土殘 由也之不除喪,亦緣情 少申無已之情。 臨 紙 號 昂幼孤,爲彖所養,乃制春服。 哽,言不識 息,復罹 藐藐 功他 雖 次 禮 而 妹孤姪, 兼開 致 沖人,未達朱紫。 邦,加制 無 今酷 制,雖識 明 據, 拓房宇, ,尋惟慟 成 事,實未T 乃事 一等,同 就 不 及 一時,篤 處以 有 古,誠 忍安。 絕, 先例, 爨有緦,明之 從兄提 人有怪而 華 彌 曠, 懷 念之深, 劇 率 昔馬棱 感慕。 彌 養訓 迷而 同財 深 問

駭,昂乃縛 事 劾奏,不憚權豪 服闋,除右 衣著柩 軍 誓同 邵 當 陵王長 時 沈溺。 號 爲正 史,俄遷御史 直。 及風 止,餘船皆沒,唯昂所乘船獲全,咸謂精誠 出爲 豫章 中丞。 內史,丁 時尚書令王晏弟詡爲 所生母 憂去 職 廣州,多 以喪還, 所致 納 江 財貨,昂 路 風 浪暴 依

起爲建武將軍、吳興太守。

隅 克。 運, 內 近 誚 祿 旣 白入 陣。 福 云補 屠 由,仍爲 奉 責 位 滅 旣 揆庸素,文武 傾 無 兆民 敕,以 了, 獨 氐室,天文表於上,人事 門, 況 今皇威 永 枝葉 非所謂孝,忠孝俱盡, 未 欲布 建業 去就 元 掎 有賴, 悉 無送款,循復嚴旨,若臨 興亡有 末,義 此 安附? 雅 角,沈法瑀、孫肸 所懷,故致今白。」昂答曰:「都史至,辱誨。 之宜、幸加詳 孤 四 懷 境多虞,見使安慰。 臨 百 城,人懷 聊 數,天之所 師 無施,直是東國賤男子耳。四 姓 長 童兒牧豎,咸謂 至京 水蘇 申 圍 往 已合, 離 師, 意 。吾荷任前 擇。 阻 棄,人孰 州牧郡守皆望 將欲 、朱端,已先 , 獨夫狂: 遐 符 若執: 面 於下,不 縛 邇 萬仞。 何 自承 其非。 畢 軍 迷遂往,同 依? 能 驅,掃除京邑, 。 惊,振· 門, 集, 匡? | 麾旆| 三吳內地,非用 豈若飜 求之 謀 人神 肅 日 風降款, 清 機 夕 古未聞,窮凶 同 屆 し明鑒。 契,寔 來 吳 相 同 惡 雖欲獻心,不增大師之勇, 止 會,而 奮。 繼, 然 不 不悛,大軍一 改圖, 方撥: 再, 莫不 實 昂 在 屠潰之期, 銳卒萬計,鐵馬千羣 足下 獨 茲辰。且 所 圖 亂 膝 承藉 自 兵之所,況 未 極虐,歲 拒境不受命。 之宜 反正 袒 招 達。 欲 軍 多福 以 以 臨,誅及三族。 早。 范 一,伐罪弔 勢不云遠。 門, 今竭 衆論,謂 品 月滋 曲 進 品 頃 惟僕一 以 之郡 力昏 申冑 藉 則 甚。 偏 民,至 高 聽 遠害 僕有 隅 主, ,禦堂堂之 祖 道 置其愚默,寧沮衆 以 天未 兼 人 久 手 路, 郡 勤 雖 全 未足爲 薦 熒 此 止 敢 書 誠款, (惑出 攻戰 胎 絕齊 身,退則 以 後 王之舉, 喻 承 何 至 後 來 日一 能 欲 者, 悔, 端 忠,家門 各率 何往 前 聖 狼 ··, 根 門、太 政以 寧復 無横 夫 役? 長 明 顧 守 啓

本

所

不

禍

志 軍 于心, 忘其所厝, 誠推理鑒, 猶懼威臨。」建康城平, 昂束身詣闕, 高祖宥之不 一之威。 旦。 幸藉 非惟物議不可,亦恐明公鄙之,所以躊躇, 將軍含弘之大,可得從容以禮。 竊以一飡微施,尙復投殞,況食 未遑薦壁。 遂以 輕微,爰降重命 問 也 人之祿,而頓 一震灼

臣之所荷,曠古不書,臣之死所,未知何地。」 還編點庶,濯疵蕩穢,入楚遊陳,天波旣洗,雲油遽沐。古人有言:『非死之難,處死之難。』 明刑徇衆,誰曰不然。幸約法之弘,承解網之宥,猶當降等薪桑,遂乃頓釋鉗赭。 冠,徒藉羽儀,易農就仕。往年濫職,守秩東隅,仰屬龔行,風驅電掩。 罪,在臣實大,披心瀝血,敢乞言之。臣東國賤人,學行何取,旣殊鳴雁直木,故無結綬彈 交通, 屢起田儋之變, 每懼殷通之禍, 空慕君魚保境, 遂失師涓抱器。 日至,執玉帛者相望。獨在愚臣,頓昏大義,殉鴻毛之輕,忘同德之重。但三吳險薄,五湖 有崇侯之伐。 之律,莫不嚴五辟於明君之朝,峻三章於聖人之世。是以塗山始會,致防風之誅;酆邑方構, 灰 非 、喻,荑枯未擬,摳衣聚足,顚狽不勝。 天監二年,以爲後軍臨川王參軍事 未有緩憲於斮戮之人, 赊刑於耐罪之族,出萬死入一生如臣者也。**推恩及** 臣遍歷三墳,備詳六典,巡校賞罰之科,調檢生死 昂奉啓謝曰:「恩降絕望之辰,慶集寒心之日,焰 後至者斬,臣甘斯戮。 當其時也,負鼎圖者 斂骨吹魂,

高祖答曰:「朕遺射鉤,卿無自外。」俄除給事黃門侍郎。 其年遷侍中。 明年,出為尋

傳第二十五 袁昂

列

年,爲 子祭酒 給東園秘器,朝服一具,衣一襲,錢二十萬,絹布一百匹,蠟二百斤,卽日舉哀。」 魏軍於朐山、詔權假昂節、往勞軍。 尚書,復 公器寓凝素,志誠貞方,端朝燮理,嘉猷載緝。 大同六年,薨,時年八十。 遷司空、侍中、尚書令,親信、鼓吹並如故。五年,加特進、左光祿大夫,增親信爲八十人。 拜,又領 陽 太守,行江州事。 中書監 兼 (國子 兼 僕射 右僕射、未拜、有詔 祭酒。 一、丹陽 如故,領豫州 尹。 六年,徵爲吏部尚書,累表陳讓,徙爲左民尚書,兼右僕射。 大通元年,加 其年進號 韶曰:「侍中、特進、左光祿大夫、司空昂, 奄至薨逝, 惻怛于懷。 大中正。 即眞。EB尋以本官領起部尚書,加侍中。 中書監,給親信三十人。尋表解祭酒,進號中撫軍 中衛將軍,復爲尚書令,即本號開府儀同三司,給 十五年,遷左僕射,[8] 尋爲尚書令、宣惠將軍 八年,出爲仁 追榮表德,寔惟令典。 威將軍、吳郡 太守。 可贈本官,鼓吹一部, 十 十一年, 四 年, 七年,除國 馬仙 入爲 大將軍, 鼓吹,未 普通三 琕破 五 兵

誠 戶。自念負罪私門,「ti 階樂望絕,保存性命,以爲幸甚;不謂叨竊寵靈,一至於此。常欲竭 吳興,屬在昏明之際,旣闇於前覺,無識於聖朝,不知天命,甘貽顯戮,幸遇殊恩,遂得全門 曰:「吾釋褐從仕,不期富貴,但官序不失等倫,衣食粗知榮辱,以此闔棺,無慚鄕里。 往忝 **、翻報,申吾乃心,所以朝廷每興師北伐,吾輒啓求行,誓之丹款,實非矯言。** 初 , 昂臨終遺疏, 不受贈諡, 敕諸子不得言上行狀及立誌銘, 凡有所須, 悉皆停省。 旣庸懦無施, 復

陳奏、詔不許。

册諡曰穆正公。

皆不蒙許,雖欲罄命,其議莫從。 知吾名品,或有追遠之恩,雖是經國恒典,在吾無應致此, 今日瞑目,畢恨泉壤,若魂而有知,方期結草。 脫有贈官, 愼勿祗奉。」諸子累表 聖朝遵古,

闋、爲邵陵王友、北中郎長史、東陽太守。 年,詔不許,仍除豫章內史,尋轉吳郡太守。〔<〕侯景亂,率數百人隨邵陵王赴援,及京城陷, 子君正,美風儀,善自居處,以貴公子得當世名譽。 尋徵還都,郡民徵士徐天祐等三百人詣闕乞留一 頃之, 兼吏部郎, 以母憂去職。 服

恐民 勸令拒守,C100吳陸映公等懼賊脫勝,略其資產,乃曰:「賊軍甚銳,其鋒不可當;今若拒之, 心不從也。」君正性怯懦,乃送米及牛酒,郊迎子悅,子悅旣至,掠奪其財物子女,因是 當官莅事有名稱,而蓄聚財產,服玩靡麗。 財造于子悅攻之,[云]新城戍主戴僧易

感疾卒。

逢厄季,雖獨夫喪德,臣志不移,及抗疏高祖,無虧忠節,斯亦存夷、叔之風矣。 史臣曰:夫天尊地卑,以定君臣之位,松筠等質,無革歲寒之心。 袁千里命屬崩離,身 終爲梁室台

校勘記

- 祖洵 「洵」各本譌「詢」,據宋書袁顗傳及南史袁淑傳改。
- 舉兵奉晉安王子勛 「晉安」各本譌「尋陽」。 按: 劉子勛封 晉安王,非尋陽王;封尋陽王者,乃
- (三) 無異於己 南史作「言無異色」。

其弟劉子房。今據宋書晉安王子勛傳、松滋侯子房傳改。

M M M 直是東國賤男子耳 殿本。按: 袁昂陳郡陽夏人,然陳郡不得稱陳國;且下袁昂謝後軍臨川王參軍事啟,有「臣東 「東」南監本、汲古閣本、百衲本、金陵局本及南史俱作「陳」,今從北監本、

國賤人」語,下「東」字各本無作「陳」者,可證此亦作「東」爲是。

- [五] 有詔卽眞 「眞」下各本衍一「封」字,今删。
- クなし 遷左僕射 「左」各本作「右」,據本書武帝紀及南史改。按上文已復兼左僕射,此不應遷右僕

射

- [4] 自念負罪私門 各本並脫「負」字。據南史補。
- 列 尋轉吳郡太守 傳 第 + 五 「吳郡」各本譌「吳興」,據南史及册府元龜八八三改。按:下文有「新城戍主戴 校 勘 記 四五七

八九 賊遭于子悅攻之 「于子悅」南史作「張太墨」。

新城戍主戴僧易勸令拒守 「城」各本譌「成」,據南史及册府元龜六九八改。

梁書卷三十二

列傳第二十六

皆倦寐,惟慶之不寢,聞呼卽至,甚見親賞。 陳慶之字子雲,義興國山人也。 幼而隨從高祖。 從高祖東下平建鄴,稍爲主書,散財聚士,常思 高祖性好棊, 每從夜達旦不輟,等輩

効用。除奉朝詩。

諸 延明、臨淮王元彧率衆二萬來拒,屯據陟□。延明先遣其別將丘大千築壘潯梁,觀兵近境。 軍應接。 普通中,魏徐州刺史元法僧於彭城求入內附,以慶之爲武威將軍,與胡龍牙、成景儁率 還除宣猛將軍、文德主帥,仍率軍二千,送豫章王綜入鎭徐州。 魏遣安豐王元

慶之進薄其壘,一鼓便潰。後豫章王棄軍奔魏,衆皆潰散,諸將莫能制止,慶之乃斬關夜

退,軍士得全。

列傳第二十六 陳慶之

長鈞

流,降城中男女三萬餘口。詔以渦陽之地置西徐州。衆軍乘勝前頓城父。高祖嘉焉,賜 之手詔曰:「本非將種,又非豪家,觖望風雲,以至於此。可深思奇略,善克令終。開朱門而 王緯乞降。所餘九城,兵甲猶盛,乃陳其俘馘,鼓噪而攻之,遂大奔潰,斬獲略盡,渦水咽 便依明詔。」仲宗壯其計,乃從之。魏人掎角作十三城,慶之銜枚夜出,陷其四壘,渦陽城主 耳。吾聞置兵死地,乃可求生,須虜大合,然後與戰。審欲班師,慶之別有密敕,今日犯者, 涉歷一歲,糜費糧仗,其數極多,諸軍並無關心,「一」皆謀退縮,豈是欲立功名,直聚爲抄暴 魏之援兵復欲築壘於軍後,仲宗等恐腹背受敵,謀欲退師。慶之杖節軍門曰:「共來至此, 盛,必不夜出。諸君若疑惑,慶之請獨取之。」於是與麾下二百騎奔擊,破其前軍,魏人震 既遠,必不見疑,及其未集,須挫其氣,出其不意,必無不敗之理。 如 軍至駝澗,去渦陽四十里。慶之欲逆戰,韋放以賊之前鋒必是輕銳,與戰若捷,不足爲功, 其不利,沮我軍勢,兵法所謂以逸待勞,不如勿擊。慶之曰:「魏人遠來,皆已疲倦,去我 大通 慶之乃還與諸將連營而進,據渦陽城,與魏軍相持。自春至冬,數十百戰,師老氣衰, 元年,隸領軍曹仲宗伐渦陽。魏遣征南將軍常山王元昭等率馬步十五 且聞虜所據營,林木甚 萬來援,前 慶

待賓,揚聲名於竹帛,豈非大丈夫哉

壯 虜騎 慶之乃解鞍秣馬,宣喻衆曰:「吾至此以來,屠城略地,實爲不少;君等殺人父兄,略人子女, 吐沒兒領胡騎五千,騎將魯安領夏州步騎九千,援楊昱,又遣右僕射众朱世隆、四 拒 宋,「三進屯考城,城四面縈水,守備嚴固。慶之命浮水築壘,攻陷其城, 督,發自銍縣,進拔榮城,遂至睢陽。 節、腦勇將軍,送元顥還北。 又爲無算。天穆之衆,並是仇讎。 刺史王羆騎一萬,據虎牢。 七千八百兩。 自旦至 土東陽宋景休、義興魚天愍踰堞而入,遂克之。 顥 。兵旣精强,城又險固,慶之攻未能拔。 不可爭力平原,及未盡至前,須平其城壘,諸君無假狐疑,自貽屠膾。」一鼓悉使登城 魏 大通初, 左僕射楊昱、西阿王元慶、撫軍將軍元顯恭率御仗羽林宗子庶子衆凡七萬,據滎陽 陷其三壘,大千乃降。 魏北海 仍趨大梁,望旗歸款。 王元顥以本朝大亂, 天穆、吐沒兒前後繼至, (三) 旗鼓相望。 時滎陽未拔, 士衆皆恐, 顥於渙水卽魏 我等纔有七千,虜衆三十餘萬,今日之事,義不圖存。吾以 時魏征 顯進慶之衞將軍、徐州刺史、武都公。 [三] 仍率衆而 魏將丘大千有衆七萬, 自拔來降, 求立爲魏主。 東將軍濟陰王元暉業率羽林庶子二萬人來救梁、 帝號,授慶之使持節、鎭北將軍、護軍、前軍大都 魏將元天穆大軍復將至,先遣其驃騎將軍分朱 俄而魏陣外合,慶之率騎三千背城逆戰 分築九 高祖納之, 城以相 生擒 拒。 暉業,獲租 以 慶之攻之, 慶之爲假 西荆州

列 傳

第

...

+ 六

陳 慶

Ż

十餘騎北渡河。高祖復賜手詔稱美焉。慶之麾下悉著白袍,所向披靡。先是洛陽童謠曰: 分遣老生、費穆兵二萬,據虎牢,刁宣、刁雙入梁、宋,慶之隨方掩襲,並皆降款。天穆與 左光祿大夫,增邑萬戶。魏大將軍上黨王元天穆、王老生、李叔仁又率衆四萬,攻陷大梁, 僚、封府庫、備法駕、奉迎顯入洛陽宮、御前殿、改元大赦。顯以慶之爲侍中、車騎大將軍、 大破之,魯安於陣乞降,元天穆、尒朱吐沒兒單騎獲免。 收滎陽儲實,牛馬穀帛不可勝計。 所向無前 進赴虎牢,介朱世隆棄城走。 「名師大將莫自牢,千兵萬馬避白袍。」自發壁縣至于洛陽十四旬,平三十二城,四十七戰, 魏主元子攸懼,奔幷州。其臨淮王元彧、安豐王元延明率百

乃表高祖曰: 河北、河南一時已定,唯介朱榮尙敢跋扈,臣與慶之自能擒討。 悉須部送。」顯欲從之,元延明說顯曰:「陳慶之兵不出數千,已自難制;今增其衆,寧肯復爲 實,方更連兵,而安不忘危,須預爲其策。宜啓天子,更請精兵,並勒諸州,有南人沒此者, 内異,言多忌刻。慶之心知之,亦密爲其計。乃說願曰:「今遠來至此,未伏尙多,若人知虚 用乎。權柄一去、動轉聽人、魏之宗社、於斯而滅。」顥由是致疑、稍成疏貳。慮慶之密啓、 事,與安豐、臨淮共立姦計,將背朝恩,絕賓貢之禮;直以時事未安,且資慶之之力用,外同 初,元子攸止單騎奔走,宮衞嬪侍無改於常,顥旣得志,荒于酒色,乃日夜宴樂,不復視 今州郡新服,

列傳第二十六 陳慶之

橋 責。」慶之不敢復言。 洛陽之地全相任委,忽聞捨此朝寄,欲往彭城,謂君遽取富貴,不爲國計,手敕頻仍,恐成僕 至都,仍以功除右衞將軍,封永興縣侯,邑一千五百戶。 山水洪溢,軍人死散。 助者,日三善天文,乃謂榮曰:「不出十日,河南大定。」榮乃縛木爲筏,濟自硤石,與顥戰 凡所得城,一時反叛。慶之渡河守北中郎城,三日中十有一戰,傷殺甚衆。榮將退,時有劉靈 吐沒兒、榮長史高歡、鮮卑、芮芮,勒衆號百萬,挾魏主元子攸來攻顥。 也。」慶之不從。 來,廢昏立明,扶危定難,鮮有得終。 正 須 **顧大敗,走至臨潁,遇賊被擒,洛陽陷。** 綏撫,不宜 軍副 馬佛念言於慶之曰:「功高 |更復加兵,搖動百姓。」高祖遂詔衆軍皆停界首。 顥前以慶之爲徐州 魏天柱將軍介朱榮、右僕射介朱世隆、大都督元天穆、驃騎將軍介朱 慶之乃落鬚髮爲沙門,問行至豫州,豫州人程道雍等潛送出汝陰 刺史,因固求之鎮。 今將軍威震中原, 聲動 不賞,震主身危, 慶之馬步數千,結陣東反,榮親自來追,值嵩高 二事旣有, 顥心憚之,遂不遣。 河塞, 洛下南人不出一 將軍豈 屠顥據洛, 顥據洛陽六十五日 得無 乃曰:「主上以 ||慮| 則千 萬,羌夷 載 自古以 於河 . 一 時 ,

棄城 豪蔡伯龍起兵應之。[刊]僧强頗知幻術,更相 走,鍾離太守單希寶見害,使慶之討焉。 出 爲 持節、都督緣准諸軍事、奮武將軍、北兗州刺史。 扇惑,衆至三萬,攻陷北徐州,濟陰太守楊起文 車駕幸白下臨餞,謂慶之曰:「江、淮兵勁,其 會有妖賊沙門僧强自稱爲帝,土

·難當,卿可以策制之,不宜決戰。」慶之受命而行。 會未浹辰,斬伯龍、僧强,傳其首。

明郡。 息。日期田六千頃,二年之後,倉廪充實。 豫州刺史堯雄、梁州刺史司馬恭於楚城。 鎭,遂圍懸瓠。 中大通二年,除都督南北司西豫豫四州諸軍事、南北司二州刺史, 破魏潁州刺史婁起、揚州刺史是云寶於溱水,又破行臺孫騰、 罷義陽鎭兵, 高祖每嘉勞之。 停水陸轉運, 又表省南司州,復安陸郡,置上 餘並 江湖諸州 如故。 大都督侯進、 並 慶之至 休

部。 八百人表請樹碑頌德、詔許焉。 降。 走,慶之收之以歸。 敕遣湘潭侯退、右衞夏侯夔等赴援,軍至黎漿,慶之已擊破景。 大同二年,魏遣將侯景率衆七萬寇楚州,刺史桓和陷沒,景仍進軍淮上,貽慶之書使 諡曰武。 敕義興郡發五 進號仁威將軍。 是歲,豫州饑,慶之開倉賑給,多所全濟。 百丁會喪。 五年十月,卒,時年五十六。贈散騎常侍、左衞將軍,鼓吹 時大寒雪,景棄輜 州民李昇等 重

慶之性祗愼,衣不紈綺,不好絲竹,射不穿札,馬非所便,而善撫軍士,能得其死力。 長

子昭嗣。

异訪北間形勢,昕聚土畫地,指麾分別,异甚奇之。 第五 子昕,字君章。 七歲能騎射。 十二隨父入洛,於路遇疾,還京師。 指鴻臚卿朱异**,**

巴山郡,以昕爲宣猛將軍,假節討焉。 樂,雄卽散潰,仍陷溱城。 間 ·驍將,兄子寶樂,特爲敢勇。 大同四年,爲邵陵王常侍、文德主帥、右衞 六年,除威遠將軍、小峴城主,以公事免。 十年,妖賊王勤宗起於 慶之圍懸瓠,雄來赴其難, 勤宗平,除陰陵戍主、北譙太守,以疾不之官。 仗主,敕遣助防 寶樂求單騎校戰,
所躍馬直趣 義陽。 魏豫州刺史堯雄,北 叉除 寶

驃騎外兵,俄爲臨川太守。

集部 欲奔京口,乃爲景所擒。 濟。」乃板町爲雲騎將軍,回引代質,未及下渚,景已渡江,仍遣率所領遊防城外,不得入守。 太宗遲疑累日不決,外事發洩,町弗之知,猶依期而下。 王偉、宋子仙爲信。桃棒許之,遂盟約,射啓城中,遣町夜縋而入。高祖大喜,敕卽受降, 云「桃棒且輕將數十人先入。」景欲裹甲隨之。 ·曲,將用之, 斯誓而不許。 太清二年,侯景圍歷陽,敕召盺還,盺啓云:「采石急須重鎭,王質水軍輕弱,恐慮不 景見町殷勤,因留極飲,曰:「我至此得卿,餘人無能爲也。」令町收 景使其儀同范桃棒嚴禁之,所因說桃棒令率所領歸降,襲殺 **断旣不肯爲書,期以必死,遂爲景所害,時年** 景邀得之,乃逼昕令更射書城中,

蘭 欽 字休明,中昌魏人也。[10]父子雲,天監中,軍功官至雲麾將軍 一、冀州 刺史。

楊 城 旧 將柴集 又遣 目遣 別 將 欽 子孝邕 都督范 及襄城太守高宣、別將范思念、鄭承宗等。 郊仲,進攻擬山城,破其大都督劉屬衆二十萬。 幼 而 果決,趫]率輕兵來援,欽逆擊走之。 又破譙州刺史劉海游,還拔厥固,收其家口。 思念、別將曹龍牙數萬衆來援,欽與戰,於陣斬龍牙,傳首京師 捷過人,隨父北征,授東宮直閣。 仍攻厥固、張龍、子城、未拔、魏彭城守將 大通元年, 攻魏蕭城, 進攻籠城, 獲馬千餘匹。 拔之。 又破其大 仍破彭 楊

百戶。 陽 援, 遂 刺 降, 史, 了三次 破 叉 梁、漢 增封 容 假 叉破 敕赴 羅 欽 五百戶,進爵 底定。 溪 天漆蠻帥 節 援。 ,都督衡州三郡 於是 進號 除 次持節 晚時 長樂諸洞 智武 爲侯。 得。 、督南梁南北秦沙四 將軍,增封 兵,討桂陽、陽山、始興叛蠻,至 破 會衡州刺 一時平蕩。 通生 一,擒行 二千戶 史元慶和 又密敕欽 臺 元子禮 州諸軍事 爲 向魏 桂陽人嚴容所圍, 大將 、光烈將軍、平西校尉、梁南 興, 薛儁、張菩薩,魏梁州 |卽平破之。封安懷縣男,邑五 經南 鄭 遣使告急 屬魏將托 跋 刺 勝 秦 欽 史元羅 三州 寇襄 往 應

鄭 入斜谷,斬獲略盡。 ~,梁州 饿 改 刺 授 史杜 持節、都督衡桂二州諸 懷瑤請 西魏相宇文黑泰致馬二千匹,自己請結隣好。 救、欽 率所領援之,大破紹、獻於高 軍 事 () 衡州刺 史,未及述職, 橋 城,斬首三千餘,紹 魏遣都督董紹、張獻 韶加散騎常侍,進號仁威 、獻奔退,追 攻圍 南

將軍,增封五百戶,仍令述職。

騎常侍、安南將軍、廣州刺史。旣至任所,前刺史南安侯密遣廚人置藥於食,欽中毒而卒, 五百戶。在州有惠政,吏民詣闕請立碑頌德,詔許焉。 經廣州,因破俚帥陳文徹兄弟,並擒之。至衡州,進號平南將軍,改封曲江縣公, 徵爲散騎常侍、左衞將軍,尋改授散 增邑

子夏禮,侯景至歷陽,率其部曲邀擊景,兵敗死之。

時年四十二。詔贈侍中、中衞將軍、鼓吹一部。

祖,旣預舊恩,加之謹肅,蟬冕組珮,亦一世之榮矣。 史臣曰:陳慶之、蘭欽俱有將略,戰勝攻取、蓋頗、牧、衞、霍之亞歟。 慶之警悟,早侍高

校勘記

.1〕諸軍並無關心 「軍」,通鑑作「君」。

時魏征 元 年 紀作「暉」,通鑑於此 東將軍 濟陰王元暉業率羽林庶子二萬 處及下 處並作「暉」。 人來救梁宋 元暉業,魏書有傳。 「暉」各本作「徽」。 今 並據改 按 武帝中大通

列傳第二十六 蘭欽 校勘記

四六七

- [] 」武都公 南史作武都郡王。
- 又遣右僕射尒朱世隆 「介朱世隆」各本皆作「介朱隆」。 南史作「介朱世隆」。 按 **尒朱世隆北**

, 史有傳, 姚思廉避唐諱, 删「世」字。 今補。

- 天穆吐沒兒前後繼至 「吐沒兒」,各本俱脫「吐」字,按卽上文之「尒朱吐沒兒」,爲尒朱兆小
- 名。今補。
- 時有劉靈助者 「靈」字各本脫,據南史及通鑑補,與魏書合。
- Cセン 土豪蔡伯龍起兵應之 「龍」南史作「龍」。
- 江湖諸州 並得休息 「湖」南監本、汲古閣本、金陵局本俱作「湘」,今從百衲本、 北監本、殿本。
- 按 "册府元龜五〇三作「湖」。 通鑑同。 胡注:「謂洞庭、彭蠡間諸州 也。
- **个**元 乃板昕爲雲騎將軍 騎」百衲本、南監本、汲古閣本、 金陵局本作「旗」、今從北監本、殿本。
- 中昌魏 人也 錢 大昕 计二史考異:「按南齊書州郡志, 梁州 有 東 昌魏 郡,又新城 郡 有 昌 魏 縣,初
- 不見中昌魏之名。」
- 屬 魏 將 托 跋 勝 寇襄陽 勝」百衲本作「滕」,今從殿本。 張森楷梁書校勘記:「托跋勝疑是賀拔

勝之譌。」

西魏相宇文黑泰致馬二千匹 錢大昕廿二史考異:「本名黑獺、獺泰聲相近。」

梁書卷三十三

列傳第二十七

王僧孺 張率 劉孝綽 王筠

王僧孺字僧孺,東海郯人,魏衞將軍肅八世孫。 會祖雅,晉左光祿大夫、儀同三司。

祖

准,宋司徒左長史。

之。」六歲能屬文,旣長好學。家貧,常傭書以養母,所寫旣畢,諷誦亦通。 僧孺年五歲,讀孝經,問授者此書所載述,曰:「論忠孝二事。」僧孺曰:「若爾, 常願

曹,使僧孺撰東宮新記。 仕齊,起家王國左常侍、太學博士。 尚書僕射王晏深相賞好。 遷大司馬豫章王行參軍,又兼太學博士。 晏爲丹陽尹, 召補郡功 司徒竟陵王子良開西

邸招文學,僧孺亦遊焉。 時王晏子德元出爲晉安郡,日以僧孺補郡丞,除候官令。 文惠太子聞其名,召入東宮,直崇明殿。 建武初,有詔舉士,揚州刺 欲擬爲宮僚,文惠薨,不

列傳第二十七 王僧孺

譽。 史始 即,以文學友會,及是將之縣,防贈詩,其略曰:「惟子見知,惟 勗。 始。 疑 儀,南宮故事 致 悟敏 斯在。」除尚書儀曹郎,遷治書侍御史,出爲錢唐令。〔三初,僧孺與樂安任昉遇竟陵王 安 修名旣 敬之重之,如蘭 了,旣筆 主 遙 立,老至 光 ,畫地成圖,抵掌 耕 表 爲養,亦傭書成 薦 秘 一何遽。 如芷。 書丞王陳 形應影隨,曩行今止。 誰其執鞭,吾爲子御。 可述; 豈直 及僧孺 學。 至乃照螢 曰:「前候官令東海王僧 鼮鼠有必對之辯, 竹書無落簡之謬, 八映雪 7,編蒲 劉略班藝,虞志荀錄,伊昔有懷,交相欣 百行之首,立人斯著。 緝 柳,先言往行,人物雅俗,甘泉遺 余知子。 孺, 年三十五 觀行 子之有之,誰毁誰 視言,要終猶 訪 理尙 對 棲 不休,質 約 西 思

貧,其母 感不自勝。 視 海 事 舶 朞 下帷 毎 天 (中表簿 監 僧孺 歲 月,有詔 灣紗 數至,外國賈人以通貨易,舊時州郡以半價就市,又買而卽賣,其利數倍,歷 初 無 除 倦,升高 尋以公事降爲雲騎將 乃歎曰:「昔人爲蜀部長 布 及起居注。 臨 徵還,郡民道俗六百 以自業,嘗攜 川王後軍記室參軍,待詔文德省。 了有屬。 遷尙 嘉爾晨燈、三 僧孺 書左丞,領著作 至市,道 軍, 兼職如故, 頃之卽眞。 (史)終身無蜀物,吾欲遺子孫者,不在 人詣闕請留,不許。 惜余夜燭。」 其爲士友推重如此。 遇 中 ·如故。 丞 鹵簿,驅迫溝 俄除 尋出爲南海太守。 旣至,拜 游擊將 中。 是時高祖製春景明志詩五 軍、兼: 中書郎、領著作,復直 及是 御 拜 郡常有高涼生 越裝。」並 史中丞。 H 引 清道 無所 僧 文德 孺 政 口 取。 幼 及 百

敕 在朝之人沈約已下 同作,高祖以僧孺詩爲工。 遷少府卿, 出監吳郡。 還除尚書吏部

郎,參大選,請謁不行。

聲,式 逢, 宁 微禽先落 生 如 、畫,獨 骸 年 小 方致 道愍逐 有値 出 膽玉 人易 何 爲 徽 在 施 仁威 謬 說。 色。 |僚端 閶 縄,解錄 浸謗 眉 仰清 闔 訟僧孺, 目。 南 方謂 始 顧 康 步高 借其從容之詞,假以寬和之色,恩禮遠過申、白,榮望多 吹,細草仍墜。 塵,假翼西雍,竊步 方當橫潭亂海, 收 王長史、行府、州、國事。 離腸隕首, \簪,且 逮詣 軒, 悲 一歸初 南 如 司。 霰 不足以報 服。 委; 奉牋辭 就魚鼈 辭 踟 竊 東閣,多慚袨服,取亂 九畹, 以 蹰 一言,露膽 董生偉器,止相 府曰:「下官不能避溺 下 而 王典籤湯道愍暱於王,用 席 爲羣; 方去 源岩 五. 披榛捫 披誠 雲。 綆 糜。」 縦天 驕王,賈子上才,爰傅卑土。 樹 何 長裾,高榻 能以 網 從 Щ 是漏 虺 間,而 酬 蛇 屢 而 相望,直居坐右,長 事府內,僧孺 聖 顧 相 一恩可 正 厠 伍 冠 應、徐。 寧謂罻 李 恃,亦 블 下 復 號 羅裁舉, 厚德 毎裁 復 仰 下 孰 聽 胎 難 寄 階 官 金 疵 抑

恨, 僧 且 近 坐 或 別之後, 趸 吟謠,況歧路 官, 久之不 將隔暄 調。 之日,將離 寒, 友 思 人廬 子爲勞, 嚴 江何 網 辭 炯猶 未 無 能忘 爲 可 憐 王府 弭。 罪 記 昔李叟入秦, 有 室, 不 測。 乃致書 蓋 於炯, 畫 地 梁生 刻 以 木, 適 見 昔 越 其 人所惡 猶 懷悵 曰:

列傳第二十七 王僧孺

叢棘

既累,

於

何

可

聞,所以握手戀戀,離別珍重。

弟愛同鄒季,至

淫淫承睫,吾猶復抗

信 手分背,羞學婦人。 用旣然,可樂爲甚。 素鍾肇節,金飈戒序,起居無恙,動靜履宜。 且使目明,能祛首疾。甚善甚善。

以 價厚名,[k] 橫叨公器人爵,智能無所報,筋力未之酬,所以悲至 撫 膺,泣 盡 而 繼 之 旦離大辱,蹈明科,去皎皎而非自汙,抱鬱結而無誰告,丁年蓄積,與此銷亡,徒竊高 吾無昔人之才而有其病,癲眩屢動,消渴頻增。委化任期,故不復呼醫飲藥,但恨

不得奉板中涓,預衣裳之會,提戈後勁,厠龍豹之謀。及其投劾歸來,恩均舊隷,升文 許、史,遨遊溪、竇,俛首脅肩,先意承旨,是以三葉靡遘,不與運幷,十年未徙,孰非能 委曲同之鍼縷,繁碎譬之米鹽,孰致顯榮,何能至到。加性疏澁,拙於進取,未嘗去來 十萬而橫行,提五千而深入,將能執圭裂壤,功勒景鍾,錦繡爲衣,朱丹被轂,斯大丈夫 動一議可以固邦興國。全壁歸趙,飛矢救燕,偃息藩魏,甘臥安郢,腦日逐,髓月支,擁 尺板斗食之吏,以從阜衣黑綬之役,非有奇才絕學,雄略高謨,吐一言可以匡俗振民, 之志,非吾曹之所能及已。直以章句小才,蟲篆末藝,含吐緗縹之上,翩蹮樽俎之側, 及除舊布新,清晷方旦,抱樂銜圖,訟謳有主,而猶限一吏於岑石,隔千里於泉亭, 顧惟不肖,文質無所底,蓋困於衣食,迫於飢寒,依隱易農,所志不過鍾庾。 久爲 列傳第二十七 王僧孺

入班九棘,出專千里,據操撮之雄官,參人倫之顯職,雖古之爵人不次,取士無名,未有 共研之夙逢, 笥餌卮酒之早識, 一旦陪武帳, 仰文陛, 備聃、佚之柱下, 充嚴、朱之席上, 石,登玉陛,一見而降顏色,再覩而接話言,非藉左右之容,無勞羣公之助。 又非同席

躡影追風,奔驟之若此者也。

端,上可以投畀北方,次可以論輸左校,變爲丹赭,充彼春薪。 器,有驗傾后,是以不能早從曲影,遂乃取疑邪徑。 得不銷爛,所謂還魂斗極,追氣泰山,止復除名爲民,幅巾家巷,此五十年之後,人君之 好生之施,解網祝禽,下車泣罪,愍茲奊詬,憐其觳觫,加肉朽紫,布葉枯株,輟薪止火, 獸,如離繳之鳥,將充庖鼎,以餌鷹鸇。 何以從人,何以徇物。外無奔走之友,內乏强近之親。是以構市之徒,隨相媒糵。 肖,在朝見嫉,女無美惡,入宮見妬。家貧,無苞苴可以事朋類,惡其鄉原,恥彼戚施, 賜焉。 朝捐 蓋基薄牆高,塗遙力躓,傾蹙必然,顚匐可俟。 木石感陰陽,犬馬識厚薄,員首方足,孰不戴天。而竊自有悲者,蓋士無賢不 棄,以快怨者之心,吁可悲矣。[刊] 雖事異鑽皮,文非刺骨,猶復因茲舌杪,成此筆 故司隷懍懍、思得應弦, 竟以福過災生,人指鬼瞰, 幸聖主留善貸之德,紆 譬縣厨之 將均宥

蓋先 貴後 賤,古富今貧,季倫所以發此哀音,確門所以和其悲曲。 又迫以嚴秋殺

省,知撰譜事。普通三年,卒,時年五十八。 同悲,秋葉晚傷,雜黃紫而俱墜。蜘蛛絡幕,熠燿爭飛,故無車轍馬聲,何聞鳴鷄吠犬。 俛眉 久之, 起爲安西安成王參軍, 累遷鎭右始興王中記室, 北中郎南康王諮議參軍, 入直西 累,時存寸札,則雖先犬馬,猶松喬焉。去矣何生,高樹芳烈。 微之道德。 渠,以實螻蟻,悲夫!豈復得與二三士友,抱接膝之歡,履足差肩,摛綺縠之清文,談希 重。 氣,具物多悲,長夜展轉,百憂俱至。況復霜銷草色,風搖樹影。 素無一廛之田,而有數口之累。豈曰匏而不食,方當長爲傭保,餬口寄身,溘死溝 事妻子,舉手謝賓遊。方與飛走爲隣,永用蓬蒿自沒。愾其長息,忽不覺生之爲 唯吳馮之遇夏馥, 范式之值孔嵩,[5] 愍其留賃, 憐此行乞耳。 儻不以 垢 裁書代面,筆淚俱下。 寒蟲夕叫,合輕重而

譜集十五卷,東南譜集抄十卷,文集三十卷,兩臺彈事不入集內爲五卷,及東宮新記,並行 所不覩。其文麗逸,多用新事,人所未見者,世重其富。僧孺集十八州譜七百一十卷,百家 僧孺好墳籍,聚書至萬餘卷,率多異本,與沈約、任昉家書相埓。少篤志精力,於書無

於世。

張率字士簡,吳郡吳人。 祖永,宋右光祿大夫。 父躟,齊世顯貴,歸老鄉邑,天監初,授

右光祿,加給事中。

陸倕 官,東南胄望未有爲之者,今以相處,足爲卿譽。」其恩遇如 條、「日」勒成百卷,使工書人琅邪王深、「10〕吳郡范懷約、褚洵等繕寫, 率爲鄱陽王友,遷司徒謝朏 就。 南 蕭 得人今爲盛。」率奉 詔 往 返數首。 子於金馬矣。」又侍宴賦詩,高祖 詔賦奏之,甚見稱賞。手敕答曰:「省賦殊佳。 金 遙 幼 光 也 久之,除太子洗馬。 率 「,卿可與定交。」由 相友狎,常 爲揚州,召迎主簿,不就。 年十二,能屬文,常日限爲詩一篇,稍進作賦頌,至年十六,向二千許首。 同 .載詣 高祖霸 此 左衞將軍沈約,適值任助 與防友善。 掾,直文德待詔 府建,引爲相 起家著作佐 乃別賜率詩曰:「東南有才子,故能服官政。 其年, 遷祕書丞, 遷尙 ·書殿· 省, 郎。 國主簿。 相 敕使 中郎。 如工而不敏, 建武 在焉,約乃謂昉曰:「此二子後進才秀,皆 引見玉衡殿。 抄乙 三年,舉秀才,除太子舍人。 天監初,臨 出為西 此 部書,又使 枚 車速而不工, 卿可謂兼二 中郎南 川王已下 高祖曰:「秘書丞天下清 以給後宮。 康王 撰 婦 並置友、學。 |功曹史,以疾不 人 余雖慚古昔, 事 率又爲待 齊始安王 二十餘 與同 以 郡

四年三月,禊飮華光殿。 其日, 河南國獻舞馬,詔率賦之,曰:

臣 聞 天用莫 如龍,地用莫如馬。」故禮稱驪騵,詩誦騮駱。 先景遺風之美,世所得

列

傅

有奇貌絕足,能拜善舞。

天子異之,使臣

作賦

了; 曰:

聞 浮琛委贄, 吐圖 騰 風被之域,越險効珍, 光之異,有 時而出。 洎我大梁,光有區 **幹服烏號之駿**, 夏, 騊駼豢龍之名。 廣運自中,員照無外, 而河南 又獻赤龍駒, 日入之所,

散大明以燭幽,揚義聲而遠斥。 唐,矚天馬之禎漢。旣叶符而比德,且同條而 御方巡。 尺 稟妙足而逸倫,有殊姿而特茂。 品 炎運,亦表祥於尙色。資皎月而載生,祖河房而挺授。 風 於漢 而 、縣鑿之辨,附蟬伏兎之別,十形五觀之姿,三毛八肉之勢,臣何得而稱焉,固已詳於 率職。 維 底。 伊自然之有質,寧改觀於肥瘦。 豈徒服阜而養安,與進駕以馳驟。 梁受命四載,元符旣臻,協律之事 考帝文而率通,披皇圖以大觀。 納奇貢於絕區,致龍媒於殊域。 善環旋於薺夏,知蹈躧於金奏。超六種於周閑,踰八 固施之於不窮,諒無所乎朝夕。並承流以請吏,咸向 子具舉, 慶惟道而必先,靈匪 伊況古而赤文,爰在茲而朱翼。 共貫。 膠庠之教必陳, 檀輿之用 詢國美於斯今, 邁皇王於曩昔。 種北唐之絕類,嗣西宛之鴻胄。 聖其誰贊。 已偃,玉輅之 見河龍之瑞 既効德於 爾其挾

定單 而 徒 觀 少天驥。 其神爽,視其豪異,軼跨野而忽踰輪,齊秀騏而並末駟。 信無等於漏面,孰有取於決鼻。 可以迹章、亥之所未遊,踰禹、益之 貶代盤而陋小 華,越

萷

古,邈深文而儲思。 所未至。 將不得而屈指,亦何暇以理轡。若跡遍而忘反,非我皇之所事。 方潤色於前

庭。 玉 漕 雀躍鷲集,鵠引鳬翔。 旣就場而雅拜,時赴曲 來,寧執朴而後進。 畢 婉脊投頌,俛膺 伊川 舉,聆韶、夏之咸播。承六奏之旣闋,及九變之已成。均儀禽於唐序, 而肩隨。 懷夏后之九代,想陳王之紫騂。乃命涓人,効良駿,經周衞,入鉤陳。 旣而機事多暇,青春未移。 而 分派,引激水以回 清輦道於上林,肅華臺之金座。 合雅。 既傾首於律同,又蹀足於鼓振。 露沫歕紅,沾汗流赭。 妍七盤之綽約,陵九劍之抑揚。 而 徐趨。 池。 敏躁中於促節,捷繁外於驚桴。 集國良於民傷,列樹茂於皇枝。 時惟上巳,美景在斯。 望發色於綠苞,佇流芬於紫裹。 乃却走於集靈, 馴惠養於豐夏。 擢龍首,回鹿軀,睨 豈借儀於褕袂,寧假器於**髦**皇。 遵鎬飲之故實,陳洛讌之舊儀。 騏行 紛高 驥動,虎發龍驤; 冠以連袵, 兩鏡,蹙雙鳬。 同舞獸於虞 言右牽之已 聽磬鎛之 鬱風雷 鏘鳴

訪也。 增上封之訓,背清都而日行,指雲郊而玄運。 若彼符瑞之富,可以臻介丘而昭卒業,搢紳羣后,誠希末光,天子深穆爲度,未之 何則? 進讓殊事,豈非帝者之彌文哉。 今四衞外封,五岳內郡,宜弘下禪之規, 將絕塵而弭轍,類飛鳥與駐驢。 總三才

之壯心,思展足於南野

列

傳

輿。 集繁祉於斯萬,在庸臣之方剛,有從軍之大願。必自茲而展采,將同畀於庖煇。悼長卿 而 驅 飾中岳之絕軌,營奉高之舊墟。 鶩 ,按五御而 超據。 翳卿雲於華蓋, 翼條風於屬車。 訓厚况於人神,弘施育於黎獻。 無逸御於玉軫,不泛駕於金 垂景炎於長世,

時與到洽、周興嗣同奉詔爲賦,高祖以率及興嗣爲工。

之遺書,憫周南之留恨。

者不願,遂出家爲尼。嘗因齋會率宅,玩之乃飛書言與率姦,南司以事奏聞,高祖惜其才, 其年,父憂去職。 其父侍妓數十人,善謳者有色貌,邑子儀曹郞顧玩之求娉焉,曰迴謳

寢其奏,然猶致世論焉。

轉宣毅諮議參軍,並兼記室。王還都,率除中書侍郎。十三年,王爲荆州,復以率爲宣惠諮 俄有敕直壽光省,治丙丁部書抄。八年,晉安王戍石頭,以率爲雲麾中記室。王遷南兗州, 議,領江陵令。府遷江州,以諮議領記室,出監豫章、臨川郡。 服闋後,久之不仕。 七年,敕召出,除中權建安王中記室參軍,預長名問訊,不限日。 率在府十年,恩禮甚篤。

及爲別駕奏事,高祖覺牒問之,並無對,但奉答云「事在牒中」。高祖不悅。 與中庶子陸倕、僕劉孝綽對掌東宮管記、江三遷黃門侍郎。出爲新安太守,秩滿還都,未至, 還除太子僕,累遷招遠將軍、司徒右長史、揚州別駕。率雖歷居職務,未嘗留心簿領, 俄遷太子家令,

丁所生母憂。 「近張新安又致故。 大通元年,服未闋,卒,時年五十三。 其人才筆弘 雅,亦足嗟惜。 隨弟府朝,東西日久,尤當傷懷也。 昭明太子遣使贈賻,與晉安王綱令曰: 比人物

零落,特可潸慨,屬有今信,乃復及之。」

子長公嗣二門。 及藝文志所載 率問 率嗜酒,事 其故,答曰:「雀鼠秏也。」率笑而言曰:「壯哉雀 詩賦,今亡其文者,並補作之。 事寬恕,於家務尤忘懷。 在新安,遣家僮載米三千石還吳宅,既至,遂秏太 所著交衡十五卷,文集三十卷,二三行於世。 鼠。」竟不 研問。 少好屬文,而七略

劉 孝綽字孝綽,彭城人,本名冉。 祖勔,宋司空忠昭公。 **父繪,齊大司馬霸府從** 事

中郎。

年長繪十餘歲,其子孝才與孝綽年並十四五,口三及雲遇孝綽,便申伯季,乃命孝才拜之。 志學,繪常使代草之。父黨沈約、任昉、范雲等聞其名,並命駕先造焉,昉尤相賞好。 融每言曰:「天下文章,若無我當歸阿士。」阿士,孝綽小字也。 孝 綽幼聰敏,七歲能屬文。 舅齊中書郎王融深賞異之,常與 繪,齊世掌詔誥。 同載適親友,號曰 孝綽 神童。 范雲 年未

列

耕

勵秋穫。」其爲名流所重如此。

嗟人,徒深老夫託。 天監 初, 起家著作佐郎,爲歸沐詩以贈任昉,防報章曰:「彼美洛陽子,投我懷秋作。 直史兼褒貶,轄司專疾惡。 九折多美疹,匪報庶良藥。 子其崇鋒穎,春 **詎慰耋**

稍 宴,於坐爲詩七首,高祖覽其文,篇篇嗟賞,由是朝野 習 。」頃之卽眞。 遷 !太子舍人,俄以本官兼尚書水部郎,奉啓陳謝,手敕答曰:「美錦未可便製,簿領亦宜 高祖雅好蟲篆,時因宴幸,命沈約、任昉等言志賦詩,孝綽亦見引。 '改觀焉。

太子 議 尙 錄 城 一入以第一官當 書 到 太子 ,僕,復 洽 金部 尋 等,同 有 事免。 獨 敕 郎、日心復爲太子洗馬,掌東宮管記。 掌 使 知青、北徐、南徐三州事,出爲 孝 見 東宮管記。 用第一人。」故以孝綽 綽 賓 起為 集 禮。 安西記室,累遷安西驃騎諮 而 序之。 太子 時昭 起樂賢堂,乃使畫工 遷員 明 太子好士愛文, 外散騎 居 此 職。 常侍,兼廷 一平南安成王記室, 隨府之鎭。 出爲 公事免。 孝綽 一先圖 議參軍,敕權 上虞令,還除秘書丞。 尉卿,頃之卽眞。 孝綽焉。 與 陳郡 尋復除秘書丞,出 殷芸 知司 太子文章繁富, 吳郡 徒右 長 陸 尋補 倕、 、史事 爲 高 祖 鎭 琅邪王筠、彭 太子洗馬,遷 ·,遷太府卿、 南 謂 **羣才咸欲** 安成王諮 舍 人周 撰 捨

及孝綽爲廷尉卿,曰出攜妾入官府,其母猶停私宅。 初 孝綽 與 到 洽友善, 同 遊 東 宮。 孝綽 自以才 優於洽, 給尋爲御史中丞, 遣令史案其事, 遂劾 每於宴坐, 嗤鄙 其文, 洽銜之。

諸弟,時隨藩皆在荆、確,乃與書論共給不平者十事,其辭皆鄙到氏。 奏之,云:「攜少妹於華省,棄老母於下宅。」「高祖爲隱其惡,改「妹」爲「姝」。[15]坐発官。孝綽 又寫別本封呈東宮,

渚宮舊 舉,且 古 出 求 此 師名動,彼此一時,何其盛也。 昭 由 想 竊以文豹 金 了,譬張 瘼 明 賞 溫 已來,衆諸屑役。小生之詆,恐取辱於廬江;遮道之姦,慮興謀於從事。 人,不以委約而能不伎癢;且虞卿、史遷由斯而作,想摛屬之興,益當不少。 洛地紙貴,京 石 太子命焚之,不開視也。 悉, 流 不 玉 時 摛 世祖 俗, ,飢渴明珠,雖愧下、隨,猶爲好事。 休,筆墨之功,曾何暇豫。 功 高 遣此 摮 何 朝衣 麗。 恥 之杜 辜 出為荆州,至鎭與孝綽書曰:「君屛居多暇,差得肆意典墳,吟詠情性,比復稀數 代懷。 用 ,以文爲罪。 近雖 多故,李固之薦二賢,江弘徐璆之奏五郡,江山弘威懷之道,兼而 門。 翰墨 預 數路計行,遲還芳札。」孝綽答曰:「伏承自辭皇邑,爰至荆臺,未勞刺 昔趙 垂 觀尺錦,而不覩全玉。 迹。 卿 由 窮愁, 雖乖 此而 近在道務閑,微得點翰,雖無紀行之作,頗有懷舊之篇。 知二,偶達聖心。 至於心乎愛矣,未嘗有歇,思樂惠音,清風靡聞。 譬夫夢 談,又何容易。 肆言得失,漢臣 新有所製,想能示之。勿等淸慮,徒虛其請。 昔臨淄詞賦,悉與楊脩,未殫寶笥,顧慚先哲。 一鬱志,廣敍盛衰。 故韜翰吮墨,多歷寒暑,旣闕 爱自退居素里,却掃窮閈, 彼 此 一時,擬非 方且褰帷自厲, 有 之。 比楊倫之不 子幼南山之 當欲使 、其匹。

下

降

情

白

屋

,存問相尋,食椹懷音,矧伊

人矣。」

寧貽 歌, 又微 懼 於朱亥。 敬通渭水之賦,無以自同獻笑,少酬褒誘。 顧己反躬,載懷累息。 但瞻言漢廣, 且才乖體物,不擬作於玄 邈若天涯, 區區一心, 根 分宵九逝。 · 事 殊宿 殿

無識 陳正 父,自茲厥後,其徒實繁。 言, 歸, 啓 條 官,交構 啓 使 30 謝 落 謝 意 勉 比 一之辯。 先示 孰 葉, 孝 東宮日 一無賢 前 周 綽 忽沾 是 毁 則 不 孝綽。 臣不 発 非,用 愚, 由 積 戴 一臣聞 逐漏 職後,高祖數使僕射徐勉宣旨慰撫之, 雲露 譽斯 天。 於 能 入 直 時奉詔 朝 銜 成 斯密網,免彼嚴棘,得使還同士伍, 道。 信? 疏遠畝隴, 養斐。 珠避 之, 周行 見 嫉。 是 知好惡之間, 先聖 所寘 顚 作者數十人,高祖 災 ,傾柯衞足, 曲筆短辭,不暇殫述,寸管所窺,常由切齒。 日 至若臧文 以『衆惡之, 月昭回,俯 ,復齒盛流。 絕望高 犬所噬,旨酒貿 闕,而 之下展季,靳尚之放 必待 以茲 明 必察焉; 明鑒。 紅直。 以孝綽尤工,即日有敕,起爲 但雕朽杇糞,徒成延獎;捕影 降其接引,優以旨喻,於臣 疏倖,與物多忤。 其 八甘酸; 故晏嬰再爲阿宰, 獄 衆好之, 必察焉 毎朝宴常引與焉。 書每御,輒鑒蔣濟之冤;炙髮見明,非關 比屋唐民, 一手所搖,嘉 靈 均, `生死肉骨, 豈侔 兼逢匿怨之友, 遂居司 絳侯之排賈 。』三三豊非 而 樹 .微物,足爲 變其 前 西中郎 及高祖爲籍田詩,又 殿下誨道觀書,俯同 繫風,終 毁 生死。 後 生 譽。 孤 湘東王 共施。 平 特 榮隕 無 津 効答 叉 後 則 之陷 鄒 譽 積 一諮議。 立。」文 隷之 陽 毁所 出 況 臣 剛 誠 主 有 於

縶馬 疵,復 家, 不取 文峻 爲 歎 望 信 法 懸 古自 使引 前 肆 車 於宸明,在縲嬰纆,幸 臣 載 . 資愚履直,不 姦其 惟 枉直 籍 息絕 雲陛 彌 八必奏。 一,備該神覽。 朝 覺 戴。 多 降寬 忝 能 不顧賣友,志 方 杜 和之色,垂 願 但 漸防微, 滅影 未 得蠲 臣昔因立侍,親承緒言, 渝 ※銷聲, 丹 於 不庸暗。 石 布 欲 曾未 () 水藏 帛之言,形之千載,所蒙已厚,況乃 要君,自 遂移林谷。 幾 裁 何, 輪 下発黜之書,仍頒朝會之旨。 ,机,相彼工言,構茲媒 非上帝運超己之光,昭 逢訧 不 罹 飄風貝錦,譬彼讒慝, 悟天 難。 聽罔已, 雖 吹 毛 洗 造次 諓。 **垢**, 陵陽 必彰, 在 恩等特召,榮 且 之虐,舞文 小人未 款 朝 聖旨殷勤,深以 冬而 而 不 同嗟 以 識 生 距 己,已 通方, 虚 ; 而 同 違 嚴 凋 起 見

年 坐 五 受 十 人 後為 絹 九 太子 束,爲 僕、三日母 **餉者所**訟, 漫去 職 左遷信威臨賀王 服闋,除安西湘 長史。 東 王諮議 頃之, 参軍 遷秘書監。 ,遷黃門侍郎,尚書 大同 五 年 卒官, 吏 部 郎

柯

葉,空延

(德澤)

無

謝

陽

春

う三言 孝 綽 並被 少 有 時遇 盛 名,而: 孝綽尤 仗 氣 ,輕之。 負才,多所陵忽, 每於朝集會同處, 有 茒 合意, 公卿間 極言 無所 1抵訾。 與語,反呼騶卒訪道 領軍 臧盾 太府 卿 沈僧 途 間

事,由此多忤於物。

孝綽 辭藻爲 後 進 所宗, 世重其文,每作一篇,朝成暮遍,好事者咸諷 誦傳寫,流聞絕域

列

文集數十萬言,行於世。

叔英、吳郡張嵊、東海徐悱,並有才學,悱妻文尤清拔。 悱,僕射徐勉子,爲晉安郡,卒,喪還 孝綽兄弟及羣從諸子姪,當時有七十人,並能屬文,近古未之有也。 其三妹適琅邪王

京師,妻爲祭文,辭甚悽愴。 勉本欲爲哀文,旣覩此文,於是閣筆。

作佐郎,太子舍人,王府主簿,功曹史,宣城王記室參軍。日間 孝綽子諒,字求信。少好學,有文才,尤博悉晉代故事,時人號曰「皮裏晉書」。 歷官著

筠幼警寤, 王筠字元禮,一字德柔,琅邪臨沂人。祖僧虔,齊司空簡穆公。父楫,太中大夫。 七歲能屬文。年十六,爲芍藥賦,甚美。 及長,清靜好學,與從兄泰齊名。

陳郡謝覽,覽弟學,亦有重譽,時人爲之語曰:「謝有覽學,王有養炬。」炬是泰,養卽筠,並小

字也。

然就職。 或勸逡巡不就,筠曰:「陸平原東南之秀,王文度獨步江東,吾得比蹤昔人,何所多恨。」乃欣 起家 尚書令沈約,當世辭宗,每見筠文,咨嗟吟咏,以爲不逮也。 中軍臨川王行參軍,遷太子舍人,除尚書殿中郎。 王氏過江以來,未有居郎署者, 嘗謂筠二昔蔡伯喈見

至 時, 能 研 紙 絕 於 五. 王 鷄 一,權 壁 後 仲 光 猶 實 周 所 反 宣 流 皆 影 歸 輿 以 未 平 稱 志 吾 直 已 盈 都 相 生 次 日。『王公之孫 念。 意 子。 字。 盡 要, 畢, 寫 至 文 好,殆 政在 墜 功 詞 夔 會 昔 遲 石 要 時 不不 、牙接響, 此 昌 此 將 筠 磓 閑 幼 昭 加篇 都 數 星 示 發 日 壯 句耳 絕 也,吾家 其 清 不不 題。 頗 草, 蒯 及「 顧 覯 愛 揮 謂 有 約謂 | 筠又嘗 冰 筠 斯 乃 玉 疲暮 書籍 餘 讀 申 文, 懸 振 慚 •° 人云:「 至雌 埳 ,復逢 含咀 克諧 爲詩 筠 孔 而 悉當相 翠 帶 爲 霓玉 之 之義 坻_, 此 呈 於 文 羣 間 能 翔 約 詩 君 激反連 與。』僕雖 心。」約 指 壓 筠 倏 寧 묘 卽 强 物 皆擊節 焉 比 報 踡 不 呈 韻 於 疲 笙 書云:「智 多 毎 郊 形 不 暮。 簧。 愧。 約撫掌 ,無假題署 居宅造 敏, 稱 公 贊。 宴 不 思 覽 古 請附斯言。 並 及 力 情 所示 欣抃 閣 約 作,辭 後 所 拙 齋 心約 曰:「知音者希, 該 進, 目, 詩, 日; ′′′, 必 誠 實 爲 毎 製郊居賦 妍美。 僕嘗 自 至 非 草 佇 爲 謝朓 乎 木十詠, 新 麗 恐人 人, 此, 奇 則 約常 諸賢零落 構 眞 呼 聲 爛 擅 歎 爲 書之 從容 美 思 賞 服 然 和 總 積 推 被 霓 吟

到洽 鄎。 肩。 其 奉 累 殷芸 遷 敕 見 太 製 重 等 子 開 如 善寺 遊 洗 此 馬 宴 筠 寶 玄 中 誌 叉 圃 舍 與 大 大三大 人, 、殷芸 師 碑文, 並 以 子 掌 方 獨 東宮管 詞甚麗逸。 雅 執 筠 見 記。 袖 禮 撫 焉。 孝 昭 叉敕 綽 明 出 太子 肩 爲 撰中書表奏三十卷, 而 丹 愛文 言 陽 日 尹 學士, 丞 所謂 北 常 中 左 與筠及 把 鄓 諮 浮 及所 丘 議 劉 袖 參 孝 軍 賦 綽 右 頌 遷 陸 拍 都 洪 中 倕 崖 書

啓

高

祖

日

晚

來

名

家,

唯

見王

筠

獨

步

列

俄 無寧遠湘東王長史,行府、國、郡事。 除太子家令,復掌管記

侯景 威 爲 酒 郎,遷太子中庶子,領羽林監,又改領步兵。 蕭 將 ^,敕爲哀策文,復見嗟賞。 雲麾豫章王長史,遷秘書監。 寇 軍 子 通 雲宅,夜忽有盜攻之,驚懼墜井卒,時年六十九。 逼 、永嘉太守,以疾固辭,徙爲光祿大夫,俄遷雲騎將軍、曰於司司徒左長 ,筠時不入城。 年,以母 憂去職。 明年,太宗卽位,爲太子詹事。 尋出爲貞威將軍、臨海太守,在郡被訟,不調累年。 **筠有孝性, 毁瘠過禮, 服闋後, 疾廢久之。** 五年,除太府卿。 中大通二年,遷司 明年,遷度支尚書。中大同元 家人十餘人同 筠舊宅先為賊 徒左長史。 遇 所焚,乃寓居國子祭 六年,除尚書吏部 害。 三年, 昭明太子 史。 年,出爲明 太清二年, 大同初,起

皆七八十遍。 應氏,並累世有文才,所以范蔚宗云崔氏『世擅雕龍』。〔三〕然不過父子兩三世耳,非有七葉 成 其 角序 、爾雅、山海經 ,不覺筆倦。 不足傳之 筠 狀 曰:「余少好書,老而 貌 寢 好 愛左氏春秋, 小,長不滿六尺。 自年十三四,齊建武二年乙亥至梁大同六年,四十六載矣。日己幼年讀五經, 、本草並再抄。 事,蓋以備遺忘 彌篤, 吟諷常為 性弘厚,不以藝能高人,而 子史諸集皆 而已。」又與諸兒書 雖偶見瞥觀、三門皆即 口 實,廣略去 遍。 取, 未嘗倩人假手,並躬 論家世集云: 「史傳稱安平崔 凡三過五 疏記,後重省覽, 少擅才 抄。 名, 餘經及周官 與劉孝綽見 自 歡 抄 興彌 錄, 深 氏 、(儀禮) 大小百餘 ,習與性 重當世。 及汝 南

府各十卷,任即沿台書三十卷,凡一百卷,行於世。 構,思各努力。」筠自撰其文章,以一官爲一集,自洗馬、中書、中庶子、吏部、左佐、臨海、太 言,身爲四代之史,自開闢已來,未有爵位蟬聯,文才相繼, 之中,名德重光,爵位相繼,人人有集,如吾門世者也。 沈少傅約語人云:『吾少好百家之 如王氏之盛者也。』汝等仰觀堂

拾青紫,取極貴,何難哉!而孝綽不拘言行,自躓身名,徒鬱抑當年,非不遇也。 史臣陳吏部尚書姚察曰:王僧孺之巨學,劉孝綽之詞藻,主非不好也,才非不用也,其

校勘記

[1] 時王晏子德元出爲晉安郡 出爲錢唐令 「錢」,各本脫,據南史補。 「德」各本作「得」,據南齊書王晏傳改。

△□□嘉爾晨燈 「燈」南史作「登」。

昔李叟入秦 秦,及關 而數,梁生適越,登岳長謠。」語蓋本此。 「李」各本作「季」。 據藝文類聚二六改。按:文選趙景眞與嵇茂齊書:「昔李叟入

列傳第二十七 校勘記

- ト ド ド 弟愛 同 鄒季 鄒 季」藝文類聚二六作「郭李」。
- . 六 니 徒竊 高 價厚名 「竊」各本譌「切」,據册府元龜九〇九 改正。
- フセン 吁可悲矣 「吁」各本譌「呼」;「可悲」各本皆顚倒爲「悲可」。 今據藝文類聚二六、册府元龜九
- 〇九改正。
- 范式之值孔嵩 「式」各本譌「彧」,據藝文類聚二六改。 按後漢書獨行范式傳: 式與孔嵩為友。

後相遇於新野縣。時式爲荆州刺史行部至縣、縣選嵩爲導騎迎式、武見而識之、把臂與語。

「二十」,疑有誤。二十餘條不能「勒成百卷」。

使工書人琅邪王深 「深」,南史作「琛」。 ハ た 凵

叉使撰婦人事二十餘條

- 邑子儀曹郎顧玩之求娉焉 「玩」南史作「珖」。
- 與中庶子陸倕僕劉孝綽對掌東宮管記 「僕」下各本衍一「射」字,今删。 按:劉孝綽是太子僕,

非尚書僕射。

- 文集三十卷 張森楷梁書校勘記:「三,南史作四。隋書經籍志有梁黃門郞張率集三十八卷。」
- 子長公嗣 南史無「嗣」字。
- 二吾 其子孝才與孝綽年並十四五 「孝才」各本譌「季才」,據南史及册府元龜七七四、八四三改。
- 遷尙書金部郎 各本作「遷尙書金部侍郞」,衍一「侍」字,今删。按隋書百官志,尚書省置 吏

部、金部、騎兵等郞二十二人。

- 二寸〕及孝綽爲廷尉卿 「卿」各本作「正」,據册府元龜五二二、九二〇、九三二改。按:劉孝綽爲廷
- 尉卿,見上文。南史無「卿」字。
- 攜少妹於華省棄老母於下宅高祖爲隱其惡改妹爲姝 按: 孝綽「攜妾入官府」, 到洽劾奏之辭
- 當爲攜少姝,高祖爲隱其惡,亦當是改姝爲妹。昔人謂此妹姝二字互倒。
- 二九 李固之薦二賢 「賢」各本譌「邦」,據册府元龜一九二改正。按册府元龜「二賢」下有小注云:
- 「楊厚、賀純也。 李固爲荆州、聞厚、純以病免歸、薦於天子,有韶徵用。」
- 徐璆之奏五郡 元龜注云:「徐璆爲荆州,奏五郡守有臧汚者案罪。」 「璆」各本譌「珍」,「五郡」各本譌「七邑」,今據册府元龜一九二改正。 按册府
- 先聖以衆惡之必察焉衆好之必察焉 二語見於論語,兩「察」字各本皆作「監」,此姚思廉避家 諱改。今改回
- 後爲太子僕 「後」姍府元龜九三二作「復」。按:上文有「遷太府卿、太子僕」,疑作「復」是。
- \subseteq 领軍臧盾太府卿沈僧杲等 「杲」南史及册府元龜九九四作「畟」。
- [18] 宣城王記室參軍 「宣」各本譌「中」,據南史改。
- (三) 常與筠及劉孝綽陸倕到洽殷芸等遊宴玄圃 按:「殷芸」南史作「殷鈞」。又按:下文「筠又與

列

傅

第

二 十

七

校勘記

四八九

殷芸以方雅見禮焉」,南史亦作「殷鈞」。

三 俄遷雲騎將軍 按:「騎」百衲本、南監本、汲古閣本、金陵局本皆作「旗」。 北監本、殿本作「騎」。

包 雖偶見瞥觀 「偶」各本及南史作「遇」,李慈铭南史札記:「遇當作偶。」今改正。

吕 四十六載矣 各本脱「六」字,據册府元龜七七〇補。按:齊建武二年乙亥至梁大同六年,首尾

四十六載。

所以范蔚宗云崔氏世擅雕龍 「云崔氏」三字,各本脫,據南史補。 按 後漢書崔駰傳贊云「崔

爲文宗,世禪雕龍」。

自洗馬中書中庶子吏部左佐臨海太府各十卷 各本脫一「左」字、據南史補。

梁書卷三十四

列傳第二十八

張緬 弟績 箱

為張 喜形於顏色。 服闋,襲洮陽縣侯,召補國子生。 氏寶也。」齊永元末,義師起,弘策從高祖入伐,留緬襄陽,年始十歲,每聞軍有勝負,憂 張緬字元長,車騎將軍弘策子也。 天監元年,弘策任衞尉卿,爲妖賊所害,緬痛父之酷,喪過於禮,高祖遣戒喻 年數歲,外祖中山劉仲德異之,嘗曰:「此兒非常器,

徐勉曰:「此曹舊用文學,且居鵺行之首,宜詳擇其人。」勉舉緬充選。頃之,出爲武陵太守, 不輟卷,尤明後漢及晉代衆家。 文案,見其斷決允愜,甚稱賞之。還除太子舍人、雲麾外兵參軍。 起家秘書郎,出爲淮南太守,時年十八。高祖疑其年少未閑吏事,乃遣主書封取郡曹 客有執卷質/編者,隨問便對,略無遺失。 緬少勤學,自課讀書,手 殿中郎缺,高祖謂

列

傳

還拜 府。 太子 政任恩惠,不設鈎距,吏人化其德,亦不敢欺,故老咸云「數十年未之有也。」 緬 朝 在 隨盡,緬私室常闃然如貧素者。 流馬,中舍人。 郡 所得祿俸不敢用, 緬母劉氏,以父沒家貧,葬禮有闕, 乃至妻子不易衣裳, 及還都, 累遷北中郎諮議參軍、寧遠長史。 並供其母賑贍親屬, 遂終身不居正室,不隨子入官 出為 豫章內史。 雖累載所

勁直 坐收 一,高 捕 大 通 人與外 祖乃遣畫工圖其形於臺省,以 元 ?年,徵爲司徒左長史,以疾不拜,改爲太子中庶子,領羽 國使鬭,左降黃門郎,兼領先職,俄復爲眞。 勵當官。 緬居憲司,推繩無所顧望,號爲 林監。 俄遷御史中丞,

緬

爲

萬, 强 雖 無 實 次。」 仕 親 倚 布五 方方 友。 相 中 之讀 大通三年,遷侍中,未拜,卒,時年四十二。 干匹。 (申才 文筵講 墳 力,摧苗落穎,彌 典,郄縠 高 席,朝遊 祖舉哀。 之敦詩書,惟今望古,蔑以 夕 /宴,何 昭明 可傷惋 太子亦往臨哭,與緬弟纘 曾不 同茲勝賞,共此言寄。 念天倫素 斯過。 睦, 韶贈侍中,加貞威將軍,侯如故。 旦相 自列宮朝,二紀 書曰:「賢兄學業該通,莅 失,如 如 何 長 何可言。 謝,奄然 將及,義惟僚屬,情 言及增 深不追! 哽,擥筆 事 且 賻錢五 明敏, 年 甫

又抄江左集,未及成。 緬 性 愛墳籍,聚書 至萬 文集五卷。 餘卷。 子傅嗣 抄後漢、晉書衆家異同,爲後漢紀四十卷, 晉抄三十卷。

纘 字伯緒,緬第三弟也, 出後從伯弘籍。 弘籍,高祖舅也,梁初贈廷尉卿。 **横年十一** ,

尙 高 祖 第 四 女富陽公主,拜駙馬都尉,封利亭侯,召補國子 生。

徙、欲 舍人、 郞 武 有 云『後八葉 四員 起家 轉洗馬 遍 觀 宋 祕 閣 書郞,時年十七。 內圖 、中舍 、齊以來,爲 有逮吾者』,其此 籍。 人,並 嘗 甲族 掌管記 執 四 身長 部書 起家 子乎。」纘 目 之選,待次入補,其居職,例數十百 七尺四寸,眉目疏 曰: 好學,兄緬 ·若讀此畢,乃可言優仕矣。」 有書萬餘卷,晝夜披讀,殆不輟手。 朗,神采爽發。 高祖異之,嘗曰:「張壯 日便遷任。 如 此數載, 方遷 纘 固 太子 求不 祕 書

河東 三,善明 人。」初未 裴子 纘 與 見而 與纘 琅邪 野 日:「張吏部 嗟 遇,便虛 王 服。 錫 齊名。 累 相 遷 在 推 太 普通 喉舌之任, 重,因爲忘 尉 諮 初 議參 , 魏遣彭 已恨 軍 年之交。 ٠, 其晚 尙 城 書 人劉善明詣京 矣。」 吏 部 郎, 子野性 俄 爲長 師 曠達,自 請 兼 和, 侍 中, () 云「年出三十, 求識績。 時 人以 | 纘時 爲早達。 不復

史、南蘭陵 大通 纘 治 元年,出爲寧遠華容公 太守, 郡, 省煩苛,務淸靜,民東便之。 加貞威 將軍,行 長 府 史, 州 事 行 琅邪彭 三 年, 大同二年,徵爲吏部尚 入為 城二 度支尚書, 郡 國 事。 二年, 母 憂 書。 去 仍 職。 遷華容公北 横居 服 選 闋 其後門寒 出 爲 中 郎長 吳 興

列

傅

第

素,有一介皆見引拔,不爲貴要屈意,人士翕然稱之。

何 纘 事 而 ,。」此言以指敬容也。 .敬容殘客。」及是遷,爲表曰:「自出守股肱,入尸衡尺,〔三可以仰首伸眉,論列是非者矣。 與參掌 寸衿所滯,近蔽耳目,深淺淸濁,豈有能預。 時並施行。 五 年,高 何敬容意趣不協,敬容居權軸,賓客輻湊,有過詣纘者,輒距不前,曰 |祖手詔曰:「纘外氏英華,朝中領袖,司空以後, 纘在職,議南郊御乘素輦,適古今之衷;又議印綬官備朝服,宜並著 加以矯心飾貌,酷非所閑,不喜俗人,與之共 名冠范陽。 可尚書僕射。」初, ...「吾不能對

九 年,遷宣 一惠將軍、丹陽尹,未拜,改爲使持節、都督湘桂東寧三州諸軍事、湘州刺史,

述職經途,乃作南征賦。其詞曰:

佇; 之上叡。 戰,附蚋之遊 三欒之休寵, 日,乃聖達之明箴。 路漫漫以 歲次 「娵訾,月惟中呂,余謁帝於承明,將述職於南楚。 居銜觴而接席,出方舟以同濟。 禽。 荷通家之渥 無端, 而盈 妙品 情容容而莫與。 |虚倚伏,俯仰浮沈,矜榮華於尺影,總萬慮於寸陰。 物於 惠。 貞觀,曾何 登石渠 乃弭 之三閣, 足而 節 彼華坊與禁苑,常宵盤而畫憩。 歎曰: 人之寓 一繫心。 典校文乎六藝。 撫余躬之末迹,屬興王之盛世 於宇宙也,何異 忽中川而反顧,懷舊鄉而延 振長纓於 承華,眷儲 彼忘 (夫栖 思德音其在 !蝸之爭 機於粹 皇

奉皇 眷 取 慚 耳, 居 副 於 滅 而 若淸塵之未逝。 沒之千里,謝韓哀於八極。 命 陳 ,長庶僚而 西 力。 悲 以奏舉,方驅傳於衡疑。 逢濯纓之嘉運,遇井 稱 師。 經二紀以及茲,悲明離之永翳。 猶 深 泉之短綆,若高墉而無基。 汲之明時。 遵夕宿以言邁, 戒晨裝而永辭。 如蓑裘之代用,譬輪轅之曲直。 懷君恩而未答,顧靈瑣而 伊吾人之罪薄,豈斯滿之能持。 惟平生之褊能, 愧周任之清規, 行搖搖於南逝,心眷 依遲。 實 有 志 總端 於 、棲息 諒無 揆以

得正 祚。 妍。 紀 覩 而 歸 而 1; 草。 命之銜壁, 逞 因 左 朔 鞠三 刑 衽, 時 懷 爾 創江南, 乃横 之或 若 相承,于茲四代,多歷年 叉施 緊明德其是賚。]]] 人 之遠理, 於茂草,霑兩京於 |濟牽牛,傍瞻雉庫;前觀隱脈,[三] 却視雲布。 躍 爱獻 獸 "從四海之宅心,故 締構基址。 而 爲謔。 璽於武王, 豊 喜 慍 候高熢以巧笑,俟長星而 次臨滄之層 豈徒能 其 啓中興之英主, 宣十世 朝 能 所,二百餘 露。 遷。 取 布 亂 其德, 故黃旗紫蓋,運在震方,金陵之兆,允符厥 囐, 雖 而 魂 誅虐。 載。 尋叔寶 埋於 主晉有祀,雲漢作詩,斯干見美而已哉 割疆 百 在蒼 之舊 世, 歡噱。 場 精之將季,翦 而 猶 埏; 蘊珠玉之餘潤, 昭羅 於華戎,拯 重光。 映 追晉氏之啓戎,覆中州之鼎 何傑傑之黔首, 澈於 觀其內招 九 生靈 泉。 洪 柯 於字內,不被髮 以 經 认义望, 銷 法 思假 落 王之梵字, ; 旣觀蝎 外攘干 祥。 綺之遺 命其無 "! 乃 及

託。信人欲而天從,爰物覩而聖作。

決,應若飇舉。 六夷膜拜,八蠻同軌。 教穆於上庠,寃申於大理;顯三光之照燭,降五靈之休祉。 流聲於鄭、衞,屏豔質於傾宮;配軒皇以邁迹,豈商、周之比隆。 功於百王,固無得而稱矣。 我皇帝膺籙受圖,聰明神武,乘釁而運,席卷三楚。 於是殪桑林之封狶、繳青丘之大風、戢干戈以耀德、肆時夏而成 師克在和,仁義必取,形猶積 。化致升平,于茲四紀, 功。 諒殊 放

徴怪 怒特之來奔。及漁人之垂餌,沈潛鎖於洪源。鑒幽塗於忠武,馳四馬之高軒。不語神以 却。 稷 蔽 頳 歷 而 文於翠嶂,跳巨石以驚湍,批衝巖而駭浪。鏟千尋之峭岸,潨萬流之大壑,隱日月以 祖宗之明君,猶負芒於盛主,勢傾河 虧,摶風煙而 下流 未 派金牛之迅渚, 觀靈山之雄壯, 實江南之丘墟, 平雲霄而竦狀。 ,情存之而 舉 ·,矧有功而無志,豈季葉其能處。懼貽笑於文、景,憂象賢之覆餗,雖苞蘗以 !沫以洊險,上岑崟而將落;聞知命之是虞,故違風而靡託。 勿論。 |回薄。[5] 崖映川而晃朗,水騰光而倏爍;積霜霰之往還,鼓波濤之前 曬姑孰之舊朔,訪遺迹兮宣武; 挾仲謀之雄氣, **!以覆岱,威回天而震宇。雖明允之篤誠,在伊、** 標素嶺乎靑壁,葺 訊會骸之詭狀,云 朝委裘而作輔

代興,終夷宗而殄族。彼儋石之贏儲,尙邀之而俟福,況神明之大寶,乃誾干於天祿。

列傳第二十八 張緬

昔,聞乳 而 造 待 局 貴。 鍵之候 虎於寧成。 實祗 司,發傳書於關尉,據轘轅乎伊洛,守衡津於 敬於王典,懷鞠躬而 在當 今而簡易,止譏鑒其姦情,陋文仲之廢職,鄙耏門之食征 屏氣。 惟函谷之襟帶,疑武庫之精兵。 河渭。 無矯且以 招賓,闕捐繻 採風謠於往

隣。 拜 之芳 南 節 於 Щ 存 水 而 当費 陵以 親 簣 赴 勝 泓 左 姬 發 塵 貫。 ; 或 澄以闇 以 於 丹 忘; 臨 寓 曉 雖 息訟、對祠 是近睇赭岑,遙瞻 爓 E 蕪 嗟吳 渚 挈 目,美牙門之守志,當晉 獨 身殉 魚官 其 而 瓶 向 而 一夕,山參差而 、何疑。 :積楚。 人之重辟,憂峻 之小 遡 風以舒情,搴芳洲 以 義、哀感 風, 輟 星 善 膳,踐 想夫 信 而 苦神吳之難習。 理 寤 實君 市 辨旦。 鵲岸, 主。 君之令問,實有 感 寒浦 人。 而 子之所識。 網 情悼,實悽 毎撫事以懷 所 之抽 島嶼蒼茫, 於將 忽臨 其誰翫。 師 以 家 筠。 之席卷,豈藩籬 貽。 · 睨於故鄉,眇江天其無畔,遡洄流而 岸曜舟而 稱 闕一 純 悵於余悲,空沈 聲於前古,拯巴漢之廢業,爰配名於鄒魯。 叉 彼沈 人,非末學其能稅。 息銅山而繋纜,訪叔文之靈字,得舊名而 風雲蕭散。 孝 有 句 是謂 生爲 不進, 瓜而 國 號 事 令德,沒爲 能 而 顯義,指滄波而 人之禮。 水騰沙以驚急。 臣。 不 屬時雨之新晴,觀百川之浩涆, 吟以 庇。 揚清 遐想,愧邯鄲之妙 攜老 明 入雷池之長浦 嘉梅根之孝女,尚乘肥 徽 神。 弱 於 爲 或捐 於窮城,猶 上列,並 期 天曀曀其垂陰, 家事 右阻,遵長薄 此浮履 異世 想法、岱 主,攜 詞。 品 以 而 品 爲 猶 明 乎 望

雨 霏霏 而 來集, 愍征夫之勞瘁, 每搴帷而佇立。 由江沲之派別,望彭匯之通津,塗未中

乎及絳,日已盈於浹旬。

出沒搖漾。 之而務德。南通珠崖、夜郎,西款玉津、華墨。莫不內淸姦宄,外弭苛慝,籬屛京師,事 在客行而多思,獨傷魂而悽楚。 所攢聚。 飄 有均於齊德也。 "界飛流於翠薄,耿長虹於青霄。 若夫灌莽川涯,層潭水府,游泳之所往還,喧鳴之 於是千流共歸,萬嶺分狀,倒影懸高,浮天瀉壯。 羣飛沙漲,掩薄草渚;奇甲異鱗,雕文綷羽。 岷山、嶓冢,悠遠寂寥;青湓、赤岸,控沙引潮。 美中流之衝要,因習坎以守固。 清江洗滌,平湖夷暢,飜光轉彩, 聽寡鶴之偏鳴,聞 望歸雲之蓊蓊,揚淸風之飄 既固之而設險,又居 孤鴻之慕侶,

仲謀 識 而 心服,玉比德而譽均。 :|蓄栗,抗十倍之銳師。在賢才之必用,寧推誠而忍欺;圖富强以法立,屬貞臣而日嬉。 (華之難擯。羨還丹其何術, 佇一丸於來信。徑遵途乎鄂渚, 迹孫氏之霸基, 陳利兵 餘基於江畔,「用」云釣臺之舊址;方戰國之多虞,猶從容而宴喜。欽輔吳之忠諒,歎 之虚已,處君臣而並得,良致霸其有以。伊文侯之雅望,誠一代之偉人,禰觀書以 眄匡嶺以躊躇,想霞裳於雲仞;流姮娥之逸響,發王子之清韻。 若夜光而 遘時雄之應運,方協義以經綸; 名旣逼而愈賞,言雖聞而彌親。 可投,豈 列 傳 第 + 八 張 緬 木披。 惜 郢 威,乃沈 之所濟; 都 勤 王於延獻,俾漢京之惟新,何天命其弗與,悲盛業之未 而 所以 抵掌,壯天險之難窺;允分荆之勝略,成百代之良規。 驅以 出懷 居宗振末,强本弱枝,聞古今之通制,歷盛衰而不移,可不謂然與,美經國 明誓。 珠而 **免讎,歸投金以答惠。** 空負 、恨其何追,徒臨飡而先祭,及旋師於鄭國,美邀福於來裔。 彼無求於萬鍾, 唯長歌而鼓枻; 申。 賈生方於指大,應侯譬之 汎蘆洲以 延佇,聞 **慨斯誠之未** 伍 員

之遠體

也。

徴名 收散亡之餘弱,結 臨赤崖 多 而 而 一解 酌 敞 振 「駕彩 怳,沉 誠 旅 ,要桑中 於夏州 酌 忠言於城野,播終古之芳猷,忘我躬之匪閱,顧社稷而懷憂。 而 決機乎 時有 慷愾 輕 蜺 ,恥蹊田 而 舟 而 便 ,推雄圖於魏 遠赴。 獨 而 乎 舉。 往。 與國 不繫,何靈胥之浩蕩。 建 之過罰,納申叔之嘉謀。 瓴, 若葆 嗟玄德之矯矯, 而 連横 事無留於蕭 武,乘戰勝以長驅,志吞吳而幷楚。 申之誅丹,實匡君以成務;在兩臣而優劣,居二主其並裕。 了延五 紀乎岷漢,紹 斧。 思 眺君、編之雙峯, 行 徒臨 興復於舊京,招 霸 孫 觀巫臣之獻箴,鑒周書以明喻,何自謀其 赫 四百 其霆奮,杖邁俗之英輔,「私一裂宇宙 於炎精。 臥龍 於當世,配 望 總八州之毅卒,期姑蘇 巴丘 風 服莊王之高義,乃 以增 以 想;償· 邅 管仲而 回,遵洞 瑤觴而 稱英。

庭

爾 乃南奠衡、霍,北距沮、漳,包括沅、澧,汲引瀟、湘。 滮滮長邁,漫漫回翔; **蕩雲**

木。 薦,敢 之妬美; 沃 之無親,動望祀以祈福。 節 延帝子于三后,降夔、龍於九疑。 彈 邦,猶殷勤而 而 而 冠 斷絕 日 依遲。 而 ,吐霞含光。 憑 振 有驊騮 回曉仄於中川,起長飇而半滅。 誠 衣, 於沼沚。 日徘徊以將暮,情眇默而無辭。 一致。 猶自別於泥滓; 而 青碧潭嶼,萬頃澄澈,綺蘭從風,素沙被雪。 不馭,焉遑遑於千里。 蘊芳華以襞積,非黨人之所媚,合小雅之怨辭,兼國風之美志。 謁黃陵而展敬,奠瑤席乎川湄。 將人怨而神怒,故飛川而蕩谷,推冥理以歸諐,遂刊山而赭 且殺 騰河靈之水駕,下太一之靈旗。 身以成義,寧露才而揚已。 旣踐境以思人,彌流連其無已。 脩行潦之薄 稅遺構之舊浦,瞻汨羅以隕 慍秦皇之巡幸,尤土壤以加戮; [<] 昧天道 具蘭香以膏沐, 懷椒糈而要之。 悲先生之不辰,逢椒、蘭 雜雲霞以舒卷,間 撫安歌以會舞,疏緩 泗;豈懷寶而 河 洲 譬 迷

遊湘之篇,史遷摛文以投弔,揚雄反騷而沉川。 來遊,□ 寬徭省賦。 於是下車入部,班條理務,砥課庸薄,夕惕兢懼。]臣耐仙而齊潔。 遠哉盛乎,斯邦之舊也。 固是明王之塵軌,聖賢之蹤轍也。 有虞巡方以託終, 夏后開圖 其風謠雅什,又是詞人之所流連也。 存問長老,隱卹氓庶,奉宣皇恩, 若夫屈平懷沙之賦,賈子 而疏決,太伯讓嗣以

列傳第二十八 張緬

替也。 尊泉,蘇生騎龍而出入,處靜駕鹿以周旋。 琰之弘通,桓伯緒之匡濟,鄧克時之絕述,谷思恭之藻麗,實川嶽之精靈,常問 亦有仲寧、咸德,仍世相繼,父子三台,緇衣改敝。 至於殊庭之客,帝鄉之賢,神奔鬼化,吐吸雲煙。 配北燭之神女,偶南榮之偓佺。 古初抱於烈火,劉先 玉笥登之而却老,金人植杖以 高而 忤世,蔣公 時髣髴其 出 而 無

遙見,亦往往而有焉。

響谷。 被知 戀,慕 Щ 宅,今築室以安禪,邑無改於舊井,尙開流而冽泉。 懷伊、管之政術,遇庸臣而見遷,終 鄒 國,惟君 而 傷 川之面 身醢。「亞在長沙而著令,經五葉其未改;知天道之福謙,勝一時之經始。尋太傅之故 生 於時主,嗟漢宗之得賢。受齊君之遠託,豈理謝而生全,哀懷王之不秀,遂抱恨 所謂還舟,楚王於焉乘馹。 爾乃歷省府庭,周行街術,山川遠覽,邑居近悉。割黔中以置守,獻靑陽而背質, 遊 低 王 仙 四 帶,將取名於衡麓。 脩定祀于北郭, 對林野而 一其能大,迨炎正之中微,實斯藩而是賴。 之靈族。 照於若華, 竦千尋於建木。 是時凉風暮節,萬實西成,華池迥遠,飛閣 。下彌漫以爽塏,上欽虧而 巡高山之累仞,褒吳文之爲宰,彼非劉而八王,皆國亡 幽藹,庶無吐於馨香,祀瓊茅而沃酹。景十三以啓 冀囂塵之可屏,登巖阿而 顧四阜之紆餘,乍升高以遊目,審 重複,風瑟瑟以鳴松,水琤琤而 淒明。 寤 宿。 嘉南州之炎德, 捨 域中之常

愛蘭 蕙之秋榮。 下名柑於曲樹,採芳菊於高城。 樹羅 軒而並列,竹被嶺而叢生。 翫棲

是掌,或解組以 **禽之夕返,送旅** 立威,乍露服而加賞。 雁之晨征。 悲去鄉而 遠客,寄覽物而 遵聖主之恩刑,荷天地之厚德。 娛情。 惟傳車之所騖,實鷹 沾河潤於 九里, 湯揚其

澤自家 而 刑國。 闕小道之可觀,寧畏塗其易克;眄高 衢 而 願 騁,憂取累於長纆。 聞困

石之非據,承炯戒乎明則,愧壽陵之餘子,學邯鄲 而匍 匐 也

衡陽等郡,有莫徭蠻者,依山險爲居,歷政不賓服, 纘 至州,停遣十郡慰勞,解放老疾吏役,及關 市戍邏先所防人,一 因 此向化。 益陽縣 人作田二 皆省併。 頃,皆異畝 州界零陵、

同穎。 纘 在 政 四年,流 人自歸,戶口增益十餘萬,州境大安。

會聞 白馬寺處之。 王 東已竪檣 王,州府候 事、 卽 遣 一侯景寇京師,譽飾裝當下援,時荆州 平北 使責讓 二年, 將軍、 上水,將襲荆州。」王信之,便回 迎及資待甚薄,譽深銜之。 會聞賊陷京師,營因不受代。 譽,索纘部下。 徵爲領軍,俄改授使持節、都督雍梁北秦東益郢州之竟陵司 寧蠻校尉。 纘初聞邵陵王編當代已爲湘州,其後定用河東王譽,纘素 旣至,仍遣纘 及至州,遂託疾不見纘,仍檢括州府庶事,留纘 刺 軍鎭,荆、湘因構嫌隙。 史湘東王赴援,軍次郢州 向襄陽,前 州助防杜岸紿纘曰:「觀岳陽殿下必不容使君, 刺 史岳陽王詧推遷未去 尋棄其部伍,單<u>舸赴江</u>陵, 武城、纘馳信報曰:「河 州之隨郡 鎭,但以 不遣。 城西 諸 輕少 軍

襲江陵,常載纘隨後。 是赴期,旣至,即執纘幷其衆,並俘送之。始被囚縶。 克。」纘信之,與結盟約,因夜遁入山。岸反以告營,仍遣岸帥軍追纘。 使 君 素得物情,若走入西山,招聚義衆,遠近必當投集,又帥部下繼至,以此義舉, 及軍退敗,行至漣水南,防守纘者慮追兵至,遂害之,棄尸而去,時年 尋又逼||續剃髮爲道人。其年,||營舉兵 **纘衆望岸軍大喜,謂** 無往不

寶} 人 也,不事王侯,負才任氣,見余則申旦達夕,不能已已。懷夫人之德,何日忘之。」 纘著鴻 一百卷,文集二十卷。 纘 有識鑒,自見元帝,便推誠委結。及元帝卽位,追思之,嘗爲詩,其浮曰:「簡憲之爲

五十一。

元帝承制,贈纘侍中、中衞將軍、開府儀同三司。 諡簡憲公。

次子浠,字子顏,早知名,選尙太宗第九女海鹽公主。承聖初,官至黃門侍郎。

騎常: 宋之世, 史中丞。 中舍 侍。 館字孝卿,纘第四弟也。初爲國子生,射策高第。起家長兼秘書郎,遷太子舍人,洗 周閔 入,並 高 時丹陽 祖 蔡廓 遣 掌管記。 其 尹西昌侯蕭淵藻以久疾未 弟 並 以 中書舍人絢宣旨日:「爲 侍中爲之,卿勿疑是左遷也。」時宣城王府望重,故有此旨焉。 累遷中書郎,國子博士。 拜,敕綰權 國之急,惟在執憲直 出爲北中郎長史、蘭陵 知尹事, 遷中軍宣 旦繩,用 人本不限 城王長史,俄 太守,還除員外散 升降。 徙 御

列

傳

冠士子聽者常數百人。

四年元日,[10]舊制僕射中丞坐位東西相當,時綰兄纘爲僕射,及百司就列,兄弟導騶,分趨 兩陛,前代未有也,時人榮之。 歲餘,出爲豫章內史。 館在郡,述制旨禮記正言義,四姓衣

鋒,縮不從,仍修城隍,設戰備,募召敢勇,得萬餘人。刺史湘東王遣司馬王僧辯帥兵討賊, 受縮節度,旬月間,賊黨悉平。 破縣邑,有衆數萬人,進寇豫章新淦縣。 八年,安成人劉敬宮挾祇道,自己遂聚黨攻郡,內史蕭倪棄城走。 南中久不習兵革,吏民恒擾奔散。 賊轉寇南康、廬陵、屠 或勸綰宜避其

城西開士林館聚學者,縮與右衞朱异、太府卿賀琛遞述制旨禮記中庸義。 十年,復爲御史中丞,加通直散騎常侍。 館再爲憲司,彈糾無所回避,豪右憚之。 是時

軍、湘東內史。承聖二年,徵爲尚書右僕射,尋加侍中。明年,江陵陷,朝士皆俘入關,縮以 奔,外轉至江陵,湘東王承制,授侍中、左衞將軍、相國長史,侍中如故。出爲持節、雲麾將 太清二年,遷左衞將軍。會侯景寇至,入守東掖門。三年,遷東部尚書。 宮城陷,綰出

馬,祕書丞,掌東宮管記。 次子交,字少游,頗涉文學,選尙太宗第十一女安陽公主。自己承聖二年,官至太子洗

疾免,後卒於江陵,時年六十三。

陳吏部尚書姚察曰:太淸版蕩,親屬離貳,續不能叶和藩岳,成溫陶之舉,苟懷私怨,構

隙瀟湘,遂及禍於身,非由忠節;繼以江陵淪覆,實萌於此。 以纘之風格,卒爲梁之亂階,惜

校勘記

矣哉。

- 俄為長兼侍中 「長」下各本衍一「史」字,據南史删。
- 入尸衡尺 「尸」南史及册府元龜四七八作「居」。
- \sqcap 前觀隱 脈 百衲本作「隱脈」,殿本作「隱賑」。按:張衡西京賦:「鄕邑殷賑」。 左思蜀都賦「邑

居隱賑」。 顏延年三月三日曲水詩序:「故以隱賑外區。」隱賑卽殷賑,富有之意。疑「隱脈」是

隱 **赈」之譌。**

년 (**摶風煙** 而 回薄 「摶」各本譌「搏」,今改正。按:摶卽莊子逍遙遊「摶扶搖羊角而上」之摶。

聚 也,謂結聚風 煙 而 回薄。

五.

識

餘基於江畔

「餘

.基」各本並作「徐基」。 「徐」當爲「餘」之形誤,今改正。

俗之英輔 邁 俗」各本作「萬俗」。 按:「萬俗」無義、「萬」當爲「邁」之譌,今改。

列 杖 傳 邁 第 = + 八 校 勘 記

- - 眺君 編之、雙峯 按:「編」當作「編」,形音相近而譌。 洞庭湖中有君山及編山。
- 十七年至三十七年,十年之間,多次出巡。其二十八年「浮江至湘山 慍秦皇之巡幸尤土壤以加戮 「巡」各本皆譌作「川」,今改正。按:史記秦始皇本紀,始皇自二 祠,逢大風幾不得渡。 於是

始皇大怒,使刑徒三千人皆伐湘山樹,赭其山」,卽此所謂「尤土壤以加戮」。

, . 九 Ш 定天下,異姓而王者八國,終於滅亡,惟吳芮傳號五世,以無嗣絕。」此卽所謂「皆國亡」。若作 彼非劉而八王皆國亡而身醢 國士」、則與下文「在長沙而著令、經五葉其未改」不相照應。今改正。 「國亡」各本並作「國士」。按:漢書韓彭英盧吳傳贊云:「昔高祖

大同四年元日 按張纘傳,纘爲尚書僕射在大同五年,此「四年」誤。

安成人劉敬宮挾祆道 按武帝大同八年紀「宮」作「躬」、通鑑同。

(三) 選尙太宗第十一女安陽公主 「安」南史作「定」。

梁書卷三十五

列傳第二十九

蕭子恪 弟子範 子顯 子雲

庶子。 年,降爵爲子,除散騎常侍,領步兵校尉,以疾不拜,徙爲光祿大夫,俄爲司徒左長史。 從七十餘人入西省,至夜當害之。會子恪棄郡奔歸,是日亦至,明帝乃止。以子恪爲太子中 國將軍、吳郡太守。 二,和從兄司徒竟陵王高松賦,衞軍王儉見而奇之。初爲寧朔將軍、淮陵太守,建武中,遷輔 蕭子恪字景沖,蘭陵人,齊豫章文獻王嶷第二子也。永明中,以王子封南康縣侯。年十 東昏卽位,遷秘書監,領右軍將軍,俄爲侍中。中興二年,遷輔國諮議參軍。 大司馬王敬則於會稽舉兵反,自以奉子恪爲名,明帝悉召子恪兄弟親 天監元

夫天下之寶,本是公器,非可力得。 子恪與弟子範等,嘗因事入謝,高祖在文德殿引見之,從容謂曰:「我欲與卿兄弟有言。 苟無期運,雖有項籍之力,終亦敗亡。 所以班彪王命論

列傳第二十九 蕭子恪

革異, 今 有 無 叉有不 云:『所求 不 天 命 因 物心須一,宜行 當 疑者,如宋明帝本爲庸常被免, 事 而 知 不 鴆 有 能害者,或不 毒, 天 所遺 命者,非 唯 處分。』我于 有景和。 知 人所害, 有 天命而 至於朝臣之中 害亦不能 時 依 不疑者 豈疑而 此而 得。 行, ,于時雖 ,或疑有天 得 我初 誰謂 全。 疑卿祖,而 平建康 又復我于時已年二歲,彼豈 不 可 命而 1 城, 我政言江左 致害者,枉濫 無 朝廷內外皆勸 如之何。 以來, 相繼。 此是疑 代謝 我云 知 然而或疑 而不得。 必相 我 『時代 應有 誅

兄弟年少,理當不悉。 家 者,齊梁雖曰革代,義異往時。 兄弟自有周旋者,有不周旋者,況五 我與卿兄弟、便是情同一家、豈當都不念此、作行 我與卿兄弟雖復絕服二世、宗屬未遠。 一服之屬邪? 齊業之初,亦是甘苦共嘗,腹心 卿 路事。此是二義。我 勿言兄弟是親,人 在 我。 卿

戮,此

是傷於

和氣,所以國祚

例不

靈長。

所謂『殷鑒不遠,

在夏后之世』。「三此是一

義。

是爲卿兄弟報仇。 有今日, 非是本意所求。 卿若能 且建武屠滅卿門,致卿兄弟塗炭。 在建武、永元之世、撥亂反正、我雖起變、鄧、豈得不釋戈推奉 我起義兵, 非惟 自 雪 門恥, 丁; 其 亦

雖欲不已,亦是師 (亂,代明帝家天下耳,不取卿家天下。 出無名。 我今爲卿報 仇 昔劉子輿自稱成帝子, 且時代革異,望卿兄弟盡節報我耳。 光武言『假使成帝 且. 更 一我自 生,天 藉

郎得安耳。但閉門高枕,後自當見我心。」叔祖卽出外具宣敕語。 今日雖是革代,情同一家;但今磐石未立,所以未得用諸郎者,非惟在我未宜,亦是欲使諸 高祖呼叔祖曰:「我本識汝在北第,以汝舊人,故每驅使。汝比見北第諸郎不。」叔祖奉答 云:「比多在直,出外甚疏,假使暫出,亦不能得往。」高祖曰:「若見北第諸郎,道我此意:我 小待,自當知我寸心。」又文獻王時内齋直帳閹人趙叔祖,天監初,入爲臺齋帥,在壽光省, 晉武能爲晉室忠臣,此卽卿事例。卿是宗室,情義異佗,方坦然相期,卿無復懷自外之意。 命,非我所能殺,若其無期運,何忽行此,政足示無度量。 曹志親是魏武帝孫,陳思之子,事

侍中、中書令。 遷太子詹事。 爲散騎常侍、輔國將軍。普通元年,遷宗正卿。三年,遷都官尚書。四年,轉吏部。六年, 子恪尋出爲永嘉太守。還除光祿卿,秘書監。出爲明威將軍、零陵太守。十七年,入 大通二年,出爲寧遠將軍、吳郡太守。三年,卒于郡舍,時年五十二。詔贈 諡曰恭。

所親曰:「文史之事,諸弟備之矣,不煩吾復牽率,但退食自公,無過足矣。」子恪少亦涉學, 子恪兄弟十六人,並仕梁。 有文學者,子恪、子質、子顯、子雲、子暉五人。〔三〕子恪嘗謂

頗屬文,隨棄其本,故不傳文集。

子蹉,亦知名,太清中,官至吏部郎,避亂東陽,後爲盜所害。 二 十· 九 蕭 子

恪

毁聞。 伏,自此重昇。以老少異時,盛衰殊日,雖佩恩寵,還羞年鬢。」子範少與弟子顯、子雲才名 護軍臨賀王正德長史。正德爲丹陽尹,復爲正德信威長史,領尹丞。 辭甚美,王命記室蔡遠注釋之。[四]自是府中文筆,皆使草之。王薨,子範遷宣惠諮議參軍, 略 府,常以自慨,而諸弟並登顯列,意不能平,及是爲到府牋曰:「上藩首佐,於茲再忝,河南雌 王戶曹屬,從事中郎。王愛文學士,子範偏被恩遇,嘗曰:「此宗室奇才也。」使製千字文,其 子,除後軍記室參軍,復爲太子洗馬,俄遷司徒主簿,丁所生母憂去職。子範有孝性,居喪以 相 一而最 比,而風采容止不逮,故宦途有優劣。每讀溪書,杜緩兄弟「五人至大官,唯中弟」飲官 服闋,又爲司徒主簿,累遷丹陽尹丞,太子中舍人。出爲建安太守,還除大司馬南平 ,範字景則,子恪第六弟也。 知名。」常吟諷之,以況已也。 。齊永明十年,封祁陽縣侯,拜太子洗馬。 歷官十餘年,不出藩 天監初,降爵爲

尋遇疾卒,時年六十四。賊平後,世祖追贈金紫光祿大夫。諡曰文。前後文集三十卷。 內 年葬簡 史。 葬復爲宣惠武陵王司馬,不就,仍除中散大夫,遷光祿、廷尉卿。 出爲戎昭將軍、始興 還除 皇后,使與張纘俱製哀策文,至太宗覽讀之,曰:「今葬禮雖闕,此文猶不滅於舊。」 太中大夫,遷秘書監。太宗卽位,召爲光祿大夫,加金章紫綬,以逼賊不拜。 其

尚書殿中郎, 二子滂、確,並少有文章。 中軍宣城王記室,先子範卒。 太宗東宮時,嘗與邵陵王數諸蕭文士,傍、確亦預焉。傍官至 確,太清中歷官宣城王友,司徒右長史。 賊平

後,赴江陵,

因沒關西

元末,以王子例拜給事中。 子顯字景陽,子恪第八弟也。 天監初,降爵爲子。 幼聰慧,文獻王異之,愛過諸子。七歲,封寧都縣侯。 累遷安西外兵,仁威記室參軍,司徒主簿, 永

太尉錄事。

并普通北伐記。 爲臨川內史,還除黃門郎。 表奏之,詔付祕閣。 明道之高致、蓋幽通之流也。」又採衆家後漢、考正同異、爲一家之書。 國子博士。 「仲尼讚易道,黜八索,述職方,除九丘,聖製符同,復在茲日。」時以爲名對。三年,以本官領 每御筵侍坐,偏顧訪焉。 子顯偉容貌,身長八尺。 高祖 所製經義,未列學官,子顯在職,表置助敎一人,生十人。 其年遷國子祭酒,又加侍中,於學遞述高祖五經義。 累遷太子中舍人,建康令,邵陵王友,丹陽 嘗從容謂子顯曰:「我造通史,此書若成,衆史可廢。」 中大通二年,遷長兼侍中。 好學,工屬文。 嘗著鴻序賦,尚書令沈約見而稱曰:「可謂得 高祖雅愛子顯才,又嘉其容止吐 尹丞,中書郞,守宗正卿。 五年,選吏部尚書,侍 又啓撰齊史,書成, 又啓撰高祖集, 子顯對 出

列傳

第二十

九

蕭

子

恪

中如故。

到 幾,卒,時年四十九。詔曰:「仁威將軍、吳興太守子顯,神韻峻舉,宗中佳器。分竹未久,奄 異人間出,今日始知是蕭尚書。」其見重如此。大同三年,出爲仁威將軍、吳興太守,至郡未 恨之。然太宗素重其爲人,在東宮時,每引與促宴。子顯嘗起更衣,太宗謂坐客曰:「嘗聞 一喪殞, 子顯 惻愴于懷。可贈侍中、中書令。今便舉哀。」及葬請諡,手詔「恃才傲物,宜諡曰 性凝簡,頗負其才氣。及掌選,見九流賓客,不與交言,但舉扇一撝而已, 衣冠·

以 受旨云:『今雲物甚美,卿得不斐然賦詩。』詩旣成,又降帝旨曰:『可謂才子。』余退謂人曰: 徒,並以文章顯,所以屢上歌頌,自比古人。|天監十六年,始預九日朝宴,[云] 稠人廣坐,獨 明 秋 顧之思,非望而至。 夜, 追尋平生,頗好辭藻,雖在名無成,求心已足。若乃登高目極,臨水送歸,風動春朝,月 子顯嘗爲自序,其略云:「余爲邵陵王友,忝還京師,遠思前比,卽楚之唐、宋,梁之嚴、 早雁初鸎,開花落葉,有來斯應,每不能已也。前世賈、傅、崔、馬、邯鄲、繆、路之 少 來 所為詩賦,則鴻浮一作,體兼衆製,文備多方,頗爲好事所傳,故虛聲易遠。」 遂方賈誼 何如哉。未易當也。』每有製作,特寡思功,須其自來,不

子顯所著後漢書一百卷,齊書六十卷,普通北伐記五卷,貴儉傳三十卷,文集二十卷。

五二二

篇,太宗嫌其書詳略未當,以愷博學,於文字尤善,使更與學士删改。 守建安,於宣猷堂宴餞,並召時才賦詩,同用十五劇韻,愷詩先就,其辭又美。 |王令曰:「王筠本自舊手,後 子家令,又掌管記。 洗馬,父憂去職。 文集並亡逸。 吏部郎。 愷,初爲國子生,對策高第,州又舉秀才。 二子序、愷,並少知名。 太清二年,遷御史中丞。 服闋,復除太子洗馬,遷中舍人,並掌管記。累遷宣城王文學,中書郎,太 愷才學譽望,時論以方其父,太宗在東宮,早引接之。時中庶子謝嘏 進有蕭愷可稱,信爲才子。」先是時太學博士顧野王奉令撰玉 序,太清中歷官太子家令,中庶子,並掌管記。 頃之,侯景寇亂,愷於城內遷侍中,尋卒官,時年四十四。 起家秘書郎,遷太子中舍人,王府主簿,太子 遷中庶子,未拜,徙爲 及亂,於城內 太宗與湘 東 出

天監初,降爵爲子。 子雲字景喬,子恪第九弟也。年十二,齊建武四年,封新浦縣侯,自製拜章,便有文采。 旣長勤學,以晉代竟無全書,弱冠便留心撰著,至年二十六,書成,表奏

之,韶付秘閣。

賜束帛。累遷北中郎外兵參軍,晉安王文學,司徒主簿,丹陽尹丞。時湘東王爲京尹,深相 子雲性沈靜,不樂仕進。年三十,方起家爲祕書郞。 遷太子舍人,撰東宮新記奏之,敕

列

傳

年 同二年,遷員外散騎常侍、國子祭酒,領南 車 賞 ,出爲 將 好, 軍 如布 ·, 兼 貞威將軍、臨川 司徒左長史。二年,入爲吏部。 衣之交。 遷北 內史。 中郞廬陵王諮議參軍,兼尚書左丞。 在郡以和 理 徐州大中正。 稱,民吏悅之。 三年,遷長兼侍中。 頃之,復爲侍中,祭酒、中正 還除散騎常侍,俄復 大通元年,除黃門郎,俄遷 中大通元 年,轉太府 爲 侍 如故。 卿。 輕

滯 朝食 誥之流,[<] 愚意亦取兼用。臣又尋唐、虞諸書,殷頌周雅,稱美是一,而復各述時事。 語,不得雜用子史文章淺言,而沈約所撰,亦多舛認。」子雲答敕曰:「殷薦朝饗,樂以雅名, 曲 理 以不?」敕答曰:「此是主者守株,宜急改也。」仍使子雲撰定。敕曰:「郊廟歌辭,應須典誥大 丘 制度,方懸日月,垂訓百王,於是乎在。 由 應正採五經,聖人成教。而漢來此製,不全用經典,約之所撰,彌復淺雜。臣前所易約十 眡燎,尚言『式備牲牷』;北郊誠雅,亦奏『牲玉孔備』; [+] 清廟登歌,而稱 ,尊嚴郊廟,得西隣之心,知周、孔之迹,載革牢俎,德通神明,黍稷蘋藻,竭誠 \舉,猶詠『朱尾碧鱗』。 聲被鼓鍾,未符盛制。 梁初,郊廟未革牲牷,樂辭皆沈約撰,至是承用,子雲始建言宜改。 知 忽朗,謹依 牲牷既革,宜改歌辭,而猶承例,不嫌流俗乖體。 成旨、悉改約制。 惟用五經爲本,其次爾雅、周易、尚書、大戴禮,卽是經 臣比無職齋官,見伶人所歌,猶用 ' 臣職司儒訓,意以爲疑,未審應改定樂辭 旣奉令旨,始得發矇。 啓曰:「伏惟聖 未革性前 『我牲以潔』; 嚴配, 臣夙本庸 曲。 經國 一敬率 畏

之典,禮樂之教,致治所成。 雅、頌前例,於體爲違。 革服,偃武脩文,制禮作樂,義高三正,而約撰歌辭,惟浸稱聖德之美,了不序皇朝制作事 伏以聖旨所定樂論鍾律緯緒,文思深微,命世一出,方懸日月,不刊 謹一二採綴,各隨事顯義,以明制作之美。覃思累日,今始克

就,謹以上呈。」敕並施用

踰杜度,美過崔寔,當與元常並驅爭先。」其見賞如 拔賞,隨世所貴,規摹子敬,多歷年所。年二十六,著晉史,至二王列傳,欲作論語草隷法, 澈字體;又以逸少之不及元常,猶子敬之不及逸少。自此研思,方悟隷式,始變子敬,全範元 言不盡意,遂不能成,略指論飛白一勢而已。十許年來,始見敕旨論書一 逮爾以來,自覺功進。」其書迹雅爲高祖所重,嘗論子雲書曰:「筆力勁駿,心手相應,巧 子雲善草隷書,爲世楷法,自云善効鍾元常、王逸少而微變字體。答敕云:「臣昔不能 此。 卷,商略筆勢,洞

餒卒于顯靈寺僧房,年六十三。 所著晉書一百一十卷,東宮新記二十卷。 子祭酒,領南徐州大中正。二年,侯景寇逼,子雲逃民間。三年三月,宮城失守,東奔晉陵, 七年,出爲仁威將軍、東陽太守。 中大同元年,還拜宗正卿。 太清元年,復爲侍中、國

恃迹,遂逼於卿。」歷官著作佐郎,太子舍人,宣惠主簿,中軍記室。 第二子特字世達。 早知名,亦善草隷。 高祖嘗謂子雲曰:「子敬之書,不及逸少。 出為海鹽令,坐事免。年 近見

梁 書 卷 三十五

二十五,先子雲卒。

西武 出爲臨安令。 、陵王諮議,帶新繁令,隨府轉儀同從事、驃騎長史,

[E] 卒。 子暉字景光,子雲弟也。少涉書史,亦有文才。起家員外散騎侍郎,遷南中郎記室。 性恬靜,寡嗜好,嘗預重雲殿聽制講三慧經,退爲講賦奏之,甚見稱賞。

通貴滿朝,不失於舊,豈惟魏幽晉顯而已哉。[10]君子以是知高祖之弘量,度越前代矣。 傳,故抑前代宗枝,用絕民望。然劉曄、曹志,猶顯於朝,及宋遂爲廢姓。 皆殲焉。 陳吏部尚書姚察曰:昔魏藉兵威而革漢運,晉因宰輔乃移魏曆,異乎古之禪授,以德相 其祚不長,抑亦由此。 有梁革命, 弗取前規, 故子恪兄弟及羣從, 並隨才任職, 而齊代,宋之戚屬,

校勘記

- 大司 '馬王敬則於會稽舉兵反 「大」各本作「及」。按:王敬則時爲大司馬、「及」當作「大」,今改正。
- 所謂 殷鑒不遠在夏后 之世 「世」各本作「代」、姚思廉避唐諱改。 今改回
- = 有文學者子恪子質子顯子雲子暉五人 按本卷有子範無子質,子質當是子範之譌。

L E U 其年葬簡皇后使與張纘俱製哀策文 按本書簡文皇后王氏傳, 后卒於太淸三年三月; 據本書

張纘傳,纘卒於太淸二年,則纘豈能與蕭子範俱製哀策文。疑有誤。

天監十六年始預九日朝宴 「天監十六年」南史作「天監六年」。

北郊誠雅亦奏牲玉孔備 「牲玉孔備」各本作「牲云孔備」,據隋書樂志改。

惟用五經爲本其次爾雅周易尚書大戴禮卽是經誥之流 按:既云「惟以五經爲本」,若無易、書、

則只是三經。「五」字疑有誤。

隨府轉儀同從事驃騎長史 「驃」各本譌「中」,今據蔣史改。

豈惟魏幽晉顯而已哉 「幽」北監本、汲古閣本、殿本、金陵局本作「與」,今從百衲本、南監本。

列

傳第二十九

校勘

記

梁書卷三十六

列傳第三十

孔休源 江革

父母,齊廬陵王記室參軍, 四早卒。 孔休源字慶緒,會稽山陰人也。 晉丹陽太守沖之八世孫。[1] 曾祖遙之,宋尚書水部

郎。

遇,深加襃賞,曰「不期忽覯淸顏,頓袪鄙吝,觀天披霧,驗之今日。」後雲命駕到少府門,登 邪王融雅相友善,乃薦之於司徒竟陵王,爲西邸學士。梁臺建,與南陽劉之遴同爲太學博 之,謂同坐曰:「董仲舒、華令思何以尚此,可謂後生之准也。 士,當時以爲美選。 垂泣。後就吳興沈驎士受經,略通大義。建武四年,州舉秀才,太尉徐孝嗣省其策,深善 |休源年十一而孤, 居喪盡禮, 每見父手所寫書, 必哀慟流涕, 不能自勝, 見者莫不爲之 休源初到京,寓於宗人少府卿孔登宅,曾以祠事入廟,侍中范雲一與相 觀其此對,足稱王佐之才。」琅

傳 第

三 十

孔休源

朝 便 拂 貴 顯, 筵 整帶, 軒蓋 盈門,休源 謂 當 詣己,旣而 或時後來,必虛襟引接,處之坐右,商略文義。 獨造休源、高談盡日, 同載還家,登深以爲愧。 其 爲 通人所 尙 書令 推 沈 如此 當

宋 儀 事 T, 休源 完起居注 者 俄 爲 除 即以 尙 誦 臨 書儀 略上口。」高祖]]] 所 王府行 曹郎。 誦記 隨機 參 爲股 軍。 斷決 亦素聞之,卽日除兼尚書儀曹郎中。 思之,誰堪 高祖 曾無疑滯。 管問 其選] 勉對曰 [吏部尚書徐勉曰:「今帝業初基,須一人有學藝解朝 吏部 郎任昉常謂之爲「孔獨誦。」 孔休源識具清通, 是時多所改作, **諳練故實**,自晉、 毎逮訪 前

歲 安王 割 代 ₹禮 御 中 史中 鎭 兒 疑 書 義 府 荆 上善其 委 舍 遷 卿, ·丞, 正 人,司 建 高祖深嘉之。 孙 長 自漢 康 史、南郡 復爲 善匡 、對,乃 獄 徒臨 一色直 魏 正 憺 至 翼 一,及辨 太守 府 繩, 敕晉安王 于]|| 之, 齊梁, 王 長 除通直散騎常侍,領羽林監,轉祕書監,遷明威將軍,復爲晉安王府長 無所 文史,南郡· 、行荆 勿憚 府 訟 記 折 回避,百僚莫不憚之。 並皆搜採, 室參軍 獄, 周昌之舉也。」 日 州 一、孔休 太守 府州 時罕冤 ·,遷尙書 行 事。 源 休源 人。 府 人 高 倫 州 對 祖 所 左丞,彈肅 後有 事 儀 日 謂 有 表, 如 之日「 奏議,咸 選 除少 故。 臣 人爲 汝年 以 府卿,又兼 禮 在 庸 荆州 尚幼**,** 獄司者,高祖 預 州 聞,雅允 鄙 (編錄。 累 總上 政,甚 曲 當 荷 、朝望。 流 行 毎 恩遇, 除給 丹陽 有 事 衝 尚引 治績 要, 師 事黃門侍郎, 之。」 時 尹 方揣 義高 事。 一个平心 休源以勵之。除 太子詹事 尋 丹誠, 分 出爲 而 (陜,今以十 決 始 斷 、遷長 周捨 宣 興 劾 恵晉 請 王 其 憺 兼

史、南蘭陵太守、別敕專行南徐州事。 止 詢 謀。 常於中齋別施一榻,云「此是孔長史坐」,人莫得預焉。 体源累佐名藩,甚得民譽,王深相倚仗,軍民機務,動 其見敬 如 此

時論 源 高 大 夫, 才 祖 委之。 識 榮之。 與羣 徵 監揚州 爲 通 臣議代王居州任者久之,同于時貴戚王公,咸望遷授,高祖曰「殷已得人。 敏,實應此選。」乃授宣惠將軍、監揚州。 太府卿,俄授都官尚書,頃之, 而神州都會,簿領殷繁,休源割斷如流,傍無私謁。 如故。 累表 陳讓,優詔不許。 領太子中庶子。普通七年,揚州刺史臨川王 在州畫決辭訟,夜覽墳籍。 休源初為臨川王行佐,及王薨而管州任, 中大通二年,加授金紫光祿 每車駕巡幸,常以軍 宝 薨, 孔休

國

事

隆 然 風 薦 遘 日 永 業 王 疾 蔬 化。 逝,倍用 愼 菲 貞 昭 高 終 明 正 而 祖遣中使 雅 追遠,歷代通 奄至 已。 太子薨,有敕夜召休源入宴居殿,與羣公參定謀議,立晉安王綱爲皇太子。四年, 悲 量 高祖 殞 惻。 冲 歿,朕甚痛之。」舉曰:「 邈 候問,並 爲之流涕,顧謂 一升榮建 可贈散騎常侍、金紫光祿大夫,賻第一材一具,布五十匹,錢五 規,聚德疇庸,先 給醫藥,日有十數。 禮,譽重 謝舉曰:「孔休源 搢 此 紳。 王 一令典。 人清 理 務 介强 其年五月,卒,時年六十四。 遺令薄葬,節朔 宣 神 惠 直,當今罕有, 州 奉職淸忠,當官正直,方欲 將軍、金紫光祿 化 草歌 詠,方興仁壽, 微臣竊爲 大夫、監揚州 陛 穆是彝 共 下惜之。」詔 康治道,以 萬、蠟二 孔休源, 倫。 奄

列

源,立身中正,行己清恪。 剋日舉哀。 喪事所須, 昔歲西浮渚宮,東泊枌壤,毗佐蕃政,實盡厥誠。 隨由資給。 諡曰貞子。」皇太子手令曰:「金紫光祿大夫孔休 安國之詳審,公

奄至殞喪,情用惻怛。

今須舉哀,外可備禮。」

禁中事,世以此 儀之廉白,無以過之。 以天下爲己任,高祖深委仗之。 **休源少孤,立志操,風範强正,明練治體,持身儉約,學窮文藝,當官理務,不憚强禦,常** 重之。 聚書盈七千卷,手自校治,凡奏議彈文,勒成十五卷。 累居顯職,纖毫無犯。 性愼密,寡嗜好。 出入帷幄,未嘗言

少子宗軌,回 長 (子雲童,頗有父風,而篤信佛理,遍持經戒。 聰敏有識度,歷尚書都官郎,司徒左西掾,中書郎。 官至岳陽王府諮議、東揚州別駕。

江 革字休映, 濟陽考城人也。 祖齊之,宋尚書金部郎。 父柔之,齊尚書倉部郎,

行,以母憂毁卒。

艱, 服闋,與觀俱詣太學,補國子生,舉高第。 與弟觀同生,少孤 革幼 而 聰敏,早有才思,六歲便解屬文,柔之深加賞器,曰:「此兒必興吾門。」九歲丁父 (貧,(E) 傍無師友,兄弟自相訓 齊中書郎王融、吏部謝朓雅相欽重。朓嘗宿衛, **勗**,讀書精力不倦。 十六喪母,以孝聞

還 臥 過候 具 加 去。 革,時大雪,見革弊絮單席,而 司徒竟陵 王聞其名, 引爲 、耽學不倦、嗟歎久之,乃脫 西邸學士。 弱冠舉南徐州秀才。 所著儒 並 時豫章胡諧之行 手割半氈與革充

、王融與 解 褐 奉朝請。 、諧之書,令薦革。 僕射江祏深相引接,祏爲太子詹事,啓革爲府丞。 諧之方貢琅邪王汎,便以革代之。 而時權傾朝 右, 以革

才 堪 經國,令參掌 機務, 詔誥文檄,皆委以具。 革防杜形迹,外人不知。 而誅,賓客皆罹

罪,革獨以智免。

城 昂, 正。 征 麾 文 所憚 晉 房 府 北 於 之職 安 除 行 頻 王 坐立 所 尙 王 遷 革爲 軍 書駕 秣 禮 時 長 總卿 成,辭義 史 ,兼 款 少 陵 征 一、尋陽 部 王 建康 記室。 若 昆 北記室參軍,帶中廬令。 郎。 行 布 |季,可謂馭二龍於 典雅,高祖深賞歎之,因令與徐勉同掌書記。 事 令,爲 衣。 太守、行 多 中興元年,高祖入石頭,時吳興太守袁昂據郡距義師,廼使革製 時吳興沈約、樂安任昉並 傾 王被 治 意 於籤帥,革以正直自居, 江 明 と徴為 州 肅 、豪强 府 丹陽尹,以 事。 長途,騁騏驥於千里。」途次江夏,觀遇疾卒。革時 輝之。 與弟觀 徙仁威廬陵王長史,太守、行事 革爲記室,領五 入爲 相賞重,防與革 少長共居,不忍離 中書舍人,尚書 不與籤帥等同 官掾,除通直散騎常侍,建康 書云:「此段雍府妙選英才, 建安王為 別, 左 坐。 丞,司 苦求同行, 俄 如 雍州 故 遷 農 左光祿 卿,復 以清嚴爲百 刺 乃以觀爲 史, 田 大夫、 在雍, 書與 表 爲 雲

列

傳

南平王長史、御史中丞、彈奏豪權,一無所避。

貞威將軍、鎮北長史、廣陵太守江革,才思通贍,出內有聞,在朝正色,臨危不撓,首佐台鉉, 日給 왧, 革罵 晒日:「卿荷國厚恩, 已無報答, 今乃爲虜立銘, 曰:「江革行年六十,不能殺身報主,今日得死爲幸,誓不爲人執筆。」延明知不可屈,乃止 八寺碑並祭彭祖文,革辭以囚執旣久,無復心思。延明逼之逾苦,將加箠撲。 乃泛舟而還,途經下邳,遂爲魏人所執。 實允僉諧。 不拜,延明將加害焉,見革辭色嚴正,更相敬重。 軍、太守如故。 脱粟三升,僅餘性命。 除 少府 可太尉臨川王長史。」 卿, 時魏徐州刺史元法僧降附,革被敕隨府王鎭彭城。 出爲貞威將軍、北 值魏主請中山王元略反北, (云) 乃放革及祖暅還朝。 中郎南康王長史、廣陵太守, 魏徐州 刺史元延明聞革才名,厚加接待,革稱 時祖暅同被拘執,延明使暅作欲器、漏刻 孤負朝廷。」延明聞之,乃令革作文 改授鎭北豫章王長史,將 城旣失守,革 革厲色而言 素不 韶曰:「前 ·便馬, 患脚

覺意詩 諸 遊。」又手敕云:「世間果報,不可不信,豈得底突如對元延明邪。」革因啓乞受菩薩戒。 時高 重除少府卿、長史、校尉。[4]時武陵王在東州,頗自驕縱,上召革面敕曰: [武陵王年 五 百字,云「惟當勤精進,自强行勝脩,豈可作底突,如彼必死囚。 祖盛於佛教,朝賢多啓求受戒,革精信因果,而高祖未知,謂革不奉佛教,乃賜革 以此告江革,並及

還,民皆戀惜之,贈遺無所受。送故依舊訂舫,革並不納,惟乘臺所給一舸。 典籤沈熾文以王所製詩呈高祖, 取石十餘片以實之。 貨狼藉,望風 得安臥。 百,革分判辨析,曾無疑滯。 |革曰:「我通不受餉,不容獨當故人筐篚。」至鎭,惟資公俸,食不兼味。 武 少 滅盾 王 長 性弱,不能匡正 或謂革曰:「船旣不平,濟江甚險,當移徙重物,以迮輕艚。」」革旣無物,乃於西陵岸 史、會稽郡丞、行府 自 解。 府王憚之,遂雅相欽重。 其清貧如此。 ,欲以卿代爲行 州事。 功必賞,過必罰,民安吏畏,百城震恐。 高祖謂僕射徐勉曰:「江革果能稱職。」乃除都官尙書。 革門生故吏,家多在 事。 非卿 每至侍宴,言論必以詩書, 不 可,不得有辭。」乃除折衝將軍、 東 州,聞革應至,並齎持緣道 琅邪 郡 王因此耽學好文。 王騫爲山陰令,贓 境殷廣,辭訟日 舸艚偏欹,不 東 迎 中郎 數 將

寇;反省遊軍尉,民下逾恐。 葬 監吳郡。 于時境內荒儉,劫盜公行,革至郡,惟有公給仗身二十人,百姓皆懼不能靜 革乃廣施恩撫,明行制令,盜賊靜息,民吏安之。

由 ...是 衣 又除明威將軍、南中郎 武 冠 陵王出鎭江州,乃曰:「我得江革,文華淸麗,豈能一日忘之,當與其同飽。」乃 士子, 翕然 歸之。 長鬼、尋陽太守。 時尚書令何敬容掌選,序用多非其人。 徵入爲度支尚書。 好獎進闆閻 革性强直,每至朝宴,恒 一爲後 生 表革同 一延譽,

列傳第三十 江革 校勘記

有

襃

此

權

勢所

疾,

謝

病還家

月,卒,諡曰强子。 除光祿大夫、領步兵校尉、南北兗二州大中正,優遊閑放,以文酒自娛。 有集二十卷,行於世。 革歷官八府長史,四王行事,三爲二千石,<<<>>□ 傍 大同元年二

無姬侍,家徒壁立,世以此高之。

長子行敏,好學有才俊,官至通直郎,早卒,有集五卷。

鄓。 侯景亂,爲任約所害,子無叩頭流血,乞代父命,以身蔽刃,遂俱見殺,天下莫不痛之。 次子從簡,少有文情,[四年十七,作採荷詞以刺敬容,爲當時所賞。 歷官司徒從事中

史臣曰:高祖留心政道,孔休源以識治見知,旣遇其時,斯爲幸矣。 江革聰敏亮直,亦

代之盛名歟。

校勘記

晉丹陽太守沖之八世孫 丹陽尹,無太守,此丹陽 太守蓋是豫章太守之誤。」 張森楷梁書校勘記:「晉書許孜傳有豫章太守孔沖,當卽此人。 |晉

[二] 父珮齊廬陵王記室參軍 南史作「父佩,齊通直郎」。

- 高祖與羣臣議代王居州任者久之「代王」各本並作「王代」。今乙正。
- [图] 少子宗軌 「軌」南史作「範」。
- 〔五〕少孤貧 各本脫「少」字、據南史及册府元龜八五一補。
- <u>へ</u> べ し 值魏主請中山王元略返北 「請」各本作「討」,據南史改。
- [4] 重除少府卿長史校尉 革以前未爲校尉,疑此處有譌脫。
- 「八」三爲二千石 「三」各本譌「二」,據南史及册府元龜八○七改。按:江革再爲尋陽太守,一爲廣

陵太守,是三爲二千石。

[元] 少有文情 「文情」各本作「文性」,據南史及册府元龜七七四、八三九、九三八改。

梁書卷三十七

列傳第三十一

謝舉 何敬容

詩,爲約稱賞。世人爲之語曰:「王有養、炬,謝有覽、舉。」養、炬,王筠、王泰小字也。 謝舉字言揚,中書令覽之弟也。幼好學,能淸言,與覽齊名。學年十四,嘗贈沈約五言

臣。」高祖大悅。轉太子中庶子,猶掌管記 宮管記,深爲昭明太子賞接。秘書監任昉出爲新安郡,別舉詩云:「詎念耋嗟人,方深老夫 託。」其屬意如此。 起家秘書郎,遷太子舍人,輕車功曹史,秘書丞,司空從事中郎,太子庶子,家令,掌東 嘗侍宴華林園,高祖訪舉於覽,覽對曰:「識藝過臣甚遠,惟飲酒不及於

年,復入爲侍中,領步兵校尉。 天監十一年,遷侍中。 十四年,出爲寧遠將軍、豫章內史,爲政和理,甚得民心。十八 普通元年,出爲貞毅將軍、太尉臨川王長史。 四年,入爲左

列傳第三

+

謝舉

書,未拜,遷掌吏部,侍中如故。 百 民 民 姓化其德,境內肅然。 尚書,領步兵校尉。 尙 書。 其年遷掌吏部,尋以公事免。五年,起爲太子中庶子,領右軍將軍。 俄徙為吏部尚書,尋加侍中。 罷郡還, 吏民詣闕請立碑, 詔許之。 學祖莊,宋世再典選,至學又三爲此職,前代未 出爲仁威將軍、晉陵太守。 大通二年,入爲侍中、五兵尚 六年,復爲左 有 在郡清靜, 也。

至。 丘 Щ 赴之。其盛如此。 舉造坐,屢折廣,辭理通邁,廣深歎服,仍以所執麈尾薦之,以況 舉少博涉多通,尤長玄理及釋氏義。 先是,北渡人盧廣有儒 爲晉陵郡時,常與義僧遞講經論,徵士何胤 術,爲國子博士,於學發講,僕射徐勉以下畢 重 一席焉。 自虎

藥。 中 中 何 大 一、將軍 吳郡, 如 夫,給親信二十人。 其恩 故。 四年,加侍中。 如故。 及舉爲政、聲跡略相比。 遇 舉父瀟,齊世終此官, 如 此。 舉 雖居端揆,未嘗肯預時務,多因疾陳解, 其年 五年,遷尙書右僕射,日日侍中如故。 其年,出爲雲麾將軍、 一,以本 官參掌 累表乞改授,敕不許,久之方就 六年,入爲侍中、中書監,未拜,遷太子詹事 選 事 吳郡 太守。 大同三年,以疾陳解,徙爲 先是,何敬容居郡 敕輒賜假, 職。 九年,遷 並手敕處方, 有美績,世 郊 尙 書 左 |僕射 將軍,侍 加給上 右光祿 稱 爲

衞 將軍、開府儀同三司,侍中、尚書令如故。 太清二年,遷尚書令,侍中、將軍 如 故。 是歲,侯景寇京師,舉卒于圍內。 文集亂中並亡逸。 韶贈侍中、中

績,民吏稱之。 通元年,改太子中庶子。 舍人,尚書殿中郎,太子洗馬,中書舍人,祕書丞,遷揚州治中。出爲建安內史,清公有美 樹碑,詔許之。 大通二年,徵爲中書令,未拜,復爲吏部尚書,領右軍將軍,俄加侍中。 中大 爲招遠將軍、吳郡太守,爲政勤恤民隱,辨訟如神,視事四年,治爲天下第一。 吏民詣闕請 爲侍中,領羽林監,俄又領本州大中正。 頃之,守吏部尚書,銓序明審,號爲稱職。 四年,出 敬容以名家子,弱冠選尙齊武帝女長城公主,拜駙馬都尉。天監初,爲祕書郎,歷太子 何敬容字國禮,廬江人也。祖攸之,宋太常卿,〔〕父昌寓,齊吏部尚書,並有名前代。 還除黃門郎,累遷太子中庶子,散騎常侍,侍中,司徒左長史。普通二年,復

災,高祖謂羣臣曰:「此門制卑狹,我始欲構,遂遭天火。」並相顧未 遷尙書右僕射,參掌選事,侍中如故。時僕射徐勉參掌機密,以疾 有此授焉。 敬容身長八尺,白皙美鬚眉。性矜莊,衣冠尤事鮮麗,每公庭就列,容止出人。三年, 五年,遷左僕射,加宣惠將軍,置佐史,侍中、參掌如故。 陳解,因舉敬容自代,故 有答。 大同三年正月,朱雀 敬容獨曰「此所

列

三十一

何敬

年,入爲尙書令,侍中、將軍、參掌 謂 陛 下『先天而 天不違』。」時以爲 、佐史 名對。 如故 俄遷中權將軍、丹陽尹、侍中、參掌、佐史如故。 五

離合等詩以嘲之,敬容處之如初,亦不屑也。 來,宰相皆文義自逸,敬容獨勤庶務,爲世所嗤鄙。 敬容久處臺閣,詳悉舊事,且 |聰明識治,勤於簿領,詰朝理事,日旰不休。 時蕭琛子巡者,頗有輕薄才,因制卦名 自晉、宋以

河東 貴,然終是何敗何耳」。及<u>敬容爲宰相,謂何姓當爲其禍,故抑沒宗族,無</u>仕進者,至是竟爲 私罔上,合棄市刑,詔特免職。〔三初,天監中,有沙門釋寶誌者,嘗遇敬容,謂曰:「君後必 軍 -將軍,敬容以書解慧明,譽卽封書以奏。 高祖大怒,付南司推劾,御史中丞張綰奏敬容挾 派所敗。 十一年,坐妾弟費慧明爲導倉丞,夜盜官米,爲禁司所執,送領軍府。時河東王譽爲領

會稽 子孟不入。夫聖賢被虛過以自斥,未有嬰時釁而求親者也。 問 呵,灰然不 謝 中 郁 大同元年三月,高祖幸同泰寺講金字三慧經,敬容請預聽,敕許之。 尋起爲金紫光祿 致 無其漸,甚休,甚休!敢賀 書戒之曰:「草萊之人,聞諸道路,君侯已得瞻望朝夕,出入禁門,醉尉 大夫,未拜,又加侍中。 於前,又將弔也。 敬容舊時賓客門生誼譁如昔,冀其復用。 昔流言裁作,公旦 且曝鰓之鱗,不念杯杓之水; 一東奔 又有敕聽朔望 燕書始 將不敢

謝絕 聊 雲霄之翼, 豈顧籠樊之糧。 太宗謂曰:「淮北始更有信,侯景定得身免,不如所傳。」敬容對曰:「 渦陽退敗,未得審實,傳者乃云其將暴顯 人,入穴幸無銜窶,恥天下之士不 思過之日,而挾復用之意,未可爲智者說矣。 侯之門者 受責見過,方復欲 二書,學士吳孜時寄詹事府,每日 福。」太宗失色,問其故。 ,微自救於竹帛,所謂『失之東隅,收之桑楡』。 優游以卒歲, 賓客, , 聳高 太清元年,遷太子詹事,侍中 了, 未 今東宮復襲此,殆非人事,其將爲戎乎。」俄而侯景難作,其言有徵也。 猶交黨援,卒無後福,終益前禍。 蟬而趨武帳,可謂盛矣。不以此時薦才拔士,少報聖主之恩,今卒如爰絲之說, 必皆感惠懷仁,有灌夫、任安之義,乃戒翟公之大署,冀君侯之復用 見可憐之意,著待終之情,復仲尼能改之言,惟子貢更也之譬,少戢言於衆 更窺朝廷,觖望萬分, 敬容曰:「景翻覆叛臣,終當亂國。」是年,太宗頻於玄圃 何者?所託已盛也。 八聽。 ·如故。 爲 執事道之,故披肝膽,示情素,君侯豈能鑒焉 竊不爲左右取也。 敬容謂孜曰:「昔晉代喪亂,頗 反,景身與衆並沒, 二年,侯景襲京 君侯宜杜門念失,無有所通,築茅茨於鍾阜, 僕之所弔,實在於斯。 昔君侯納言加首,鳴玉在腰,回豐貂以步 如此,令明主聞 師, 昔竇嬰、楊惲亦得罪明時,不能 敬容自府移 朝廷以 知,尚有冀也。 。人人所以頗猶有 得景遂死, 爲憂。 由 家 祖 臺內。 尙 敬容尋見東宮, 玄虛,胡賊殄 深是朝廷之 三年正月, 自講老、莊 僕東 也。 初 景於 1 皐 踵 君

列

敬容卒于圍內,詔贈仁威將軍,本官並如故。

敬容免職出宅,止有常用器物及囊衣而已,竟無餘財貨,時亦以此稱之。 者因助財造構,敬容並不拒,故此寺堂宇校飾,頗爲宏麗,時輕薄者因呼爲「衆造寺」焉。 何氏自晉司空充、宋司空尚之,世奉佛法,並建立塔寺,至敬容又捨宅東爲伽藍,趨勢 及

子穀,秘書丞,早卒。

望白署空,是稱清貴;恪勤匪懈,終滯鄙俗。是使朝經廢於上,職事隳於下。小人道長,抑 謂之曰:「卿常無閑暇,不乃勞乎。」宋世王敬弘身居端右,未嘗省牒,風流相尚,其流遂遠。 譏薄俗,惜哉。 此之由。嗚呼!傷風敗俗,曾莫之悟。永嘉不競,戎馬生郊,宜其然矣。何國禮之識治,見 領文案,不復經懷,皆成於令史。逮乎江左,此道彌扇,惟卞壼以臺閣之務,頗欲綜理,阮孚 陳吏部尚書姚察曰:魏正始及晉之中朝,時俗尚於玄虛,貴爲放誕,尚書丞郎以上,簿

校勘記

年、五年。但大通只二年,大通三年十月改元中大通。 據本書武帝紀,吏部尚書謝舉爲尚書右

僕射在中大通五年。則「四年」上當有「中大通」三字,否則上文之「大通二年」乃「中大通二年」

之譌。

祖攸之宋太常卿 錢大昕廿二史考異:「按南史何昌寓傳,敬容之祖佟之,位侍中,與此異。南

齊書亦作『佟之』,疑此傳誤也。」

年五月、通鑑同。「十一年」當作「十年」。

十一年坐妾弟費慧明爲導倉丞夜盜官米至

韶特発職

按本書武帝紀,

何敬容坐発官在大同十

梁書卷三十八

列傳第三十二

朱异 賀琛

康宜置獄司,比廷尉,敕付尚書詳議,三從之。 聚蒲博,頗爲鄉黨所患。 逡巡未達其旨。 弈書算,皆其所長。 异年數歲,外祖顧歡撫之謂异祖昭之曰:「此兒非常器,當成卿門戶。」年十餘歲,好羣 朱异字彦和,吳郡錢唐人也。 約乃曰:「天下唯有文義棊書,卿一時將去,可謂不廉也。」其年,上書言建 年二十、詣都、尚書令沈約面試之、因戲异曰:「卿年少,何乃不廉。」异 旣長,乃折節從師,逼治五經,尤明禮、易,涉獵文史,兼通雜藝,博 父巽,以義烈知名,[]官至齊江夏王參軍、吳平令。

之士,五經博士明山賓表薦异曰:「竊見錢唐朱异,年時尙少,德備老成,在獨無散逸之想, 舊制,年二十五方得釋褐。 時异適二十一,特敕擢爲揚州議曹從事史。 尋有詔求異能

列

第

三十二

朱

异

遷尙書儀曹郎,入兼中書通事舍人,累遷鴻臚卿,太子右衞率,尋加員外常侍。 處闇 千里之用。」高祖召見,使說孝經、周易義,甚悅之,謂左右曰:「朱异實異。」後見明山 曰:「卿所舉殊得其人。」仍召异直西省,俄兼太學博士。 珪璋新琢,錦組初構,觸響鏗鏘,值采便發。 有對賓之色,器字弘深,神表峯峻。 金山萬丈,緣陟未登,玉海千尋,窺映不測。 觀其信行,非惟十室所稀,若使負重遙途,必有 其年,高祖自講孝經,使异執讀。 加以

|祖仍遣异報法僧,並敕衆軍應接,受异節度。 旣至,法僧遵承朝旨,如异策焉。 「自王師北討,剋獲相繼,徐州地轉削弱,咸願歸罪法僧,法僧懼禍之至,其降必非僞也。」高 普通五年,大舉北伐,魏徐州刺史元法僧遣使請舉地內屬,詔有司議其虛實。 异日:

贍,不暫停筆,頃刻之間,諸事便了。 並兼掌之。每四方表疏,當局簿領,諮詢詳斷,塡委於前,异屬辭落紙,覽事下議,從橫敏 中大通元年,遷散騎常侍。自周捨卒後,异代掌機謀,方鎭改換,朝儀國典,詔誥敕書,

禮記中庸義,皇太子又召异於玄圃講易。 及道俗聽者千餘人,爲一時之盛。時城西又開士林館以延學士,异與左丞賀琛遞日述高祖 二年,遷中領軍,舍人如故。 大同四年,遷右衞將軍。六年,异啓於儀賢堂奉述高祖老子義,敕許之。及就講,朝士 八年,改加侍中。 太清元年,遷左衞將軍,領步

澄 見,願 朝,豈非 此,今便受地,詎是事宜,脫致紛紜,悔無所及」。异探高祖微旨,應聲答曰:「聖明御字,上應 臣 述 郞 徐 議, 敕 欲 旨 陵 更 陛下無疑。」高祖深納异言,又感前夢,遂納之。 北土遺黎,誰不慕仰,爲無機會,未達其心。今侯景分魏國太半,輸誠送款,遠歸 尚書僕射謝舉等以爲不可,高祖欲納之,未決,嘗夙興至武德閤,自言「我國家承平若 使 申 以 祖 公報之。 天誘其衷,人獎其計。 夢中原平,舉朝稱慶,旦以語异,异對曰:「此宇內方一之徵。」及侯景歸降,敕召羣 北 和 通好。 睦,敕有司定議,异又以和爲允,高祖果從之。其年六月,遣建康令謝挺、通 八月,景邃舉兵反,以討异爲名。募兵得三千人,及景至,仍以其衆守大司 是時,侯景鎭壽春,累啓絕和,及請追使。 原心審事, 殊有可嘉。 及貞陽敗沒,自魏遣使還,述魏相 今若不容, 恐絕後來之望。 又致書與异,辭意甚切,异但 此誠 易 聖

丹地,排玉殿之金犀,陳謀 狼 內文武 應 其何者? 爾 ",乃謂 初 景謀反, 咸尤之。 使者:「鄱陽王遂不許 訪 虺蜴之爲 皇太子又製圍城賦,其末章 合州刺史鄱陽王範、司州刺史羊鴉仁並累有啓聞,异以景孤立寄命,必不 誰。」蓋以指异。 謨之啓沃,宣 國家 有一客!」並抑而 政刑之福威,四郊以之多 异因慚憤,發病卒,時年六十七。 云:「彼高冠及厚履,並 不奏,故朝廷不爲之備。 壘, 鼎 萬邦 食 而 韶曰:「故中領軍 以之未綏。 乘肥, 及 升紫霄之 寇至,城 問 豺

列

傳

第

 \equiv

+

朱

异

祖因其宿志,特有此贈焉。 卒,高祖惜之,方議贈事,左右有善异者,乃啓曰: 「异忝歷雖多,然平生所懷,願得執法。」高 器字弘通,才力優贍,諮謀帷幄,多歷年所。 可贈侍中、尚書右僕射,給秘器一具。 凶事所須,隨由資辦。」舊尚書官不以爲贈,及异 方贊朝經,永申寄任。 奄先物化, 惻悼兼

宅至青溪,其中有臺池翫好,每暇日與賓客遊焉。 百餘篇,亂中多亡逸。 至侍中,四官皆珥貂,自右衞率至領軍,四職並驅鹵簿,近代未之有也。 厨下珍羞腐爛,每月常棄十數車,雖諸子別房亦不分贍。 异居權要三十餘年,善窺人主意曲,能阿諛以承上旨,故特被寵任。 。四方所饋,財貨充積。 所撰禮易講疏及儀注、文集 异及諸子自潮溝 性吝嗇、未嘗有散 歷官自員外常侍 列

長子廟,官至國子博士,次子閏,司徒掾。並遇亂卒。

便通 義理。 **閒則習業,尤精三禮。初,場於鄉里聚徒教授,至是又依琛焉。** 賀琛字國寶,會稽山陰人也。伯父瑒,步兵校尉,爲世碩儒。 陽異之,常曰:「此兒當以明經致貴。」 陽卒後,深家貧,常往還諸暨,販粟以自 踩幼,場授其經業,一聞

通事 悅 舍人,參禮 謂僕射徐勉 中,刺史臨川王辟爲祭酒從事史。〔三〕琛始出都,高祖聞其學術,召見文德殿,與語 儀事。 曰:「踩殊有 累遷通 直 :世業。」仍補王國侍郎,俄兼太學博士,稍遷中衞參軍 正員郎,舍人如故。 叉征 |西鄱陽||王中錄事,兼尚書左丞,滿 事 、尚書

歲爲眞。詔琛撰新諡法,至今施用。

時皇太子議,大功之末,可以冠子嫁女。 踩駮之曰:

之禮 有服 嫁 ? 嫁。 不得 是約 文言已可娶,大功之文不言已冠,故知身有大功,不得自行嘉 得爲子,己身不 一服,每 若 !自嫁 令旨 不 ,本是父之所成,無父之人,乃可自冠,故稱大功小功,並以冠子嫁子爲文;非關 言而 若 自 行 明冠子 父 嘉 見旨。 冠 自冠者, 以「大功之末可得冠子嫁女,不得自冠自嫁。」推以記文,竊猶致惑。 於 禮, 自 嫁 大功之末可 ·得 嫁子,結於後句, 本爲吉凶 若謂 於 也。 則小 事 有礙,則冠子嫁子寧獨可通? 緣父服 小功之末,既得自嫁娶,而亦云「冠子娶婦」,其義益明。 功之末, 不 以冠子 可相 大 (功,子服小功,小 非明父子服殊,不應復 干。 方顯自娶之義。 ,嫁子, 子雖小功之末,可得 是於吉凶 功服 禮 旣明小功自娶,卽 今許其冠子而塞其自冠 無礙 輕,故得爲 云「冠子嫁子」也。 ";吉凶 行冠嫁, 禮 禮 一,但得 子 無 冠嫁,大功服 猶 知大 礙, :為子 應 분 須 (功自 若謂 父 冠 不 ,是琛之所 得 嫁。 得 冠矣,蓋 爲 故先列 案嫁冠 小 自 重,故 功之 其冠 竊謂 冠 惟 自

列

傳

第

惑也。

殤則 明不 期降 服 出嫁 明 服 則 不 此 輕,頓成殺略,故特明不娶,以示本重之恩。 冠 不 而 成 大 小 娶。 ·娶之義者,蓋緣以幼稚之故,夭喪情深,旣無受厚佗姓,又異傳重彼宗,嫌其年稚 《出後,或有再降,出後之身,於本姊妹降爲大功;若是大夫服士父,〔至〕又以尊降, 嫁 、功不可冠子嫁子,則降服小功亦不可自冠自娶,是爲凡厥降服大功小功皆不得冠 大 厚於彼,此服雖降,彼服則隆。 又令旨推「下殤小功不可娶婦,則降服大功亦不得爲子冠嫁」。伏尋此旨,若謂降 不 功。 者, 得 功,大功降爲小功,止是一等,降殺有倫,服末嫁冠,故無有異。 記文應云降服則不可,寧得惟稱下殤? 其義若此,則不得言大功之降服,皆不可冠嫁也。 通於中 · 公 其於冠嫁,義無以異。 記不得直云「下殤小 上,語 小 功則不得 兼於 所以然者,出嫁則有受我,出後則有傳重,並欲薄於 功則不可」。 昔實期親,雖再降猶依小 大 功。 若實· 今不言降服,的舉下殤,實有其義。 恐非文意。 是以凡厥降服,冠嫁不殊;惟在下殤,乃 大小功降服皆 此 且記云「下殤小 又琛之所 功之禮,可冠可嫁。 ·不冠嫁,上中二殤亦 惟下殤之服,特 疑 也。 功, 言下 夫

遂從琛議。

遷員外散騎常侍。 舊尚書南坐,無貂;貂自琛始也。 頃之,遷御史中丞,參禮儀事如

兼國子博士,未拜,改爲通直散騎常侍,領尙 儀,多所創定。 琛家產旣豐,買主第爲宅,爲有司所奏,坐免官。俄復爲尚書左丞,遷給事黃門侍郎, 每見高祖,與語常移晷刻,故省中爲之語曰:「上殿不下有賀雅。」琛容止都 .書左丞,並參禮儀事。 琛前後居職,凡郊廟諸

雅,故時人呼之。 遷散騎常侍,參禮儀如故。

謂謀猷,寧云啓沃。獨緘胸臆,不語妻子。辭無粉飾,削稾則焚。 之子,明君不畜無益之臣」,臣所以當食廢飱,中宵而歎息也。 是時,高祖任職者,皆緣飾姦諂,深害時政,琛逐啓陳事條封奏曰: 如不允合,亮其戆愚。 臣荷拔擢之恩,曾不能効一職,居獻納之任,又不能薦一言。 輒言時事,列之於後。非 脫得聽覽,試加省鑒。 竊聞「慈父不愛無益

治其 之急務。雖是處彫流,而關外彌甚,郡不堪州之控總,縣不堪郡之哀削,更相呼擾,莫得 大邦大縣 不獲已而竄亡,非樂之也。 `政術,惟以應赴徵斂爲事。 百姓不能堪命,各事流移,或依於大姓,或聚於屯封, , 寧非牧守之過。東境戶口空虛, 皆由使命繁數。 夫犬不夜吠, 故民得安居。今 其 一事曰:今北邊稽服,戈甲解息,政是生聚教訓之時,而天下戶口減落,誠當今 ,舟舸銜命者,非惟十數;復窮幽之鄉,極遠之邑,亦皆必至。 每有一使,屬所 國家於關外賦稅蓋微,乃至年常租課,動致逋積,而民失

列

業之詔,屢下蠲賦之恩,而終不得反其居也。 搔 擾 況 縱有 復 煩擾積理,深爲民害。 廉 平,郡猶掣肘。 故邑宰懷印,類無考績,細民棄業,流冗者多,雖年降復 駑困邑宰,則拱手聽其漁獵,桀黠長吏,又因之而爲

消散。 在貪 嚴爲禁制,道之以節儉,貶黜雕飾,糾奏浮華,使衆皆知,變其耳目,改其好惡。 餘淫 貪殘 品制,二八之錫,良待和戌。 止 之產,不周一 月,敬之如 在 俄 ?,罕有: 修,著之凡百 污,爭飾羅綺。 夫食方丈於前,所甘一 而 其 頃。 州郡無恤民之志,故天下顒顒,惟注仰於一人,誠所謂「愛之如父母,仰之如 二事曰:聖主恤隱之心,納隍之念,聞之遐邇,至於翾飛蠕動,猶且度脫,況在兆 蓋 由 廉白者,良由風俗侈靡,使之然也。 鬼神,畏之如雷霆」。 「宴醑 乃 燕之資,而賓主之間,裁取滿腹,未及下堂,已同臭腐。 更追 所費、旣破數家之產;歌謠之具,必俟千金之資。 「習以 很 故爲吏牧民者,競爲剝削,雖致貲巨億,罷 向 成俗,日見滋甚,欲使人守廉隅,吏尚清白 !所取之少,今所費之多。 味。今之燕喜,相競誇豪,積果如 今畜妓之夫,[+] 無有等秩,雖復 苟須應痛逗藥, 豈可不治之哉。今天下宰守所以皆尚 淫奢之弊,其事多端,粗舉二條,言其尤 如復傅翼,增其搏噬, 庶賤微人,皆盛 山岳,列肴同綺繡,露臺 歸 之日,不支數年,便已 一安可 所費 叉歌姬 事 得 了等丘 何悖哉 邪 **儛女,本有** 1 姬姜,務 山、爲歡 夫失節 今誠 宜 其 日

列傳第三十二 賀琛

之嗟,亦民所自患,正恥不及羣,故勉强而爲之,苟力所不至,還受其弊矣。 風 而 E 其 失,易於反掌。 夫論至治者,必以淳素爲先,正彫流之弊,莫有過儉 松朴者 今若釐其 也。

章。 苦, 豈止日昃忘飢, 夜分 今誠願責 雖似於奉公, 國 實道邁百 之大體。云不知當一官,處一職,貴使理其紊亂,匡其不及, 但務吹毛求 其三事日: 王,事超千載。 、其公平之效,黜其讒愚之心,則下安上謐,無徼倖之患矣。 事更成其威 聖躬荷負蒼生以爲任,弘濟四海以爲心,不憚胼胝之勞,不辭癯瘦之 ·疵,擘肌分理,運挈餠之智,徼分外之求,以深刻爲能,以繩逐爲務,迹 7廢寢。 但斗筲之人,藻梲之子,旣得伏奏帷扆,便欲詭競求進,不說 福。 至於百司,莫不奏事,上息責下之嫌,下無逼上之咎,斯 犯罪者多,巧避滋甚,曠官廢職,長弊增姦,實由於此。 心在明恕,[四事乃平

或無 昔應 或 弊則省 多,在今宜 凡京 其 四事 ,或妨民,有所宜除,除之,有所宜減,減之。 其 若積以歲月,斯乃范蠡滅吳之術,管仲霸齊之由。 師 治 事 曰:自征伐北境,帑藏空虚。 而 、署、邸、肆應所爲,或十條宜省其五,或三條宜除其一 少。 息其 雖 、費、事省則養民,費息則財聚,止五 於後應多,即事未須 今天下無事,而猶 ,皆悉減省。 凡厥興造,凡厥費財,有非急者,有 應四 |年之中,尙於無事, 日不暇給者,良有以也。 今應內省 方屯、傳、邸、治、或舊 ;及國容 1職掌, 必能 各檢: 、戎備 使 其 所 夫 國

使也, 聚財 役民 魏氏 異 生聚殷阜,不可得矣。 (境有 和 小事不足害財,則終年不息矣,以小役不足妨民,則終年不止矣。 者,又凡厥討召,凡厥徵求,雖關國計,權其事宜,皆須息費休民。不息費,則無以 ,不休民,則無以聚力。 則難可以語富强而圖遠大矣。 虞,關河 親,疆場無警,若不及於此時大息四民,使之生聚,減省國費,令府庫蓄積,一旦 可掃,則國弊民疲,安能振其遠略?事至方圖,知不及矣。 耗其財而務賦斂繁興,則姦詐盜竊彌生,是弊不息而其民不可 故蓄其財者,所以大用之也;息其民者,所以大役之也。 自普通以來,二十餘年,刑役荐起,民力彫流。 擾其民而欲求

書奏,[10]高祖大怒,召主書於前,口授敕責琛曰:

於關茸,止取名字,宣之行路。 與卿不異,常欲承用,無替懷抱,每苦倥偬,更增惛惑。 正旦虎樽,皆其人也。 「蕩蕩其無人,遂不御乎千里」。或誦老子「知我者希,則我貴矣」。如是獻替,莫不能言, 謇謇有聞 ,殊稱所期。 卿可分別言事,啓乃心,沃朕 但朕有天下四十餘年,公車讜言,見聞聽覽,曰〕所陳之事, 言「我能上事,明言得失,恨朝廷之不能用」。或誦離騷 心 卿珥貂紆 組,博問洽聞,不宜同

觸 向多弊,四聰不開,四明不達,內省責躬,無處逃咎。|堯爲聖主,四凶在朝;况乎脫 卿云「今北邊稽服,政是生聚教訓之時,而民失安居,牧守之過」。股無則哲之知,

迷邦。 已營之,自己食之,何損於天下。無賴子弟,惰營產業,致於貧窶,無可施設,此何益於 通之錢布於天下,以此而治,朕無愧焉。 若以下民飲食過差,亦復不然。 天監之初,思 無翼而飛,能到在所,不威而伏,豈不幸甚。卿旣言之,應有深見,宜陳祕術,不可懷寶 惡人日滋,善人日蔽,欲求安臥,其可得乎!不遣使而得事理,此乃佳事。無足而行, 軍糧,諸所飈急,蓋不獲已而遣之。若不遣使,天下枉直云何綜理?事實云何濟辦? 賢,有如飢渴,廉平掣肘,實爲異事。 宜速條聞,當更擢用。 凡所遣使,多由民訟,或復 手聽其漁獵,桀黠長吏,又因之而爲貪殘」,並何姓名?廉平掣肘,復是何人。朝廷思 事,得以黜陟。 横暴,某太守貪殘,某官長凶虐,尚書、蘭臺,主書、舍人,某人姦猾,某人取與,明言其 也,能無惡人。但大澤之中,有龍有蛇,縱不盡善,不容皆惡。 卿 卿又云「東境戶口空虛,良由使命繁多」,但未知此是何使。卿云「駑困邑宰,則拱 又云:守宰貪殘,皆由滋味過度。貪殘糜費,已如前答。漢文雖愛露臺之產,鄧 其勤力營產,則無不富饒,惰遊緩事,則家業貧窶。 向令舜但聽公車上書,四凶終自不知,堯亦永爲闇主。 動脩產業,以營盤案,自 卿可分明顯出:某刺史

傳第三十二 賀琛

天下。且又意雖曰同富,富有不同:慳而富者,終不能設;奢而富者,於事何損。若使

借,以成其事。 卿之心度我之心,故不能 稔,乃至宮人,亦不食國家之食,積累歲月。 豪芥不關 費,變一瓜爲數十種,食一菜爲數十味,不變瓜菜,亦無多種,以變故多,何損於事,亦 若復減 此 細已甚,欲使吏不呼門,其可得乎。更相恐脅,以求財帛,足長禍萌,無益治道。 朝 指 廷 緩 朝廷,我無此事。昔之牲牢,久不宰殺,朝中會同,荣蔬而已,意粗得奢約之節。 此,必有蟋蟀之譏。若以爲功德事者,皆是園中之所產育。 《其刑,此事終不可斷,若急其制,則曲屋密房之中,云何可知?若家家搜檢,其 國家。 近之得財,頗有方便,民得其利,國得其利,我得其利,營諸功德。 如得財如法而用,此不愧乎人。 得知。 所得財用,暴於天下,不得曲辭辯論 凡所營造,不關材官,及以國匠,皆資 我自除公宴,不食國家之食,多歷年 功德之事,亦無多 若以 或以 雇

追 育民 亦復 噬之用,不能得不重更任,彼亦非爲朝廷爲之傅翼。卿以朝廷爲悖,乃自甘之,當思致 怯 者 恨 必必 不 所 可使守城, 卿 聞家 叉云 取 無成功。 爲 少 女妓越濫,此有司之責,雖然,亦有不同: 有二八,多畜女妓者。 ٠, 如復傅翼,增其搏噬,一何悖哉。」勇怯不同,貪廉各用,勇者可 貪者可使 捍禦,廉者 若使吳起而 不重 此並宜 用, 可使牧民。 則西河之功廢。 具言其人,當令有司振 向使叔齊守於西河、豈能 貴者多畜妓樂,至於勳附若兩掖, 今之文武,亦復 其霜 豪。 如 湾事? 此。 卿又云:「乃 使進取, 取 吳起 其搏

列 傳 第 三 十 二 質 琛

故可得中主。 夜, 與女 存,非爲妄說。 所 身正,不令而行;其身不正,雖令不從」。股絕房室三十餘年,無有淫佚。 悖 一更出 共 所以。 無有定時。 知。 人同 卿 理 又云「百司莫不奏事, 詭競求進」。 屋 卿云「宜導之以節儉」。又云「至治者必以淳素爲先」。此言大善。 事 受生不飲酒,受生不好音聲,所以朝中曲宴,未嘗奏樂,此羣賢之所觀 `,隨事多少,事少或中前得竟,或事多至日昃方得就食。 而 今乃不発居九品之下,「不令而行」,徒虛言耳。 寢,亦三十餘年。 為誰爲之? 疾苦之日, 救物故也。 或亦再食。 至於居處不過一牀之地,雕飾之物不入於宮,此亦人 昔要腹 書曰:「股肱惟 此又是誰 過於十圍, ?何者復是詭 人,良臣惟聖。」 今之瘦削裁二尺餘,舊帶猶 卿今慊言,便罔 事? 日常一食,若晝若 向使股 **朕頗自計,不** 夫子言「其 知 有股肱 見。 所答 朕

猶 也。若斷呈 事 · , 於義可否 ? 二世之委趙高,元后之付王莽。 事 ,誰尸其任。專委之人,云何可得。是故古人云:「專聽生姦,獨任成亂。」 無 人廢職、職可廢乎? 呼鹿爲馬,卒有閻樂望夷之禍,王莽亦終移漢鼎 職廢則人亂,人亂則國安乎? 以咽廢飱,此之謂 今不使外 人呈

「繩逐」,並復是誰?〔三〕又云「治、署、邸、肆」,何者宜除? 卿 云「吹毛求疵」, 何者未須?「四方屯傳」,何者無益?何者妨民?何處興造而是役民?何處 復是何人所吹之疵?「擘肌分理」, 何者宜省?「國容戎備」, 復是何 人乎?事及「深刻」 何

費財

加

五五〇

是非急。若爲「討召」。若爲「徵賦」。朝廷從來無有此事,靜息之方復何者。

宜各出其事,具以奏聞。

欺罔朝廷,**空示頰舌。凡人有爲,先須內省,惟無瑕者,可以戮人。卿不得歷**詆內外, 必能行之。富國强兵之術,急民省役之宜,號令遠近之法,並宜具列。若不具列,則是 民,是何處所。卿云「國弊民疲」,誠如卿言,終須出其事,不得空作漫語。 夫能言之, 息,惟新之美,復見今日。 加 不極言其事。佇聞重奏,當復省覽,曰己付之尚書,班下海內,庶亂羊永除,害馬長 卿云「若不及於時大息其民,事至方圖,知無及也」。如卿此言,卽時便是大役其

踩奉敕,但謝過而已,不敢復有指斥。

闕下,求見僕射王克、領軍朱异,勸開城納賊。 臺 內,留琛與司馬楊曒守東府。 明年,臺城 後遇疾卒,年六十九。 **外之,遷太府卿。** 不守,琛逃歸鄉里。 太清二年,遷雲騎將軍、中軍宣城王長史。侯景舉兵襲京師,王移入 贼尋攻陷城,放兵殺害,琛被槍未至死,
(四)賊求得之, 其年冬, 賊進寇會稽, 復執琛送出都, 以爲金紫光祿大 克等讓之,涕泣而止,賊復譽送莊嚴寺療治

琛所撰三禮講疏、五經滯義及諸儀法,凡百餘篇。

佐君, 苟取容媚。 异、賀琛並起微賤,以經術逢時,致於貴顯,符其言矣。 旣弗加,賞亦斯濫,失於勸沮,何以爲國。君子是以知太淸之亂,能無及是乎。 陳吏部尚書姚察云:夏侯勝有言曰:「士患不明經術;經術明,取青紫如拾地芥耳。」朱 及延寇敗國,實异之由。 禍難旣彰,不明其罪,至於身死, 寵贈猶殊。 而异逐徼寵幸,任事居權,不能以道 罰

校勘記

[一] 父巽以義烈知名 「巽」南史作「巽之」。 按:朱异父名選之,事跡略見南齊書孝義朱謙之傳。 惠

ベニン 敕付尚書詳議 「詳議」,各本作「議詳」,今據南史及册府元龜二一二乙正。

去,非脫文。

刺史臨川王辟爲祭酒從事史 南史及册府元龜七二七、八二八無「史」字。

猶應須父得爲其冠嫁 「冠嫁」各本作「嫁冠」,據南史乙正。

列傳第三十二 校勘記

- (五)若是大夫服士父「父」字各本股,據南史補。
- 上中二殤亦不冠嫁者 「冠嫁」各本作「嫁冠」,據南史乙正。
- フトレ 今畜妓之夫 「畜」各本譌「言」,據通鑑梁武帝大同十一年及册府元龜五二九改。
- 不說國之大體 「說」通鑑作「論」,册府元龜五二九作「識」,疑作「識」是。
- [九] 心在明恕 「在」通鑑作「存」,疑作「存」是。
- (10) 書奏 「書」各本譌「言」,據南史改。
- 公車讜言見聞聽覽 「見聞」南史作「日聞」,通鑑作「日關」,疑作「日關」是。
- 擘肌分理復是何人乎事及深刻繩逐並復是誰 理,復是何事」,無下文「事及深刻繩逐」云云。 本段文字有脫譌,現無從訂正。 通鑑作「擘肌分
- [1]] 佇聞重奏當復省覽 「復」,各本譌「後」,據通鑑改正。
- [四] 琛被槍未至死 「槍」,南史及册府元龜九四○作「創」。
- [三] 子翻 「翻」,南史作「翊」。

梁書卷三十九

列傳第三十三

元法僧 元樹 元願達 王神念 楊華 羊侃 子鵙

羊鴉仁

款,請爲附庸,高祖許焉,授侍中、司空,封始安郡公,邑五千戶。及魏軍旣逼,法僧請還朝, 鋤異己,立諸子爲王,部署將帥,欲議匡復。 爲使持節、都督徐州諸軍事、徐州刺史,鎭彭城。 給甲仗百人,出入禁闥。 金帛,前後不可勝數。 高祖遣中書舍人朱异迎之。 元法僧,魏氏之支屬也。 法僧以在魏之日, 久處疆場之任, 每因寇掠, 殺戮甚多, 求兵自衞, 詔 大通二年,加冠軍將軍。 旣至,甚加優寵。 其始祖道武帝。父鍾葵、江陽王。法僧仕魏、歷光祿大夫、後 旣而魏亂稍定,將討法僧,法僧懼,乃遣使歸 時方事招攜,撫悅降附,賜法僧甲第女樂及 普通五年,魏室大亂,法僧遂據鎭稱帝,誅 中大通元年,轉車騎將軍。 四年,進太

五五三

列傳第三十

≡

元

法

僧

司之儀、郢州刺史。一大同二年,徵爲侍中、太尉,領軍師將軍,薨,時年八十三。二子景隆 尉,領金紫光祿。 其年,立爲東魏主,不行,仍授使持節、散騎常侍、驃騎大將軍、開府同三

景仲,普通中隨法僧入朝。

將軍、平越中郎將、廣州刺史,行至雷首,遇疾卒,時年五十八。 王,不行,俄除侍中、度支尚書。太淸初,又爲使持節、都督廣越交桂等十三州諸軍事、征南 中郎將、廣州刺史。中大通三年,徵侍中、安右將軍。四年,爲征北將軍、徐州刺史,封彭城 景隆封沌陽縣公,邑千戶,出爲持節、都督廣越交桂等十三州諸軍事、平南將軍、平越

之,皆棄甲而散,景仲乃自縊而死。 |先徇其衆曰:「朝廷以元景仲與賊連從,謀危社稷,今使曲江公勃為刺史,鎭撫此州。」衆聞 中,徵侍中、左衞將軍。兄景隆後爲廣州刺史。曰侯景作亂,以景仲元氏之族,遣信誘之, 奉爲主。 景仲封枝江縣公,邑千戶,拜侍中、右衞將軍。」大通三年,增封,并前爲二千戶,仍賜女 出爲持節、都督廣越等十三州諸軍事、宣惠將軍、平越中郎將、廣州刺史。〔1〕大同 景仲乃舉兵,將下應景。 會西江督護陳霸先與成州刺史王懷明等起兵攻之,霸

屬,願奉爲主,詔封貞爲咸陽王,以天子之禮遣還北,會景敗而返。 平之,加散騎常侍、安西將軍,又增邑五百戶。 願來援,遂圍樹 持節、鎭北將軍、都督北討諸軍事,加鼓吹一部。 朝,遷使持節、督郢同霍三州諸軍事、雲麾將軍、郢州刺史,增封并前爲三千戶。 朱榮亂,以天監八年歸國,至封爲鄴王,邑二千戶,拜散騎常侍。 子貞,大同中,求隨魏使崔長謙至鄴葬父,還拜太子舍人。 元樹字君立, [三亦魏之近屬也。 ,城陷被執,發憤卒於魏,時年四十八。 祖獻文帝。父僖,咸陽王。四樹仕魏爲宗正卿,屬介 中大通二年,徵侍中、鎭右將 以伐魏,攻魏譙城,拔之。 太清初, 普通六年,應接元法僧還 侯景降, 請元氏戚 軍。 會魏將獨孤 討南蠻賊, 四年,爲使

如

持節 翊左將軍。 通 中,大軍北伐,攻義陽,願達舉州獻款,印詔封樂平公,邑千戶,賜甲第女樂。 散騎 元願達,亦魏之支庶也。 常侍、都督湘州諸軍 大同三年,卒,時年五十七。 祖明元帝。 事、平南將軍 父樂平王。 ·、湘州刺史。 中大通二年,徵侍中、太中大夫、 願達仕魏爲中書令、郢州刺史。〔六〕普 仍出為使

刺史。 史, (歸款。 王神 皆著治績。 魏軍至,與家屬渡江,封南城縣侯,邑五百戶。 念,太原祁人也。 還除太僕卿。 少好儒術,尤明內典。 出為持節、都督青冀二州諸軍事、信武將軍、青冀二州 仕魏起家州主簿,稍遷潁川太守,遂據郡 頃之,除安成內史,又歷武陽、宣城 內

神念性剛正,所更州郡必禁止淫祠。 時青、冀州東北有石鹿山臨海,先有神廟,妖巫欺

惑百 遘疾卒,時年七十五。 普通 .姓,遠近祈禱,糜費極多,及神念至,便令毀撤,風俗遂改。 中, 大舉北伐, 徵為 韶贈本官、衡州刺 右衞將軍。 史,兼給鼓吹一部。 六年,遷使持節、散騎常侍、爪牙將軍,右衞 諡曰壯。

如故。

神念少善騎射,旣老不 衰, 嘗於高祖 前 手 執二 刀楯, 左右交度, 馳馬往來,冠絕羣伍

時復 有楊華者,能作驚軍騎,並一時妙捷,高祖深歎賞之。 仕至太僕卿。 卒,贈信威將軍、靑冀二州刺史,鼓吹一 部。

次子僧辯,別

有傳。

子尊業,

華懼及禍,乃率其部曲來降。 楊華 武都 仇池 人 也。 父大眼,為魏名將。 胡太后追思之不能已,爲作楊白華歌辭,使宮人晝夜連臂蹋 華少 有勇力, 容貌雄偉, 魏胡 太后 逼通之,

中,侯景亂 足歌之,辭甚悽惋焉。 ,華欲立志節,妻子爲賊所擒,遂降之,卒於賊。 華後累征伐,有戰功,歷官太僕卿, 太子左衞率,封益陽縣侯。

事、大中正。 羊侃字祖忻,泰山梁甫人,漢南陽太守續之裔也。 會薜安都舉彭城降北,規由是陷魏,魏授衞將軍、營州刺史。父社,魏侍中, 祖規, 宋武帝之臨徐州,辟祭酒從

父在 紫光祿 生 、衆遂潰。 | 率衆攻陷岐州,遂寇雍州。 梁州 侃 大夫。 少而瑰偉,身長七尺八寸,雅愛文史,博涉書記,尤好左氏春秋及孫吳兵法。 立 以功遷使持節、征東大將軍、東道行臺,領泰山太守,進爵鉅 功。 魏正光中,稍爲別將。 侃爲 偏將,隸蕭寶夤往討之,潛身巡壍,伺射天生,應弦卽倒, 時秦州羌有莫遮念生者,據州反,稱帝,仍遣其弟天 不侯。 弱冠隨

給糧仗。 弗 將 剋 舉河濟以成先志。 初,其父每有南歸之志,常謂諸子曰:「人生安可久淹異域,汝等可歸奉東朝。」侃至是 仍築十餘城以 魏帝聞之,使授侃驃騎大將軍、司徒、泰山郡公,長爲兗州刺史,侃斬其使者以徇 守之。 兗州 刺史羊敦,侃從兄也,密知之,據州拒侃。 朝廷賞授, 與元法僧 同。 遺羊鴉仁、王弁率軍 侃乃率精兵三萬襲之, 應接,李元履運

列

第

三十

=

王神

念

羊

侃

馬 栅 魏 中 人 大駭 兂 千匹,將 盡 一,南 ,令僕射 入南, 軍 不 進,乃夜潰圍 于暉率衆數十萬, 士卒並竟夜悲歌。 而 出 及高歡、介朱陽都等相繼 且戰且行,一日一 侃乃謝曰:「卿等懷土,理不能見隨,幸適去留,於此 夜乃出魏境。 而 至, 圍侃 至渣 十餘 口,衆 重 一,傷 尚 殺甚 萬餘人,

城 刺 ,(101) 侃 并 會陳 以 大 其 慶之失律,停進。 通三年至京師, 兄 默及三弟忱、 韶授使持節、散騎常侍、都督瑕丘征討諸軍事、安北將軍、徐州 給、元, 其年, 詔 皆拜 以爲持節 為刺 史。「亞專以侃爲都督北討諸 雲麾將軍 一、青冀 二州刺 史。 軍 一事,出 日

别

異。」因

各

1拜辭而

去。

年 吳, 置 稱 卿 日 法 僧 之。」行 願 南 吳滿等,於是郡內肅淸,莫敢犯者。 出 朝 先啓 與 中 爲 人已呼 太 廷今者 大 雲麾將 尉 通 次 云 官竹 $\stackrel{:}{\neg}$ 同 四 臣 要須 行 與 年 軍 爲 - , 詔為: 侃 虜, 、晉安 元樹 卿 有 今與法僧 舊,願 行 目...「臣 使持節 又於譙 、太守。 乃詔 得 拔 、都督 同行 城 閩 同行, 迹還朝,常 以 喪 越 爲 高高 師 瑕丘 俗 大軍 還 好反 祖 頃之,徵太子左衞率 是羣 軍 諸 剖 乃召侃 思 龍, 軍事 亂, 馬。 効 類 入爲 命 前 相 、安北 高 然 問 逐, 後 祖 方 侍 太守 實未 非 謂 將軍 中。 略 侃 止 侃 莫能 曾願 有 一、兗州 日 五 具陳 那 年, 止 與 軍 素 息, 法 進 刺 封 司 心 僧 史,隨太 取 馬 高 侃至討擊,斬其渠帥陳 之計。 亦 同 昌 廢 行。 使 「縣侯, 來 匈 已 湯元 奴 高 北 久 邑千 人 輕 祖 法 |漢 此 雖 因 僧 戶 段 謂 日 北 高 知知 爲 臣 六 卿 祖 爲

遊造。 賢不絕。」六年,遷司徒左長史。八年,遷都官尚書。 三寸,高祖因賜侃馬,令試之。 三十韻以示侃,侃 大同三年,車駕幸樂遊苑,侃預宴。 有宦者張僧胤候侃,侃曰:「我牀非閹人所坐。」竟不前之,時論美其貞正。九年,出 即席應詔,高祖覽曰:「吾聞仁者有勇,今見勇者有仁,可謂鄒、魯遺風,英 侃執矟上馬,左右擊刺,特盡其妙,高祖善之。又製武宴詩 時少府奏新造兩刃稍成,長二丈四尺,四回圍一尺 時尚書令何敬容用事,與之並省,未嘗

侃 勸 不從,侃乃率所領出頓堰上。 太清 元帥貞陽侯乘水攻彭城,不納;旣而魏援大至,侃頻勸乘其遠來可擊,旦日 元年, 徵爲侍中。 會大舉北伐,仍以侃爲持節、冠軍,監作韓山堰事,兩旬堰立。 及衆軍敗,侃結陣徐還。 又勸出戰,

爲使持節、壯武

將軍、衡州

刺史。

都督城 間之。 侃偽稱得射書,云「邵 容豕突,宜急據采石,令邵陵王襲取 議者謂景未敢便逼京師,遂寢其策,令侃率千餘騎頓望國門。 一年,復爲都官尙書。 軍人爭入武庫,自取器甲,所司不能禁,侃命斬數人,方得 內 諸 軍 事。 時景既卒至,百姓競入,公私混亂,無復 陵王、西昌侯已至近路」。衆乃少安。 侯景反,攻陷壓陽,高祖問侃討景之策。 壽春。 景進不得前,退失巢窟,烏合之衆,自然瓦解。」 次第。 賊攻東掖門,縱火甚盛,侃親自 景至新林,追侃 此。 侃乃區 侃曰:「景反迹久見,或 及賊逼城,衆皆恟懼, 分防擬,皆以宗室 入副宣城王

列

傳

第

距抗,以水沃火,火滅,引弓射殺數人,賊乃退。加侍中、軍師將軍。 兩,絹萬匹,以賜戰士,侃辭不受。 部曲千餘人,並私加賞賚。 有韶送金五千兩,銀萬

遂使千餘人出戰,未及交鋒,望風退走,果以爭橋赴水,死者太半。 破賊、若多、則一旦失利、自相騰踐、門隘橋小、必大致挫衂、此乃示弱、非騁王威也。」不從、 車動果倒,衆皆服焉。賊旣頻攻不捷,乃築長圍。朱异、張綰議欲出擊之,高祖以問侃,侃 登城樓車,高十餘丈,欲臨射城內,侃曰:「車高壍虛,彼來必倒,可臥而觀之,不勞設備。」及 曰:「不可。 賊爲· 賊又東西兩面起土山,以臨城,城中震駭,侃命為地道,潛引其土,山不能立。 尖頂木驢攻城,矢石所不能制,侃作雉尾炬,施鐵鏃,以油灌之,擲驢上焚之,俄 賊多日攻城,旣不能下,故立長圍,欲引城中降者耳。今擊之,出人若少,不足 賊又作

陣,終不以爾而生進退。」因引弓射之。 賊處其忠義,亦不之害也。 景遣儀同傅士哲呼侃與 語曰:「侯王遠來問訊天子,何爲閉距,不時進納?尚書國家大臣,宜啓朝廷。」侃曰:「侯將 子,幸汝早能殺之。」數日復持來,侃謂鷹曰:「久以汝爲死,猶復在邪。吾以身許國,誓死行 之下,虜馬飲潤,矢集帝室,豈有人臣而至於此。吾荷國重恩,當禀承廟算,以掃大逆耳,不 軍奔亡之後,歸命國家,重鎭方城,懸相任寄,何所患苦,忽致稱兵。今驅烏合之卒,至王城 初,侃長子隱爲景所獲,執來城下示侃,侃謂曰:「我傾宗報主,猶恨不足,豈復計此一

年,聰 敍,願去戎服,得一 向 正 能妄受浮說,開門揖盜。 .城闕,事君盡節,正若是邪!」士哲無以應,乃曰:「在北之日,久挹風猷,每恨平生,未獲披 欲 面 明叡哲,無幽不照,有何姦佞而得在朝。欲飾其非,寧無詭說。 . 啓至尊,以除姦佞。 相見。」侃爲之免冑,士哲瞻望久之而去。其爲北人所欽慕如 幸謝侯王,早自爲所。」士哲又曰:「侯王事君盡節,不爲朝廷所知, 既居戎旅,故帶甲來朝,何謂作逆。」侃曰:「聖上臨四海將五十 且侯王親舉白刃,以 此。

裏築城,賊不能進。 十二月, 遘疾卒于臺內, 時年五十四。 後 大雨,城內土山崩,賊乘之垂入,苦戰不能禁,侃乃令多擲火,爲火城以斷其路,徐於 詔給東園秘器,布絹各五百匹,

錢三百萬,贈侍中、護軍將軍,鼓吹一部。

跡。 泗橋 侃 少 而 有數石 !雄勇,膂力絕人,所用弓至十餘石。 人,長八尺,大十圍,侃執以相擊,悉皆破碎。 嘗於兗州堯廟蹋壁,直上至五尋,橫行得七

解纜, 對。 陸太喜,著鹿 能 反腰帖地,銜 初 侃 臨波置酒,緣塘傍水,觀者塡咽。 赴 性豪侈,善音律,自造採蓮、掉歌 衡州 角 得席 於兩 爪長七寸。 艖辦起三間 上 一玉簪。 **儛人張淨琬,腰圍一尺六寸,時人咸推能掌中儛。** 敕齊歌人王娥兒,東宮亦齊歌者屈偶之,並妙盡奇曲,一時無 通梁水齋,飾以珠玉,加之錦繢,盛設帷屏,陳列 大同中,魏使陽斐,與侃在北嘗同學,有韶令侃延斐 兩曲,甚有新致。姬妾侍列,窮極奢靡。 又有孫荆玉, 女樂,乘潮 有彈筝人

列

傳

第

≡

+

Ξ

羊

侃

輟。 張孺才者,醉於船中失火,延燒七十餘艘,所燔金帛不可勝數。 同宴。 能飲酒,而好賓客交遊,終日獻酬,同其醉醒。性寬厚,有器局,嘗南還至漣口,置酒,有客 孺才慚懼,自逃匿,侃慰喻使還,待之如舊。第三子鵬。[1] 賓客三百餘人,器皆金玉雜寶,奏三部女樂,至夕,侍婢百餘人,俱執金花燭。 侃聞之,都不挂意,命酒不 侃不

威將| 以 蒙 陵」,景大喜,將依之。 武 東陽太守。 其 太尉僧辯敗,乃還,爲侯瑱所破,於豫章遇害,時年二十八。 東 將 小刀抉船,鵾以稍入刺殺之。 Щ ! 走。 軍 軍 <u></u> - 賜字子鵬。隨侃臺內,城陷,竄於陽平,侯景呼還,待之甚厚。及景敗,鵾密圖之,乃隨 、東晉州刺史。 、青州刺史,封昌國縣公,自己邑二千戶,賜錢五百萬,米五千石,布絹各一千匹,又領 汝但聽我處分。」遂直向京口。至胡豆洲,景覺,大驚,問岸上人,云「郭元建猶 景於松江戰敗,惟餘三舸,下海欲向蒙山。 征陸納,加散騎常侍。平峽中,除西晉州刺史。 承聖三年,西魏圍江陵,鹍赴援不及,從王僧悟征蕭勃於嶺表。日即聞 世祖以鵖爲持節、通直散騎常侍、都督靑冀二 會景倦晝寢,鵾語海師:「此中何處有 破郭元建於 東關,遷使持節、信 一州諸 軍事、明 在廣

諸子所害。

北司 持節 盟 國 恩。 高祖大怒,責之,鴉仁懼,又頓軍於淮上。 州 所留 刺史湛海珍等精兵三萬,趨懸瓠應接景,仍爲都督豫司淮冀殷應西豫等七州諸軍事、司 ,鴉仁乃與趙伯 ,封廣晉縣侯。 州刺史,鎭懸瓠。 豫楚四州諸軍事、輕車將軍、北司州刺史。 社稷 ,以爲五兵尙書。 、都督譙州諸軍事、信威將軍、譙州刺史。 羊鴉仁字孝穆,太山鉅平人也。少驍果有膽力,仕郡爲主簿。 三年,出奔江西,自己其故部曲數百人迎之,將赴江陵,至東莞,爲故北徐州刺史荀伯道 傾危,身不能死,偸生苟免,以至于今。 征伐青、齊間,累有功績,稍遷員外散騎常侍、歷陽太守。 超及南康王會理共攻賊於東府城,反爲賊所敗。 會侯景敗於渦陽,魏軍漸逼,鴉仁恐糧運不繼,遂還北司,上表陳謝, 鴉仁常思奮發,謂所親曰:「吾以凡流,受寵朝廷,竟無報效,以答重 及侯景反,鴉仁率所部入援。 大同七年,除太子左衞率,出爲持節、都督南 若以此終,沒有餘憤。」 侯景降,韶鴉仁督土州刺史桓和之公三仁 臺城陷,鴉仁見景,爲景 普通中,率兄弟自魏歸 | 因遂泣下,見者傷 太清二年,景旣背 中大通四年,爲

國。 法僧之徒入國,並降恩遇,位重任隆,擊鍾鼎食,美矣。 而 羊侃、鴉仁值太清之難,並竭忠奉 侃則臨危不撓,鴉仁守義殞命,可謂志等松筠,心均鐵石,古之殉節,斯其謂乎。 史臣 曰:高祖革命受終,光期寶運,威德所漸,莫不懷來,其皆殉難投身,前後相屬。 元

校勘記

大通三年至平越中郎將廣州刺史 郎將、廣州刺史者乃景隆。至中大通三年,景隆自廣州刺史徵還爲侍中、安右將軍)景仲乃出爲 「大通」上疑脫「中」字。 自普通中至中大通三年,爲平越中

ヘニン 景仲卽繼其兄後爲廣州刺史。 兄景隆後爲廣州刺史 「兄」上疑奪一「繼」字。 景隆於太淸初又爲廣州刺史,行至雷首,病死,

廣州刺史。

〇三〕元樹字君立 魏書咸陽王禧傳作「字秀和」。

[] 又僖咸陽王 「僖」,魏書獻文六王傅作「禧」。

二五 樹仕魏爲宗正卿屬尒朱榮亂以天監八年歸國 宗正卿? 八年降,安得云屬尒朱榮亂?此傳聞之誤。」 尒朱榮起兵在<u>孝昌末、武泰初,於梁當大通元、二年,去天監八年近二十年。</u>樹以天監 張森楷梁書校勘記:「案禧以反誅,諸子安得為

- ハベン 願達仕魏爲中書令郢州刺史 「郢州」,各本誤作「司州」,據本書武帝紀改。
- でやし 普通中大軍北伐攻義陽願達舉州獻款 本書武帝紀:「魏郢州刺史元願達以義陽內附, 置北司

州 事在大通二年四月。「普通」當作「大通」。

- 又歷武陽宣城內史 武陽疑武陵之譌。沅州有武陵郡、梁爲王國。
- **幷其兄默及三弟忱給元皆拜爲刺史** 按:百衲本卷末有會鞏校語:「『悅』南史作『忱』, 未知孰

册府元龜二一五作「悅」。

是宋代所見梁書「忱」本作「悅」。

是。」

- 出頓 日城 「日」字疑爲「呂」字之譌。
- 時少府奏新造兩刃矟成長二丈四尺 「二」字各本脫,據南史及册府元龜八四五補。
- 第三子鵑 爲 鵬」之意,當以作「鯤」爲是。 「鹍」娱景傳作「鯤」,其字或從魚或從鳥。本傳云「字子鵬」,蓋取莊子逍遙遊 然侃長子名驚,則鵾字子鵬亦自可通。 鯤化
- 封昌國 縣公 「公」南史及册府元龜八四七作「侯」。
- 從王 僧 愔 征蕭勃 於嶺表 「勃」各本譌「穀」,據南史梁宗室傳改。
- 至 詔鴉. 仁 督 土州刺史桓和之 「土州」各本譌「士州」、據南史及隋書地 理志改正。
- 出 奔江 西 江 西」各本譌「江陵」,據南史及册府元龜三七二改。

梁書卷四十

列傳第三十四

到漑 劉顯 劉之遴 弟之亨

司馬褧字元素,河內溫人也。 司馬褧 曾祖純之,晉大司農高密敬王。 許然 祖讓之,員外常侍。

變,善三禮,仕齊官至國子博士。

軍。 其學,深相賞好。 少與樂安任昉善,昉亦推重焉。 **褧少傳家業,强力專精,手不釋卷,其禮文所涉書,略皆逼覩。** 天監初,詔通儒治五禮,有司舉、黔治嘉禮,除尚書祠部郎中。 除步兵校尉,兼中書通事舍人。褧學尤精於事數,國家吉凶禮,當世名儒明山賓、 初爲國子生,起家奉朝請,稍遷王府行參 是時創定禮樂,褧所議多 沛國劉瓛爲儒者宗,嘉

賀陽等疑不能斷,皆取決焉。

列

傅

第 \equiv + 四

司 馬 褧 見施行。

累遷正 員郎、鎭南諮議參軍, 兼舍人如故。 遷尙書右丞。 出爲仁威長史、 長沙內史。

還除雲騎將軍,兼御史中丞,頃之卽眞。十六年,出爲宣毅南康王長史、行府國並石頭戍軍 長史,未幾卒。 褧雖居外官,有敕預文德、武德二殿長名問訊,不限日。 王命記室庾肩吾集其文爲十卷,所撰嘉禮儀注一百一十二卷。〔〕〕 十七年,遷明威將軍、晉安王

到溉字茂灌,彭城武原人。曾祖彦之,宋驃騎將軍。祖仲度,驃騎江夏王從事中郎。

父坦,齊中書郎。

常侍,御史中丞,太府卿,都官尚書,郢州長史、江夏太守,加招遠將軍,入爲左民尚書。 會稽太守,以溉爲輕車長史、行府郡事。高祖敕王曰:「到溉非直爲汝行事,足爲汝師, 有進止,每須詢訪。」遭母憂,居喪盡禮,朝廷嘉之。服闋,猶蔬食布衣者累載。除通直散騎 後軍法曹行參軍,歷殿中郎。出爲建安內史,遷中書郎,兼吏部,太子中庶子。湘東王繹爲 溉少孤貧,與弟恰俱聰敏有才學,早爲任昉所知,由是聲名益廣。 起家王國左常侍,轉 間

一侍,自外車服,不事鮮華,冠履十年一易,朝服或至穿補,傳呼清路,示有朝章而已。 溉身長八尺,美風儀,善容止,所莅以清白自脩。性又率儉,不好聲色,虛室單牀,傍無 了之,坐事左遷金紫光祿大夫, 三 俄授散騎常侍、侍中、國子祭酒。

| 概素謹厚,特被高祖賞接,每與對棊,從夕達旦。 溉第山池有奇石,高祖戲與賭之,并

禮記 ,安敢失禮 一部,漑並 l。」<u>高</u>祖大笑,其見親愛如 |輸焉,未進,|高祖謂||朱异曰:「卿謂||到||漑所輸可以送未。]|||溉斂板對曰:「「臣旣 此。

後因疾失明,詔以金紫光祿大夫、散騎常侍,就第養疾。

漑、 友密。 身蔬 臨終,託張 家 世創立,故生平公俸,咸以供焉,略無所取。 治兄弟比之二陸,故世祖贈詩曰:「魏世重雙丁,晉朝稱二陸,何如今兩<u>到</u>,復似凌寒 食,別營小室,朝夕從僧徒禮誦。 溉家門雍睦,兄弟特相友愛。 及臥 、劉勒子孫以薄葬之禮,卒時年七十二。 :疾家園,門可羅雀,三君每歲時常鳴騶枉道,以相存問,置酒叙生平,極歡 初與弟洽常共居一齋,給卒後,便捨爲寺,因斷腥羶,終 高祖每月三置淨饌,恩禮甚篤。 性又不好交游,惟與朱异、劉之遴、張綰同志 韶贈本官。 有集二十卷行於世。 蔣山有延賢寺者,既 而去。 時以

子鏡,字圓照,安西湘東王法曹行參軍,太子舍人,早卒。

假手於蓋 從 高 祖 鏡 幸京口,登北 子蓋,早聰慧,起家著作佐郎,歷太子舍人,宣城王主簿,太子洗馬,尚書殿中 。」因賜溉連珠曰:「研磨墨以騰文,筆飛毫以書信。如飛蛾之赴火,豈焚身之可吝。 顧樓賦詩,蓋受詔 便就,上覽以示戲曰:「盡定是才子,翻恐卿從來文章 郎。

列傳

第

劉顯字嗣芳,沛國相人也。父鬷,晉安內史。

於壁。 其五 令,又除驃騎鄱陽王記室,兼中書舍人,累遷步兵校尉 外 掌著作,撰 好學,博涉多通,任昉嘗得一篇缺簡書,文字零落,歷示諸人,莫能 此 顯 删 兵參 對。」其爲名流推賞 逸篇,防檢周書,果如其說,防因大相賞異。 經史十事,顯對其九。 ,約對其二。 顯 軍,遷尙書儀曹 幼 出 爲 而 國 篇川 聰敏,當世 史,引顯 王記室參 陸倕聞之歎曰:「劉郎 介如此。 爲佐。 號日 郎。 約日: 軍。 一神童。 嘗爲上朝詩,沈約見而美之,時約郊居宅新 九年,始革尚書五都選,顯以本官兼 及約爲太子少傳,乃引爲五官掾,俄兼廷尉 建康平,復入爲尚書儀曹侍郎,兼中書通事 老夫昏忘,不可受策,雖然,聊試數事,不可至十也。」顯 天監初,舉秀才,解褐中軍臨川王行參軍,俄署法曹。 可謂差人,雖吾家平原詣張壯武,王粲謁伯喈, 丁母憂,服闋,尚書令沈約命駕造焉,於坐策 、中書侍郎,舍人如故 吏部郎, 問者,顯云是古文尚書所 成, 正。五 叉除 舍 因 命工 人。 兵尚書傅昭 司 出爲 書 空 臨 人題之 林陵 JII 必 問 顯

顯與河東裴子野、南陽劉之遴、吳郡顧協,連職禁中,

遞相師友,時人莫不慕之。

|顯博

五七〇

月,一字不差,高祖甚嘉焉。 聞 强 記,過於と、顧,時魏人獻古器,有隱起字,無能識者,顯案文讀之,無有滯礙,考校年

寒斂 明壯 誌銘 **今**輒 雲 彼 聰明 優 史、尋陽太守。 士,名豈施於後世。信哉!生有七尺之形,終爲一棺之土。不朽之事,寄之題目,懷珠抱 玉,有歿世 輕 西 而 、特達,出類拔羣。 友人劉之遴啓皇太子曰:「之遴嘗聞,夷、叔、柳惠,不逢仲尼一言,則西山餓夫,東國 上星。 酕。 浮 仕。 重 齒。 曰:「繁弱挺質,空桑吐聲, 遷尙書左丞,除國子博士。 呂掩書墳 厭 議 長空常暗, Щ 而名不稱者,可爲長太息,孰過於斯。 飫 伏願鴻慈,降茲睿藻,榮其枯骴,以慰幽魂。 獄 到海, 旣佐,芸蘭乃握。 典墳,研精名理。 大同九年,王遷鎮郢州,除平西諮議參軍,加戎昭將軍。其年卒,時年六十 還逐東流。 揚歸 陰泉獨湧。 闔棺郢都,歸魂上國, 玄冢。 分器見重,播樂傳名。 營營返 稍彼故塋,流芬相踵。」 摶 爾其戒行,途窮 出爲宣遠岳陽王長史,行府國事,未拜,遷雲麾邵陵王長 鳳 見弗忘,過目 池 魄, 水,推羊 汎 卜宅有日,須鐫墓板。〔□〕之遴已略撰其事行, 汎 ·太學。 虚 則記。 土 竊痛友人沛國劉顯,韞櫝藝文,研精覃奧, 壟。 舟。 誰 白馬 內參禁中,外相 若訪賈逵,如問 弱葛方施,叢柯 其均之? 冒昧塵聞,戰慄無地。」 向 郊,丹旒 美有髦 伯始。 . 日拱。 背 藩 鞏。 士。 岳。 璲柳荑春,禽 野 禮著幼年,業 斜 穎 埃 光 脫 乃蒙令爲 斯 已道,殞 興伏,山 出,學 黜

顯有三子:莠,荏,臻。 臻早著名。

劉之遴字思貞,南陽涅陽人也。父蚪,齊國子博士,論文範先生。

博覽羣籍。 南行參軍,尙書起部郎,延陵令,荆州治中。 爲太學博士。 秀氣,果有異才,後仕必當過僕。」御史中丞樂藹,即之遴舅,憲臺奏彈,皆之遴草焉。 |瞻嘗侯任昉,值之遴在坐,昉謂瞻曰:「此南陽劉之遴,學優未仕,水鏡所宜甄擢。」瞻即 之遴八歲 時劉顯、韋稜並强記,之遴每與討論,咸不能過也。 時張稷新除尚書僕射,託昉爲讓表,昉令之遴代作,操筆立成。 《能屬文,十五舉茂才對策,沈約、任昉見而異之。 太宗臨荆州,仍遷宣惠記室。 起家寧朔主簿。 之遴篤學明審, 昉曰:「荆南 吏部尚書

此 寄居南 故令卿衣錦還鄉,盡榮養之理。」後轉爲西中郎湘東王長史,太守如故。 郎,鴻臚卿,復兼中書舍人。 郡。 還除 郡 丁母憂,服闋,徵秘書監,領步兵校尉。 廨,忽夢前太守袁彖謂曰:「卿後當爲折臂太守, 通直散騎侍郎,兼 中書通事舍人。遷正 出爲征西鄱陽王長史、南郡太守,高祖謂 出爲郢州行事, 員郎,尙書右丞,荆州大中正。累遷中書侍 即居此中。」之遴後果損臂, 之遴意不願出,固辭, 日「卿母年德並高, 初,之遴在 開府,嘗 高祖 逐臨

所奏免。久之,爲太府卿,都官尚書,太常卿。 手敕曰:「朕聞妻子具,孝襄於親,爵祿具,忠襄於君。卿旣內足,理忘奉公之節。」遂爲有司

造」。其第一種,金銀錯鏤古樽二枚,有篆銘云「秦容成侯適楚之歲造」。其第三種,外國澡灌 能 ·知者。又獻古器四種於東宮。其第一種,鏤銅鴟夷榼二枚,兩耳有銀鏤,銘云「建平二年 之遴好古愛奇,在荆州聚古器數十百種。有一器似甌,可容一斛,上有金錯字,時人無

口,銘云「元封二年,龜茲國獻」。其第四種,古製澡盤一枚,銘云「初平二年造」。

十三王、武五子、宣元六王雜在諸傳秩中,古本諸王悉次外戚下,在陳項傳前。又今本韓彭 解音釋義,以助雅詁,而今本無此卷。」 『潍陰毅毅,杖劍周章,邦之傑子,實惟澎、英,化爲侯王,雲起龍驤』。 英盧吳述云『信惟餓隸,布實黥徒,越亦狗盜,芮尹江湖,雲起龍驤,化爲侯王』,古本述云 次,總成三十八卷。又今本外戚在西域後,古本外戚次帝紀下。又今本高五子、文三王、景 班彪事行,而古本云『雅生彪,自有傳』。又今本紀及表、志、列傳不相合爲次,而古本相合爲 班固上」,而今本無上書年月日字。又案古本敍傳號爲中篇,今本稱爲敍傳。又今本敍傳載 校 異同。之遴具異狀十事,其大略曰:「案古本漢書稱『永平十六年五月二十一日己酉,郎 時鄱陽嗣王範得班固所上漢書眞本,獻之東宮,皇太子令之遴與張纘、到溉、陸襄等參 又古本第三十七卷,

於世。 取。 促,機事罕暇,夜分求衣,未遑搜括。 易、尙書、禮記、毛詩並有高祖義疏,惟左氏傳尙闕,之遴乃著春秋大意十科,左氏十科,三 鑣,指歸殊致,詳略紛然,其來舊矣。 昔在弱年,乃經研味,一從遺置,迄將五紀。 **骤同異十科,合三十事以上之。 高祖大悅,詔答之曰:「省所撰春秋義,比事論書,辭微旨** 編年之教,言闡義繁,丘明傳洙泗之風,公羊禀西河之學,鐸椒之解不追,瑕丘 繼踵胡母,仲舒云盛,因循穀梁,四千秋最篤。張蒼之傳左氏,賈誼之襲荀卿,源本分 之遴好屬文,多學古體,與河東裴子野、沛國劉顯常共討論書籍,因爲交好。 |太清二年,侯景亂,之遴避難還鄉,未至,卒於夏口,時年七十二。 前後文集五十卷,行 須待夏景,試取推尋,若溫故可求,別酬所問 也。 兼晚冬晷 之說 無

年五十。 校尉,司農卿。又代兄之遴爲安西湘東王長史、南郡太守。 之亨字嘉會,之遴弟也。少有令名。舉秀才,拜太學博士,稍遷兼中書通事舍人,步兵 荆土至今懷之,不忍斥其名,號爲「大南郡」、「小南郡」云。 在郡有異績。 數年卒於官,時

許懋字昭哲,高陽新城人,魏鎭北將軍尤九世孫。 祖珪、宋給事中、著作郎、桂陽太守。

父勇慧,齊太子家令,冗從僕射。

稱爲儀注之學。

領師說,晚而覆講,座下聽者常數十百人,因撰風雅比興義十五卷,盛行於世。 懋少孤,性至孝,居父憂,執喪過禮。 篤志好學,爲州黨所稱。 十四入太學,受毛詩,且 尤曉故事,

志友善,僕射江而甚推重之,號爲「經史笥」。天監初,吏部尚書范雲舉懋參詳五禮,除征 鄱 而召之,侍講于崇明殿,除太子步兵校尉。永元中,轉散騎侍郎,兼國子博士。 士,草封禪儀,將欲行焉。懋以爲不可,因建議日 陽王諮議,兼著作郎,待詔文德省。時有請封會稽禪國山者,高祖雅好禮,因集儒學之 起家後軍豫章王行參軍,轉法曹,舉茂才,至遷驃騎大將軍儀同中記室。 與司馬褧 文惠太子聞 西 同

梁甫,連延不絕,父沒子繼也。」「尽」若謂「禪奕奕爲盛德者,古義以伏羲、神農、黃帝,是 成 刻 功 也。 相 紀號」。此緯書之曲說,非正經之通義也。依白虎通云,「封者,言附廣也,禪者,言 臣案舜幸岱宗,是爲巡狩,而鄭引孝經鉤命决云「封于泰山,考績柴燎,禪乎梁甫, 傳也」。若以禪授爲義,則禹不應傳啓至桀十七世也,湯又不應傳外丙至紂三十 又禮記云:「三皇禪奕奕,謂盛德也。 五帝禪亭亭,特立獨起於身也。 三王禪

列傳

第

泰山 子,又非獨立之義矣。若謂三王禪梁甫,連延不絕,父沒子繼者,禹封泰山,禪云云, 爲三皇。 周成王封泰山,禪社首,舊書如此,異乎禮說,皆道聽所得,失其本文。假使三王皆封 封泰山 子,義旣矛盾,理必不然。 禪梁甫者,是爲封泰山則有傳世之義,禪梁甫則有揖讓之懷,或欲禪位,或欲傳 若謂五帝禪亭亭,特立獨起於身者,顓頊封泰山,禪云云,帝嚳封泰山,禪云云,堯 ,禪云云,舜封泰山,禪云云,亦不禪亭亭,若合黃帝以爲五帝者,少昊卽黃帝 伏羲封泰山,禪云云,黃帝封泰山,禪亭亭,皆不禪奕奕,而云盛德,則無所寄

| 羲後第十六主,云何得在伏羲前封泰山禪云云? 中刻石。 十二君封禪之事?且燧人以前至周之世,守法未有君臣,人心淳朴,不應金泥玉檢,升 昊、顓頊、高辛、堯、舜、禹、湯、文、武,中間乃有共工,霸有九州,非帝之數,云何得有七 皇、中央、栗陸、驪連、赫胥、尊盧、混沌、昊英、有巢、朱襄、葛天、陰康、無懷、黃帝、少 又七十二君,夷吾所記,此中世數,裁可得二十餘主: 伏羲、神農、 燧人、伏羲、神農三皇結繩而治,書契未作,未應有鐫文告成。 女媧、大庭、栢 且無懷氏,伏

神農與炎帝是一主,而云神農封泰山禪云云,炎帝封泰山禪云云,分爲二人,妄亦甚 夷吾 又曰「惟受命之君然後得封禪。」周成王非受命君,云何而得封泰山禪 社首?

若是聖主,不須封禪,若是凡主,不應封禪。 當是齊桓欲行此事,管仲知其不可,

故舉怪物以屈之也。

禪。 Щ 狩,至于岱宗」,夏南,秋西,冬北,五年一周,若爲封禪,何其數也! 郊祭天地,故小宗伯云「兆五帝於四郊」,此卽月令迎氣之郊也。 地養之,故知 與天地同 「天子祭天地」是也。 因 封禪,乃至太康議猶不定,竟不果行。 使高堂隆撰其禮儀,聞隆沒,歎息曰:「天不欲成吾事,高生捨我亡也。」晉武泰始中欲 士,廣召儒生,皮弁搢紳,射牛行事,獨與霍嬗俱上,旣而子侯暴卒,厥足用傷。 至魏明 地 事地,因名山升中于天,因吉土享帝于郊」。 鄭玄有參 此朝君子,有何功德? 夫封禪者,不出正經,惟左傳說「禹會諸侯於塗山,執玉帛者萬國」,亦不謂爲封 秦始皇登泰山,中坂,風雨暴至,休松樹下,封爲五大夫,而事不遂。漢武帝宗信方 和,大禮 地亦有 、、柴之風,不能推尋正經,專信緯候之書,斯爲謬矣。 與天地同節;和故百物不失,節故祀天祭地。」百物不失者,天生之, ?祈報,是則一年三郊天,三祭地。 又祈穀一,報穀一,禮乃不顯祈報地,推文則有。 不思古道而欲封禪,皆是主好名於上,臣阿旨於下也。 孫皓遣無司空董朝、兼太常周處至陽羨封 燔柴岱宗,即因山之謂矣。故無禮云 周官有員丘方澤者,總爲三事, 舜典有「歲二月東巡 蓋禮云「因天事天, 此爲九郊,亦皆正 樂記云:「大樂 禪 國

列傳

大於時祭。案繫辭云:「易之爲書也,廣大悉備。有天道焉,有地道焉,有人道焉,兼三 惟大禘祀不在此數。大傳云:「王者禘其祖之所自出,以其祖配之。」異於常祭,以故云 而備。至於封禪,非所敢聞。 行雨施,品物流形,大明終始,六位時成。」此則應六年一祭,坤元亦爾。誠敬之道,盡此 才而兩之,故六。六者非佗,三才之道也。」戟彖云:「大哉乾元,萬物資始,乃統天。雲 「雩,禜水旱也」。是爲合郊天地有三,特郊天有九,非常祀又有三。孝經云:「宗祀文 王於明堂,以配上帝。」零祭與明堂雖是祭天,而不在郊,是為天祀有十六,地祭有三, 至,祀于高禖」,亦非常祭。故詩云「克禋克祀,以弗無子」。幷有雩禱,亦非常祭。禮云 至如大旅於南郊者,非常祭也。大宗伯「國有大故則旅上帝」,月令云「仲春玄鳥

同祖嘉納之,因推演懋議,稱制旨以答,請者由是遂停。

儒 陽,應各從其類,今雩祭燔柴,以火祈水,意以爲疑。」懋答曰:「雩祭燔柴,經無其文,良由先 是,有事於明堂,儀注猶云「服衮冕」。人懋駮云:「禮云『大裘而冕,祀昊天上帝亦如之。』良由 天神尊遠,須貴誠質。今泛祭五帝,理不容文。」改服大裘,自此始也。又降敕問:「凡求陰 不思故也。按周宣雲漢之詩曰:『上下奠瘞,靡神不宗。』毛注云:『上祭天,下祭地,奠其 十年,轉太子家令。宋、齊舊儀,郊天祀帝皆用衮冕,至天監七年,懋始請造大裘。至

之證矣。 燔柴者,今明堂之禮,又無其事。 幣,瘞其物。』以此而言,爲旱而祭天地,並有瘞埋之文,不見有燔柴之說。 昔雩壇在南方正陽位,有乖求神;而已移於東,實柴之禮猶未革。 且禮又云『埋少牢以祭時』,時之功是五帝,此又是不 若以祭五帝必應 請停用柴,其牲 用柴

五卷。 諸儒參錄長春義記。 以足疾出爲始平太守,政有能名。 四年, 拜中庶子。 加散騎常侍, 是歲, 卒, 時年六十九。 轉天門太守。 撰述行記四卷, 中大通 三年,皇太子召 有集十

车等物,悉從坎瘞,以符周宣雲漢之說。」詔並從之。

凡諸禮儀,多所刊正。

繁,應對左右,斯蓋嚴、朱之任焉。 |陳 吏部尚書姚察曰:司馬褧儒術博通,到溉文義優敏,顯、懋、之遴强學浹洽,並 而溉、之遴遂至顯貴,亟拾青紫,然非遇時,焉能致此仕 職經 便

校勘記

也。

所撰 嘉 禮儀注一 百一十二卷 「二」當依本書徐勉傳作「六」。

列傳第三十四 校勘記

坐事 左遷金紫光祿大夫 錢大町廿二史考異「金紫光祿大夫似非左遷之官。」按南史作「左遷

光祿大夫」。

闔棺郢都歸魂上國卜宅有日須鐫墓板 「上國卜宅」四字,各本脫, 據册府元龜七九二及通志

補。

因循穀梁 「循」各本作「脩」、據南史改。

轉法曹舉茂才 「舉」字各本脫,據南史補。

万五

C 六] 又禮記云至 父沒子繼也 禮緯也。下文云異乎禮說,可證記爲說之譌矣。」 錢大昕廿二史考異:「按禮記無此段文字。 禮記當作禮說。 禮說者,

ても〕且燧人以前至周之世 「至周」含義不明,疑爲「玄同」之形譌。「玄同」一詞見尧子。

